







ଜଞ୍ଜନେ

# ଆତ୍ମୀ ବିବେକାନନ୍ଦ

ଶ୍ରୀମହେନ୍ଦ୍ର ନାଥ ଦତ୍ତ

ସୁଗାନ୍ଧବର ବାଣୀ ଭବନ  
ପୁସ୍ତକ ବିକ୍ରେତା ଓ ପ୍ରକାଶକ  
୩୦, କର୍ମଘାଟିଆ ଟ୍ରିଟ୍, କଲିକାତା



প্রকাশক—শ্রীজহর লাল বস্তু  
যুগান্তর বাণী ভবন  
৩০, কর্ণওয়ালিস স্ট্রীট, কলিকাতা

প্রথম সংস্করণ, ১৩৩৮

মূল্য দেড় টাকা

প্রিন্টার—শ্রীনিরদ চন্দ্র ঘোষ  
স্বাতি প্রেস  
১৫, রায়বাগান স্ট্রীট, কলিকাতা

## প্রাক-বানী

১৮৯৬ সালে স্বামী বিবেকানন্দ আমেরিকা হইতে লণ্ডনে যান, স্বামী সারদানন্দ অল্প দিন পূর্বেই রেডিং নগরে ষ্টার্ডির বাড়ীতে পৌছিয়াছিলেন ; বর্তমান লেখক এক সপ্তাহ পরে কলিকাতা হইতে লণ্ডনে পৌছেন। স্বামীজীর সহিত জে, জে, গুডউইন নামক একটা ইংরাজ যুবক থাকিতেন, তিনি স্বামীজীর ক্ষিপ্রলিপিকারের কাজ করিতেন।

গুডউইন বাধ নগরের কাছে ফ্রোম নামক গ্রামে বাস করিতেন। তাঁহার বিধবা মাতা ও অবিবাহিতা দুই ভগ্নী ছিলেন। গুডউইন স্বামীজীর নিত্য বশব্দ ও একান্ত সেবক ছিলেন। স্বামীজী যখন যে কথা বলিতেন বা বক্তৃতা দিতেন গুডউইন ক্ষিপ্রলিপিতে তাহা করচা করিয়া রাখিতেন। যে সকল ইংরাজী গ্রন্থ বক্তৃতারূপে স্বামীজীর নামে প্রকাশিত হইয়াছে সে সমস্তই গুডউইনের পরিশ্রমের ফল।

স্বামীজী কলিকাতায় প্রত্যাবর্তন করিলে গুডউইনও সঙ্গে আসেন। তিনি নানা কারণে মাদ্রাজ প্রদেশে চলিয়া গেলেন ; তাঁহার ইচ্ছা ছিল অবসর পাইলে তাঁহার করচা হইতে প্রচলিত লিপি করিয়া স্বামীজীর কথোপকথন ও ভাষণের অপর অংশ প্রকাশ করিবেন। সেই সকল বিষয় প্রচলিত লিপিতে লিখিত হইলে প্রায় সাত খণ্ড গ্রন্থ হইত। নানা কারণে তাহা হয় নাই এবং গুডউইনও মাদ্রাজ প্রদেশে দেহত্যাগ করেন।

মাদ্রাজের আলা সিদ্ধা প্রভৃতি স্বামীজীর কয়েকজন ভক্ত গুডউইনের দ্রব্যাদি ও কাগজ পত্র তাঁহার মাতার নিকট প্রেরণ করেন। বৃদ্ধা স্ত্রীলোক ক্ষিপ্রলিপির কিছু বুঝিতে না পারিয়া সমস্ত নষ্ট করিয়া দেন। এই ব্যাপারের কয়েক বৎসর পরে সিষ্টার নিবেদিতা ইংলণ্ডে যান ;

আমি তাঁহাকে গুডউইনের ঠিকানা দিয়া তাঁহার মাতার সহিত দেখা করিতে অনুরোধ করি। ইচ্ছা ছিল, সেই সমস্ত কাগজপত্র পাওয়া গেলে কোন বিশিষ্ট আমেরিকান ফ্রিপ্রিন্সিপ-কোবিদ দিয়া পুস্তকাকারে প্রকাশ করিব ; একজন আমেরিকান ভক্তও সমস্ত ব্যয়ভার বহন করিতে প্রস্তুত হইয়াছিলেন। নিবেদিতা ইংলণ্ড হইতে ফিরিয়া আসিয়া বলেন যে, গুডউইনের বৃদ্ধা মাতা ও ভগিনীদ্বয় অপর কোন স্থানে চলিয়া গিয়াছেন, তাঁহাদের কোন ঠিকানা পাওয়া যায় না। এইজন্ত গুডউইন লিখিত সমস্ত কাগজপত্র নষ্ট হইয়া যায়। স্বামীজী যখন লণ্ডনে বক্তৃতা দিতেন তখন নার্সের পরিচ্ছদে একটা স্ত্রীলোক আসিয়া স্বামীজীর দিবাভাগের বক্তৃতা সমূহ ফ্রিপ্রিন্সিপে লিখিয়া লইতেন। তিনি আমাদের সহিত কখনও মেশেন নাই বা আমরা কেহ তাঁহার ঠিকানা জানিতাম না ; তাঁহার কাছে স্বামীজীর অনেক বক্তৃতা থাকিতে পারে কিন্তু তাহা পাওয়া দুরাশার বিষয়।

এই সকল কারণে বহু লোকের অনুরোধে আমি এই গ্রন্থ প্রণয়ন করিতে প্রয়াসী হই। আমার যতদূর স্মরণ আছে এবং যাহা নিভুল ও সত্য বলিয়া স্মরণ আছে সেই সকল বিষয় কিঞ্চিৎ আভাষস্বরূপ এই গ্রন্থে প্রদত্ত হইল, ইহাতে আমার নিজের মত বা ভাব কিছুই সন্নিবেশিত হয় নাই। যে সকল বিষয় আমার অস্পষ্ট স্মরণ হইয়াছে তাহার উল্লেখ করিয়াছি এবং পাদটীকায় ব্যাখ্যা স্বরূপ কিঞ্চিৎ দীপিকা করিয়া দিয়াছি। গুডউইনের লিখিত কাগজের সহিত এই গ্রন্থ তুলনা করিলে হিমালয় পর্বতের সহিত বালুকণার যে সম্বন্ধ ইহা তজ্জপ হইবে। তবে কিছু না থাকা অপেক্ষা অল্পমাত্র আভাষ ইঙ্গিতও ভাল সেইজন্ত বৎ সামান্য এই স্থলে লিপিবদ্ধ করা হইল। স্বামীজী উপদেশকালে দেড় ঘণ্টা বা দুই ঘণ্টা অনর্গল বলিয়া যাইতেন এবং অনেক গ্রন্থ উল্লেখ করিয়া

ভাবরাশির সম্পর্ক ও সম্মিলন দেখাইয়া যাইতেন। গুডউইনের করচা ছাড়া অপর কোন স্থানে এই সমস্ত লেখা ছিল না এবং কোন ব্যক্তির পক্ষে সমস্ত বিষয় স্মরণ রাখাও সম্ভব নয়। আমার যে কয়টা বিশিষ্ট বিষয় স্মরণ আছে আমি সেই কয়টা মাত্র দিতেছি।

এই গ্রন্থপাঠে যদি কাহারও কিছু উপকার হয় এবং স্বামীজীর বিষয় কেহ বিশেষভাবে বুঝিতে পারেন তাহা হইলে আমি কৃতার্থ হইব এবং আমার শ্রম সফল জ্ঞান করিব। ঘটনা সংক্ষেপ এবং ত্রুটি বিদ্যুতির জ্ঞাত আমি পাঠকগণের কাছে ক্ষমা প্রার্থনা করিতেছি। এইরূপ সামান্য গ্রন্থপাঠে মহান্ স্বামীজীর বিষয় বিশেষ কিছু বোঝা যায় না তবে আকার ইঙ্গিতে সেই মহান্ ধীশক্তি সম্পন্ন পুরুষের কিঞ্চিৎ আভাষ দিলাম।

এই গ্রন্থ প্রণয়ন কালে শ্রীযুক্ত বসন্তকুমার চট্টোপাধ্যায়, শ্রীযুক্ত প্যারীলাল মুখোপাধ্যায়, শ্রীযুক্ত দ্বিজেন্দ্র নাথ সেন, শ্রীযুক্ত বিধুভূষণ সেন, স্বর্গীয় বলাইচাঁদ মিত্র লিপিকার ও অন্যান্য বিষয়ে সাহায্য করিয়াছিলেন। ব্রহ্মচারী প্রাণেশকুমার ও শ্রীযুক্ত চিরঞ্জীব বলিয়ার অন্যান্য বিষয়ে বিশেষ উপকার করিয়াছিলেন। অপর কয়েকজন উৎসাহী যুবক একান্ত পরিশ্রম করিয়া আমাকে যথেষ্ট সাহায্য করিয়াছেন সেইজন্য আমি প্রত্যেকের নিকট কৃতজ্ঞতা জ্ঞাপন করিতেছি। তাঁহাদের আন্তরিক সাহায্য না পাইলে আমি কখনই এই গ্রন্থ রচনা করিতে পারিতাম না।

৩, গৌর মোহন মুখার্জী ষ্ট্রীট,  
কলিকাতা।  
রাসপূর্ণিমা, ১৩৩৮

শ্রীমহেন্দ্র নাথ দত্ত

## উৎসর্গ

শ্রীমৎ স্বামী বিবেকানন্দের যিনি একান্ত অনুরক্ত সেবক  
ছিলেন, স্বামীজী যাঁহাকে পুত্রের স্থায় স্নেহ করিতেন,  
যাঁহার পরিশ্রমে স্বামীজীর সমস্ত ইংরাজী গ্রন্থ  
লিখিত ও জনসমাজে প্রকাশিত হইয়াছে  
স্বামীজীর সেই পরম প্রীতিভাজন  
জে, জে, গুডউইনের মধুময়  
স্মৃতির উদ্দেশ্যে এই  
গ্রন্থ উৎসর্গীকৃত  
হইল

## প্রকাশকের নিবেদন

এহ গ্রন্থ প্রকাশনা ব্যাপারে আমি অনেক সহৃদয় ব্যক্তির সাহায্য পাইয়াছি। শ্রীযুক্ত আশুতোষ গঙ্গোপাধ্যায়, শ্রীযুক্ত সত্যচরণ দত্ত, ডাঃ অধীরশরণ বসু, শ্রীযুক্ত অক্ষয়কুমার ঘোষ, শ্রীযুক্ত শৈলেন্দ্র নাথ দে, শ্রীযুক্ত উপেন্দ্র নাথ ঘোষ, শ্রীযুক্ত হিরণ চট্টোপাধ্যায় প্রভৃতি ভদ্রমহোদয়গণ অর্থ সাহায্য না করিলে ইহা প্রকাশ করা আমার পক্ষে সম্ভব হইত না। সেইজন্য আমি তাঁহাদের প্রতি আন্তরিক কৃতজ্ঞতা জ্ঞাপন করিতেছি।

শ্রীজহরলাল বস্তু

## সমর্পণ

এই গ্রন্থ বিক্রয় করিয়া যাহা উপস্বত্ব হইবে তাহা স্বামী  
বিবেকানন্দের নামে কোন বিদ্যা-প্রতিষ্ঠান স্থাপনকল্পে  
নিয়োজিত হইবে। ইহাতে আমার কোন স্বত্ব রহিল না।

কলিকাতা  
৮ই অগ্রহায়ণ, ১৩৩৮ }

শ্রীমহেন্দ্রনাথ দত্ত



স্বামী বিবেকানন্দ





লগনে

## স্বামী বিবেকানন্দ

এক

১৮৯৬ সালে মার্চের শেষ বা এপ্রিল মাসের প্রথমে বি, আই, এস,

সারদানন্দ স্বামী  
লগুন যাওয়া।

এন, কোম্পানীর রিউয়া জাহাজে করিয়া সারদানন্দ

স্বামী লগুন নগরে যান। পূর্বেই ই, এফ, ষ্টার্ডিকে

চিঠি পত্র লেখা ছিল। সারদানন্দ স্বামী পৌঁছিলে

ষ্টার্ডি তাঁহাকে সসম্মানে রেডিং নগরে আপন ভবনে লইয়া গেলেন

এবং উভয়ে একত্র বস করিতে লাগিলেন। ষ্টার্ডি পূর্বে থিওজফিক

সম্প্রদায়ভুক্ত ছিলেন এবং ভারতবর্ষে আসিয়া আলমরায় যোগ অভ্যাস

করিবার নিমিত্ত একটা বাড়ী ভাড়া লইয়া কিছু দিন বাস করিয়াছিলেন।

আলমরায় অবস্থান কালে শিবানন্দ স্বামীর সহিত ষ্টার্ডির বেশ বন্ধুত্ব হয়

এবং উভয়ে একসঙ্গে মাদ্রাজ যান। যাহা হউক, ষ্টার্ডির সহিত

স্বামীজীর আমেরিকা হইতে পত্র ব্যবহার চলিতে লাগিল এবং ষ্টার্ডির

অনুরোধে তিনি আমেরিকা হইতে ইংলণ্ডে আসিয়া বক্তৃতা করিতে

মনস্থ করিলেন।

১৮৯৪ বা ১৮৯৫ সালে স্বামীজী একবার ইংলণ্ডে গিয়াছিলেন।

আমেরিকায় অনবরত বক্তৃতা করিয়া ক্লাস্ত ও শ্রান্ত হইয়া কিছু দিনের জন্ত

বিশ্রাম করিবার ইচ্ছা করিয়া তিনি ইংলণ্ডে আসিয়াছিলেন। চুই এক

লণ্ডনে বিবেকানন্দ

মাস পরে আবার আমেরিকায় চলিয়া যান। ১৮৯৬ সালের এপ্রিল বা মে মাসে তিনি আমেরিকা হইতে ইংলণ্ডে আসিয়া রেডিং নগরে ষ্টার্ডিক্স বাড়ীতে কিছুদিন অবস্থান করিতে লাগিলেন।

স্বামী সারদানন্দ কলিকাতা ত্যাগ করিবার সপ্তাহ পরে বর্তমান লেখক অধ্যয়ন করিবার জন্ত লণ্ডনে যান এবং আইন পড়িতে স্বামীজী নিষেধ করায় তিনি অত্র বিষয় অধ্যয়ন করিতে আরম্ভ করেন। স্বামীজী “বাচস্পত্যম্ অভিধানম্” গ্রন্থ পাঠাইয়াছিলেন, সেইজন্ত বর্তমান লেখক লণ্ডন যাত্রাকালে আপনার সহিত স্বামীজীর জন্ত একটি বাগ্জ করিয়া “বাচস্পত্যম্ অভিধানম্” লইয়া যান।

স্বামীজী আমেরিকা হইতে প্রত্যাবর্তন করিয়া রেডিং নগরে ষ্টার্ডিক্স বাড়ীতে অবস্থান করিতে লাগিলেন। স্বামী সারদানন্দ সেই সময় ষ্টার্ডিক্স বাড়ীতে কয়েক দিন পূর্ব হইতেই বাস করিতেছিলেন। কৃষ্ণ-মেনন্ নামক জনৈক মাদ্রাজী যুবক একদিন আসিয়া বর্তমান লেখককে বলিলেন, “ষ্টার্ডি লেডী মাগু’সনের সজ্জিত বাড়ী ভাড়া করিবেন, লেডি মাগু’সন (Lady Murgusan) তাঁহার সন্তানাদি লইয়া কয়েক মাস অত্র বাস করিতে মনস্থ করিয়াছেন।”

সজ্জিত বাড়ীর অর্থ—যে বাড়ীতে রন্ধনের তৈজসাদি, পড়িবার পুস্তকাদি, আসবাব সজ্জা ইত্যাদি যাহা কিছু ভদ্রলোকের আবশ্যক হইতে পারে, সে সমস্তই পাওয়া যাইবে, শুধু নিজের পরিধেয় বস্ত্র লইয়া প্রবেশ করিতে হইবে। স্বামীজী, সারদানন্দ স্বামী, বৃদ্ধা মিস্ হেনরিয়াটা মূলার ও জে, জে, গুডউইন সকলে গিয়া লেডী মাগু’সনের বাড়ীতে বাস করিতে লাগিলেন; বর্তমান লেখক তখন একটু দূরে অপর পল্লীর একটি বাড়ীতে বাস করিতেছিলেন। কৃষ্ণমেনন্ আসিয়া তাঁহাকে ৫৭ নং সেন্ট জর্জ্জ ষ্ট্রীটের বাড়ীতে লইয়া গেলেন। স্বামীজী আহ্লাদ করিয়া বর্তমান লেখককে

একটি কলম দিলেন। এই কলমটী স্বামীজীকে আমেরিকায় উপহার-স্বরূপ একজন দিয়াছিলেন। আঙুটীতে যে রকম সাদা ডোরা কাটা নীল পাথর থাকে, সেই রকম পাথরের হাতল এবং নিব ও নিব বসাইবার স্থানটি সোণার। কলমটী খুব মূল্যবান ছিল। বর্তমান লেখক সেই কলমটী তাঁহার ছোটভাইকে (বর্তমানে ডাঃ ভূপেন্দ্রনাথ দত্ত এম, এ, পি, এইচ, ডি) ডাকযোগে পাঠাইয়া দেন, কিন্তু ছুর্ভাগ্যবশতঃ ডাকওয়ালাদের হাত হইতে তাহা আর পাওয়া যায় নাই।

বর্তমান লেখক তখন অল্পদিন মাত্র লগুনে গিয়াছেন। বিস্তৃত সহর, স্বতন্ত্র আচার-ব্যবহার, স্বতন্ত্র ভাবগতিক। বিদেশের এই সমস্ত ব্যাপার দেখিয়া বর্তমান লেখক একটু আশ্চর্য্যান্বিত হইয়া একদিন পদচারণ করিতে করিতে Cheap-side চীপসাইড নামক পল্লীর দিকে যান। কলিকাতায় যেমন বড় বাজার কারবারের প্রধান স্থান লগুনের চীপসাইড এবং তন্নিকটস্থ স্থানগুলিও সেইরূপ কারবারের কেন্দ্রস্বরূপ। অতিশয় জনাকীর্ণ। জনতা এত অধিক যে ধীরে ধীরে পদবিক্ষেপ করিয়া অগ্রসর হইতে হয়। যাওয়া আসার জন্ত সর্বদাই যেন লোকসমূহ চাপ্-জমাট হইয়া দাঁড়াইয়া রহিয়াছে। এমন কি রাস্তা বা রোড হইলে ছাতা খুলিবার উপায় নাই, তাহা হইলে ছাতাটা অপরের মাথায় লাগিয়া যাইবে এবং ছাতা খুলিবারও আদৌ স্থান নাই। কলিকাতায় মেলা বা উৎসব উপলক্ষে কখনও কখনও যে রূপ লোকসমাগম হইয়া থাকে, এই সিটি অব লগুনে বেলা ১০টা থেকে ৫টা পর্যন্ত ঠিক সেই ভাবের লোক সংবদ্ধ হইয়া থাকে। মোটকথা, যদি জনসমূহের মাথার উপর একখানি তক্তা ফেলিয়া দেওয়া যায়, তাহা হইলে বোধ হয় তাহার উপর দিয়া কয়েক মাইল পরিভ্রমণ করা যাইতে পারে। এই সিটি অব লগুন সমস্ত পৃথিবীর কারবারটী নিজের হস্তে রাখিয়াছে ও চালাইতেছে।

## লগুনে বিবেকানন্দ

স্বামীজী, সারদানন্দ স্বামী ও গুডউইন তিনজন চীপসাইডের একটা চৌমাথার কোণে দাঁড়াইয়াছিলেন। বর্তমান লেখকও মহা-জনতা দেখিয়া, অবাক হইয়া একদিকে দাঁড়াইয়া আছেন। গুডউইন স্বামীজীর সহিত বর্তমান লেখকের সাক্ষাৎ। অপরিচিত সাধারণ ইংরেজের তায় একজন হইয়া গিয়াছেন। সারদানন্দ স্বামীকে চিনিতে পারা গেল, কিন্তু স্বামীজীকে বহু বৎসরের পর দেখিয়া বর্তমান লেখকের চিনিতে একটু বিলম্ব হইল। ইহার একটা বিশেষ কারণ এই যে, কলিকাতা বা বাংলাদেশে যে নরেন্দ্রনাথ ছিলেন, সে লোক আর তখন নয়, তিনি স্বতন্ত্র এক ব্যক্তি হইয়াছেন। গায়ের বর্ণ অনেকটা উজ্জ্বল বা যাহাকে ইংরাজিতে Fairbrown colour বলা যায়, শুধু white নয় : মাথায় যদিও অর্ধচন্দ্রাকৃতি লক্ষ্মীর তাজের মতন কালো মোটা কাপড়ের টুপি ছিল, কিন্তু মাথার সম্মুখেতে সিঁথি-কাটা দেখা যাইতেছিল : পরিধানে কালো রংএর ইজের, কালো রংএর ভেট্‌ এবং গলায় কলার ছিল, কিন্তু টাই ছিল না। চক্ষুদ্বয় সুদীর্ঘ ও প্রশস্ত, চক্ষুর পাতার নিম্নস্থল স্ফীত এবং অক্ষিপুট সাধারণ লোকের অপেক্ষা কিঞ্চিৎ পরিমাণে সুদীর্ঘ ও বিস্তারিত এবং নেত্র হইতে মহাতেজ ও আকর্ষণী-শক্তি বাহির হইতেছে। চক্ষুদ্বয় স্বতন্ত্র ভাবে পরিবর্তিত ও পরিবর্তিত হইয়াছে। কণ্ঠ-স্বর অতিশয় গম্ভীর ও তেজঃপূর্ণ এবং শব্দশ্রোত বহুদূরগামী ! অকস্মাৎ এভাবে দেখিয়া বর্তমান লেখকের একটু ইতস্ততঃ ভাব হইয়াছিল, এবং সেইজন্ত চিনিতে একটু বিলম্বও হইয়াছিল। যাহা হউক, কথাবার্তা কহিয়া সকলেই প্রস্থান করিলেন।

বর্তমান লেখক পর দিন মেননের সহিত সেন্ট জর্জ্‌ স্ট্রীটের বাটীতে যান। দেশের পাঁচটা কথা কহিয়া, স্বামীজী বর্তমান লেখককে অপর একটা ঘরে লইয়া যান। ঘরটাতে যখন অপর কেহ রহিল না, তখন

স্বামীজী বর্তমান লেখকের মনের কি ভাব হইতেছিল এবং কয়েক দিন ধরিয়া কি চিন্তা করিয়া ছিলেন, সমস্ত পড়া পুঁথির ছায় বলিয়া যাইতে লাগিলেন—কোন ভাবিয়া চিন্তিয়া নয়, স্বাভাবিক ভাবে বলিতে লাগিলেন, এবং প্রত্যেক কথাগুলি সত্য হইয়াছিল। তাহার পরেই পুনরায় নীচেকার বৈঠকখানা ঘরটিতে আসিয়া স্বামীজী বর্তমান লেখককে পুনরায় পূর্বতন বাঙ্গলা দেশের নরেন্দ্র নাথ হইয়া বেশ হাসি তামাসার ভাবে কথাবার্তা কহিতে লাগিলেন এবং সোণার কলমটা দিলেন। যাহা হউক, স্পষ্ট বোঝা গেল যে পূর্বতন নরেন্দ্রনাথ আর নয়, পূর্বদেহে বিবেকানন্দ নামক এক মহাশক্তি প্রবেশ করিয়াছে। এক দেহের ভিতর কখন বা কলিকাতার নরেন্দ্রনাথ বাস করেন কখন বা বিশ্ববিজয়ী বিবেকানন্দ বাস করেন। ভাবভঙ্গী, আচার-ব্যবহার, হাত-নাড়া, আঙ্গুল-নাড়া স্বতন্ত্র হইয়া গিয়াছে। কোন কিছু ভাব প্রকাশ করিতে হইলে, বাম হস্তের এটা অঙ্গুলি কৃষ্ণভ বা বিক্ষিপ্ত করিয়া ভাব প্রকাশ করিতে লাগিলেন, ডান হাত তত সঞ্চালন করিতে লাগিলেন না। কিন্তু প্রত্যেক হস্তসঞ্চালনে বা শিরঃসঞ্চালনে স্পষ্ট, নির্দিষ্ট ও নির্দ্বারিত ভাব প্রকাশ করিতে লাগিলেন। ঠা বা না যাহাই হউক না কেন, ভাবগুলি কিন্তু দ্বিধাশূন্য, যেন স্বতন্ত্র লোক, পূর্বে কখনও এভাবে তাঁহার ভিতর দেখা যায় নাই। শুধু ইচ্ছা করিলে পূর্বের অবস্থায় নামিতে পারেন এবং পূর্ব অবস্থার স্মৃতি ও ভাবভঙ্গী একটু কষ্ট করিয়া আনিতে পারেন। কিন্তু স্বাভাবিক অবস্থায়ও সব সময় যেন আজ্ঞাদাতা মহাশক্তিমান পুরুষ, সমস্ত কথাগুলি যেন hushing, commanding voice (দ্বন্দ্বাতীত, আজ্ঞাপ্রদ গম্ভীর স্বর)।

স্বামীজী বর্তমান লেখককে নিজের পকেট হইতে ৫ পাউণ্ড দিয়া দিলেন এবং কৃষ্ণমেননকে সঙ্গে করিয়া পাঠাইয়া দিলেন, পথে যাইতে যাইতে কৃষ্ণমেননের সঙ্গে কথা হইতে লাগিল। কৃষ্ণমেনন বলিতে

## লগনে বিবেকানন্দ

লাগিলেন, “মাদ্রাজের যে স্বামীজীকে দেখিয়াছি তিনি এব্যক্তি নন, এবং যাহার আমি তামাক সাজিতাম এবং যিনি আমার সঙ্গে হাসি তামাসা করিতেন তিনিও এব্যক্তি নন ; ইহাঁর ভিতর এখন অনেক শক্তি জাগ্রত হইয়া উঠিয়াছে, এখন যেন সম্মুখে বাইতে বা কথা কহিতে ভয় করে । ইচ্ছা করিয়া নিজে নিয়ন্তরে আসিয়া কথা না কহিলে অপরের কথা কহিতে সাহস হয় না । এক্ষণে যৌগিক শক্তি নানা প্রকার বর্দ্ধিত হইয়াছে,”—এরূপ বলিতে বলিতে মেননের কাফি খাইতে ইচ্ছা হইল, এবং দুজনে একটি প্রথম শ্রেণীর কাফির দোকানে প্রবেশ করিলেন ।

ভারতবাসীরা বিদেশের বাহা কিছু গল্প পান, অধিকাংশ স্থলে কাটা-ছাঁটা শুদ্ধ কয়েকটি ভাবমাত্র, কিন্তু সেখানকার আচার-ব্যবহার, রীতিনীতি প্রভৃতি অনেকের জানিতে কৌতুহল হইয়া থাকে । এস্থলে যদিও ঐশ্বর্য্যচ্যুতি গল্পগুলি অপ্রাসঙ্গিক, কিন্তু মাঝে মাঝে হাসি তামাসা না দিলে পাঠকের হইতে পারে এই জন্ত মাঝে মাঝে নানা রকম উপাখ্যান প্রদত্ত হইল ।

ভিক্টোরিয়া ষ্টেশনের সন্নিকটে একটি প্রথম শ্রেণীর কাফি হাউস বা চাঁর দোকান ছিল । বসন্ত বা গরমের প্রারম্ভ, এইজন্ত রাস্তার ধারের দোকান গুলিতে Oyster (কাঁকড়া) গলদা চিংড়ি ও কুঁচো চিংড়ি বিক্রয়ার্থ রহিয়াছে । Oyster আমাদের বাংলা দেশে কিছুক যে রকম লম্বা লম্বা হয় সে প্রকার নয় । যেরূপ পুরীধামে সমুদ্রে এক ইঞ্চি পরিমাণ গোল গোল কিছুক হয়, ইহা সেই জাতীয় । Oysterএর খোসার মাঝখানে সাদাতে-হলুদেতে মিশানো হড়হড়ে নালের মত এক প্রকার শাস হয়, সেই হড়হড়ে নালের শাঁসটা চামচে দিয়া স্করৎ স্করৎ করিয়া খাইতে থাকে কিন্তু ইহা শুনিয়া এতদেশীয় লোকের ঘৃণা হইবে । ইংলণ্ডবাসীরা এই Oysterকে পরম উপাদেয় বলিয়া গণ্য করে । আমাদের দেশে যেমন ছোট ছোট গুলি, ইংরাজ দেশে সেইরূপ ছোট ছোট গুলি

হয়। এসব গুগলিকে সিদ্ধ করিয়া বাজারে বিক্রয় করে, ৮।১০ দিনের পুরাতন বা বাসিও হইতে পারে। এইগুলি একটা চীনে মাটির প্লেটে রাখিয়া একটা পিন দিয়া ভিতরকার সিদ্ধ শাঁসটি বাঁধিয়া বাহির করিয়া খায়। স্ত্রীলোকেরা অনেক সময় মাথার পিন দিয়া ভিতরকার শক্ত শাঁসটা বাহির করিয়া খাইয়া থাকে তবে বাংলা দেশে যে রূপ গুগলির ঝোল খায়, সে রূপ সেখানে হয় না।

যদি হুগলির কোন লোক লগুনে গিয়া গুগলির ব্যবসা করে তাহলে বেশ ব্যবসা চলিবে। কুঁচো-চিংড়ি, (prawn)—বাংলাদেশে কুঁচো-চিংড়ি যেমন সাদাপানা দেখিতে, ইহা সেইরূপ নয়। prawnগুলো একটু পান্সুটে রঙের মোটা মোটা, সিদ্ধ করিয়া বাজারে বিক্রয় হয়। খাইবার সময় দুইহাতে খোসা ছাড়াইয়া খাইতে হয়, ইচ্ছা করিলে বা একটু গন্ধ হইলে ভিনিগার সংযোগ করিলে দোষ কাটিয়া যায়। এদেশের কঁকড়া বাংলাদেশের কঁকড়ার মত নয়। ৬পূরীধামে সমুদ্রের ধারে মাঝে মাঝে যে রূপ কঁকড়া দেখিতে পাওয়া যায়, অর্থাৎ মাঝারি রকমের কচ্ছপের মত, তবে গোল নয় বর্তুলাকার, অর্থাৎ ডান্ধার-বাঁধার কিছু লম্বা এবং অপর দুই দিকটা কিঞ্চিৎ চ্যাপটা হয়। এই কঁকড়া সিদ্ধ হইয়া বিক্রয় হইয়া থাকে। সমুদ্রের কঁকড়া, এই জন্ত ইহার দাড়াগুলো মোটা মোটা, বোধহয় এই দাড়া দিয়া যদি সে একবার ধরিতে পারে তাহলে মানুষের হাতের হাড় কাটিতে না পারিলেও, জখম করিতে পারিবে। সিদ্ধ অবস্থায় ভাজিয়া লইয়া কাঁটা বা চামচা দিয়া ভিতরকার শাঁসগুলি বাহির করিয়া খাইতে থাকে, আবশ্যক হইলে ভিনিগার সংযোগ করে।

গল্‌দা চিংড়ি (Lobster)—ইহা বাংলাদেশের চিংড়ির ২।৩টার সমান। গল্পেতে যে টেকি চিংড়ির কথা আছে, এ বোধ হচ্ছে সেই টেকি চিংড়ির প্রপৌত্র। বাংলাদেশে গল্‌দা চিংড়ির দাড়া নেলুথালে, সন্ধ্যা-সন্ধ্য,



## লণ্ডনে বিবেকানন্দ

কিন্তু সমুদ্রের গলদ চিংড়ির দাড়া কাঁকড়ার দাড়ার মত। ৬পুত্রীতে একবার এই প্রকার গলদ চিংড়ি দেখা গিয়াছিল। দাড়ার ভাঙ্গিয়া লইয়া তাহাতে ভিনিগার ও স্নুন দিয়া ছোট চামচে করিয়া কুরিয়া কুরিয়া খায়। গলদ চিংড়িটা খোসা শুদ্ধ ২।৩ ইঞ্চি, কাটিয়া কাটিয়া তাহা খাইতে হয়, কারণ পূর্ব হইতে ইহা সিদ্ধ করা থাকে। ইংরাজেরা মাছের মুড়ো খায় না, ফেলিয়া দেয়, এবং মাছের ডিম বাহা বাংলাদেশে এত আদর করিয়া খাইয়া থাকে, ইহার তাহা ঘৃণা করিয়া খায় না। মাছের ডিম (Fishroe) এরা অজ্ঞানেতে খাইলেও বমি করিয়া ফেলে, ইহার উপর তাহাদের বড় বিতৃষ্ণা আছে। কিন্তু প্রকৃতপক্ষে মাছের ডিম বেশ সুস্বাদু, বাংলাদেশের মাছের ডিমের চেয়ে কোন পক্ষে নূন নয়। কিন্তু অপর জাতের আহার পদ্ধতি লইয়া কোন দোষ গুণ বিচার করা উচিত নয়, কথ্যে বলে ‘আপ্‌ রুচি খানা’—এই হ’লো মোটামুটি মাছের কথাবার্তা।

তবে কাফি খাবার কথাবার্তা একটু বলা আবশ্যক। সদর দোরে, কাকি হাউস ও প্রস্তুত প্রণালী। ঢুকিয়াই সম্মুখে এক সিঁড়ি, দেওয়ালের দুই পার্শ্ব বড় বড় আর্শি দিয়া মোড়া, সিঁড়িতে নরম গালিচা, তার উপর মথমল পাতা। ভারতবর্ষের লোক

এমন গালিচাতে কখনও শুইতে বা বসিতে পায় না। তাহার উপর জুতা পায়ে দিয়া উঠিয়া উপরে কফির ঘরটিতে গিয়া বসিতে হয়। মেঝের উপর গালিচাখানি, ইঞ্চি-কতক পুরু, পা দিলেই ইস্পিরিঙ্গের মত বসিয়া যায়, আবার লাফাইয়া উঠে, তাহার উপর মথমল মোড়া ইস্পিরিং-এর চেয়ার, সম্মুখে একটা করিয়া মার্কেল পাথরের টেবিল, টেবিলের খুরা-গুলি মেহগনি কাঠের নানা ফুলকাটা ও নক্সাকরা এবং ঝকঝকে পালিস করা। দুইজন ভারতীয় লোক সেই চেয়ারে বসিলেন, নূতন বলিয়া সব

জিনিস আশ্চর্য্য হইয়া দেখিতে লাগিলেন। অবশ্য কিছুকাল থাকিলে এসব জিনিস অভ্যস্ত হইয়া যায় তখন আর কোন বিস্ময় থাকে না এবং কয়েক বৎসর পর নিজের দেশে আসিলে নিজের দেশের জিনিস প্রথম দিনকতক নূতন নূতন বলিয়া বোধ হয়। ইহাই মনের স্বাভাবিক গতি, হাত্ত করিবার কিছুই নাই। ঘরের তৈজসাদি সব রূপার, প্রথম শ্রেণীর, কাফি হোটেল—এই জন্তু অপর কোন নিকৃষ্ট পাতু ব্যবহৃত হয় না।

ছোট একটা ডিমের ঝায় ছোট বাটীতে করে চিকরি মিশান কাফি দিলে, সঙ্গে ফুল-কাটা একটু করিয়া মাখন, ছোট একখানি Roll বা মচমেচে পাউরুটি—মেনান মাদ্রাজী, কাফি খাওয়ার জাত, তার ঠোঁট ভিজিল না, গজগজ করিয়া বকিতে লাগিল। দাম চাহিল প্রত্যেকের ৫ শিলিং করিয়া ১০ শিলিং—তখন ১৯৥ টাকা পাউণ্ড, ১০ শিলিং অর্থাৎ ১০৮ টাকা—এইত মেনান চটিয়া গেল। বর্তমান লেখক বলিলেন, “ওহে বাবু চট কেন, কালা আদমি, ঘরে ঢুকতে দিয়েছে এই যথেষ্ট, ঘরটার ব্যাপার কি দেখে যাচ্ছ এই জন্তু আক্কেল সেলামি দিলে,” এই বলিয়া হাসি তামাসাতে উভয়ে চলিয়া আসিলেন :

লগুনে অনেক ইংরেজ পরিবার প্রাতঃভোজনের সহিত কাফি খাইয়া থাকে এবং অপরাহ্নে চা পান করিয়া থাকে এই জন্তু নানা দেশে কি করিয়া কাফি প্রস্তুত করিয়া থাকে সংক্ষেপে তাহার কিছু বর্ণনা করা যাইতেছে। ইংরাজ রমণীরা কাফির জলটা বেশ গরম করিয়া থাকে এবং তাহাতে গুঁড়ো কাফি দিয়া অল্প পরিমাণে ফুটায়, ও তাহার পর দুধ চিনি মিশাইয়া জলটা ছাঁকিয়া বড় বড় বাটি করিয়া কাফি খায়, ইহাকেই ইংরাজি কাফি বলে। রান্নার কার্য্যে মেয়েরা সিদ্ধহস্ত। কাফির ভিতর একটা তেল আছে, সেটা বেরুলে সুগন্ধ হয়, জলটা কত গরম হইবে, কি পরিমাণে কাফির গুঁড়ো দিতে হইবে এবং কতক্ষণ গরম জলে কাফি

লগনে বিবেকানন্দ

স্নানান্তে হইবে, এই কার্য্য সুন্দর ভাবে করিতে ইংরাজ মেয়েরা সিদ্ধহস্ত । তাহারা কাফিটা এমন সুন্দর ও সুস্বাদু করে যে দ্বিতীয় বার খাইতে ইচ্ছা হয় । কাফি তৈরীর নিয়ম সম্বন্ধে একটি সুন্দর যেয়েলি ছড়া আছে ।  
One tea spoonful for the cup, one for the kettle.

লগনে ফরাসী স্ত্রীলোকেরাও কাফির দোকান খুলিয়া থাকে, তাহারা কাফির গুঁড়োর সহিত ডিমের হলুদেটা দিয়া মাখায়, এবং সেইটাকে সিদ্ধ করিয়া দুধ চিনি মিশাইয়া দেয়, চালিবার সময় বড় বাটির উপর ঈষৎ লালচে রঙের বেশ ফেনা হইয়া থাকে, এবং খাইতেও বেশ সুস্বাদু হয় । সাধারণ Frenchরা কাফির গুঁড়ো একটা লম্বা হাতল-ওয়ালা তামার ঘটির বা চোঙের মত পাত্রে গরম করে, এবং ছোট ছোট বাটা করিয়া তাহা পান করে । তাহারা কাফিতে দুধ দেয় না, অল্প পরিমাণে mastie cognac ( ম্যাসটিক কনিয়াক্ ) মিশাইয়া চিনি দিয়া খায়, এবং পান করিবার সময় ইহা ছোট ছোট বাটিতে করিয়া পান করিয়া থাকে ।

ভূর্কিদের কাফি এই Frenchদের মত, তবে mastie ব্যবহার করেনা ।

আরবরা ছোট বাটিতে করিয়া দৃক্খকে গুরু কাফি খায় । পাতলা বা তরল অংশটা পান করে এবং নীচের কাদার মত অংশটা ফেলিয়া দেয় । কিন্তু উপরকার তরল অংশে এত গুঁড়ো থাকে, যে পান করিলে কয়েক দিনের ভিতর বিদেশী লোকের পেট কামড়ায় । মিশর দেশের কাফি খাওয়া আবার স্বতন্ত্র । আগে আধ গেলাস ঠাণ্ডা জল খায় তারপর ছোট ছোট বাটিতে আরবি কাফি খায়, তারপর আধ গেলাস ঠাণ্ডা জল খায় । এইত হ'লো মোটামুটি নানা দেশের কাফির বর্ণনা, আর কত দেশে কি রকম কাফি খায় তাহা বিশেষ জানা নাই ।

বর্তমান লেখক যখন পরের দিন স্বামীজীর সহিত দেখা করেন তখন

বর্তমান লেখকের পোষাক পরিচ্ছদ ক্রয় করিবার জন্ত যেননের হস্তে স্বামীজী ১১ পাউণ্ড দিয়া দেন।

সেন্ট জর্জ ষ্ট্রাটের বাড়ীতে স্বামীজী সপ্তাহ খানেক থাকিয়াই Miss Mullerএর গ্রামের বাড়ীতে শরৎ মহারাজের সহিত চলিয়া গেলেন এবং বর্তমান লেখককেও তথায় বাইতে বলিয়া যান। পথ হইতেছে—Paddington Station হইতে Winson গ্রামের পার্শ্ব দিয়া Maiden head-station বাইতে হয় এবং ষ্টেশন হইতে ঘোড়ার গাড়ীতে বা হাঁটিয়া মাইল তিনেক বাইলে Pinkineys green (পিংকিনিস্ গ্রীন) নামক একটা গাঁয়ে পৌছান যায়। প্যাডিংটন ষ্টেশন ভারতবর্ষ রেলওয়ের ষ্টেশন হইতে বহুগুণে পরিষ্কার পরিচ্ছন্ন। ষ্টেশনের প্ল্যাটফর্মটা (platform) যেন কোন বড়লোকের বৈঠকখানা, দেওয়ালে নানা রকম ছবি টাঙ্গানো এবং ছবির নীচে কারবারীদের বিজ্ঞাপন। দেওয়ালটা সাজানও হইল এবং কারবারীদেরও বিজ্ঞাপন চলিল।

এত লোকের ভিতরে চেঁচামেচি হৈ-হৈ কিছুই নাই, সকলেই আপন আপন কার্যে ব্যস্ত এবং স্থির ভাবে কার্য করিতেছে। ট্রেনে কেবল যাত্রাই শ্রেণীর গাড়ী আছে, প্রথমে শ্রেণীকে Saloon কহে এবং সাধারণকে Ordinary কহে, তবে গাড়ীতে তামাক খাওয়া নিষিদ্ধ, গাড়ীতে তামাক খাইলে পাচ পাউণ্ড জরিমানা দিতে হয়। একখানা Smoking Car (তামাক খাইবার গাড়ী) থাকে। যত তামাক খোর সেই গাড়ীতে গিয়া ভিড় করে; কারণ অপর গাড়ীতে তামাক খাইলে ভদ্র মহিলারা বিশেষ আপত্তি করিয়া থাকেন। সাধারণ গাড়ীগুলি অতি পরিষ্কার পরিচ্ছন্ন এবং গাড়ীর কার্টের দেওয়ালগুলিতে নানা প্রকার ফটোগ্রাফ ও ছবি লাগান, গাড়ীতে কেহ থুথু ফেলে না বা নোংরা করে না, এইজন্ত গাড়ীর ঘরগুলি খুব পরিষ্কার পরিচ্ছন্ন। তবে স্ত্রীলোকদের ও পুরুষদের জন্ত ভিন্ন গাড়ী

লণ্ডনে বিবেকানন্দ

নাই, কারণ পর্দাপ্রথা বা স্ত্রীলোকদের স্বতন্ত্র বসিবার নিয়ম তথায়  
নাই।

বর্ণনাগুলি ১৮৯৬ সালের হইতেছে, এখন অনেক পরিবর্তন হইতে  
পারে, কিয়দংশ মিলিতেও না পারে। সে সময় ঘোড়ার গাড়ী দুই প্রকার  
ছিল, এক Four wheelers ক্রম (Brougham) এবং অপরগুলি  
Hansom; এগুলি দুই চাকা বগি গাড়ীর জায়, তবে গাড়ীর ঘেরা-টোপ  
বা ছাদটা কাঠের তৈয়ারী। আরোহী বসিয়া সম্মুখে খোলা স্থান দিয়া  
সব দিক্ পরিদর্শন করিতে পারে এবং কোচম্যান (চালক) গাড়ীর পিছন  
দিকে ছাদের উপর বসিয়া ঘোড়ার লম্বা লাগামটা ছাদের উপর দিয়া টানিয়া  
লয়, সর্পাৎ সহিস যেমন পিছনদিকে নীচুতে বসে, তাহা না হইয়া কোচ-  
ম্যান পিছনদিকে উচু স্থানটীতে বসে এবং ছাদের উপর দিয়া লাগামটা  
ঘোড়ার সহিত সংযুক্ত হইয়া থাকে এরূপ গাড়ী অপর দেশে প্রায় দেখিতে  
পাওয়া যায় না।

পাঠকের ভিতর অনেকেই বিদেশের বর্ণনা জানিতে ইচ্ছা করেন,  
তাহাদের গাচার নীতি ও নানা প্রকার কার্যকলাপ জানিতে চাহেন, এই  
জ্ঞান অপ্রাসঙ্গিক হইলেও আবশ্যিক বিবেচনায় এই স্থানে প্রদত্ত হইল।  
কারণ আনুসঙ্গিক বিষয় জানা না থাকিলে, স্বামীজী কি প্রকারে কার্য  
করিয়াছিলেন ও দিন কি ভাবে কাটাইতেন, তাহা বিশেষ উপলব্ধি করা  
যাইতে পারে না।

স্বামীজী ও সারদানন্দ স্বামী মিস্ মুলারের গ্রামের বাড়ীতে অবস্থান  
করিতে ল'গিলেন এবং বর্তমান লেখক তথায় গিয়া  
মিস মুলারের বাড়ী। উপস্থিত হইলেন। গুড্‌উইন কেবল সহরে রহিলেন।  
মিস্ মুলারের বাড়ীতে থাকিবার ঘর তত বেশী না থাকায় পার্শ্বের একটি  
বাড়ীতে বর্তমান লেখক রহিলেন, কিন্তু সর্বদাই তিনজনে একত্র থাকিতেন।

ইংলণ্ডের গ্রামগুলি অতি সুন্দর ও পরিষ্কার পরিচ্ছন্ন, দেখিতে যেন এক একখানি ছবি। গ্রামের ভদ্রলোক ও চাষাদের ঘরগুলি অতি পরিষ্কার পরিচ্ছন্ন। বাড়ীগুলি প্রায় ছোট ছোট দোতলা, দেওয়ালগুলি একহারা ইটের পেট, মেজেটা এদেশের মত পাকা খোয়া-পিটা নয়, কেবল তক্তা পাতিয়া দেওয়া হইয়াছে। এদেশে যেমন ছাত্তর রাখিবার জন্ত কড়ি ও বরগা ছই প্রকার আধার আছে ও তাহার উপর টালি পাতিয়া খোয়া পিটাইয়া ছাদ হয়, ইহা তদ্রূপ নয়। ৩×৫ ইঞ্চি বা ৫×৭ হইতে আড়ার মতন কাঠ বিছাইয়া দিয়া তাহার উপর তক্তাগুলি ইস্ক্রুপ মারা হয় এবং মেজেতে গালিচা পাতিয়া দিলে বেশ পরিষ্কার পরিচ্ছন্ন হইয়া যায়। দেওয়ালগুলিতে রঙিন কংগজ মুড়িয়া দেয়। বালি ধরান বা চুনকামা খাটা সেরূপ নয়। Wall paper এর প্রচলন অধিক পরিমাণে। ছাদগুলি দোচালা অর্থাৎ দুদিকে গড়ান, বরফ বা বৃষ্টি পড়িলে জমিয়া না থাকিয়া শীঘ্র গড়াইয়া যায়। চাষাদের ছোট ছোট বাড়ীগুলির সম্মুখে একটু উঠান বা ফাঁকা জমি এবং পিছনদিকে ছোট ছোট উঠান আছে, ইহাকে ব্যাক ইয়ার্ড (back-yard) বলে। এই ব্যাক ইয়ার্ডে দড়ি টাঙাইয়া কাপড় বিছানা শুকাইতে দেয়। কাপড়গুলি শ্রিং ওয়ালা কাঠের (clip) ক্লীপ দিয়া দড়িতে ঝোলান হয়। মিস্ মূলারের গ্রামের বাড়ীর সম্মুখে একটি ছোট বাগান, এবং ছুঁচোলা মুখো পাতলা পাতলা কাঠের তক্তার গোঁজ দেওয়া, রাস্তার ধারের বেড় এবং এরূপ গোঁজ দেওয়া একটা কপাট। এই কপাট বন্ধ করিয়া রাখিলে কোন জানোয়ার আর ঢুকিতে পারে না। বাড়ীটা দ্বিতল ও কাঠের তৈয়ারী। বাড়ীতে ঢুকিয়া ডানদিকে বসিবার ঘর বা বৈঠকখানা—বাদিকে অল্প কার্যের জন্ত ঘর, তাহার পর ভিতরকার উঠান বা বাগান, উঠানের এক অংশে অর্থাৎ বসিবার ঘরের পার্শ্বে একটি লম্বা কাঁচের ঘর। কাঁচের ঘরটার ভিতর নানা রকম ফুলগাছ শাঙ্গান ছিল।

লগুনে বিবেকানন্দ

ইতাকে (Green-house) সজ্জাগার বলে। উঠানের দিকে সম্মুখ করিয়া বা-দিকে একটা স্থানে একটা লতাকুঞ্জ ছিল। গোটাকতক তারে একটা আয়তন করিয়া তাহার উপর লতানে গাছ দেওয়া ছিল। এই লতাকুঞ্জের ভিতর বসিবার মতন একটা স্থান বা ঘর ছিল। মিস্ মূলার ও স্বামীজী অনেক সময় এই স্থানটীতে বসিয়া অপরাহ্নে চা পান বা স্নান্য আহার করিতেন। উঠানে অনেকগুলি গাছ ছিল, বসন্তকাল—বেশ ফুল ধরিয়াকে, গাছগুলি সম্ভবতঃ আপেল, গ্রাসপাতি ও চেরি গাছ হইবে। এদেশের একটি বিশেষত্ব যে বসন্তকালে আগে ফুল ফোটে তাহার পরে পাতা বেরায় কারণ শীতকালে গাছের পাতা ঝরিয়া যায়। দোতালার ঘরগুলি নীচেকার ঘরের আয়তনে সমান। নিম্নে বসিবার ঘরের বা-পাশে একটা ঘর, সেটী স্নানাগার। এই স্নানাগারে বাংলাদেশের পূর্বে প্রথানুযায়ী একটা পাতকুরা,—পাইখানা ছিল, উপরটী বেশ কাঠের বাক্স পাইখানার বা Comodeএর মতন ছিল, এবং মলত্যাগের পর কিঞ্চিৎ পরিমাণে বালি ঢালিয়া দিতে হইত, তাহা হইলে ঘরটীতে আর কোন দুর্গন্ধ হইত না। কিন্তু গ্রামের অপর বাড়ীর পাইখানা এরূপ নয়, উঠানের এক কোণেতে একটা ঘর থাকে, এবং পাইখানার ভিতরে একখানা তক্তা ও তাহার উপরের তক্তায় একটা গর্ত। একপাশে কতকগুলি পুরাতন কাগজ থাকে, মেজেতে গামলা পাতা থাকে না,—মল মাটিতে পড়ে, কারণ ওদেশে জল-শৌচের প্রথা নাই—সেইজন্ত অত স্যাংসেঁতে কাদা হয় না, মাঝে মাঝে চাষারা আসিয়া মাঠে সার দিবার জন্ত মলটা তুলিয়া লইয়া যায়।

একদিন বেলা এগার বা বারটার সময় স্বামীজী মিস্ মূলারের বাড়ীর  
স্বামীজীর  
কম্পোকখন।  
নীচেকার বৈঠকখানা ঘরটিতে আসিয়া একখানি সোফায়  
বসিতেন। ডাক পিয়ন কতকগুলি চিঠি দিয়া গিয়াছিল।  
স্বামীজীকে পড়িয়া

শুনাইতে লাগিলেন। কলিকাতার একখানি চিঠিতে লেখা ছিল, “বলরাম বাবুর পুত্র রামকৃষ্ণ ও শ্রীযুক্ত তুলসীরাম দোষের কন্যা চণ্ডী—উভয়েরই বিবাহ হইয়া গিয়াছে।” এই খবর শুনিয়া স্বামীজী, সারদানন্দ স্বামী ও বর্তমান লেখক তিনজনে খুব আনন্দ করিতে লাগিলেন এবং বলরাম বাবুর অনেক স্মৃতি হইতে লাগিল। তারপর সারদানন্দ স্বামী পুনরায় চিঠি পড়িতে লাগিলেন। একস্থানে লেখা ছিল, “রাখাল মহারাজের পুত্র সত্যের মৃত্যু হইয়াছে। ইহাতে রাখাল মহারাজ (স্বামী ব্রহ্মানন্দ) বড় ব্যথিত ও বিষম হইয়া পড়িয়াছেন।” এই খবরটি শুনিয়া সকলে দুঃখিত হইলেন। স্বামীজী বলিতে লাগিলেন, “রাখালের মত এত উচ্চ অবস্থার লোকও পুত্র শোকে বিহ্বল হয়! পুত্রশোক কি ভয়ানক জিনিস! মানুষ জগতের সব সহ্য ক’রতে পারে কিন্তু পুত্রশোক সহ্য ক’রতে পারে না, এত বেশী অধীর হ’য়ে পড়ে। তাই তো রাখালের ছেলেটি মারা গেল—ছেলেটা বেঁচে থাকলে তাকে গিয়ে মঠে নিয়ে নিতুম্। ছেলেটাকে তৈরী ক’রে নিতুম্। তার কি ব্যামো হয়েছিল?” বর্তমান লেখক বলিলেন “ছেলেদের সঙ্গে খেলতে খেলতে সে পড়ে যায়। তাইতে তার বুকে একটা গোঁজা লেগে পাঁজরা ফুলে ওঠে। সেই থেকে তার হৃৎপিণ্ড রোগ হয় আর সব সময় বুক ধড়ফড় ক’রতো। রাখাল মহারাজ বর্তমান লেখককে সঙ্গে লইয়া কাঁসারি পাড়ার সেনেদের বাড়ীতে গিয়ে ছেলেটিকে রোজ দেখে আসতেন, চিকিৎসাও বেশ হ’য়েছিল।” রাখাল মহারাজ যে ছেলেটিকে দেখে আসতেন এইকথা শুনিয়া স্বামীজী একটু স্তব্ধ হইলেন এবং বলিতে লাগিলেন, “না হউক, রাখাল তো ছেলেটিকে দেখা শুনা ক’রেছে।” কিন্তু শোকের চিহ্ন স্বামীজীর মুখে স্পষ্ট রহিল এবং মাঝে মাঝে সেই কথা তুলিয়া বলিতে লাগিলেন, “তাইতো রাখালের ছেলেটা মারা গেল!” সারদানন্দ স্বামী পুনরায় চিঠি পড়িতে



## লগনে বিবেকানন্দ

লাগিলেন। একস্থানে লেখা ছিল, “হরমোহনের মিত্রের স্ত্রী মারা গিয়াছে।” এই কথা শুনিয়া বর্তমান লেখক সহসা বলিয়া উঠিলেন, “এটা সুখবর! এটা সুখবর!!” স্বামীজী একটু বিরক্ত হইয়া বর্তমান লেখককে বলিলেন, “একজন ম’রে গেল আর তুই বলছিস্ সুখবর?” বর্তমান লেখক বলিলেন, “হরমোহনের স্ত্রী কষ্ট থেকে বেঁচেছে। এখন হরমোহন তার ছেলেপুলে নিয়ে বুঝুক্কে যাক্—বউটা তো অব্যাহতি পেলে।” এই বলিয়া হরমোহন যে ঘর-সংসার না দেখিয়া কেবল ছুজুগ ক’রে হৈ হৈ ক’রে বেড়াইত সেই সমস্ত কথা স্বামীজীকে বলিতে লাগিলেন এবং বর্তমান লেখক আরও বলিলেন যে, হরমোহনের স্ত্রীর অসুখ ক’রলে হরমোহন ফিরেও দেখতো না। একদিন আলমবাজারের মঠ থেকে দীন বুড়ো এসে হরমোহনকে খুব ধমক্ দিয়ে ব’লে গেলেন, “যদি হরমোহন স্ত্রীর চিকিৎসা বন্দোবস্ত না করে তাহলে তিনি আসিয়া চিকিৎসা ও গুস্তাফার বন্দোবস্ত করিবেন।” স্বামীজী সারদানন্দ স্বামীকে জিজ্ঞাসা করিলেন, “দীন বুড়ো আবার কে জুটলো রে?” তখন সারদানন্দ স্বামী দীন বুড়োর সমস্ত ঘটনা বলিতে লাগিলেন। স্বামীজী সমস্ত শুনিয়া একটু খুসী হইয়া বলিলেন, “যাহোক্ এখন ছ’একটা লোক মঠে আসছে তো।”

চিঠি পত্রের কথা সমাপ্ত করিয়া স্বামীজী কলিকাতার কথা তুলিলেন। কলিকাতার লোকের হাব-ভাব এবং তাহারা স্বামীজীর কার্য্য কিরূপ ভাবে লইতেছেন সেই সকল বিষয় জিজ্ঞাসা করিলেন। নরেন সেন যে তাঁহার পক্ষ লইয়া “ইণ্ডিয়ান মিররে” খুব লিখিতেছেন সেই কথা শুনিয়া স্বামীজী বিশেষ আনন্দিত হইলেন। তাহার পর স্বামীজী জিজ্ঞাসা করিলেন, এন, ঘোষের ভাবগতিক কিরূপ? সারদানন্দ স্বামী বলিলেন, “এন, ঘোষ তাঁহার “নেশন” পত্রে প্রথম ছ’একবার বিরোধীভাব প্রকাশ করেছিলেন কিন্তু তাহার পর স্বামীজীর পক্ষ লইয়া খুব জোর কলম লিখিতে আরম্ভ

করেছেন এবং টাউন হলের সভাতে তাঁহারই সব চেয়ে শ্রেষ্ঠ বক্তৃতা হয়েছিল।” ইহা শুনিয়া স্বামীজী বলিলেন, “ই্যা, এন, ঘোষ একটা পণ্ডিত লোক। সে যে এপক্ষে দাঁড়াইয়াছে এটা ভাল কথা ইহাতে ঢের কাজ হবে।” তাহার পর আমেরিকাতে ধর্মপালের বক্তৃতার কথা উঠিল। স্বামীজী বলিতে লাগিলেন, “আরে ধর্মপালটা প্রতিনিধি হয়ে গেল, পড়া-শুনা বিশেষ কিছু করে নাই, সে তো গিয়ে এক লেকচারের সরঞ্জাম ক’রলে। দেখলুম কিছুই জানে না, তখন আমি কি করি, বুদ্ধ তো আমাদেরও একজন অবতার, সেইজন্তে নিজে কোমর বেঁধে লেগে গেলুম আর বুদ্ধর কথা লোককে বললুম।” কারণ স্বামীজী বক্তৃতায় একস্থানে বলিয়াছিলেন “আমি বৌদ্ধ নহি—কিন্তু আমি বুদ্ধ হ’তে চাই। চীন, জাপান ও সিংহল সেই লোকগুরু বুদ্ধের উপদেশ অনুসরণ করতে পারেন, কিন্তু ভারত তাঁহাকে ঈশ্বরাবতার বলে পূজা করেন।” এইরূপ সরলভাবে হাসি তামাসাচ্ছলে অনেক কথাবার্তা হইতে লাগিল। ঘরের দেওয়ালে একখানি ছবি ছিল। ছবিটি হইতেছে একটি ১৩/১৪ বৎসরের মেয়ের,—চুল এলিয়ে, হাঁটু উঁচু করে পা ছড়িয়ে চরকার সূতা কাটিতে কাটিতে সূতাটি ছিঁড়িয়া গিয়াছে, আর মেয়েটি মাথা হেঁট করিয়া নিজের হাঁটুতে মাথাটা যেন দেবীর মত করিয়াছে এবং পা দুটি লম্বা করিয়া ছড়াইয়া বসিয়া পড়িয়াছে। ছবিটির তলায় লেখা ছিল “Hope Deferred” অর্থাৎ আশা-ভঙ্গ। স্বামীজী দেওয়ালের সেই ছবিটির দিকে দৃষ্টিপাত করিয়া বলিতে লাগিলেন, “মানুষের আশা যতক্ষণ থাকে ততক্ষণ সে ঘাড় উঁচু ক’রে, হাত পা সংযত ক’রে, প্রফুল্ল-মনে বসে থাকে, কিন্তু আশাটি নষ্ট হ’লে আর যেন হাত পায়ের জোর থাকে না, হাত পা এলিয়ে পড়ে। ছবিখানা বেশ ভাবট্ট প্রকাশ ক’রেছে, মানুষের জীবনেও ঠিক এইরূপ ভাব হ’য়ে থাকে।” এইরূপ কথাবার্তা করিয়া স্বামীজী সারদানন্দ স্বামীকে বলিলেন, “না,

## লগুনে বিবেকানন্দ

অনেকক্ষণ ব'কেছি, একটু উপরে গিয়ে আড়াগোড়া দেই গিয়ে” এই বলিয়া স্বামীজী উপরকার ঘরটীতে বিশ্রাম করিতে চলিয়া গেলেন।

বেলা ৩টার সময় রেডিং নগর হইতে ষ্টাডি ও ষ্টাডির পত্নী উভয়ে দুইখানি বাইকে করিয়া মিস্ মূলারের বাড়ীতে আসিলেন। মিস্ মূলার তখন বৈঠকখানার ঘরে আসিয়া বসিলেন। লগুনে ফিরিয়া গিয়া

কিরূপভাবে কার্য চলিবে এবং বাড়ী ভাড়া প্রভৃতি  
ষ্টাডি ও তাঁহার  
দায়ী আগমন।  
দিয়া কেমন করিয়া চলিবে সেই সকল বিষয়ে কিছু  
কথাবার্তা হইল। উভয়ে স্থির করিলেন যে প্রথম

প্রথম কিছু খরচ তাঁহারা নিজেদের হাত হইতে দিবেন, তাহারপর স্বামীজী ক্লাস ও বক্তৃতা সুরু করিলে তখন অনেক বন্ধু-বান্ধব টাকা কড়ি সাহায্য করিবেন। তাহা হইলে খরচের আর কোন অকুলান হইবে না, বেশ গুণ্জলায় চলিয়া যাইবে। ষ্টাডি তখন মাথায় একটা (Straw Panama hat) উঁচু চোঙ্গপানা খড়ের টুপি দিয়াছিলেন। তিনি বলিলেন, “এই খড়ের টুপি বেশ হাল্কা তবে ধুলো লেগেছে। সাবান দিয়ে ধুয়ে নিলে চলিবে।” ষ্টাডি ও তাঁহার পত্নী, মিস মূলার, সারদা-নন্দ স্বামী ও বর্তমান লেখক একটু চা পান করিলেন। মিস্ মূলার সেদিন একটা নুতন পোষাক পরিয়াছিলেন,—পায়ে জুতা, হাঁটু পর্যন্ত মোজা, তারপর অর্ধেক পা-ওয়ালা ইজের, গায়ে ডবল ব্রেস্ট কোট ও মাথায় একটি টুপি। পোষাকের রং কাল বনাতের ছিল। তখন দিনকতক লগুন সহরে মেয়েদের ভিতর পুরুষদের পোষাকের চাল উঠিয়াছিল। স্বামীজী তখন উপরকার ঘরে বসিয়া চিঠি পত্র লিখিতেছিলেন। সেইজন্ত ষ্টাডি উপরে গিয়া দেখা করিতে ইচ্ছা করিলেন না। তারপর মিস্ মূলার ও ষ্টাডি-দম্পতী তিনখানি বাইসাইকেলে চড়িয়া রেডিং নগরের দিকে চলিয়া গেলেন। ঘণ্টা কয়েক পরে মিস্ মূলার ফিরিয়া আসিয়া ষ্টাডির পত্নীকে

বকিতে শুরু করিলেন, “আল্‌বডেড মাগী (awkward woman), বাইসাইকেল চড়তে জানে না, পথে খানিকটা গিয়ে থপ্‌ক’রে পড়ে গেল, কাপড়-চোপড়ে সব ধুলো লাগলো, পাড়ার হতভাগা ছেলেরা হোঃ হোঃ ক’রে হাসতে লাগলো। দেখ দেখি, বে-হিসাবী, বাইসাইকেল চড়তে জানে না” এই বলিয়া আপনাআপনি বকিতে লাগিলেন। তাহার পর আবার শুরু করিলেন, “গাঁয়ের ছোঁড়াগুলো কি পাজী! আমাকে হাততালি দিতে লাগলো, কেউ বা ঢেলা ছুঁড়ে লাগলো, সব ছেলে-মেয়েগুলো দল বেঁধে আমার বাইসাইকেলের পথ আটকে দিয়ে ব’লতে লাগলো, ‘ত্থাখ্‌ ত্থাখ্‌ একটা বুড়ো মাগী মন্দোর পোশাক প’রেছে’ এই ব’লে ছেলে মেয়ে গুলো এত বিরক্ত ক’রলে যে আমি আর যেতে পার্লাম না, কাজেই ফিরে এলুম। ছেলে গুলো ভারি হুঁহু!” সারদানন্দ স্বামী ও বর্তমান লেখক মিস্‌ মুলারের ভাব গতিক দেখিয়া চুপ করিয়া রহিলেন, ‘হাঁ’ ‘না’ কিছুই বলিলেন না, ছুটো যেন জ্যাস্ত পুতুলের মত হুইখানি বেতের চেয়ারে বসিয়া রহিলেন। মিস্‌ মুলারের যদিও বেশী বয়স হইয়াছিল কিন্তু তাঁহার মুখে পুরুষের মত একটু একটু গোঁফ, এবং দাড়িতে সামান্য একটু চুল হইয়াছিল, গালে কিন্তু ছিল না, তাঁহার গোঁফটা যেন স্পষ্ট দেখা যাইত। লগুনের জ্বীলোকেরা খুব বলিষ্ঠ, এইজন্ত লগুনে অনেক জ্বীলোকের মুখে ছোট ছোট গোঁফ দেখিতে পাওয়া যায়, কাহারও বা সাদা গোঁফ, কাহারও বা কালো গোঁফ। ভারতবর্ষে এরূপ নাই বলিলেই হয়। কিন্তু লগুনে এটা কিছু আশ্চর্যজনক নয়, এরূপ জ্বীলোক অনেক দেখিতে পাওয়া যায়। সেইজন্তই বোধ হয় ছেলেগুলো আরও ফেপাইয়া দিয়াছিল।

কংবান্ধী কহিবার প্রথা বিভিন্ন দেশে বিভিন্ন প্রকারের আছে। ইংরেজ গর একটা প্রথা আছে এবং স্বামীজী তাহা বিশেষ করিয়া লক্ষ্য

## লগুনে বিবেকানন্দ

করিয়াছিলেন। যখন নিজেরা অর্থাৎ বঙ্গভাষীরা থাকিতেন তখন বাঙ্গালায় কথাবার্তা হইত কিন্তু মিস্ মূলার বা ষ্টাডি ঘরে ঢুকিলেই তখন ইংরেজীতে কথাবার্তা হইতে থাকিত। কারণ সকলে ইংরেজদের কথাবার্তা কহিবার প্রথা।

একজন ভাষা না জানার জন্ত নিরানন্দ ভাবে বসিয়া থাকিবে ইহা ভদ্র সমাজের নীতি-বিরুদ্ধ। এইজন্ত সকলের বোধগম্য ভাষায় কথাবার্তা বলা উচিত। স্বামীজী এ বিষয়ে বিশেষ লক্ষ্য রাখিতেন এবং অপর কেহ ঘরে ঢুকিলেই ইংরেজীতে কথা কহিতেন।

বেঠকথানা ঘরটি মাঝারি রকমের ছিল, নিতান্ত বড় বা ছোট ছিল না। মেঝেতে তক্তাপাতা—তাহার উপর বালান্দার মাড়ুর পাতা। মাড়ুরগুলি পর পর সেলাই করিয়া সমস্ত ঘরের মেঝেটি মোড়া হইয়াছে। আহারের সময় ডাকিবার জন্ত ছোট একখানি কাঁসর ছিল এবং তাহা বাজাইবার জন্ত একটি রবারের গুলো দেওয়া কাঠি ছিল। লগুনে অনেক বাড়ীতে ঘণ্টার পরিবর্তে ছোট ছোট কাঁসর বাজানার এক প্রথা ছিল। কাঁসরটি বাজাইলে সকলে বুঝিতে পারিতেন যে আহারের সময় হইয়াছে। ঘরে বসিবার জন্ত বেতের ও বাঁশের মোড়া চেয়ার ও স্ফাসন (sofa-chair) ছিল, তাহার উপর লম্বা লম্বা পশমওয়ালা চামড়া বা পাতলা পাতলা বালিসের মত গদি পাতা ছিল। ঘরের যেখানে আগুন জ্বালান হয় অর্থাৎ আতসিখানা (Fire-place) সেখানে একখানি মির্জাপুরী পশমওয়ালা গাল্চে ছিল। জিনিসগুলি অধিকাংশ ভারতবর্ষ-জাত। লগুন সহরের পূর্বসীমান্ত পল্লীতে ঐ সকল জিনিসের আড়ং আছে, তথায় বহু পরিমাণে বাঙ্গলা দেশের মাড়ুর ও মির্জাপুরী গাল্চে বিক্রয় হইত।

সময়টা যদিও বসন্তকাল কিন্তু কলিকাতার পক্ষে বেশ ঠাণ্ডা মনে হইতে লাগিল। পর দিবস স্বামীজী, মিস্ মূলার, সারদানন্দ স্বামী ও বর্তমান

লেখক ছপুর বেলা বসিয়া আছেন, সকলেই একটু ঠাণ্ডা অনুভব করিতে লাগিলেন। মিস মুলার তাঁহার বুড়ী ঝিকে আত্মস্থানাতে একটু আগুন করিয়া দিতে বলিলেন ঘরটা যাহাতে একটু গরম হয়। বুড়ী ঝি কিছু কাঠের কুঁচো (woodchips) ও ঘুঁটে আনিয়া আগুন জালিয়া দিল। বাঙ্গালা দেশের ঘুঁটেগুলি চ্যাপ্টা হয়। হিন্দুস্থানের অনেক জায়গায় ঘুঁটেগুলি মোটা মোটা অর্দ্ধ গোলাকার অর্থাৎ নীচের দিকটা চ্যাপ্টা ও উপর দিকটা অর্দ্ধচন্দ্রাকার কিন্তু মিস মুলারের বাড়ীতে যে ঘুঁটে দেখিলাম তাহা অন্য প্রকারের, নিরেট লম্বা লম্বা চোঙ্গার মত অর্থাৎ নিরেট লম্বা লম্বা মাটির গ্লাসের মত। নীচের চ্যাটালো দিক দেকের উপরের দিকটা ক্রমে সরু হইয়া গিয়াছে। প্রায় ৯ ইঞ্চি, এরূপ তিনখানা ঘুঁটে রাখিয়া মাঝখানে কাঠের কুঁচো দিয়া আগুন দিতে ঘরের ঠাণ্ডা কমিয়া গেল। গ্রামটা রেল স্টেশন থেকে প্রায় ২১৩ মাইল দূরে, এইজন্ত পাথুরে কয়লার চলন নাই, আনাইতে গেলে বিশেষ খরচ পড়ে। গ্রামে কাঠ জালাইয়া সকলে রন্ধন করিয়া থাকে।

একদিন বিকালবেলা স্বামীজী, মিস মুলার, সারদানন্দ স্বামী ও বর্তমান লেখক চারজন বাইয়া ভিতরকার উঠানে বসিলেন। মিস মুলার একখানি চেয়ারের উপর বসিয়া রহিলেন। স্বামীজীর পরিধানে একটা কালরংয়ের ইজের, একটা কাল রংয়ের ভেঁট, গলায় কলার ছিল না, আলপাকার লম্বা চোগাটা পরিয়াছিলেন। তিনি বাঁ-হাতের কনুইয়ের উপর হেস্ দিয়া ঘাসের উপর বাকিয়া শুইয়া পড়িয়াছিলেন এবং কথাবার্তার সময় মাঝে মাঝে উঠিয়া পা মুড়িয়া একপায়ের উপর অন্য একটি পা দিয়া বসিয়া কথাবার্তা কহিতে লাগিলেন।

কালো লম্বা কোট ও ইজের পরা সারদানন্দ স্বামীও ঘাসের উপর চাপ্টানি খাইয়া বসিয়া রহিলেন। বর্তমান লেখক সারদানন্দ স্বামীর

লগনে বিবেকানন্দ

পাশে বসিয়া রহিলেন। স্বামীজী মিস্ ম্লারের সহিত কথাবার্তা কহিতে লাগিলেন। প্রথমে আমেরিকায় কার্যের কথা উঠিল, তারপর ইংলণ্ডের

কর্মপ্রণালী সম্বন্ধে  
স্বামীজীর আলোচনা।

কার্য কি করিয়া হইবে সেই সব বিষয় কথাবার্তা  
হইতে লাগিল, এবং ভবিষ্যতে ভারতে যাইয়া কি  
প্রকারে কার্য করিবেন সে বিষয়ে কথাবার্তা বলিতে

বলিতে স্বামীজী একটু উত্তেজিত হইলেন। বাঁ হাতে হেলান দিয়া  
গুইয়া থাকার অবস্থা হইতে উঠিয়া বসিলেন ও মুখে গম্ভীর ভাব আসিল।  
তাহার পর পুনর্জন্মের কথা উঠিলে স্বামীজী বলিলেন, “This time I  
will give hundred years to this body” অর্থাৎ এবার এই শরীরকে  
শত বৎসর রাখিব। আমায় এবার অনেক দুঃস্বপ্ন কাজ করিতে হইবে।  
পূর্ববারের চেয়ে এবার আমার ঢের কাজ বেশী। মিস্ ম্লার বলিলেন  
“কাজ দিনকতক ভাল লাগে তারপর বড় বেজার বলিয়া বোধ হয়,  
চিরকাল কি মানুষ কাজ করিতে পারে?” কিন্তু স্বামীজী উত্তেজিত ও  
গম্ভীর হইয়া বলিলেন, “এবার শেষ মুহূর্ত পর্যন্ত কাজ করিব”—বলিতে  
বলিতে তিনি আরও উত্তেজিত হইয়া নিজের অন্তর্নিহিতভাব প্রকাশ  
করিয়া ফেলিলেন। যদিও ভাষাটা ঠিক উদ্ধৃত করিতে পারিতেছি না  
কিন্তু ভাবটা স্পষ্ট মনে আছে। তিনি প্রকারান্তরে বলিলেন যে পূর্বজন্মে  
আমি বুদ্ধ দেহ ধারণ করিয়াছিলাম। যদিও এই কথাটা মিস্ ম্লারের  
পক্ষে ততটা হৃদয়স্পর্শী হইল না কিন্তু অপর দুইজনের পক্ষে অতি বিশ্ময়কর  
বলিয়া বোধ হইল; বিশেষতঃ যখন তিনি বলিলেন যে, “এইবার এই  
দেহকে একশত বৎসর ধরিয়া রাখিব।” এই বলিয়া তিনি পূর্বজন্মের  
অনেক কথা বলিতে লাগিলেন। কিন্তু কথাগুলি এত জোরের সহিত  
বলিয়াছিলেন যে সারদানন্দ স্বামী ও বর্তমান লেখক তাহা শুনিয়া বিভোর  
বা হতভম্ব হইয়া রহিলেন। সব যেন নূতন ভাবের নূতন লোক। তাহার

পর স্বামীজী কিঞ্চিৎ পরিমাণে ভাব সম্বরণ করিয়া আবার সাধারণ লোকের শ্রায় কথা কহিতে লাগিলেন ও চোখ দুইটা মিটমিট করিয়া মাঝে মাঝে নাসিকা কুঞ্চিত করিতে লাগিলেন। তাঁহার মুখের ভাব-ভঙ্গী ও গলায় আওয়াজ যেন প্রকাশ করিতে লাগিল যে এ কথাগুলি বলে ফেলা ঠিক হয়নি, ফস্ ক'রে মুখ দিয়ে বেরিয়ে গেল। তার পর কথাটা চাপিয়া অল্প কথা বলিলেন।

মিস্ ম্লার একেই জীলোক তাতে আবার বুড়ী, মেজাজ অত্যন্ত খিটখিটে, কাহার সহিত তাঁহার বনিবনা হইত না। স্বামীজীর এই কথাগুলি শুনিয়া তিনি তাঁহার ভাব ও অবস্থা অনুযায়ী উপলব্ধি করিয়া বলিতে লাগিলেন, “এত বুড়ো হয়ে বেঁচে থাকবার কোন আবশ্যক নাই। বুড়ো হোয়ে বেঁচে থাকলে জীবনটা বড় কষ্টকর হয়। এক শ' বৎসর বেঁচে থাকা—হাত পায়ের জোর থাকে না, চোখের জোর কমে যাবে—না, এতদিন বেঁচে থাকা ঠিক নয়। এক শ' বৎসর বেঁচে থাকা—আমার শুনলে ভয় হয়।” স্বামীজী কথার প্রারম্ভেই বলিয়াছিলেন, “কাজ ত সবে শুরু ক'রেছি, আমেরিকাতে ত সবেমাত্র একটা কি দুটো ঢেউ তুলেছি—একটা মহা তরঙ্গ তুলতে হবে—জাতিটাকে উন্টে ফেলতে হবে। জগতকে এবার একটা নূতন সভ্যতা দিতে হবে। শক্তি কি জগত বুঝবে! কি জন্তে আমি এসেছি জগত বুঝবে, পূর্ব্ববারে আমি যে শক্তি দেখিয়েছি এবার তার চেয়ে ঢের বেশী শক্তি দেখিয়ে দিয়ে যাব।” এই সকল কথা শুনিয়া সারদানন্দ স্বামী ও বর্তমান লেখকের হতভম্ব হইবারই কথা। এইস্থানে কেবলমাত্র সেই সকল তেজঃপূর্ণ কথার আভাস মাত্র দিলাম কারণ স্বামীজী ঐ ভাবের প্রকৃত কথা ১৫।২০ মিনিট ধরিয়া বলিয়াছিলেন।

তাহার পর স্বামীজী কথা বদলাইয়া দিলেন, সন্ধ্যার সময় গাছে



## লগুনে বিবেকানন্দ

নানারকম পাখী ডাকিতেছিল তাহাদের কথা তুলিয়া ভারতবর্ষের পাখীর ডাকের সহিত তুলনা করিতে লাগিলেন। কিন্তু তখন পর্য্যন্ত তিনি যেন নিজের ভাবটা অনেক কষ্টে সকলের নিকট হইতে লুকাইবার চেষ্টা করিতেছেন। মাঝে মাঝে চোখ হইতে তীব্র দৃষ্টি অগ্নিশুলিঙ্গের মত বাহির হইতেছিল। বেশ স্পষ্ট বোঝা যাইতেছিল যে স্বামীজীর ভিতরে এক ভাব বহিতেছিল কিন্তু বাহিরে কথাবার্ত্তার দ্বারা সে ভাব চাপিয়া রাখিবার চেষ্টা করিতেছিলেন। স্বামীজীর সেই দিনের কথাবার্ত্তা শুনিয়া সকলেই স্থির হইয়া বসিয়া রহিলেন—কাহারও কোন কথা কহিবার সাংগঠ্য ছিল না।

তারপর মিস্ ম্লারের উঠানে বা-দিকে যে একটি লতাকুঞ্জের মত ছিল সেইখানে সকলে যাইয়া সান্ধ্য-আহারে বসিলেন। প্রথমে দিয়াছিল দুধ দিয়া মোটা মোটা ম্যাকরনি (macaroni) সূপ, তাহাতে জুন দেওয়া ছিল। সারদানন্দ স্বামী ছ'এক চাম্চে খাইয়া মুখ বিট্কেল করিয়া ত্রাণকার করিবার মত করিলেন। সারদানন্দ স্বামী নূতন লোক, কি করিয়া খালাখানি কাৎ করিয়া ধরিতে হয় এবং চাম্চে কিরূপভাবে ধরিয়া তাহার উপর খাণ্ডদ্বা তুলিয়া লইতে হয়, চাম্চের কোনদিকে মুখ দিতে হয়, সে সব বিষয় তখন কিছুই তিনি জানিতেন না। স্বামীজী মৃদুভাবে সারদানন্দ স্বামীকে ইঙ্গিত করিয়া বাংলায় বলিতে লাগিলেন, “ওরে শরৎ, ও রকম ক’রে ধরে না। আমি যেভাবে ক’রছি সে রকম কর।” অর্থাৎ প্লেট অপরাদিকে বঁকিয়ে ধরিতে হয়, সম্মুখের দিক্‌টা উঁচু করিলে মাথার দিক্‌টায় সব তলার জিনিস জমা হয়। চাম্চেটা তলার দিক্‌ থেকে হেলাইয়া সূপটা লইতে হয় এবং মুখে দেবার সময় চাম্চের পাশ দিয়া লইতে নাই, ডগার দিক দিয়া লইতে হয়। চাম্চেটা ধরিবার সময় গোড়ার দিক ধরিতে নাই, মাঝখানে ধরিতে হয়। ভারতবর্ষের হস্ত সঞ্চালন ও দিক্‌ নির্ণয়ের

ইহা ঠিক বিপরীত। আহারের থালাটা সম্মুখে নীচু করে ও পেছন দিকটা উঁচু করে, কিন্তু এ দেশ ঠিক ইহার বিপরীত। তাহার পর কোন্ হাতে কাঁটা চামুচে ধরিতে হয়—সে এক বড় সমস্যা। স্বামীজী অলক্ষিতভাবে সারদানন্দ স্বামীর পা চাপিয়া দিয়া বলিলেন, “ওরে ডান-হাতে ধ’রিতে নেই, ডান হাতে ছুরি ধ’রিতে হয়, আর বাঁ হাতে কাঁটা দিয়ে মুখে তুলিতে হয়। অত বড় বড় গরস্ করে না, ছোট ছোট গরস্ করবি। খাবার সময় দাত জিভ বার করতে নেই, কখন কাসবি না, ধীরে ধীরে চিবুবি। খাবার সময় বিষম খাওয়া বড় দুষণীয়, আর নাক ফোঁস ফোঁস কখনও ক’রবে না।” এ সব হচ্ছে তালিম প্যারেড্, যেন থিয়েটারে প্রম্পটিং করা হচ্ছে। যাহা হউক, মুন দিয়া হুধ খাইয়া সারদানন্দ স্বামীর গা বমি বমি করিতে শুরু করিল, আর কিছুই খাইতে পারিলেন না, কোন বকম করিয়া খাওয়া সাজ করিতে পারিলে যেন তিনি বাচেন। অবশেষে খাওয়া সাজ করিয়া মিস্ মুলারের বৈঠকখানা ঘরে আসিয়া সারদানন্দ স্বামী বর্তমান লেখককে বলিলেন, ‘না বাবা, অমন আটে-কাটে বেধে আমি লেকচার কর্তে পার্ক না। ও নরেনের কাজ, নরেন করুক গে! কোথায় হাতে ক’রে বড় বড় খাবা করে খাব, না, একটু একটু ক’রে ছুঁচ বিধে খাওয়া! আর জ্বাখ দেখি হিন্দুর ছেলে হুধে মুন দিয়ে খাওয়া? আরে খেয়ে আমার পেট গুলিয়ে উঠলো, কিন্তু ভয়ে বমি ক’র্তে পাল্লুম না। তখন উঠতেও পারিনি, আবার ও জিনিস খেতেও পারি নি। জ্বাখ ভাই, এ দেশের হুধটা বেশ ঘন আর মোটা ভার মিশেলি পাওয়া যায়, কমলা নেবুও এ দেশে আছে, একদিন ভাল করে চিনি দিয়ে কমলা লেবুর ক্ষীর বা ভারমিশেলির ক্ষীর খাব। জ্বাখ দেখি এমন ঘন হুধ মুন দিয়ে নষ্ট ক’চ্ছে। শুধু ওর খাতিরেই এই খায়গায় পড়ে আছি আর ঐসব জিনিস খেয়ে বেশ আছি”—এইরূপ কথা অর্ধ কুক্ষিত ও অর্ধ ব্যঙ্গচ্ছলে বলিতে লাগিলেন। কিন্তু স্বামীজী যখন

লগুনে বিবেকানন্দ

পুনরায় বৈঠকখানা ঘরটিতে আসিলেন, তখন সারদানন্দ স্বামী শান্ত শিষ্ট  
ভাল মানুষটির মত বসিয়া রহিলেন—যেন তাঁহার খাবার সময় কোন কষ্ট  
হয় নাই। মিস্ মুলার নিরামিষভোজী সেইজন্ত তাঁহার বাড়ীতে মাছ মাংস  
আসিত না।

## দুই

অপর একদিন স্বামীজী হুপুর বেলা ঘরে ঢুকিয়া বলিতে লাগিলেন,  
বর্তমান লেখকের “আঙ্গুলগুলি সব পরিষ্কার পরিচ্ছন্ন করিয়া রাখিবে,  
অতি স্বামীজীর নখে যেন ময়লা থাকে না। বড় নখ হ’লে কেটে  
উপদেশ। ফেলবে। তাখ আমার জামার পকেটে বা ট্রাক্সের

ভিতর একটা লোহার রিং করা নখ কাটবার অনেক রকম যন্ত্র  
আছে। নখ কাটবার, নখ ঘসবার সব রকম যন্ত্র আছে। আমায় নখ  
কাটবার জন্য আমেরিকায় একজন দিয়েছিল, সেইটে দিয়ে নখ পরিষ্কার  
কর”—এই বলিয়া নানারূপ গল্প করিয়া স্বামীজী চলিয়া গেলেন।

পরদিন বেলা ১১টা বা ১২টার সময় বর্তমান লেখক কটেজ বাড়ীর  
উপরকার ঘরে বসিয়া সার্ন্যাল মহাশয়কে চিঠিতে Pinkeney’s green,  
মিস মুলারের বাড়ী ও স্বামীজীর বিষয় লিখিতেছিলেন, দরজাটি ভেজান  
এমন সময় দরজায় ঠক্ ঠক্ ক’রে টোকা মারার আওয়াজ হইল। বর্তমান  
লেখক বলিলেন, “Come in, please?” বর্তমান লেখক মনে করিয়া-  
ছিলেন যে কটেজের কেহ বোধ হয় আসিয়াছেন। দরজাটি খুলিয়া দিয়া  
ফিরিয়া দেখেন, যে স্বামীজী ঘরে ঢুকিলেন। বর্তমান লেখক সসজ্জমে  
চেয়ার থেকে দাঁড়াইয়া উঠিলেন। “বোস্ বোস্” বলিয়া নিজেকে একটা চেয়ার  
টানিয়া লইয়া বসিয়া স্বামীজী বলিলেন, “কি রে, কি খেয়েছিস্?” বর্তমান  
লেখক বলিলেন, “অনেক দিন ভাত খেতে ইচ্ছে হ’য়েছিল, তাই হু’টি  
ভাত আর একটু মাংসের ঝোল খেয়েছি।” স্বামীজী বলিলেন, “তা বেশ,  
যোগাড় ক’রে নিতে পারলে গ্রামে ভাত হ’তে পারে।” তাহার পর

## লগনে বিবেকানন্দ

সুনরায় বলিতে লাগিলেন, “মাথার চুল সব সময় বুরুস্ ক’রে রাখবে, চুল যেন উস্কে খুস্কে হয় না, তা হ’লে এ দেশের লোক বড় ঘৃণা করে। জামা ঠেজের সর্বদা বুরুস ক’রতে হয়। সর্বদা ফিট্‌ফাট্‌ সেজে থাকবে, নইলে লোকে ঘৃণা ক’রবে। একেই তো ইণ্ডিয়ানস্ ব’লে লোকে অবজ্ঞা করে, তার উপর যদি ফিট্‌ফাট্‌ হ’য়ে না থাকতে পার তাহলে লোক আরও ঘৃণা ক’রবে।” স্বামীজী তারপর জিজ্ঞাসা করিলেন, “স্নান ক’রেছিস্?” বর্তমান লেখক বলিলেন, “কি ক’রে নাইব, কল চোবাচ্চা যে নাই?” স্বামীজী একটু হাসিয়া বলিলেন, “এ দেশে অমন করে স্নান করে না। ঘরেতে Bath টবেতে ঠাণ্ডা জল মিশিয়ে দিয়ে যাবে। আগে একখানা স্পঞ্জ ভিজিয়ে গায়ে বুলাইয়া নিতে হয়, তারপর সাবান দিয়ে গা-টা ঘসে নিতে হয়। দ্বিতীয় বার ভিজ়ে স্পঞ্জ দিয়ে সাবানের ফেনাটা গা থেকে তুলে ফেলতে হয়, তারপর Bath-tubএ ব’সে মগে ক’রে মাথায় জল দিয়ে গা টা ধুয়ে ফেলে, শুকনা তোয়ালে দিয়ে গা-টা পুঁছে ফেলেই তখনই কাপড় জামা পরিতে হয়, নইলে বুকে ঠাণ্ডা লেগে যাবে। আর জাখ্ নাকের শিক্‌নি হাত দিয়ে অমন ক’রে ফেলতে নেই, ছ’খানা রুমাল পকেটে রাখতে হয়, নাক ঝাড়তে হ’লে রুমাল দিয়ে নাক মুছে পকেটে রাখতে হয়। শিক্‌নি, গুথু যেখানে সেখানে ফেলতে নেই, এরা বলে তাতে অপরের ব্যামো হবে। আর খেয়ে দেয়ে খুব ফাঁকা হওয়ায় বেড়াগে যা।” বর্তমান লেখক যদিও স্বামীজীর এ সব কথার কোন প্রত্যুত্তর করিলেন না, কিন্তু মনে মনে ভাবিতে লাগিলেন যে, শিক্‌নি মাখান রুমাল পকেটে রাখতে হবে, হায় রে কপাল! তাহার পর স্বামীজী জিজ্ঞাসা করিলেন, “কাকে চিঠি লিখ্‌ছিস্?” বর্তমান লেখক বলিলেন, “সান্মাল মহাশয়কে লিখ্‌ছি।” স্বামীজী বলিলেন, “তা বেশ, সান্মালকে মাঝে মাঝে চিঠি দিস্। আর দাখ্, রোজ একঘেয়ে খেলে অরুচি হয়,

বাড়ীর মাগীটাকে বলিস্ যে মাঝে মাঝে যেন সে পোচ্ট এগ্ (Poached egg) বা অম্লেট (Omelette) করে দেয়, তা হ'লে মুখ বদলান হবে। আর আমি বোধ হয় শীঘ্র লগুনে চলে যাব, শরৎও সঙ্গে যাবে, তা তুই একা থাকতে পারবি নি?" এই বলিয়া স্বামীজী ঘরের দরজাটা ভেজিয়ে দিয়ে নীচে নেমে গেলেন। যাইতে যাইতে স্বামীজী পুনরায় ফিরিয়া বলিলেন, "চিঠি লেখা হলে ও বাড়ীতে যাস্।"

পোচ্ট-এগ (Poached egg) হইতেছে—একটা প্যান (pan) বা কড়াতে খানিকটা জল টগুবগু করিয়া ফুটিবে, আর ডিমের ডগার দিকের খোসা খানিকটা ভেঙ্গে ভিতরকার তরল পদার্থটি জলের উপর ঢেলে দিতে হয়, তাহা হইলে ডিমটি জমিয়া গিয়া নীচেটা গোল সাদা মত হয় এবং মাঝখানটা 'হলদে মত থাকে' কিন্তু ফেলিবার সময় হাতের বিশেষ নৈপুণ্য থাকা প্রয়োজন; নচেৎ নষ্ট হইয়া যাইবে। অম্লেট (Omelette) হইতেছে সাধারণতঃ ডিম ফেটিয়ে বড়া করা। তবে তাহাতে ওয়াটার-ক্রেস্ (Water-cress) নামক একরকম সুগন্ধি শাক কুঁচিয়ে দেয়। এই শাকটি পুদ্নে ও ধনে শাকের মত বেশ সুগন্ধি। অম্লেটএ ওয়াটার-ক্রেস্ শাক দিলে খাইতে বেশ সুস্বাদু হয়, তবে ডিমটাকে ভেঙ্গে একটা চীনা মাটির বাটিতে অনেকক্ষণ ফেনায় (well-beaten egg)।

এদেশের মাংসের তরকারি করিবার প্রথা হইতেছে এই যে, ভেড়ার মাংসের হাড় বাদ দিয়া টুকরা টুকরা করিয়া গরম জলে ফেলিয়া দেয়। সেইটি যখন অল্প জলে খুব করিয়া ফুটিয়া সিদ্ধ হয়, তখন তাহাতে একটু "কারি পাউডার" (Curry powder) ছড়িয়ে দেয় আর একটু নুন দেয়। ঝোলটা ঘন করিবার জন্ত ঈষৎ পরিমাণে ময়দা গুলিয়া তাহাতে দেয়। তা বাহা হউক খাইতে এক রকম হয়।

জানালাকে শাস্ (Sash) বলে। একটি কাঠের ফ্রেমের মাঝখানে

## লগনে বিবেকানন্দ

একটি কাঁচ দেওয়া। ভারতবর্ষে যেমন জানালা হুকপাটওয়ালা হয়, ইহা তদ্রূপ নয়। রেলগাড়ীর জানালার মত উপরে উঠান দরজা ও জানালা।

ও নীচে নামান যায়। ছুখানা কাঁচের ফ্রেম থাকে, উপরকার খানা স্থায়ীভাবে Screw মারা থাকে আর নীচের খানা উঠান নামান যায়, তবে কাঠের তক্তার কপাট নহে। ঘরের অতিরিক্ত আলো নিবারণ করিবার জন্ত ছু ধার থেকে ছুটি দড়ি বাঁধা থাকে, সেট দড়ির মাঝে একখানা গ্রাকড়া থাকে। ইচ্ছামত কাপড়খানা গুটিয়ে ব ছড়িয়ে রাখা যায়। ইহাকে বলে window-blind.

দরজাগুলি এক-কপাটে, ছু-কপাটে প্রায় হয় না। ঠাণ্ডা ও গুঁহ-শেঁতে দেশ বলিয়া দরজা সব সময়ে প্রায় বন্ধ থাকে। ভারতবর্ষ গরম দেশ, তথায় যাহাতে ঘরে বেশী হাওয়া ঢুকিতে পায় সেই নিয়মে ঘরের দরজা জানালা তৈয়ারী হয়। ইংরাজদের শীতপ্রধান দেশ, সেইজন্ত যাহাতে ঠাণ্ডা না ঢুকিতে পারে সেই হিসাবে ঘর ও দরজা জানালা তৈয়ারি হয়। এ বিষয়ে ছুই দেশের মধ্যে বিশেষ পার্থক্য আছে সিঁড়িগুলি প্রায় কাঠের হইয়া থাকে। বড় লোকের বাড়ীতে সিঁড়ির উপর গাল্চে পাতিয়া দেয়, কারণ তাহলে আর আওয়াজ হবে না। কিন্তু সাধারণ লোকের বাড়ীতে সিঁড়ির ধাপগুলি পালিস্ করা থাকে। অবশ্য কটেজের কথা স্বতন্ত্র।

একদিন বেলা ১১টা ২টার সময় বর্তমান লেখক গিস্ মূলারের বৈঠকখানা ঘরটীতে গেলেন, এবং বেতের সোফার উপর বসিলেন। সারদানন্দ স্বামী ভিতরকার উঠানের দিকে দেওয়ালের কাছে একটা গড়ানে টেবিলে (Secretariat table) কাগজগুলি রাখিয়া একটি চেয়ারে বসিয়া আছেন। স্বামীজী ভেট ও আলপাকার চোগাটা পরিয়া সারদানন্দ স্বামীর বাঁ দিকে টেবিলের কোণে দাঁড়াইয়া আছেন। স্বামীজীর আমেরিকার কার্য ও

ইংলণ্ডে আগমন সম্বন্ধে একটি রিপোর্ট তৈয়ারী করিয়া মাদ্রাজের ‘ব্রহ্মবাদিন্’ কাগজে পাঠাবেন। সারদানন্দ স্বামী সেই রিপোর্ট পাঠ করিতে আরম্ভ করিলেন ও স্বামীজী দাঁড়াইয়া শুনিতে লাগিলেন। সারদানন্দ স্বামী খানিকটা পড়িয়া এক জায়গায় পড়িলেন, “yesterday night।” স্বামীজী তৎক্ষণাৎ শুধরাইয়া দিয়া বলিলেন, “yesterday night হয় না, last night হবে, কেটে দে।” তাহার পর সারদানন্দ স্বামী আবার পড়িতে লাগিলেন। অভ্যাসবশতঃ সারদানন্দ স্বামী সুর করিয়া পড়িতে লাগিলেন। স্বামীজী ব্যঙ্গচ্ছলে বলিলেন, “হুর্ শালা, অমন এ্যা এ্যা করে পড়ছিস্ কেন? তোর চণ্ডী পাঠ করা অভ্যাস কি না, তাই মনে করিস্ যেন চণ্ডী পাঠ করছিস্। ভাল করে স্পষ্ট স্পষ্ট করে পড়।” সারদানন্দ স্বামী অপ্রতিভ হইয়া সামলাইয়া লইয়া পুনরায় সহজভাবে পড়িতে লাগিলেন।

একদিন স্বামীজী খুব প্রফুল্ল, বেলা ৪টার সময় বলিলেন, ‘চ, সকলে মিলে স্নম্ভের মাঠে গিয়ে বাইক চড়িগে।’ মিস্ মুলারের আর্থার (Arthur) নামে একটা মালী ছিল, সে মিস্ মুলারের গ্রিন্ হাউস থেকে একটি বাইক মাঠে পৌছিয়া দিয়া আসিল। সারদানন্দ স্বামী বাইকটি ধরিলেন, আর স্বামীজী বর্তমান লেখকের কাঁধে হাত দিয়া বাইকে উঠিয়া বসিলেন। অনভ্যস্ত, সেইজন্য দুইজনে দুইদিকে থেকে বাইকটিকে সামলাইতে লাগিলেন। তাহার পর সারদানন্দ স্বামীকে বলিলেন, ‘তুই চড়, শেখ না। দিনকতক চেষ্টা করলে অভ্যাস হয়ে যাবে।’ সারদানন্দ স্বামী অনিচ্ছাসম্বন্ধেও খাতিরে বাইকের উপর একবার চড়ে বসলেন। ষোটামানুষ, বড় ভয় করিতে লাগিল, সেইজন্য দুইজনে দু পাশ থেকে তাঁহাকে আটকাইতে লাগিলেন। আর্থার মালী ছোঁড়া একটু দূরে বেড়াতে ঠেস্ দিয়া দাঁড়াইয়া তামাসা দেখিয়া খুব হাসিতেছিল। স্বামীজী



## লণ্ডনে বিবেকানন্দ

মালী ছোঁড়াকে হাসিতে দেখিয়া কৌতুক করিয়া বলিতে লাগিলেন, ‘ওরে আমাদের চড়া দেখে মালী ছোঁড়া যে হাস ক’রছে, আরে হাস ক’রছিস্ ক্যান্?’ তাহার পর স্বামীজী সারদানন্দ স্বামীকে বলিতে লাগিলেন, “গাথ্ শরৎ ! তুই মোটা, তোর শিখতে আর পা চালাতে একটু দেয়ী হবে।” বর্তমান লেখকের দিকে নির্দেশ করিয়া বলিতে লাগিলেন, ‘এক পাগুলো খুব লম্বা লম্বা, এ খুব শিগ্গির শিখে ফেলবে।’ সারদানন্দ স্বামী একটু পরে নাগিয়া পড়িলেন। স্বামীজী আবার উঠিলেন, সেদিন মনটা খুব প্রফুল্ল ছিল, মৃদুস্বরে বাঙ্গালায় গান গাহিতে লাগিলেন—

“সাধের তরলী আমার কে দিল তরঙ্গে

ভাসল তরী সকালবেলা, ভাবিলাম এ জলখেলা,

মধুর বহিবে সমীর ভেসে যাব রঙ্গে।”

এবং মাঝে মাঝে সারদানন্দ স্বামীর সহিত হাসি তামাসা করিতে লাগিলেন এবং কখন কখন বা দেশের কথা জিজ্ঞাসা করিতে লাগিলেন। তখন তাঁহার গম্ভীর ভাব ছিল না। পূর্বতন ক্রীড়াপ্রিয় বালকের ছায়া হাসি তামাসা ও খেলাধুলা করিতে লাগিলেন,—যেন সমস্ত জগৎ ভুলিয়া গিয়া বাইক চড়াই তখন তাঁহার জীবনের প্রধান লক্ষ্য ছিল।

স্বামীজীর কলার ছিল সম্মুখদিকের বোতাম দেওয়া, ইহাকে সাধারণের কলার বলে। পাদ্রিদিগের কলারে ঘাড়ের পশ্চাৎদিকে বোতাম বন্ধ করিতে হয়। স্বামীজী যদিও ধর্ম-উপদেষ্টা ছিলেন, কিন্তু পাদ্রিদের কলার ব্যবহার করিতেন না, এবং গলায় টাইও দিতেন না। কারণ তাঁহার জামার গলার উপরটা কলারের কাপে কাপে থাকিত।

স্বামীজীর ঘড়িটি ছিল সোণার ও উপরকার ঢাকনিটির মাঝখানে একটু কাটা এবং কাঁচ দেওয়া ছিল। চেন্টা রেশমের ফিতা ছিল, তাহার

একদিকে ঘড়িটি আটকে রাখিবার জন্ত সোণার আংটা ছিল। মাঝখানে একটা সোণার চারকোণা লম্বা কড়া ( clasp ) এবং অপর দিক্‌টার ডগায় একটা সোণার চৌকোপানা আটকাইবার ঝায়গা ছিল। গাঁটকাটা শীঘ্র চুরি করিয়া লইতে পারিবে না। ফিতেটা ৬ ইঞ্চি লম্বা ও ১ ইঞ্চি চওড়া এবং বাঁ দিক্‌টার ভেষ্টের পকেটে রাখিতে হয়।

ভারতবর্ষে সাধারণতঃ দুই প্রকার ঘাস হইয়া থাকে, মুগ্ধো ও দুর্কা। গরম দেশ বলিয়া উদ্ভিদের বেশী তেজ হইয়া থাকে তজ্জন্ত মুগ্ধো ঘাসগুলি বড় বড় ও চওড়া হইয়া থাকে। কিন্তু ইংলণ্ড ঠাণ্ডা দেশ, ঘাসগুলি বেশ নরম ভেড়ার লোমের মত সরু সরু কোঁকড়ান হয়। বসন্তকাল, বরফ গলিয়া গিয়াছে সেইজন্ত মাঠের চতুর্দিকে খুব ঘাস ও গাছে নূতন পাতা বাহির হইয়াছে। বাঙ্গালা দেশে আমড়া গাছে যেমন আগে ফুল ধরে তাহার পর পাতা বাহির হয় ঠাণ্ডা দেশে সেইরূপ চেরী, আপেল প্রভৃতি ফল গাছে আগে ফুল বাহির হয় তাহার পর পাতা গজায়। খাড়া ডালে ফুল বেরুতে দেখলে ঠিক যেন একটা বিড়ালের ল্যাজের মত দেখিতে বড় বাহার হয়। গ্রামের মাঝখানে একটা বড় খালি জায়গা থাকে সেটা সাধারণের জায়গা। সেই ফাঁকা মাঠে গোটা কতক সেকেলে মোটা মোটা ওক্ ( Oak ) গাছ ছিল। ওক্ গাছের গোড়ার মাটিটা একটু উঁচু বোধ হইত, যেন মাটিটা সেখান থেকে গড়িয়ে আসছে আর কুটিকাটি না থাকাতে মনে হইত যেন ঝাড় দিয়েছে। ইংরাজদিগের গ্রামগুলি যথার্থ একটি ছবি—যেন মা লক্ষ্মী বিরাজ করিতেছেন।

মেইডেন্সহেড্‌ স্টেশন হইতে মাঠ ও গ্রামের মাঝখান দিয়ে একটা রাস্তা মিস্‌ মুলারের বাড়ীর দরজা পর্যন্ত আসিয়াছে এবং ইংলণ্ডের পল্লীগাম। আরো অগ্রসর হইয়া দুটি রাস্তায় বিভক্ত হইয়াছে। তথায় একটি কার্ডের সাইনবোর্ডে রেডিং এবং অক্সফোর্ড বা কেমব্রিজ

লগুনে বিবেকানন্দ

(এটা ঠিক এক্ষণে স্মরণ হইতেছে না) লেখা ছিল অর্থাৎ একটি পথ রেডিং নগরের দিকে আর অতীত অক্সফোর্ড বা কেমব্রিজের দিকে গিয়াছে। মাঠগুলি বাঙ্গালা দেশের মত সমতল নয়, ঢেউ খেলান, তজ্জন্ত যখন একটা লোক বাইক করিয়া গমন করে তখন তাহাকে দেখতে দেখতে মনে হয় যেন কোথায় লুকাইয়া পড়িল, খানিকক্ষণ পরে আবার বাহির হইয়া আসিল। গ্রামগুলি অতি পরিষ্কার ও স্বাস্থ্যকর স্থান। গ্রামের জল Pump করিয়া কি পাত্কে হইতে লয় সেটা ঠিক এক্ষণে স্মরণ নাই।

গ্রামের দুপুরবেলা খেয়ে দেয়ে অনেকেই গ্রাম্য যাজক বা পাদ্রির বাড়ীতে বাইয়া জটলা করে। পাদ্রি গিন্নী হইতেছেন গুরুত্বাকরণ, কাজেই স্ত্রীলোকেরা সেইখানে বসিয়া সুখ দুঃখের ও গ্রামের কথা চর্চা করে। কারণ গ্রামের পাদ্রি হইছেন মাতব্বর লোক, পুরুষ বাবাজীরা কাজকর্ম সারিয়া সন্ধ্যার সময় গুঁড়ীর দোকানে (public house) বসিয়া মজলিস করে—এক এক গ্লাস বিয়ার খায় ও গল্প করে।

মাঠে ভেড়া চরিতেছে। সকল ভেড়ার রং প্রায় সাদা, কালো ভেড়া প্রায় দেখিতে পাওয়া যায় না, এই জন্ত কালো ভেড়া (black sheep) একটা গালের কথা। নাহুস্ হুহুস্ টাপ্ টোপ্ ভেড়াগুলি মাঠে যখন চরে তখন দেখিতে অতি সুন্দর। গরুগুলির পিঠে কুঁদ বা কুকুদ (hump) নাই। শিং ভারতবর্ষের গরুর মত বড় হয় না, ছোট ছোট হয়। রং প্রায় শ্যামলী (dun colour) হয়। সাদা রংএর গরু খুব কম বলিয়া বোধ হইল। ভারতবর্ষের গরু খুব চালাক চতুর হয়, মুখের চেহারার দেখলে খুব তেজী বলিয়া বোধ হয় কিন্তু এদেশের গরু দেখলে বোকা বলে বোধ হয়। পিঠে কুঁদ নাই বলিয়া লাঙ্গল টানতে পারে না এইজন্ত এক জোড়া ভাল তেজী ঘোড়া দিয়ে লাঙ্গল টানে।

কটেজ বাড়ীর কিছুদূরে ক্ষেত ছিল। চাবারা লাঙ্গল দিচ্ছে, বব ব

গম বুনবে। চাষাদের পরিচ্ছদ হইতেছে পায়ে মোটা মোটা বুট তাহার তলায় বড় বড় পেরেক দেওয়া। একটা ভেলভেটিন বা মোটা খাজকাটা শক্ত কাপড়ের ইজের, হাঁটুর নীচেটা একটা বগলোস্‌ওয়ালা চামড়া দিয়া আঁটা। ভিতরে একটা পিরাণ ও ভেঁট আর উপরে একটা ভেলভেটিনের কোট এবং মাথায় একটা বড় felt-hat। এই ভেলভেটিনের কোট আর ঐ মোটা বুট জুতা বহুকাল পর্য্যন্ত টেঁকে। উইল করিয়া বাইলে পোত্র পর্য্যন্ত সেটা ব্যবহার করিতে পারে। গ্রামে চাষা মালীরাই বেশী থাকে। ইহারা বেশ বিনয়ী ও নম্র। আগন্তুক ভদ্রলোক দেখিলে বেশ সম্মান করিয়া কথা কয়। সহরে লোকের মত খটমটে নয়। গ্রামে ধোপার প্রথা নাই সেইজন্ত কাপড় ধোয়াই করিতে হইলে গ্রামের কোন গরীব স্ত্রীলোককে কাপড় দিতে হয়। সে নিজে ধুইয়া ইস্ত্রী করিয়া সময় মত দিয়া দেয়।

সকল গ্রামে রুটীর দোকান নাই। একটি বড় গ্রামে রুটীওয়ালা রুটী তৈয়ারী করিয়া গাড়ী করিয়া নিকটবর্তী সকল গ্রামে রুটী দিয়া বেড়ায়। দুগ্ধ, মাংস, ডিম, আনাজ-তরকারী সব এইভাবেই ছোট ছোট গ্রামে সরবরাহ করে। গ্রামের লোকদিগের সহিত অর্থাৎ চাষাদের সঙ্গে যদি একটু মিষ্টি করিয়া কথাবার্তা বলা যায় বা যদি পাইপের তামাক একটু তাহাদের দেওয়া যায় তা হ'লে তা হারা অত্যন্ত আপ্যায়িত হয় এবং বিশেষ সম্মান ও যত্ন করিয়া থাকে।

মিস্‌ মূলারের একটা বুড়ী ঝি ছিল, তাহাকে হাউস্‌ কিপার (House-keeper) বলে অর্থাৎ বাড়ীর সব কাজ কন্ঠ তাহাকে করিতে হইত। সাদা কথায় যাকে বলে জুতা সেলাই থেকে চণ্ডীপাঠ। তাহাকে রাখিতে হইবে, জুতা বুরুশ করিতে হইবে, ঘর ঝাঁট দিতে হইবে, খাবার পরিবেশন করিতে হইবে। কিন্তু একটা বুড়ী ঝি এই হামার-খামার কাজ করিত।

লগনে বিবেকানন্দ

ইংরাজদিগের ষাণ্ডলি খুব পরিশ্রম করিতে পারে। ভারতবর্ষের তুলনায় তিন চারিটি ষাণ্ডের কাজ একা করিতে পারে। এক্ষেত্রে রান্না খাইয়া স্বামীজী মাঝে মাঝে মুখ বদলাইতে ইচ্ছা করিতেন। একদিন স্বামীজী বলিলেন, “চ’, রান্না ঘরে গিয়ে রাঁধি গে, বেশ ঝাল্ ঝাল্ আলু-চচ্চড়ি বা আলুর-দম।” বর্তমান লেখককে সঙ্গে যাইতে দেখিয়া স্বামীজী নিষেধ করিয়া বলিলেন, “না রান্না ঘরে যাইতে নেই, গেলে এ দেশে বড় নিন্দে করে।” যাহা হউক, বেশ মাখন দিয়ে কাঁল মরিচ দেওয়া আলু-চচ্চড়ি রন্ধে নিয়ে স্বামীজী আসিলেন। সেই আলু-চচ্চড়ি একটু মুখে দিয়ে যেন ধড়ে প্রাণ আসিল। তখন সকলে বুঝিতে পারিল যে দেশের জিনিসটা কি মিষ্ট ও আদরের। নানাবিধ রাজভোগ ফেলে দিয়ে কাঁলমরিচ দিয়ে আলুচচ্চড়ি যেন ঢের উপাদেয় বোধ হইল। একেই বলে দেশানুরাগ বা স্বদেশ-প্রীতি।

স্বামীজী সারদানন্দ স্বামীকে বলিলেন, “শ্রীশ্রীরামকৃষ্ণের ইংরাজীতে একটা সংক্ষিপ্ত জীবনী লেখ ত?” মিস্ মুলার পত্র লিখিয়া প্রঃ ম্যাক্স-মুলারের সহিত বন্দোবস্ত করিয়াছেন যে স্বামীজী এক নির্ধারিত দিনে অধ্যাপকের সহিত সাক্ষাৎ করিতে যাইবেন। সারদানন্দ স্বামী ব্যস্ত সমস্ত হইয়া যথেষ্ট পরিশ্রম করিয়া শ্রীশ্রীরামকৃষ্ণদেবের একটি সংক্ষিপ্ত জীবনী লিখিলেন। মিস্ মুলারের বৈঠকখানা ঘরে বসিয়া সারদানন্দ স্বামী সেইটি পড়িলেন ও স্বামীজী শুনিয়া একটু আধটু বদলাইয়া দিলেন, কিন্তু লেখাটা পছন্দ করিলেন। তাহার পরদিন সেই সংক্ষিপ্ত জীবনীটি লইয়া স্বামীজী, সারদানন্দ স্বামী ও মিস্ মুলার অধ্যাপকের সহিত সাক্ষাৎ করিতে গেলেন। অধ্যাপক ম্যাক্সমুলার যে শ্রীশ্রীরামকৃষ্ণদেবের জীবনী লিখিয়াছেন সেই লিখিত জীবনের ঘটনাবলীর অনেক অংশ সারদানন্দ স্বামীর রচনা হইতে গৃহীত হইয়াছে ; এমন কি সেই ভাষাও স্থানে স্থানে রহিয়া গিয়াছে।

একদিন বেলা ১১ টার সময় মিস্ মুলার ও স্বামীজী একটা গোল

টেবিলের ধারে বসিয়া আছেন। টেবিলের উপর বেশ রং-চঙে নূতন প্রকাশিত Stanley লিখিত, “How I found Living Stone” নামক একখানি বই রহিয়াছে। বর্তমান লেখক গিয়া তথায় বসিলেন এবং বইখানি লইয়া দেখিতে লাগিলেন, পরে পড়িবার ইচ্ছা প্রকাশ করিলেন। মিস্ মুলার বলিলেন, ‘বইখানি কাহাকেও দিবে না। বই কাহাকেও দিব না এই স্থির করিয়াছি। বই লইয়া গেলে কেউ ফেরৎ দেয় না।’ স্বামীজী বলিলেন “না, মহিম বই ফেরৎ দিবে।” মিস্ মুলার বিরক্ত হইয়া বর্তমান লেখককে বই পড়িতে দিলেন এবং বিরক্তির সহিত কথা বলিতে লাগিলেন, “ব্যাটা ছেলেকে কখন বই পড়িতে দিতে নাই, নিয়ে গেলে আর তারা কখন ফেরৎ দেয় না, পুরুষদের এটা ভারি দোষ। আর মাগীদের কথা যদি বল তো নিডিল বক্স, থিম্বুল (thimble) ও কাঁচি দেখতে পেলেই সুবিধামত নিয়ে স’রে পড়বে। মাগীদের সম্মুখে নিডিল বক্স, কাঁচি এবং অগ্ন্যস্ত্র জিনিস সব সময় লুকিয়ে রাখতে হয়।” স্বামীজী শুনিয়া ব্যঙ্গচ্ছলে হাসিতে হাসিতে জিজ্ঞাসা করিলেন, “কেন, তাদের বাড়ীতে কি কাঁচি নিডিল বক্স সব থাকে না?” মিস্ মুলার উত্তেজিত হইয়া বলিলেন, ‘থাকে না কেন? মাগীদের ঐ সব তো রোগ, এই জন্ত মাগীরা এলে অত ভয় করে।’ স্বামীজী এই সকল কথা শুনিয়া হাসিতে লাগিলেন। বর্তমান লেখক আর দুদিন পিন্‌কিনিস্ গ্রীনে থাকিয়া লণ্ডনে ফিরিয়া আসিলেন।

মিস্ মুলারের গ্রামের বাড়ী হইতে সকলে আসিয়া সাউথ-বেল-গ্রেভিয়াতে লেডি মাগু’সনের ৫৭ নং সেন্টজর্জ্জ্‌ ষ্ট্রীট বাড়ীতে পৌছিলেন।

রাস্তার পার্শ্বে একটি ছোট বাগান বা পার্ক ছিল,  
 হ্যানাভার  
 স্কোয়ারের বর্ণনা। তাহার নাম “হ্যানাভার স্কোয়ার।” এই স্থানটি  
 ভিক্টোরিয়া স্টেশন ও টেমস্‌নদীর প্রায় মধ্যে এবং পিম্-  
 লিকো পাড়ার অনতিদূরে। বাড়ীটি ছিল পাঁচতলা। বাড়ীতে প্রথম ঢুকিয়া

একটি প্যাসেজ। তাহার পর ডান দিকে বৈঠকখানা ঘর, ভিতরদিকে যাইলে ডান দিকে ছোট দুই একটি ঘর ছিল। সেই ঘরের একটিতে স্বামীজী শয়ন করিতেন ; তাহার পরেই ছোট একটি পাইখানা ছিল। পাইখানা ঘরটার মেজেতে ভাল করিয়া গাল্চে মোড়া ছিল এবং স্বামীজী শোচে বসিয়া বড় খুখু ফেলিতেন সেইজন্ত স্বতন্ত্র একটা চীনা মাটির বাটি তথায় রাখিয়াছিলেন। দরজায় ঢুকিয়া ভিতরদিকে একটা কাঠের সিঁড়ি, সেইটি দিয়া পোতালায় যাওয়া যায়। কাঠের সিঁড়িতে খানিকটা উঠিয়া একটা বড় কাঠের ছাত বা চাতাল (landing place), তাহার পর আবার উঠিয়া সম্মুখে একটা বড় ঘরে যাওয়া যায়। এই ঘরটা অতি সুন্দরভাবে সজ্জিত, এইটি ছিল লেকচার বা ড্রয়িং রুম। ঘরটি দুই ভাগে বিভক্ত। প্রথম অংশটি ছোট এবং অপর অংশটি নীচেকার বৈঠক-খানা ঘর ও গলির ঠিক উপরে সেইজন্ত সেইটি বড় ছিল। ঘরের দুটি অংশের মধ্যে লোহার ধান দিয়া ছাতটা রাখায় একটা ঘর বলিয়া বোধ হইত। ঘরটিতে ঢুকিয়া অপর পার্শ্বে অর্থাৎ রাস্তার দিকে একটা টেবিল ও একটা চেয়ার থাকিত, সেইখানে দাঁড়াইয়া স্বামীজী বক্তৃতা করিতেন। স্বামীজীর দাঁড়াবার স্থানের ডানদিকে ও আগন্তুকদিগের বাঁ দিকের দেওয়ালের দিকের মাঝখানে একটা আতসীখানা ছিল ; এই আতসীখানার রাস্তারদিকের কোণেতে দেওয়ালের দিকে টেবিল করিয়া ও ঘরের দিকে পিছন করিয়া গুডউইন স্কিপ্র লিপিতে (short-hand) সমস্ত লিখিয়া যাইতেন। ঘরটার ভিতর প্রায় দেড়শত লোক বসিতে পারিত। সিঁড়ি থেকে উঠিয়া ঘরে ঢুকিয়া ভিতরদিকের বাঁ দিকে কয়েকটা আলমারী পুস্তক-পূর্ণ ছিল এবং ভিতরকার দেওয়ালের দিকে একখানি বড় স্ত্রীংএর শোফা ছিল।

কাঠের সিঁড়ি দিয়া উপরে উঠিয়া আর একটি চাতাল দিয়া গেলে

লেকচার ঘরের উপরে আর একটি ঘর ছিল। এই ঘরটিতে মিস্ মুলার বাস করিতেন। দোতলা ও তেতলার ঘরের মাঝখান ও ভিতরকার উঠান দিয়া স্নানের ঘর ছিল। একটি এনামেলের তৈয়ারী বড় স্নানীয় জলাধার (bath tub) ছিল, তাহাতে গরম ও ঠাণ্ডা জলের দুটি কল ছিল। স্নান করিবার সময় ইচ্ছামত ঠাণ্ডা ও গরম জল মিশাইয়া লইত। মেঝেটি কর্কের চাদর পাতা এবং একখানিতে বিন্দু বিন্দু করা পিঁড়ের মত ছিল। নথ ঘসিবার জন্য একটি ব্রস এবং পিঠি ঘসিবার জন্য লম্বা হাতলওয়ালা ব্রস। দেওয়ালে আঁশি ও চুল পরিষ্কার করিবার জন্য চিরুণী ও ব্রস ছিল এবং ঘরের এক পাশে একটি (ভিতরটা চিনা মাটির এবং বাহিরটা ভাল পালিস করা) কাঠের কমড এবং পিঠে ঠেস্ দিবার জন্য চামড়ার গদি ও পাতলা কাগজের রোল ছিল। ঘসিবার স্থানটা বেশ পালিশ করা। দাঁত মাজিবার, মুখ ধুইবার স্বন্দোবস্ত (wash stand) ছিল। মেঝেটা ভাল রঙিন টালিতে মোড়া ছিল। বাড়ীর মেঝের নীচেতে (ground floor) রান্না ঘর, ভাঁড়ার ঘর ও ঝি চাকরদের থাকিবার স্থান ছিল। উত্তরের সঙ্গে একটি বড় বয়লার অর্থাৎ দেওয়ালে লোহার দুটি নল দেওয়া বয়লার (boiler) ছিল এবং তার সঙ্গে উপরকার Bath tub এর পাইপের সহিত যোগাযোগ ছিল। রান্না থেকে জল তাহাতে আসিয়া পড়ে এবং জলটা তথায় গরম হয় এবং রাঁধিবার সময় কলটা ঘুরাইলে গরম জল পাওয়া যায়। এই বয়লার হইতে গরম জল নল দিয়া স্নান ঘরে উঠিয়াছে। ঠাণ্ডা জলেরও এই প্রকারের স্বন্দোবস্ত আছে। উত্তর ধরিলে জল গরম হয় এবং রান্নায় জল আসিলেই সেই গরম জল চাপে উপরে উঠে; তখন উপরে কল খুলিলেই আপনা-আপনি জল পড়ে। এইরূপ কল বড় মাস্তবের বাড়ীতে থাকে, গৃহস্থের বাড়ীতে এমন হয় না, তাহার উপর অধিকাংশ বাড়ীতে স্নানের স্বন্দোবস্ত



লগুনে বিবেকানন্দ

নাই। পাড়ায় একটি সাধারণের স্নানাগার আছে তথায় সকলে স্নান করে, তাহাকে public bath house বলে।

পূর্বকথিত সিঁড়ি দিয়া আর খানিকটা উঠিলে উপরে একটি বড় ঘর ছিল। ঘরেতে দুই তিন জন শয়ন করিতে পারে এমন একটা লোহার খাটিয়াতে বিছানা ছিল।

রাস্তারদিকের দেওয়ালের নিকট প্রকাণ্ড একটি মাটির জিনপরান দোলনা-ঘোড়া ( Rocking horse ) ছিল। ছোট ছেলে মেয়ে তাহাতে দোল খায়। ঘরের মাঝে একটি গোল টেবিল ও তিন খানি চেয়ার ও একটি আতসীখানা ছিল। রাস্তার দিকের দেওয়ালের নিকট cupboard বা টানাওয়ারা দেরাজ ছিল, তাহার উপর আরসি চিরুণী থাকিত।

এই ঘরের উপরে অর্থাৎ পাঁচতলায় একটি লম্বা টানা ঘর ছিল। ছাতটা ছদিকে গড়ান, ঘরটির মধ্যস্থানে দাঁড়াইলে ছাতটা মাথায় ঠেকে না কিন্তু ধারে বাইলে মাথায় ঠেকে, ইহাকে বলে Garet। ঝি চাকরের কাপড়-চোপড় ও বাড়ীর ভাঙ্গাচোরা জিনিস এইখানে থাকে। আলোর জন্ত মাঝে মাঝে ফোকর আছে এবং একটি lumber room অর্থাৎ ভাঙ্গাচোরা জিনিস রাখিবার ঘর ছিল।

বাঁ-দিকে সিঁড়ির নীচেতে অন্ধকার দিয়া গোটা কতক ধাপ নামিয়া মেঝেরতলায় (ground floor) ঘর পাওয়া যায়। এই ঘরগুলি ভিতরকার উঠানের সহিত এক লেভেলের। তথায় রান্নাঘর এবং আর দুই তিনখানি ঘর ছিল। ভিতরে একটি উঠান ছিল। এই হইল সমস্ত বাড়ীর বর্ণনা।

ফুটপাতের নীচেতে কয়লা রাখিবার ছোট ছোট ঘর থাকে এবং ফুটপাতের উপর লোহার কড়াওয়ারা গোল গোল ঢাকনি থাকে। ঢাকনিটা

তুলিয়া গৰ্ভ দিয়া কয়লা ঢালিয়া দেয় সেইজন্ত বাড়ী কয়লার গুঁড়াতে অপরিষ্কার হয় না।

রাত্রি ষটার পর সারদানন্দ স্বামী ও বর্তমান লেখক চারিতলার বড় ঘরটিতে শুইতে গেলেন। রাস্তারদিকের দেওয়ালের নিকট থাকওয়ালা একটা দেরাজ ছিল। দেরাজের উপর ঘোরান যায় এইরূপ ফ্রেমওয়ালা একখানি আয়না, ক্রস ও চিক্রণী ছিল। সারদানন্দ স্বামী ও বর্তমান লেখকের জিনিস সব স্বতন্ত্র। সারদানন্দ স্বামী গলার কলার খুলিয়া আলমারীর উপরে রাখিলেন। তিনি “টাই” (tie) পরিতেন না, পাশী-কোটের গায় লম্বা কাল কোট পরিতেন। গলার কাছে বোতাম দেওয়া ছিল। বর্তমান লেখক পুরা ইংরাজী পোষাক পরিতেন এই জন্ত তিনি টাই ও কলার আশীর পার্শ্বে রাখিলেন। সারদানন্দ স্বামী জুতা মোজা ও ট্রাউজারস্ ইত্যাদি খুলিয়া স্লীপিং সুট (sleeping suit) পরিলেন অর্থাৎ ফ্লানলের একটা ঢিলা পায়জামা ও একটা কোট পরিলেন। পায়জামাকে বান্ধালা দেশে Pantaloons বলে কিন্তু ইংলণ্ডে ওকথা বলিলে কেহ বুঝিতে পারে না। Pantaloons অর্থে ভাঁড় বা নাচওয়ালা বুঝায় এইজন্ত ট্রাউজারস্ বলে। Pantaloons হইতেছে ফ্রেঞ্চ কথ্য, অপভ্রংশ হইয়া এ দেশে চলিতেছে। ইজের বাঁধিবার গলার যে ফিতা থাকে তাহাকে বাংলাদেশে গ্যালিস্ বলে কিন্তু লগুনে গ্যালিস্ বলিলে বুঝিতে পারা যায় না, তাহারা ব্রেজেজ্ বলিয়া থাকে। জুতার সাধারণ নাম বুট (Boot) ও টুপির সাধারণ নাম হ্যাট (Hat)। বাহা হউক সারদানন্দ স্বামী ও বর্তমান লেখক দুজনে কাপড় ছাড়িয়া বিছানার কাপড় (sleeping suit) পরিলেন। এক কপাটের দরজা, সেটা সদা সৰ্ব্বদা ডেজাইয়া রাখিতে হয়। সারদানন্দ স্বামী নিরিবিলি পাইয়া লম্বা করিয়া পা ছড়াইয়া আলমারীর স্মুথের গালিচার উপর বসিয়া বর্তমান লেখককে

বলিলেন, ‘ওহে, একটু আরাম ক’রে বোস, একটু পা ছড়িয়ে হাঁপ ছাড়ি। তাহার পর ছ্যাক্‌ড়া গাড়ীর ঘোড়া বিকেল বেলা গাড়ী থেকে মুক্ত হয়ে যেমন ক’রে মাটিতে শুয়ে এদিক ওদিক গড়াগড়ি দেয়, সারদানন্দ স্বামীও তদ্রূপ চিংপটাং হইয়া গড়াইয়া লইলেন এবং বর্তমান লেখককে বলিলেন, ‘একবার গড়িয়ে নাও হে, দেখ না কি আরাম।’ খানিকক্ষণ পিঠে শুয়ে হাঁটু ঢাট উঁচু করিলেন এবং ক্রীড়াবৃত্ত বালকের তায় খুব অঙ্গভঙ্গী করিলেন, তাহার পর চ্যাপটানি খাইয়া বসিলেন। বর্তমান লেখকও আদেশমত সবই অল্প বিস্তর অনুকরণ করিলেন। সারদানন্দ স্বামী বলিতে লাগিলেন, ‘বাবা! চব্বিশ ঘণ্টা আটে-কাটে বন্ধ থাকা একি আমার সাধ্য! অষ্টবজ্রে বন্ধন করে পা ঝুলিয়ে ব’সে থাকা। এ বাপু নরেনের সাধ্য, নরেন করুক গে! নরেনের হাঁফের পড়ে প্রাণটা আমার গেল। কোথায় বাড়ী ছাড়লুম মাধুকরী কর্কো, নিরিবিলিতে জপ ধ্যান কর্কো না এক হাঁফের ফেলে দিলে। না জানি ইংরাজী না জানি কথাবাক্য কইতে অণচ তাঁইশ হচ্ছে লেক্‌চার কর লেক্‌চার কর! আরে বাপু আমার পেটে কি কিছু আছে? আবার নরেন যা রাগী হয়েছে কোন্ দিন যেরে বোসবে। তা চেষ্টা কর্কো, দাঁড়িয়ে উঠে যা আসবে তাই একবার বোলবো যদি হয় ত ভাল, না হয় এক চোঁচা মারবো, একেবারে দেশে গিয়ে উঠবো। সাধুগিরি কোর্কো সে আমার ভাল! কি উপদ্রবেই না পড়েছি! কি ঝক্‌মারির কাজ। এমন জান্লে কি এখানে আসতুম? শুধু নরেনের অস্থখ শুনে এলুম। নরেন আর গঙ্গাধরটা সারাদিন বোকেই তো, মুখের আর বিরাম নেই! নরেন কিনা উকিলের বেটা আর গঙ্গাধর ভাটের বেটা তাই সারাদিন বোচ্ছে। কান ঝালাপালা হয় সেইজন্তে আমি পালিয়ে আসি। আচ্ছা ওদের মুখ কি ব্যথা করে না, মাথা ধরে না,’ ইত্যাদি বলিতে লাগিলেন।

এইরূপ পুরো ব্যঙ্গচ্ছলে সারদানন্দ স্বামী কথা বলিতেছেন এমন সময় দরজায় ঢোকা মারার আওয়াজ হইল।  
 উদার-চরিত্র  
 গুড্‌উইন। সারদানন্দ স্বামী স্তব্ধ হইয়া বলিলেন, 'come in, please ?' ইংরেজীতে ভদ্রভাবে কথা কহিতে হইলে সকল কথার সহিত please বলিতে হয় এবং please না বলিলে অতি রূঢ় ভাষা হয়। সারদানন্দ স্বামীর আদেশ পাইয়া গুড্‌উইন ঘরে প্রবেশ করিলেন এবং আত্মসীমানার নিকটে তাঁহার চামড়ার গ্লাডষ্টোন ব্যাগ্ ও আর দু' তিনটি ছোট ব্যাগ্ রাখিলেন। সেই ব্যাগেতে তাঁহার সমস্ত জিনিস পত্তর থাকিত। গুড্‌উইনের বয়স তখন ২৩২৪ বৎসর হইলেও বরাবর কষ্টে ও উদ্বিগ্নে প্রতিপালিত হইয়াছিলেন বলিয়া তখন তাঁহার ৩৫৩৬ বৎসর বয়স বলিয়া মনে হইত। গুড্‌উইনের প্রাণটা বড় সরল ও সরস ছিল। ব্যাগ্ হইতে তাঁহার sleeping suit ও আর দু' একটি জিনিস বাহির করিয়া সারদানন্দ স্বামীর সহিত মিষ্টালাপ শুরু করিলেন। সমস্ত দিন কাজে ব্যস্ত ছিলেন সেই জন্ত কাহারও সহিত ঝগড়া করিবার অবকাশ পান নাই। কাহারও সহিত ঝগড়া করিতে না পারিলে তাঁহার মন সুস্থ থাকিত না। এক্ষণে সময় পাইয়া বেশ ঝগড়া আরম্ভ করিলেন। গুড্‌উইন সারদানন্দ স্বামীকে বলিতে আরম্ভ করিলেন, 'You Cooky Swami, Devil Swami, Blackie Swami, তুমি চোখ বুজে বুজে কেবল ধ্যান কর আর ভাব যে কখন খাবার আসবে, কখন খাবার ঘণ্টা বাজবে' ইত্যাদি বলিতে লাগিলেন। সারদানন্দ স্বামীও হাসিতে হাসিতে তাহার জবাব দিতে লাগিলেন। এইরূপে ছজনায় কিছুক্ষন হাসি তামাসার কৌদল চলিল। তাহার পর গুড্‌উইন তাঁহার জিনিস পত্তর লইয়া গ্যারেট ঘরে গুহিতে গেলেন। গ্যারেট ঘরটি অনেক দিন ব্যবহার হয় নাষ্ট বলিয়া সেই ঘরে অনেক পিছু (flea) ছিল।

## লগনে বিবেকানন্দ

গুড্‌উইন দরজাটি ভেজাইয়া দিয়া চলিয়া গেলে উভয়ে বিছানায় শুইলেন এবং সারদানন্দ স্বামী বলিতে লাগিলেন, ‘আরে ভাই, আমরা ত গরীব দেশের লোক, মেঝেতে মাছুর পেতে রাত কাটাই। আরে প্রথম যখন এ দেশে এসে বিছানায় শুতে গেলুম তখন দেখি না ধব্ধবে বিছানা একটার উপর আর একটা, কোনটা গায়ে দোব আর কোনটার শোব কিছুই ঠিক কর্তে পারলুম না। অবশেষে হাঁটু দুটি শুড়িয়ে শুলুম। শীত ধলে চাদর মুড়ি দিয়ে শুয়ে রইলুম। তা কি জানি বিছানার ভেতর কত কেরামুতী রয়েছে।’ বর্তমান লেখকও সায় দিলেন যে একটু শীত ধরলে সব তুলে বিছানার ভেতরে ঢুকে বেশ গরম হয়ে শুয়ে থাক। কারণ বসন্তকালে বিম্বিম্ব রুষ্টি হচ্ছে। বাঙ্গালা দেশের পৌষ বা মাঘের সময়।’ এইরূপ কথাবার্তা কহিতে কহিতে দু’জনায় শুইয়া পড়িলেন। একটা লোহার স্প্রিংওয়াল খাটিয়া ছিল তাহাতে দুইজনায় পাশাপাশি কঞ্চল মুড়ি দিয়া শুইয়া রহিলেন।

বিছানা হইতেছে, একটি তারের স্প্রিংওয়াল খাটিয়া। তাহার উপর বড় কুঁচানো বা ঐ রকম একটি মোটা ক্যান্বিশের গদি, তাহার উপর পালকের হউক বা তুলার হউক মোটা তোষক। বাঙ্গালা দেশে তোষকের মাঝে সেলাই করে, ইহা তদ্রূপ নয়। কাপড়ের খোলার ভিতর তুলো বা পালক দেয়। প্রত্যেক দিন বিছানা করিবার সময় উন্টে পান্টে দেয় ও চোস্তু করিয়া দেয়। তাহার উপর একটি বড় চাদর দেয়। মাথার বালিস বেশ লম্বা চওড়া। তবে পাতলা পাতলা একটির উপর আর একটি দেয়। বাঙ্গালা দেশে একটু উঁচু করিয়া শোওয়া অভ্যাস সেইজন্ত প্রথম প্রথম মাথা ঝুলিয়া পড়িতেছে বলিয়া মনে হয় তারপর অভ্যাস হইয়া যায়। বিছানার উপরকার চাদরের উপর অপর একখানি চাদর দেয় তার উপর দু’একখানা কঞ্চল দেয় এবং এই কঞ্চলের উপর এক বড় সৃজনীর চাদর

## লগুনে বিবেকানন্দ

পাতিয়া দেয়। অর্থাৎ কঞ্চল ছুঁখানার যেন ওয়াড় দেওয়া হইল। শয়ন করিবার সময় কঞ্চলের নীচেকার চাদর তুলিয়া বিছানার উপর শুইয়া চাদর মোড়া কঞ্চল দিয়া গলা পর্য্যন্ত ঢাকিয়া রাখিতে হয়। লোহার খাটিয়ায় কালো ফ্রেম দেখিতে খারাপ হয় সেইজন্য চারিদিকে একটা ঝালর করিয়া ঝুলাইয়া দেয় এবং নীচে চাকাওয়ালা একটি পোরসিলিংএর বাটা থাকে। রাত্রিতে প্রস্রাব পাইলে তাহাতে ত্যাগ করিতে হয়। নচেৎ অত্র প্রস্রাব করিতে গেলে বৃকে ঠাণ্ডা লাগিয়া যাইতে পারে।

## তিন

সকালবেলা ৮টার সময় স্বামীজী, সারদানন্দ স্বামী, মিস্ মূলার ও বর্তমান লেখক আহাৰ করিতে বসিলেন। কৃষ্ণমেনন্ উইলিয়ম হোয়াইটলির দোকান হইতে তিনটি খুব কচি কাঁচা লঙ্কা আনিয়াছিল। সব হইয়াছে, তাই ঝাল নাই, কেবলমাত্র একটু গন্ধ আছে। তিনটির প্রত্যেকটির দাম এক শিলিং করিয়া। তখন ১৯১০ টাকায় পাউণ্ড বা গিনি ছিল। স্বামীজী লঙ্কা খাইতে বড় ভালবাসিতেন সেইজন্ত কৃষ্ণমেনন্ অনেক দোকান খুঁজিয়া সব মাত্র তিনটি পাইয়াছিলেন। লঙ্কাকে কায়েন পেপ্পার (Cayne Pepper) বলিয়া থাকে চিল্লি (Chilli) বলিলে কেহ বুঝে না। স্বামীজী আহাৰ করিতে করিতে একটি লঙ্কা খাইয়া ফেলিলেন। সারদানন্দ স্বামী ও বর্তমান লেখকেরও কাঁচা লঙ্কা দেখিয়া খাইতে বড় লোভ হইল কিন্তু দামের কথা শুনিয়া হাত তুলিয়া লইলেন। ষ্টার্ডিও সঙ্গে খাইতে বসিয়াছিলেন কিন্তু গুড্‌উইন অথ ঘরে খাইতেছিলেন। মেনন আসিয়া ডান-দিকের দেওয়ালের নিকট চেয়ারে বসিয়া রহিল। বর্তমান লেখকের খাইতে খাইতে টোষ্ট বা সেকা রুটী আবশ্যক হওয়ায় তিনি মূছ ও নম্রস্বরে রুটীর টুকরা চাহিলেন। মিস্ মূলার বুড়ী ওমনি রাগিয়া উঠিলেন, “অমনভাবে কথা কহিলে কেন? We are not cruel people? ভয়ে ভয়ে অমন করে কথা কহিলে কেন?” এই তাহার বকুনি চলিল! স্বামীজী বলিলেন, “ভারতবর্ষে ছোট ভাই বড় ভায়ের সাম্নে কোন জিনিস চাইবার বেলা নম্রভাবে কথা কহিয়া থাকে।” মিস্ মূলার আবার ফেপিয়া উঠিয়া বলিতে লাগিলেন, “এ তোমার ভারতবর্ষ নয়! এ ইংলণ্ড, এখানে বড় ভাই ছোট ভাই সব

সমান।' আর কোন কথা বলা অবিবেচনা বুঝিয়া সকলেই নিজ নিজ খালায় নজর রাখিয়া আহার করিতে লাগিলেন ; তবে মিস্ মুলার বুড়ী খামে ।

সকলে কাফি খাইতে লাগিলেন । মিস্ মুলার একটা জাপানী বাটিতে গরম জল ঢালিলেন এবং ঝাঁজরিওয়ালা ছোট ছেলের ঝুম্‌ঝুমির মত হাতলওয়ালা একটি জিনিস লইলেন । ঝুম্‌ঝুমির যেখানে কোটা থাকে তা'র ঢাক্‌নি খুলিয়া দিয়া জাপানী চা বা গ্রীন্‌ টি ভরিয়া দিয়া ঢাক্‌নিটি আবার টিপে বন্ধ করিলেন । সেই জিনিসটি রূপার ছিল । হাতলটা ধরিয়া জাপানী চায়ের বাটিতে গরম জলে ডুবাইয়া মাঝে মাঝে নাড়া দিতে লাগিলেন । খানিকক্ষণ পর বাটির সমস্ত জলটা বেশ লাল হইয়া উঠিল এবং তাহাতে চুধ চিনি মিশাইয়া খাইতে লাগিলেন এবং যতটা অশ্রু রাখিলেন ।

প্যাসেজ দিয়া ঢুকিয়া ডান দিকে একটি ঘর । ঘরে ঢুকিয়া বাঁদিকে একটি ক্যাপ বোর্ড, নীচে একটি কপাটওয়ালা তিন-তাক দেওয়া আলমারী । উপরে বেশ বাহারি ছোট গরাদে দেওয়া কাচের গ্লাস রাখিবার স্থান । ঘরের মাঝখানে গোল টেবিল ও চারখানি চেয়ার । ঘরে ঢুকিয়া ডান-দিকের দেওয়ালের নিকট ঘাসের বিলুনি চারিখানি 'উইকার চেয়ার।' দরজার সম্মুখে আতসীখানা, ইহার নীচে লোহার গরাদে দেওয়া একটা বেড়া থাকে সেটাকে ফেণ্ডার ( Fender ) বলে । আতসীখানার দিক সম্মুখ করিয়া ডান-দিকের কোণে জাপানী একখানি বেতের স্‌থাসন ( easy chair ) ছিল । স্বামীজী তথায় বসিতেন এবং ষ্টার্ভিও ছ'এক দিন বসিয়াছিলেন । অপর কেহ তাহাতে বসিতেন না । স্বামীজীর বসিবার বাঁদিকে সেক্রেটারিয়েট টেবিল ছিল, উপরটা বর্তুলাকার ঢাক্‌না দেওয়া, ইচ্ছা করিলে নামাইয়া চাবি দেওয়া যায় । ঘরের ছাতের উপরটা



সিলিং ( Ceiling ) দেওয়া, পদ্ম ফুল আঁকা। সিলিংটা শোন, পাট, চূণ ইত্যাদি দিয়ে একটা কাদা ( paste ) করে খুব বড় ছাঁচে জমিয়ে দেয় ও একটা কড়ি কাঠে ঘেরে দেয়। যেন একটা রং বেরঙের চূণকাম করা কেছিস। সেই সিলিংএর মাঝখানে একটা ঝাড় ছিল। বাড়ীতে ইলেক্ট্রিক আলো ছিল না, গ্যাসের ঝাড়ে গ্যাস জ্বলিত অথবা ষ্টার্ভি বাতি আনিয়া ঝাড়ের ডালটা সাজাইয়া দিতেন।

আহারের পর স্বামীজী নিজের স্নানসনে গিয়া বসিলেন। কখন বা পা ঝুলাইয়া কখন বা জুতা সমেত এক পায়ের উপর আর এক পা রাখিয়া দিবি বাঙ্গালী ধরণে বসিতেন। একটি চেঁরী কাঠের গুড়ি, তার মাঝখানে পাইপে তামাক রাখিবার গর্ত, তার ধারে ফুটো করিয়া লম্বা একটা পাইপ ছিল। সেইটি স্বামীজীর প্রিয় পাইপ ছিল, তাহাতে তামাক দিয়া লম্বা পাইপে বেশ টানিতেন।

ষ্টার্ভি, মেনন, সারদানন্দ স্বামী ও বর্তমান লেখক দেওয়ালের দিকে ষ্টাডি ও মেননের চারিখানি চেয়ারে বসিলেন। মিস্ মুলার নিজের ঘরে সহিত স্বামীজীর চলিয়া গেলেন। স্বামীজী ষ্টার্ভির সহিত কথা কহিতে কথোপকথন। লাগিলেন। স্বামীজী বলিলেন, ‘দেখ, আমি ভারতবর্ষে

যখন ঘুরে বেড়াইতুম তখন আমার শুধু পা, গারে সামান্য একটা গা ঢাকা কাপড়। একদিন আমেদাবাদের ট্রেনে করে যাচ্ছি, সেই ট্রেনে কতকগুলি থিয়োজফিষ্ট লোক কুতুমিলালের গল্প কর্তে লাগলো। তাদের পেটে যত আজগুবি গল্প ছিল সব বলতে আরম্ভ করিল। আমার পেটে তখন ছ’একদিন কিছু জোটেনি, ক্ষিদেয় দেহ অবসন্ন। আমি তো চুপ ক’রে বসে তাদের যত সব আজগুবি কথা শুনতে লাগলুম। আমার গেকুরা পরা দেখে একজন জিজ্ঞাসা করিলেন, ‘মহাত্মা কোথা থেকে আসছেন?’ আমি তার কিছু আগে হরিদ্বার থেকে আসছি। আমি বলি, ‘আমি

হরিদ্বার থেকে আসছি, আমি রম্ভা সাধু।’ এই তো আমাকে ধল্লো আপনি নিশ্চয় কুতমিলালকে দেখেছেন। আমার তখন ক্ষুধায় প্রাণ ওষ্ঠাগত। আমিও তাদের আজগুবি গল্পের সঙ্গে মিশে গিয়ে বল্লুম, ‘কুতমিলালের কথা বোলবেন কি এই কয় দিন আগে কুতমিলালের ভাণ্ডারায়ে গেছলুম। সে কি ব্যাপার! ইয়া বড়া বড়া লাড্ডু (নিজের প্রকাণ্ড হাত দেখাইয়া) আর কত যে সাধু ভোজন করছে তার ইয়ত্তা নাই। সে কি ব্যাপার তা আর আপনাদের কি বোলবো’ এইরূপ কথা আমিও তাদের বলতে লাগলুম। আমার কথা শুনে তাদের ঠিক বিশ্বাস হ’লো। তখন আমার খাতির দেখে কে! তাড়াতাড়ি আমাকে খাবার এনে খাওয়ালে। খেয়ে দেয়ে আমার শরীর খখন স্তস্ত হ’লো তখন আমি তাদের গাল পাড়তে লাগলুম, ‘তোরা লেখাপড়া শিখে ধিওজফিষ্টদের বিশ্বাস করিস?’ যত সব mystery monger আর miracle hunterএর দল।’ ইত্যাদি। তারা বললে আপনি যে বলেন। আমি ওসব ঠাট্টা করে বলছিলাম, এই বলিয়া স্বামীজী উত্তেজিত হইয়া আপনার পাইপে এক একবার দম্ মারিতে লাগিলেন ও ষ্টার্ভির সহিত কথা কহিতে লাগিলেন। পুনরায় উঠিয়া ফেণ্ডারে তামাকগুলি উণ্টে ফেলে দিলেন। আবার রবারের পাউচ বা তামাকের ব্যাগ হইতে তামাক বাহির করিয়া তামাক ভরাইলেন। প্রথম বারে যে তামাক ফেলিয়া দিলেন তাহা একেবারে পোড়ে নাই; উত্তেজিত হইলে মানুষের যেমন হয় তেমনি হইয়াছিল। স্বামীজী আবার তামাক টানিতে লাগিলেন ও ধিওজফিষ্টদের কথা বন্ধ করিয়া দিলেন।

তাহার পর মুছ মুছ হাসিতে হাসিতে ও তামাক টানিতে টানিতে যেননের দিকে তাকাইয়া বলিতে লাগিলেন, “দেখ, যখন আমি যেননের দেশটা ঘুরে বেড়াছিলাম তখন ওদের দেশে এক বীভৎস ব্যাপার দেখে-

## লগনে বিবেকানন্দ

ছিলুম। ওদের দেশটা হচ্ছে মাদ্রাজের দক্ষিণ দিকে। আরে রাম কহো! ওদের দেশে গিয়ে গা ঘিন্ ঘিন্ কর্তে লাগলো। ওদের মেয়েদের কাপড় পরা কি বোলবো। মেয়েদের কোমর পর্যন্ত কাপড় আর উপরটা সব খালি; সে দেখে মাথা হেঁট করে থাকতে হয়। তারপর যখন দেশান্তর এই রকম ব্যাপার দেখলুম তখন আমার সব সঙ্কোচ চলে গেল। আরে কি বড় ঘর, কি ছোট ঘর! আগন্তুক আসিলে মেয়েরা সব অভ্যর্থনা করে—কিন্তু গা খোলা। কি রে মেনন! তাদের দেশে ঠিক এরকম নয়?” মেনন আর কি বোলবে কথা সব বেরিয়ে পড়লো। মেননকে লইয়া এইরূপ কৌতুক রহস্য চলিতে লাগিল।

তাহার পর ষ্টার্ডি উঠিয়া কার্য্যান্তরে চলিয়া গেলেন, স্বামীজী হঠাৎ বর্তমান লেখকের পায়ের দিকে নজর করিয়া বলিয়া উঠিলেন, ‘তোমার বুট ইজেরের পায়ের দিকটাতে অমন ঢেব্বাপানা কেন?’ বর্তমান লেখক বলিলেন, ‘উপরে একটা বনাতের ইজের বা ট্রাউজারস্ তার ভিতরে একটা ড্রয়ার, তার ভিতরে স্কস্ (socks) তাই ওরকম হয়েছে।’ ‘না তুই পরতে জানিস্ নি’ এই বলিয়া স্বামীজী চেয়ার থেকে উঠিয়া আসিয়া বর্তমান লেখকের চেয়ারের সম্মুখে উপু হয়ে বসে, বুটের কাছে পায়ের ইজেরটা তুলিলেন। বর্তমান লেখক তাই দেখিয়া স্বামীজীকে বলিতে লাগিলেন, “আরে কি কর, কি কর, পায়ে হাত দাও কেন?” স্বামীজী বালকের মত ইজের তুলে দেখলেন যে স্কসের (মোজা) উপর ড্রয়ার রয়েছে তাই অমন হয়েছে অর্থাৎ স্কস্‌টা ভিতরে থাকিবে আর ড্রয়ারটা উপরে থাকিবে তাহা হইলে আর তেমন ঢেব্বা মত হবে না। স্বামীজী এমন ভাবে করিতে লাগিলেন যে বর্তমান লেখক আর কিছু বলিতে পারিলেন না, ইজের পরা হ’লে বর্তমান লেখক স্বামীজীকে প্রণাম করিলেন।

স্বামীজী বলিতে লাগিলেন, “দেখ চিকাগো প্রদর্শনীতে এক তিস্কর

মেজাজ মহারাজীয় দোকানদার ভারত-উৎপন্ন জিনিসপত্রর বেচিতেছিল। খবরের কাগজের রিপোর্টাররা ঘুরে ঘুরে বেড়াচ্ছিল যদি কিছু নূতন খবর পায়। তাহারা সেই দোকানদারকে নানা কথা জিজ্ঞাসা করিতেছিল। কথাপ্রসঙ্গে তাহারা বরোদার মহারাজের কথা জিজ্ঞাসা করিল। দোকানদারটি কড়া মেজাজের লোক ছিল, বরোদা মহারাজের নানা কুৎসা কর্তে লাগলো। রিপোর্টাররা তাহা লিখিয়া লইল এবং নিজেদের করিয়া মনোমত অনেক আবার তৈয়ারী করিয়া লইল; কিন্তু লোকটার নাম ভুলিয়া গিয়াছিল। এ কথা সকলেই জানিত। ভারতবর্ষ হইতে স্বামী বিবেকানন্দ আসিয়াছে চিকাগোতে, রিপোর্টে একটা নাম তো দিতে হবে তাই তারা আমার নাম দিয়ে দিলে। কাগজে বেরোলো স্বামী বিবেকানন্দ বরোদা মহারাজের নিন্দা করেছে। অথচ আমি তার বিন্দু বিসর্গ জানি না। এইরূপ জগতের ব্যাপার! ঘটনাক্রমে বর্তমান লেখকের সহিত একটি কারবারী মহারাজীয় সহিত সাক্ষাৎ হয়। দুই চারিদিন সাক্ষাতের পর অনুমান করিয়া তাহাকে প্রশ্ন করা গেল। তখন তিনি স্পষ্ট বলিলেন যে তিনি বরোদার মহারাজকে গাল দিয়াছিলেন, তবে অতি অল্পই হয়েছিল, বেশী দেওয়া উচিত ছিল। লোকটির নাম ছিল রাজোওয়াড়ী কিন্তু সকলে তাহাকে “রিচি” বলিয়া ডাকিত।

স্বামীজী হাসিতে হাসিতে বলিতে লাগিলেন যে বীরচাঁদ গান্ধী নামক এক ব্যক্তি চিকাগো পার্লামেন্টে জৈনধর্ম বিষয়ে বীরচাঁদ গান্ধী। বলিতে গিয়াছিলেন। লোকটি একটু বেশী মাত্রায় নিরামিষ ভোজী। হোটেলে গিয়া তিনি বন্দোবস্ত করিলেন যে তিনি নিরামিষ ভোজী, আমিষ কোন জিনিস দিবে না। হোটেলে তাহাই হইতে লাগিল। একদিন তিনি কাফি খাইতেছেন এমন সময় তাঁহার কাফির সহিত ডিমের খোলা বাহির হইয়া পড়িল। সেই দেখিয়া

## লগুনে বিবেকানন্দ

লোকটি ভৃত্যকে ডাকিয়া বলিলেন, “এ কি করেছ?” ভৃত্যটি বলিল, ডিমটা মাংসের মধ্যে গণ্য হয় না, ওটা নিরামিষের মধ্যে। একজন বলিলেন, “There is a egg shell in the coffee pot” অপর একজন বলিলেন, “ডিম নিরামিষের ভিতর” ইত্যাদি। স্বামীজী এই বলিয়া মুখ-ভঙ্গী করিয়া রহস্য করিতে লাগিলেন এবং পরে বলিলেন, “অত গোড়ামী করে কি বিদেশে থাকা চলে? সব জিনিসকে নিজের মত করে নিতে হয়।”

অনেকক্ষণ পরে গুডউইন ফিরিয়া আসিলেন। বর্তমান লেখকের তখন কোক্‌ডান কোক্‌ডান দাড়ী ছিল। ইংরেজদের দেশে ইহা নিতান্ত অশোভন। স্বামীজী গুডউইনকে বলিলেন, ‘একে একটা নাপিতের দোকানে নিয়ে গিয়ে দাড়ীটা ছাঁটিয়ে আন।’ গুডউইন তখন বর্তমান লেখককে সঙ্গে লইয়া অনতিদূরে বঙ্গাটজ্ (Bongartz) নামক জাম্বান নাপিতের দোকানে লইয়া গেলেন। নাপিতে গুডউইনের কণ্ঠমত দাড়ীগুলি ছুঁচালো বা ফ্রেঞ্চ ফাসানে কাটিয়া দিল। গুডউইন যেরূপ ধমক দেন তাহাতে বর্তমান লেখক তাঁহাকে কিছু বলিতে আর সাহস করিলেন না। অবশেষে কোক্‌ডান দাড়ী পরিত্যাগ করিয়া ছুঁচালো ছাগল দাড়ী লইয়া বর্তমান লেখক ফিরিয়া আসিলেন। স্বামীজী ত সেই দেখিয়া হাসিতে লাগিলেন এবং বলিলেন, ‘আরে ছ্যাঃ, ঠিক চূণোগলির ফিরিঙ্গি হয়েছে।’ অতি জখণ্য দেখিতে হইয়াছিল। তাহার দিন কতক পরেই Bongartzএর দোকানে গিয়া বর্তমান লেখক দাড়ী মুড়াইয়া আসিলেন।

গুডউইন বিকালবেলা সারদানন্দ স্বামীকে লইয়া অনেক দূরে ক্রিকেট খেলা দেখিতে গেলেন। গুডউইন ইংরাজ, তাঁহার খেলা  
গুডউইন ও শরণ  
মহারাজের ক্রিকেট  
খেলা দেখিতে যাওয়া  
খুলায় ভারি আমোদ। সারদানন্দ স্বামীর ভাল লাগিতে  
ছিল না, খাতিরে গেলেন এবং তাঁহার সঙ্গে একটি  
শিলিং সম্বল ছিল। ৫টা ৫১০ টার সময় হু’জনায়ে ফিরিয়া আসিলেন এবং

গুড্‌উইন বাস ভাড়া দিয়াছিলেন। সারদানন্দ স্বামী তখন পকেট হইতে শিলিং বাহির করিয়া বেণ্ডের আধুলির অভিনয় করিতে আরম্ভ করিলেন। গল্পটা তত যুৎসই বলিতে পারিলেন না এবং গুড্‌উইনের তাহা ভাল লাগিল না। সারদানন্দ স্বামী বলিতে লাগিলেন যে তাঁহার ক্রিকেট খেলা তত ভাল লাগে না। ক্রিকেট খেলা দেখে কি আমি স্বর্গে যাব? বর্তমান লেখক চট্ করে বলিয়া ফেলিলেন, স্বর্গে যেতে হয় On the top of a bus অর্থাৎ বাস্ গাড়ীর উপরের ছাতে বসে গেলে স্বর্গ হয়। গুড্‌উইন সেই গুনিয়া হোঃ হোঃ করিয়া হাসিয়া উঠিয়া বলিলেন যে, ঠিক বলেছ বাস্, গাড়ীর ছাদে বসেই ত স্বর্গে যেতে হয়। বাস্ গাড়ীর ভিতরের গদি-গুলি বেশ মখমল দেওয়া এবং ভিতরে তামাক খাওয়া নিষিদ্ধ। এইজন্ত মেয়েরা এবং যে সব পুরুষ তামাক খাইবেন না বা সিগারেট টানিবেন না তাঁহারা ভিতরে বসিয়া থাকেন। কিন্তু পুরুষেরা ছাতের উপর এক এক টুকরা অয়েল্‌ক্লথ উরু পর্যন্ত ঢাকিয়া দিয়া pipe বা সিগারেট টানিতে টানিতে মজা করিয়া উপরে বসিয়া চারিদিক দেখিতে দেখিতে যায়। বৃষ্টি হইলে ছাতা খুলিয়া মাথায় দেয়। বাস্ গাড়ীর ছাতটা বড় আরামের স্থান তাই গুড্‌উইন এত আশ্চর্য করিয়াছিলেন।

সারদানন্দ স্বামী ও বর্তমান লেখক কলিকাতার ম্যালেরিয়া জরে দেড়  
 বা দুই বৎসর ভুগিতেছিলেন। সারদানন্দ স্বামীর জ্বরটা  
 জ্বর অবস্থায় সারদানন্দ  
 স্বামীর বক্তৃতা। মাস দেড়েক স্থগিত ছিল কিন্তু বর্তমান লেখকের হু'  
 একদিন অন্তর জ্বর হইতেছিল এবং প্রত্যহই দুই তিন-

বার করিয়া কুইনাইন খাইতেন। হু'জনাই উপরকার Rocking horse  
 ঘরে কঞ্চল মুড়ি দিয়া শুইয়া আছেন। হু'জনাই জ্বর। সারদানন্দ  
 স্বামীর জ্বর অত্যধিক। স্বামীজী মাঝে মাঝে গুড্‌উইনকে উপরে দেখিতে  
 পাঠাইয়া দিতেছেন এবং গুড্‌উইন আসিয়া দুধ সাগু ইত্যাদি খাওয়াইয়া

যাইতেছিলেন। বেলা ১টার সময় সারদানন্দ স্বামীর জরটা কিছু বেশী হইল, বাতিক বৃদ্ধি খুব হইল। তখন তিনি বিছানা পরিত্যাগ করিয়া উঠিলেন এবং বর্তমান লেখকও সঙ্গে সঙ্গে উঠিলেন। দু'জনেই স্লিপিং সুট পরিধান করিয়া আছেন। গোল টেবিলের ধারের একখানা চেয়ারে বর্তমান লেখক বসিলেন। সারদানন্দ স্বামীর বাতিকের জ্বর—তিনি বসিতে পারিলেন না, দাঁড়াইয়া দাঁড়াইয়া পায়চারি করিতে লাগিলেন। একে ম্যালেরিয়ার জ্বর তাহার উপর লেকচার করিতে হইবে এই ভয়ে তাঁহার বাতিক বৃদ্ধি হইয়া গিয়াছিল। প্রথমে চোখ খুলিয়া তিনি পায়চারি করিতে করিতে বলিতে লাগিলেন, ‘দেখ মহিম, নরেন ত ছাড়বে না, যে কোন প্রকারেই হউক লেকচার দেওয়াবেই। আমি ত বাবা ওর কিছু বুঝি না, আবার যে রাগী কখন কি গাল দিবে, কি মেরেই বসবে! তা এখন ত আর এখানে কেউ নেই এখন লেকচার রিহারশেল্‌দি। কিন্তু তুমি হুঁ দিও।’ এই বলিয়া সারদানন্দ স্বামী ঘরে ঘুরে ঘুরে বলিতে লাগিলেন, ‘The subject of my lecture, ladies and gentlemen, of course I have got nothing to say’, বাতিকের জরে নানা পর্দার সুর ভাঁজতে ভাঁজতে এই কথাই বহুবার বলিতে লাগিলেন এবং মাঝে মাঝে বলিতেছেন “মহিম শুনছ ত? হুঁ দাও।” বর্তমান লেখকেরও জ্বর, চেয়ারে বসা থেকেই অতিকষ্টে উত্তর দিলেন—হুঁ। তাহার পর চোখ বুজিয়া পাইচারি করিতে করিতে সারদানন্দ স্বামী সেই একই কথা আওড়াইতে লাগিলেন। তাহার পর পা ব্যথা করিতে লাগিল, চেয়ারে ঠেস দিয়া বসিয়া সেই কথাই বলিতে লাগিলেন। বাতিকের ধমকে সুরের মাত্রা ক্রমেই বাড়িল। তাহার পর টেবিলে হাত ও মাথা রাখিয়া লেকচার চলিল এবং মাঝে মাঝে বলিতে লাগিলেন, “মহিম, শুনছো ত? হুঁ দাও।” তাহার পর উভয়েই বিছানার ভিতর কদল মুড়ি দিয়া শুইয়া

পড়িলেন। সারদানন্দ স্বামী মাথা পর্য্যন্ত কঞ্চল ঢাকিয়া লেক্চার আওড়াইতে লাগিলেন। প্রায় ৫টার সময় স্বামীজী আসিয়া ঘরে ঢুকিলেন ও সারদানন্দ স্বামীর লেক্চার শুনিলেন। তিনি হাসিয়া ধমক দিতে সারদানন্দ স্বামী নিব্বুঁয় হয়ে ঘুমাইয়া পড়িলেন, আর কোন চাঞ্চল্য-ভাব রহিল না।

পরদিন সারদানন্দ স্বামীর জর কম ও বর্তমান লেখকের কম্প দিয়া খুব জর। খুব যন্ত্রণা হইতেছিল কিন্তু কি করিবেন নাচার, উভয়েই পাশা-পাশি কঞ্চল মুড়ি দিয়া শুইয়া রহিলেন। বেলা ২টা ২১টার সময় বর্তমান লেখক অনুভব করিতে লাগিলেন যে পায়ের চেটো হঠাৎ গরম হইয়া উঠিল। বেশ রীতিমত গরম অনুভব করিলেন। গরমটা ধীরে ধীরে পায়ের গাঁটের কাছে এসে আটকে রহিল। তাহার পর হঠাৎ গরমটা নামিয়া গেল। খানিকক্ষণ পরে গরমটা এসে পায়ের গাঁট হইতে হাঁটু পর্য্যন্ত ধীরে ধীরে আবার উঠিতে লাগিল! কি যেন একটা ভিতর থেকে যাচ্ছে তা বেশ অনুভব করিতে পারিতেছিলেন কিন্তু অতি ধীরে ধীরে উত্তাপটা উঠলো। হাঁটুর নিকট আসিয়া আটকাইল তাহার পর নামিয়া বাইবার সময় শীঘ্র নামিয়া গেল। খানিকক্ষণ বাদে হাঁটু হইতে কোমর পর্য্যন্ত উত্তাপ অনুভব হইতে লাগিল এবং আবার সেইভাবে নামিয়া গেল। ক্রমে হৃদপিণ্ডের নিকট আসিল এবং ভয়ানক যন্ত্রণা হইতে লাগিল। আভ্যন্তরিক একটা শক্তি ও বাহির থেকে একটি শক্তির সংঘর্ষণ অনুভব হইল। তাহার পর বর্তমান লেখকের আর কোন চৈতন্ত্য রহিল না। উত্তাপ ধীরে ধীরে মাথা পর্য্যন্ত গেল। এইরূপ বেহুঁস অবস্থায় বর্তমান লেখক এক ঘণ্টার উপর ছিলেন, এত ঘামিয়া ছিলেন যে মাথার বালিশ কঞ্চল ইত্যাদি সব ভিজিয়া গিয়াছিল। বেলা ৪টার সময় দরজায় কে টোকা আরিল। কিন্তু অভ্যাস এমনি জিনিস যে ওরূপ বেহুঁস অবস্থায় মুহূ ক্ষীণ-



## লগুনে বিবেকানন্দ

স্বরে বর্তমান লেখক বলিলেন, “come in, please” স্বামীজী হাসিতে হাসিতে ঘরে ঢুকিলেন এবং জোরে জিজ্ঞাসা করিলেন, ‘কি রে তোর জর ছেড়েছে?’ বর্তমান লেখক অর্দ্ধনিদ্রিত অস্পষ্ট স্বরে বলিলেন, ‘হাঁ জর ছেড়েছে।’ স্বামীজী বলিলেন, ‘হ্যাঁ, জর ছেড়ে গেছে আর ঔষধ কুইনাইন খাস্ নি, জরকে তাড়িয়ে দিয়েছি।’ সারদানন্দ স্বামীও জরে আচ্ছন্ন ছিলেন তিনিও দেখিতে লাগিলেন কিছু বলিলেন না। স্বামীজী বলিতে লাগিলেন, ‘কি রে শরতা! জর হুকুম শুনে না?’ বর্তমান লেখককে স্বামীজী বলিলেন, ‘হ্যারে, তোর জর কি ক’রে গেল?’ বর্তমান লেখক তখন ক্ষীণকণ্ঠে সমস্ত ঘটনা বলিলেন। স্বামীজী বলিলেন, ‘বা তোর আর জর আসবে না, অগ্নি নীচে চেয়ারে বসে will force দিচ্ছিলুম, জরকে বের করে দিলুম, জর হুকুম মানবে না?’ স্বামীজী কখন টেবিলের নিকট দাঁড়াইয়াছিলেন, কখন বা পাঁইচারি করিতেছিলেন। সারদানন্দ স্বামীর তখন তন্ত্রা কাটায়া গিয়াছে। তিনি গায়ের কম্বল ছুঁড়িয়া ফেলিয়া তড়াক্ করিয়া মেজেতে নামিয়া হাঁটু গাড়িয়া বসিয়া স্বামীজীর পা জড়াইয়া বালকের শ্রায় কাঁদিতে লাগিলেন এবং অনবরত বলিতে লাগিলেন, “আমার মনটা ভাল করে দাও, এটাকে উপড়ে তুলে দাও,” এই বলিয়া পা জড়াইয়া ধরিয়া পায়ের মাঝে মাথা রাখিয়া পড়িয়া রহিলেন। স্বামীজী সারদানন্দ স্বামীর অকপট ভালবাসা দেখিয়া মৃদু মৃদু হাসিয়া বলিতে লাগিলেন, “ভূঃ শ্রীলা হোঁৎকা, উঠে বোস্! শ্রীলার ম্যালেরিয়া জর হয়েছে কি না তাই বাতিকে কি কচ্ছে দেখ। বা শ্রীলা, তোকে লেকচার কর্তে হবে, না হোলে তোকে মার্ক্স লাথি আর এই চার-তোলার জ’নালা থেকে রাস্তায় ফেলে দোবো। শ্রীলা তোকে work houseএ খাটাব। জানিস্ না কত খরচ হয়েছে?” সারদানন্দ স্বামী বলিলেন, “তুমি লাথিই মার আর বা ইচ্ছা কর, কিন্তু আমার মন ভাল করে দাও, দাও, তা না হ’লে তোমায়

ছাড়বো না।” স্বামীজী হর্ষ ও প্রীতভাবে বলিতে লাগিলেন, “তা শ্রালা হবে, এখন ওঠ!” সারদানন্দ স্বামী পা পরিত্যাগ করিয়া উঠিয়া দাড়াইলেন। কিন্তু মনে এতটা উদ্বেগ আসিয়াছিল যে আর সখ্যভাবে কথা কহিতে পারিলেন না, নিতান্ত অনুরাগের আশ্রয় দাঁড়ালেন। স্বামীজী বলিলেন, “দ্যাখ্, ডাইনিং-রুমের যে চেয়ারে আমি বসি, সেইখানে বসে আমি শক্তি সঞ্চার করিলাম। শ্রালা, শক্তি সঞ্চার জানিস্ নি, কিন্তু এই দেখ্ ত তাদের চোখের সামনে কল্পম।” সারদানন্দ স্বামী বিনীতভাবে বলিলেন, “তা করেছ বেশ করেছ. আমার মন ভাল করে দাও।” স্বামীজী বর্তমান লেখককে বলিলেন, “বা আর কুইনাইন খাস্‌নি, বাক্সো থেকে সব টেনে ফেলে দে। উইল ফোর্স বা শক্তি সঞ্চারে সব হয়। আজ রাত্রে রুটী খাস্‌নে, দুধসাপ্ত খাস্‌ এই বলিয়া স্বামীজী চলিয়া গেলেন। সারদানন্দ স্বামী বিছনায় শুইয়া বলিলেন, “ওহে সে নরেন আর এখন নেই, এই ত হাতে হাতে দেখ্‌লুম ভকুমে ত এত বৎসরের জর এক দিনে একেবারে. তাড়িয়ে দিলে। এখন বুঝে স্বখে কথা বলা ভাল” ইত্যাদি নানা কথা বলিতে লাগিলেন।

সারদানন্দ স্বামীর জর ভাল হইলে মিস্‌ মূলারের সহিত বেশ সমানভাবে চলিতে লাগিলেন। আবশ্যিক হইলে সারদানন্দ স্বামী মিস্‌ মূলারকে একটু আধটু সংস্কৃত পড়াইয়া দিতেন। একদিন বৈকালবেলা মিস্‌ মূলার তাঁহার কোন পরিচিত লোকের বিবাহ দেখিতে সারদানন্দ স্বামীকে সঙ্গে লইয়া

গির্জাতে গেলেন। গির্জাতে কিরূপভাবে বিবাহ হয়

মিস্‌ মূলারের সহিত  
সারদানন্দ স্বামীর  
গির্জাতে যাওয়া।

সারদানন্দ স্বামী পূর্বে তাহা দেখেন নাই। বাহা  
হটক ঘণ্টা খানেক বাদে আনন্দিত ভাবে ফিরিয়া

আসিয়া সারদানন্দ স্বামী বিবাহের কথাবার্তা কহিতে লাগিলেন। কারণ কয়দিন তিনি প্রায় বিমর্ষ ছিলেন। খায় দায়, বসে

## লগুনে বিবেকানন্দ

‘থাকে বিশেষ কোন কাজ নাই, তাহার পর তামাক খেতে পায় না। মাঝে মাঝে গুডউইন হু’ একটা সিগারেট দেয় সেইজন্য মনটা খুসী ছিল না। বিবাহ দেখিয়া পাঁচ জনের সঙ্গে মিশে মনটা খুসী হইল।

সারদানন্দ স্বামী ষ্টার্ডি বা মিস্ মূলারের সহিত আরল্‌স কোর্ট (Earl’s Court) স্থানেতে ইণ্ডিয়ান এম্পায়ার একজিবিসন  
ইণ্ডিয়ান এম্পায়ার  
একজিবিসন।  
দেখিতে গিয়াছিলেন। তিনি ফিরিয়া আসিয়া  
বলিলেন যে ইংরাজ ষা কমলালেবু রঙের শাড়ী

পরিয়া উল্টো দিক থেকে মাথায় ঘোমটা দিয়ে পেতোলের থালায় দুধের বাটী ও চায়ের বাটী রেখে দোকানে চা বিক্রী কচ্ছে দেখে ভারি খুসী হয়েছিলেন। তবে একজিবিসন স্থানটা প্রকাণ্ড বড় তাই সমস্ত স্থানটি দেখিতে পারেন নাই। আর একদিনেও সম্ভব নয়। সারদানন্দ স্বামীর মুখে একজিবিসনের কথা শুনিয়া বর্তমান লেখক গুডউইনের নিকট খবর লইয়া পরদিন বেলা ১১টার সময় বাহির হইয়া ঘুরে ঘুরে একজিবিসন দেখিতে লাগিলেন। চায়ের দোকানটি দেখিতে খুব ভাল হইয়াছিল। সারদানন্দ স্বামীর যে রকম ধারণা হইয়াছিল বর্তমান লেখকেরও তদ্রূপই হইল। আমাদের দেশের মেয়েদের শাড়ী পরা ইউরোপের গাউন পরার চাইতে দেখিতে ঢের সুন্দরী হয়। একজিবিসনে বাঙ্গালা দেশের অনেক হিন্দু ও মুসলমান কারিগর গিয়াছিল। ভূনেওয়ারা বাল ছোলা, খই মুড়ী ভাজিতেছিল, কেউ বা কাশীর ফুলকাটা থাল, গেলাস ইত্যাদি তৈয়ারী করিতেছিল। কেউ বা বরফী তৈয়ারী করিতেছিল। যাহারা কলিকাতার মেছুয়াবাজারের ও চাটগায়ের মুসলমান ও বিহারের হিন্দু কারিগর ছিল তাহারা বর্তমান লেখককে বাঙ্গালী পাইয়া তাহাদের পেটের কথা সমস্ত খুলিয়া বলিল। তাহারা বিদেশে বাঙ্গালী বাবুকে পাইয়া বড়ই খুসী হইল। তাহারা বলিল যে ফিরিজিদের ছোঁয়া জল, রুটী বা উহাদের কাটা মাংস

তাহারা খায় না। নিজেরা ভেড়া কিনে ও মুসলমানরা কাটে সেই মাংস হিন্দু মুসলমান দুজনায় মিলিয়া খায়। কিন্তু ফিরিজির ছোঁয়া জিনিস তাহারা খায় না। বোঝা গেল বিদেশ হইলে হিন্দু মুসলমান একসঙ্গে খায় আর তখন দেশের ভালবাসা জাগে। একটা ইংরাজ বুড়ো পাত্রী বা নিম্ন শ্রেণীর স্বাক্ষর ভূনেওয়ালাদের দোকানের কাছে ঘুরে বেড়াইতেছিল। বুড়োর হাতে একটা ব্যাগ ও চাটগারে মুসলমানী-ভাষাতে কতকগুলি খুঁটানী প্যামফ্লেট ছাপান ছিল। বুড়োটি তাহাদের সহিত ও অত্যাশ্চর্য মুসলমানদের সহিত দিব্বি কথাবার্তা কহিতে লাগিল। বর্তমান লেখক সেই দেখিয়া বুড়টিকে বলিলেন ‘আপনি কি পূর্ববঙ্গে ছিলেন?’ লোকটি বলিল তিনি ইংলণ্ডের বাহিরে কখন যান নাই, ঘরে বসিয়া তিনি ঐ ভাষা শিখিয়াছিলেন ও বেশ কথা কহিতে পারেন। বাঙ্গালী বাবু পাইয়া তাহাকে কিছু খাওয়াইবার জন্ত তাহাদের কি আক্লাদ! অবশেষে তাহাদের খুসী করিবার জন্ত এক মুঠো মুড়ী ও ছোলাভাজা লইয়া বর্তমান লেখক খাইলেন। দুই পেনী দিয়া বরফিওয়ালাদের দোকান হইতে একটি বরফি লইলেন। একটা ইংরাজ যুবক সব দেখিতেছিল, সে বলিল ভারতবর্ষে যে একরূপ শিল্প কার্য হয় ইহা তাহার ধারণা ছিল না। যদি এই সকল কার্য এদেশে হইত তা হলে পৃথিবী শুদ্ধ নাগ জাহির হইয়া বাইত। পিতলের খালায় পেরেক দিয়া কি সুন্দর ময়ূর তৈয়ারী করিতেছে। কাজকর্ম সব চটপট হইতেছে। ময়ূরের লেজটি ঠিক হইয়াছে। সে কাগীর কাপড় বোনা দেখিয়া একেবারে আশ্চর্য হইল। নানা দেশ থেকে যত লোক আসিয়াছিল সকলেই ভারতবর্ষের সুখ্যাতি করিতে লাগিল। যুবকটিকে বরফি দিলে সে খাইয়া বলিল, It is sweet wax অর্থাৎ মোমো চিনি দিয়া ইহা তৈয়ারী হইয়াছে। সে সেইটা কাগজে মুড়িয়া বন্ধ বান্ধবকে দেখাইবার জন্ত লইয়া গেল।

লগনে বিবেকানন্দ

এই সময়ে অর্থাৎ এপ্রিলের শেষ বা মে মাসের প্রথমে আমেরিকা হইতে জন পিয়ার ফক্স নামক একটি যুবক আসিয়া এইখানে রহিলেন।  
মিঃ ফক্সের আগমন ফক্স স্বামীজীর অত্যন্ত অনুরক্ত এবং আমেরিকায়  
বোষ্টন নগরের কাছে কেমব্রিজ নামে যে গ্রামটি আছে  
সেখানে মিস্ ওলীবুলের বাড়ীতে যখন একটি ধর্মসভা হয় তখন তিনি  
সেখানকার সেক্রেটারী ছিলেন। যাহা হউক ফক্স যুবক হইলেও স্বামীজীর  
পূর্বপরিচিত বলিয়া সকলেই বিশেষ মেহ করিতেন। সারদানন্দ  
স্বামীর সহিত তাঁহার বিশেষ হৃদয়তা হইয়াছিল।

স্বামীজী ও সারদানন্দ স্বামী অধ্যাপক ম্যাক্সমুলারের সহিত সাক্ষাৎ  
করিতে গিয়াছিলেন! কি কথাবার্তা হইয়াছিল তাহা  
ম্যাক্স মুলারের সহিত  
স্বামীজীর সাক্ষাৎ।  
কেহ কিছু বলেন নাই। কিন্তু স্বামীজী একটু হর্ষিত  
হইলে অধ্যাপকের কণ্ঠস্বর অনুরণন করিয়া কথাবার্তা  
কাহ্নতেন। স্বামীজী বলিতেন, ‘ম্যাক্সমুলার ইউরোপের মধ্যে প্রধান  
পণ্ডিত, বেশ ইংরাজি জানেন কিন্তু তাঁহার উচ্চারণ জার্মানদিগের মত ও  
খুব ভাল নয়।’ স্বামীজী মাঝে মাঝে nice man ( নাইস্ ম্যান্ ) nice  
man করিয়া রহস্য করিতেন।

মিস্ মুলার কেমব্রিজে অধ্যয়ন কালে ডাঃ ভেনের ( Dr. Vane )  
নিকট অধ্যয়ন করিয়াছিলেন। ডাঃ ভেন গ্রায় শাস্ত্রে  
ডাঃ ভেনের সহিত  
স্বামীজীর কথাবার্তা  
অগাধ পণ্ডিত ছিলেন। তাঁহার পুস্তকখানির নাম  
লজিক অব চান্স ( Logic of Chance ) এই গ্রায়-  
শাস্ত্রের জ্ঞান তিনি সমস্ত জীবন অতিবাহিত করিয়াছিলেন এবং ইউরোপের  
‘গ্রায়ের’ প্রধান ব্যক্তিদিগের মধ্যে তিনি একজন অত্যন্ত বলিয়া পরিগণিত  
হইতেন। মিস্ মুলার একদিন স্বামীজীকে সঙ্গে লইয়া প্রফেসর ভেনের  
সহিত দেখা করিতে গেলেন। প্রফেসরের সহিত স্বামীজীর নানাদেশের

শাস্ত্রশাস্ত্রের কথা উঠিল। ভিন্ন ভিন্ন দেশে ভিন্ন ভিন্ন সময়ে শাস্ত্রশাস্ত্রের চর্চা কিরূপভাবে হইয়াছিল সেই সব বিষয় আলোচনা হইতে লাগিল। গ্রীকদিগের, ইউরোপের, বৌদ্ধদিগের এবং হিন্দুদিগের নানা সময়ের নানা শাস্ত্রশাস্ত্রের কথা উঠিল। প্রফেসর ভেনের ধারণা ছিল যে স্বামীজী ধর্মের উপদেশ দেন, দৃশ্য অদৃশ্য বস্তুর যে সব কথা বলেন ওসব বাজে জিনিস। স্বামীজীর মুখে শাস্ত্র শাস্ত্রের কথা শুনিয়া প্রফেসর ভেন দেখিলেন যে বোধ হয় তাঁহারই মত সমস্ত জীবন এ ব্যক্তি শাস্ত্রশাস্ত্রে অতিবাহিত করিয়াছেন এবং ভারতবর্ষ হইতে একজন প্রধান নৈরায়িক আসিয়া ইউরোপের প্রধান প্রধান নৈরায়িকের সহিত দেখা করিয়া গেলেন। স্বামীজীর সহিত কথাবার্তা কহিয়া প্রফেসর অত্যন্ত আনন্দিত হইয়াছিলেন। স্বামীজী কিন্তু ফিরিয়া আসিয়া এ বিষয় কোন কথা বলিলেন না, তাঁহার সঙ্গে একজন আনন্দিত হইয়া সব বলিয়াছিলেন।

মিস্ মুলার বুড়ী হইয়াছিলেন এইজন্ত সব সময় খিট্ খিটে থাকিতেন। সারদানন্দ স্বামীর উপর তিনি এতদিন সন্তুষ্ট ছিলেন। একদিন দুপুর বেলা নীচেকার খাবার ঘরে আতসীখানার পার্শ্বে ছ'জন ছ'খানা চেয়ারে বসিয়াছিলেন। বর্তমান লেখকও দেয়ালের দিকের চেয়ারে বসিয়া আছেন। মিস্ মুলার কথা আরম্ভ করিলেন, 'আমি যখন গুজরাটের কাছে লেকচার করিতেছিলাম এলীকে (আলী বেগম) বলিলাম এই এই কর। এইরূপভাবে কার্য করিতে হইবে। আমি ভারতবর্ষের অনেক স্থান বেড়াইয়াছি এবং দেখিয়াছি যে রোগা রোগা গরু, রোগা রোগা কুকুর lean cows, lean dogs চারিদিকে, সবাই রোগা। আমরা কিন্তু এমন হ'তে দিই না। যখন গরু বা ঘোড়া বড়ো হয় তখন তাহার জীবনটা একটা বোঝা হয়। তখন তাদের বেঁচে থাকবার দরকার কি? তাই আমরা বড় গরু ঘোড়াকে মেরে ফেলি এবং তার মাংস লোকে

## লগুনে বিবেকানন্দ

থায়। কারণ বড় হয়ে জীবন ধারণ করবার আবশ্যক কি ? তিনি প্রত্যেক কথায় মাত্রা দিতে ছিলেন যে We English are very kind people (আমরা ইংরাজেরা বড় দয়ালু) সারদানন্দ স্বামী নীরবে বোকা হাবার মত গল্প শুনিতেছিলেন, শেষটা আর তিনি থাকিতে পারিলেন না। তিনি বলিয়া ফেলিলেন ‘বাপ মা বড় বুড়ী হলে জীবন বড় কষ্টদায়ক হয়, কেন তাদের মেরে ফেলেন না ?’ বৃদ্ধা মিস্ মূলারের মাতা তখনও জীবিতা ছিলেন। এই আর কি ! মিস্ মূলার অগ্নিশশ্মা হইয়া ঘর থেকে উঠে চড়্ চড়্ করিয়া চলিয়া গেলেন। সারদানন্দ স্বামী ত অপ্রস্তুত হইয়া পড়িলেন। আবার কে জানে স্বামীজী শুনিলে বিরক্ত হইবেন। সব দিক বিপরীত ! ষ্টার্ডি কি মনে করিবে ? পরের বাড়ী থাকা যে কি ঝকমারি তা বেশ বুঝিতে পারিলেন। বর্তমান লেখকের নিকট প্রাণ খুলে অনেক কথা বলিলেন। বর্তমান লেখক বলিলেন, “কি হবে যেমন কথা তেমন উত্তর ! তা ভয় পাবার দরকার কি ? না হয় চলে যাব।” সারদানন্দ স্বামী সেই শুনিয়া একটু আশ্বস্ত হইলেন এবং পুনরায় বলিতে লাগিলেন—এ দেবীর কি মন্ত্র জান ?

ক্ষণে রুষ্ট ক্ষণে তুষ্ট

তুষ্ট রুষ্ট ক্ষণে ক্ষণে

এই দেবীকে এই মন্ত্রে পূজা করিতে হয়। তাহার পর মিস্ মূলার তিন দিন সারদানন্দ স্বামীর সহিত কথা কহেন নাই। প্রমাণ গ্রহণ করিতেন না, কেমন আছ ইত্যাদি কথার কোন উত্তর দিতেন না। স্বামীজী একদিন জিজ্ঞাসা করিলেন, ‘হাঁারে পাগলী বুড়ীর সহিত কি হয়েছে ?’ বর্তমান লেখক সমস্ত কথা বলিলেন। স্বামীজী বলিলেন, ‘ও খ্যাপ্তান্ মাগীর আলায় অস্থির করে তুলেছে। দ্যাখ্ শরৎ, এ দেশে যে মাগীর বে করে না সে গুলি বুড়ী হলে ছ’রকম হয়। কতকগুলো মাগী ফেটিয়ে

ষায় (মোটাই হয়) সে গুলো ঠাণ্ডা ভালমাস্থ্য থাকে। কতকগুলো মাগী শুটুকে ষায় সে মাগীর খিট্ মিটে হয়। খ্যাপ্তান্ মাগীর জালায় অস্থির করে তুলেছে। ওরে বাপু তোরা বুড়ী মাগীর সঙ্গে খুব সাবধানে চলবি। ঘরে ও ঢুকলেই দাঁড়িয়ে উঠবি, কেমন আছেন জিজ্ঞাসা কোর্কি, প্যান্টুলনের পকেটে হাত রাখবি নি, বুকে হাত রাখবি নি। বুড়ী যতক্ষণ দাঁড়িয়ে থাকে তা বাপু তোরা বোসিস্ নি। যে জিনিস চাইবে তা তাড়াতাড়ি ওকে দিস্। কোন্ রকমে বুড়ীকে সন্তুষ্ট কোর্কি। আর পারি নি বাপু, সারাদিন লেক্চার কর্তে হবে, ভিজিটরদের সঙ্গে দেখা কর্তে হবে, আবার বুড়ীকে ও সন্তুষ্ট কর্তে হবে, ইত্যাদি বলিতে লাগিলেন।

৫৭ নং সেন্টজর্জ্ ষ্ট্রীটস্থ বাড়ীতে আসিয়া ষ্টার্ডি, মিস্ মুলার এবং অপার. কয়জনে মিলিয়া বক্তৃতার বন্দোবস্ত করিলেন। মঙ্গলবারে বেলা ১১টা হইতে

আরম্ভ হইয়া ১টা পর্যন্ত বক্তৃতা হইত। কিন্তু অনেকে  
স্বামীজীর বক্তৃতা  
আরম্ভ।  
সেই সময় আসিতে পারিতেন না বলিয়া পুনরায় সেই  
বিষয় সন্ধ্যা ৭টার সময় হইতে আরম্ভ হইত। শুক্রবারেও

ঠিক এইরূপ ভাবে দুইবার বক্তৃতা হইত। প্রায় মাস খানেকের পর রবিবারে ‘পিকাডেলি’ নামক স্থানে রয়েল ইনষ্টিটিউটের ওয়াটার পেটিং গ্যালারীতে বেলা ৪টা হইতে বক্তৃতা হইত। বাড়ীর বক্তৃতার নাম হইল ‘ক্লাস লেক্চার।’ ক্লাস লেক্চারে রাজ্যযোগের একটি সূত্র লইয়া কথা আরম্ভ হইত। তাহার পর সেই কথা উপলক্ষ করিয়া প্রাচ্য ও পাশ্চাত্যে যত প্রকার দর্শন শাস্ত্র আছে, এমন কি ইতিহাস, কেমিস্ট্রী, ফিজিকস্ প্রভৃতি তুলিয়া অনর্গল বক্তৃতা দিতেন। বক্তৃতা শেষ হইলে প্রশ্ন আরম্ভ হইত। শ্রোতাদিগের ভিতর লইতে যাহারা প্রশ্ন করিতেন স্বামীজী তাঁহাদিগকে উত্তর দ্বারা বুঝাইয়া সন্তুষ্ট করিয়া দিতেন। এ সময়টাতে বিশেষ কোন নিয়ম-পদ্ধতি থাকিত না, বেশ সখ্য



## লগুনে বিবেকানন্দ

ভাবে কথাবার্তা হইত। কিন্তু এমন দিন ও দেখা গিয়াছে যে ক্লাস লেকচার হইতে প্রমোত্তরই সুন্দর হইয়াছে। কিন্তু এত ছুটি ও গভীর বিষয় তিনি এত শীঘ্র অনর্গল বলিয়া বাইতেন যে সমগ্র স্রবণ রাখা সম্ভবপর নয়, এমন কি বস্তারও পর মূহর্তে কিছু স্রবণ থাকিত না। তখনকার লোকের মধ্যে বর্তমান লেখক বতীত আর কেহ জীবিত আছেন বলিয়া জানা নাই।

যে দিন স্বামীজী বর্তমান লেখকের জর ভাল করিয়া দিয়াছিলেন সেই দিন তাঁহার প্রথম ক্লাস লেকচার আরম্ভ হয়।

হইলে রাত্রি ১১টার সময় স্বামীজী উপরকার ঘরে প্রথম দিনের বক্তৃতা আরম্ভ। চুকিলেন। পরিধানে লাল রঙের হাঁটু পর্যন্ত একটা

বকু (পাহাড়ীদের ছায় কোট অর্থাৎ অনেক সময় বাহা স্বামীজীর ছবিতে দেখিতে পাওয়া যায়) কোমরে একটা রেশমের কাপড় বা Sash। প্রফুল্ল অবস্থায় স্বামীজী ঘরে ঢুকিয়া ছই একবার পাইচারি করিয়া জিজ্ঞাসা করিলেন, 'কি রে শরৎ জেগে আছিস্? এই দুপুরের মাতন এখন শেষ হ'লো তাই তোদের দেখতে এনুম। আর তোর এখন জর-টর হয় নি ত? কি খেয়েছিস্? দুধ সাঙ খাচ্ছিস্ ত?' এই বলিয়া সামান্য আর দু' একটি কথা কহিয়া তিনি চলিয়া গেলেন।

প্রাতে ভোজনের কোন বিশেষ নিয়ম ছিল না। কখনও সকলে এক সঙ্গে বসিয়া খাইতেন আবার কখনও বা আঙুপেছুও খাইতেন। লোকও নির্দ্বারিত ছিল না কারণ গুডউইন ও ষ্টার্ডি ইহার প্রাতঃকালীন কার্য।

ইচ্ছামত কখনও একসঙ্গে কখনও বা পৃথক বসিতেন। আহার সমাপনান্তে ষ্টার্ডি সংস্কৃত নারদহৃত্ত পুস্তকখানি, কাগজ কলম ও দোয়াত লইয়া বসিতেন আর স্বামীজী সংস্কৃত বইখানি দেখিয়া ইংরাজীতে অনুবাদ করিয়া বাইতেন ও ষ্টার্ডি তাহা কাগজে লিখিয়া লইতেন। ইহা হইল প্রাতের নির্দিষ্ট কার্য, তা ছাড়া আবশ্যক মত অন্ত্র কার্যও হইত।

এই ইংরাজী নারদমূর্ত্ত পুস্তকখানি ষ্টার্ডি মুদ্রিত করিয়াছিলেন। কতকগুলি সংস্কৃত গ্রন্থ ‘ইণ্ডিয়া অফিসের’ পুস্তকাগার হইতে আনাইলেন। তখন কলিকাতার সি, এইচ, টনি পুস্তকাগারের অধ্যক্ষ ছিলেন। স্বামীজী সংস্কৃত পুস্তকগুলি পাইয়া ষ্টার্ডিকে বলিলেন, ‘আখ, ভারতবর্ষের কয়েক স্থানে আমি এই বই গুলির অনুসন্ধান করেছিলুম কিন্তু পাই নি। যাহা হউক এখন পাইলাম।’ স্বামীজী সেই পুস্তকগুলি অল্পদিনের ভিতরে পড়িয়া ফেরৎ দিলেন। এক্ষণে সেই পুস্তকগুলির নাম স্মরণ নাই।

আমেরিকাতে স্বামীজী যে সকল বক্তৃতা দিয়াছিলেন গুডউইন ক্ষিপ্ৰ লিপিতে তাহার অনেক লিখিয়া লইয়াছিলেন—সেইগুলি ছাপাইবার কথাবার্তা হইতে লাগিল। গুডউইন সময় পাইলেই স্বামীজীর আমেরিকার বক্তৃতা ছাপাইবার কথা আপনার নোট বই হইতে প্রচলিত অক্ষরে লিখিয়া ফেলিতেন এবং ছাপাইবার চেষ্টা করিতেন। এ বিষয়ে ষ্টার্ডি প্রধান উদ্যোগী ছিলেন এবং মিস্ মুলার ও অপরে অর্থ সাহায্য করিতে সম্মত হইয়াছিলেন। সিটি অফ লগুনে (সম্ভবতঃ কুইন ভিক্টোরিয়া ষ্ট্রীটে) স্থালভেসন্ আর্মিদের একটি বড় কার্য্যাশ্রম ছিল। গুডউইন একদিন বর্তমান লেখককে বলিলেন, ‘চল, হুজনে ছাপাখানায় যাই।’ গুডউইন ও বর্তমান লেখক হু’জনায় দুই মাইল দূরে ‘স্থালভেসন্ আর্মিদের’ ছাপাখানায় গেলেন। গুডউইন ঘুরিয়া ঘুরিয়া বর্তমান লেখককে সেই বাটীর সমস্ত অংশ দেখাইতে লাগিলেন। তাহাদের নিজেদের ব্যাক, ছাপাখানা, জুতার কারখানা প্রভৃতি অনেক প্রকার কার্যের কারখানা বর্তমান লেখক দেখিলেন। তাহার পর প্রফসিট হাতে লইয়া পুনরায় হু’জনায় বাড়ীর দিকে ফিরিয়া আসিলেন। রাস্তায় কাগজের বগলী করিয়া চেরীফল বিক্রয় হইতেছিল, তখন সবে নূতন উঠিয়াছে। এক পেনি

## লগুনে বিবেকানন্দ

করিয়া প্যাকেট, ছ'জনায় ছই প্যাকেট কিনিয়া লইলেন, গুডউইন বলিতে লাগিলেন, 'ইংলিশ চেরি সব দেশের চেয়ে ভাল, খাও খাও। আরে খুব ভাল করে খাও। তবে কাগজের বগ্‌লীটা পকেটে পুরো, লোকের স্মৃথে দেখিয়ে খেলে অসভ্য বল্বে। পকেটে হাত দিয়ে একটি কোরে বার কর আর খাও।' কাশ্মীরে এই চেরিকে গিল্‌ আম্‌ বলে এবং পারস্য দেশেও ঐ শব্দ ব্যবহার হইয়া থাকে। হিমালয়ের স্থানে স্থানে ইহাকে পাহাড়ী কুল বলিয়া একটা নাম করিয়া লইয়াছে। পারস্য দেশের ও কাশ্মীরের চেরিগুলি টোপা কুলের মত—খাইতে একেবারেই ভাল নয়। কিন্তু ইংরাজী চেরী খাইতে খুব সুস্বাদু। তাহার পর উভয়ে বাটীতে ফিরিয়া আসিলেন।

২টার সময় বা ল্যান্‌চের সময় (lunch) স্বামীজী অধিক দিবসই বাটীতে খাইতেন না। কোন বিশিষ্ট সম্ভ্রান্ত লোক আসিয়া স্বামীজীকে লইয়া যাইতেন এবং তাঁহার সহিত আহার করিতেন। বেলা ৪টার সময় তথায় চা খাইয়া হয় তাঁহার সহিত বেড়াইতে বাহির হইতেন নয় ত বাটীতে ফিরিতেন। বেলা সাড়ে চারিটার সময় বর্তমান লেখক ও গুডউইন বাটীতে ফিরিয়া আসিলেন। সারদানন্দ স্বামী ও মিঃ ফক্স বসিয়াছিলেন। বাটীতে একজন বুড়ী ঝি বা হাউস-কিপার ছিল, সে চা লইয়া আসিল। একটা টি পট্‌ করিয়া বা একটা ছোট জ্যাগে করিয়া কাঁচা দুধ, পিচবোডের মত পাতলা পাতলা মাখন দেওয়া পাঁউরুটী কাটা ও ল্যাম্প স্নগার। আর একটা বড় জ্যাগে গরম জল থাকে। ঝিনি পাতলা চা খান তাঁহাকে গরম জল দেয়। সাধারণতঃ ইংরাজেরা পাতলা চা খায়, বাঙ্গালীদের মত কড়া চা খায় না। খালাসীরা কড়া-চা খায় বলিয়া সেইজন্ত তাহাকে 'সেলার্স টি' বলিয়া থাকে। গুডউইন কর্তা হইয়া সকলের বাটীতে চা ঢালিয়া দিলেন—সকলেই চা ও রুটি দু'টুকরা করিয়া খাইলেন। ইংরাজদিগের

দেশে দুধ গরম করিয়া খায় না, সর্বদা কাঁচা থাকে। একবার বর্তমান লেখক গরম দুধ খাইয়াছিলেন। কিন্তু এত লবণ বোধ হইতে লাগিল যে খাইতে কষ্ট হইতে লাগিল। গরুকে ইহার অতিরিক্ত লবণ খাওয়ায়। ইহার দুধ কাঁচা খায় বলিয়া বাঙ্গালা দেশে বাহাকে দুধের সর বলিয়া থাকে তাহা তথ্য নাই। সেইজন্ত দুধের সরের কোন ইংরাজী কথাও নাই। চিনি হইতেছে বিট সুগার অর্থাৎ বিট পালঙ্গের চিনি। এক ইঞ্চি স্বয়ার এবং তিনখানা রাখিলে স্বয়ার হয়। ইহাকে বলে ল্যাম্প সুগার। আর এক রকম লাল দানাওয়ালা ব্রাউন সুগার আছে সেটা খুবই কম ব্যবহৃত হয়। কোন জিনিস হাত দিয়া ধরিবার প্রথা নাই। ল্যাম্প সুগার লইবার প্রথা হইতেছে যে একটি জার্মান সিলভারের বা ঐরূপ কোন সাদা ধাতুর বাহারি চিমটার দুই দিক্কার ডগাতে সরু সরু আঙ্গুলের মত কাঁটা দেওয়া আছে ; চিনির টুকরা সেই কাঁটা দিয়া টিপিয়া ধরিয়া ইচ্ছামত চায়ের বাটিতে দিতে হয়। হাত দিয়া চিনি তুলিয়া লওয়া নিষিদ্ধ। চা পান করিয়া টেবিলের একদিকে বসিয়া গুডউইন তাঁহার প্রফসিট দেখিতে লাগিলেন। সারদানন্দ স্বামী, ফক্স ও বর্তমান লেখক তিনজনে দেওয়ালের দিকে পিছন করিয়া আমেরিকা ও ভারতবর্ষের নানা কথাবার্তা কহিতে লাগিলেন। স্বামীজী কোথায় বাহির হইয়া গিয়াছিলেন, একেবারে রাত্রির আহ্বারের পর আসিলেন। গুডউইনই তখন বাড়ীর মালিক, স্বামীজী না থাকায় তিনি হাঁফ ছেড়ে বেঁচেছিলেন কিন্তু স্বামীজী ফিরে আসায় আবার পূর্ববৎ জড়সড় হইয়া রহিলেন।

সারদানন্দ স্বামী ফক্সকে অনিয়া লঘিমা প্রভৃতি শক্তির কথা বলিতে লাগিলেন। শ্রীচৈতন্যদেবের শরীর যেনন কখন হ্রস্ব বা দীর্ঘ হইয়া যাইত, কখন বা গ্রস্থি সকল যেন শিথিল হইয়া গিয়াছে এইরূপ দেখাইত সেই সকল বিষয় বলিতে লাগিলেন ও ফক্স অবাক হইয়া তাহা শুনিতে লাগিল,

## লগনে বিবেকানন্দ

মাঝে মাঝে শুধু একবার একবার প্রশ্ন করিল। প্রসঙ্গক্রমে কথা উঠিল যে একবার একটি আমেরিকান স্ত্রীলোক কলিকাতায় আসিয়াছিলেন, দেখিতে কৃশ, খুব সামর্থ্য আছে বলিয়া বোধ হইল না। তিনি কোন এক ধনাঢ্য ব্যক্তির প্রাঙ্গনে এক অলৌকিক কাণ্ড দেখাইয়াছিলেন। প্রাঙ্গনে তিনি ধ্যান করিতে বসিলেন এবং পূর্বেই বলিয়া দিলেন যে তিনি ধ্যানে বসিলে বলিষ্ঠ লোকেরা তাঁহাকে নড়াইবার চেষ্টা করিলেও নড়াইতে বা তুলিতে পারিবে না। সেই বিষয় পরীক্ষা করিবার জন্ত যণ্ডা যণ্ডা পালোয়ান তাঁহাকে তুলিয়া ফেলিবার চেষ্টা করিতে লাগিল, কিন্তু অকৃতকার্য হইল। প্রথমে একজন, তাহার পর দু'জন তাহার পর তিনজনেও পারিল না। পরে বক্ষে দড়ি বাঁধিয়া টানিতে লাগিল কিন্তু তাহাতেও কিছু সুরিধা করিতে পারিল না। ধ্যান ভঙ্গ হইলে তিনি সাধারণ কৃশ স্ত্রীলোকের স্থায় পুনরায় উঠিলেন। সারদানন্দ স্বামী ফলকে বুঝাইতে চেষ্টা করিলেন যে, যোগের অষ্ট সিদ্ধি হইলে এইরূপ শক্তি পাওয়া যায় এবং এ সকল কার্যও সহজে করিতে পারা যায়। মনুষ্য শক্তি পৃথিবীর সহিত এক হইয়া যায়, স্বতন্ত্র থাকে না। সেইজন্ত কৃশ স্ত্রীলোকটিকে নড়াইতে পারা যায় নাই। ফল এই সব বিভূতির কথা শুনিয়া অবাক হইয়া বসিয়া রহিল।

ষ্টার্ডি ও মিস্ মূলার নিরামিষভোজী, সেইজন্য বাড়ীতে মাছ মাংস কিছুই প্রবেশ করিতে দেওয়া হইত না। ফল মাংসাহারী সেইজন্য বাহিরে খাইতে চলিয়া গেল। তারপর তিনজনে একত্র বসিয়া আহার করিলেন। গুডউইনের কাজ শেষ হইয়াছে তাই তাঁহার ভারি স্তুতি। টেবিলটা সরাইয়া দিয়া মেঝেতে খানিকটা ফাঁকা জায়গা করিলেন, তাহার পর মেঝেতে নাচিতে সুরু করিলেন। সারদানন্দ স্বামীর সহিত ধ্বস্তাধ্বস্তি ও আপোসে গালমন্দ হইতে লাগিল। তাহার পর গান গাহিতে সুরু

করিলেন, ‘তেরা লেরা বোন দিলে।’ বর্তমান লেখক স্প্যানিশদের বড় বড় টুপি মাথায় দিয়া মাথা ছুলাইয়া পা তুলিয়া নাচের কথা বলিলেন। বর্তমান লেখক পোর্ট সৈয়দ বা এই রকম কোন স্থানে উক্ত নাচ দেখিয়া ছিলেন। ‘তুই বুঝি স্প্যানিশদের ক্যান্ ক্যান্ ডান্স দেখেছিস্’ এই বলিয়া গুডউইন পুনরায় বাণ্ডান্স দেখাইলেন, পরে স্প্যানিশদের নাচ আরম্ভ করিয়া মাঝে মাঝে হাসিতে লাগিলেন ও সারদানন্দ স্বামীর উপর মাঝে মাঝে গাল পাড়িতে লাগিলেন। গুডউইন মাঝে মাঝে নিজেকে একটা সিগারেট লইতেছেন আর একটা সারদানন্দ স্বামীর মুখে দিয়া বলিতেছেন, “খা খা স্মৃতি কর, সারাদিন খাটতে হয় স্মৃতি না কর্লে চলবে কি করে।” সারদানন্দ স্বামী বলিলেন, “দেখ ইংরাজ জাতির কি পরিশ্রম করিবার শক্তি! এই গুডউইন সমস্ত সহর ঘুরেছে, প্রফেসিট্ দেখেচে আবার এখন কি নাচ বেখ! এত পরিশ্রম না করিলে কি এই জাতটা উঠেছে।” তাহার পর ফক্স আসিল। সকলে মিলিয়া ষ্টেটস্‌এর কথা কহিতে লাগিলেন। ইউনাইটেড ষ্টেটস্‌কেই চলিত কথায় ‘ষ্টেটস্’ বলিয়া থাকে। তারপর রাত্রি হইলে সকলে শয়ন করিতে গেলেন।

## চার

প্রাতের বক্তৃতা বেলা ১১টার সময় আরম্ভ হইত। কিন্তু আহারাদি সমাপ্ত হওয়ায় স্বামীজী, সারদানন্দ স্বামী, গুড্‌উইন ও ষ্টার্ডি নীচেকার ক্লাসের বক্তৃতা ঘরে বসিয়া রহিলেন। বর্তমান লেখক উপরকার বক্তৃতা ও ঘরটিতে গিয়া একান্তে বসিয়া রহিলেন। বহুদূর পল্লী ম্যাকলাউড। ক্রিষ্টাল প্যালাশ বা সাইডেন্‌হাম হইতে একটি বৃদ্ধা রমণী আসিয়া বসিলেন। বৃদ্ধার বয়স ৬০ বৎসরের উপর হইবে বলিয়া বোধ হইল—স্কলকায়, চুলগুলি সাদা। অল্পে অল্পে কষ্টে কষ্টে সিঁড়িতে উঠিয়া তিনি বক্তৃতা ঘরটিতে আসিয়া একখানি চেয়ারে বসিলেন। গ্রীষ্মও বেশ আরম্ভ হইয়াছে কিন্তু শীতকালের মত গায়ে কাপড় থাকায় ঘাম হইতে লাগিল। দ্বিতীয়তঃ তিনি অনেকদূর হইতে আসিয়াছেন, তাই বাতাস খাইবার জন্য একখানি হাতপাখা চাহিলেন—বর্তমান লেখক সসম্মানে একখানি হাত-পাখা দিলেন। তাহার পর দুইজনায় কথাবার্তা হইতে লাগিল। তিনি বলিলেন, “এই স্বামীর কথা আমার বড় ভাল লাগে। আমি যেন বাইবেলের উল্লিখিত ব্যক্তিগণকে দেখিতে পাই। আমি মেয়ে মানুষ ও বৃদ্ধা, সব কথার মানে বুঝিতে পারি না, ও সব পণ্ডিতদের কথা। তবে স্বামী এমন একটি ভাবে বলেন এবং গলার আওয়াজ ও মুখ ভঙ্গি এমন-ভাবে করেন যে দেখতে শুনতে আমার ভাল লাগে। আমি যেন বাইবেলের অনেক ঘটনা চোখে স্পষ্ট দেখতে পাই।” বর্তমান লেখক জিজ্ঞাসা করিলেন “আপনি কোন খান থেকে আসেন?” বৃদ্ধা বলিলেন, “আমি সাইডেন্‌হাম ক্রিষ্টাল প্যালাশ থেকে আসি। তা অত গাড়ী ভাড়া কোথা

থেকে পাব তাই খানিক হেঁটে ও খানিক গাড়ীতে আসি কিন্তু প্রত্যেক লেকচারের দিন আমি আসিয়া থাকি।” এইরূপ কথাবার্তা হইতেছে এমন সময় ভাল কাপড় চোপড় পরা একটি ৩৫ বৎসর বয়সের স্ত্রীলোক ভিতরে আসিয়া একখানি চেয়ারে বসিলেন এবং সম্মুখে বর্তমান লেখকের সহিত কথাবার্তা কহিতে লাগিলেন। তিনি নিজেই পরিচয় দিলেন যে তাঁহার নাম মিস্ জোসেফাইন ম্যাক্‌লাউড, আমেরিকায় বাড়ী, তিনি স্বামীজীর নিতান্ত অনুরাগত। নামটি পূর্ব হইতে জানা ছিল সেজন্য বর্তমান লেখক অতি আনন্দিত হইয়া বিশেষ সম্মানের সহিত কথাবার্তা কহিতে লাগিলেন। মিস্ ম্যাক্‌লাউড তখন বসিয়া স্বামীজীর বিষয় কথাবার্তা কহিতে লাগিলেন এবং তাঁহার কথাবার্তার প্রত্যেকটির ভিতরই স্বামীজীর প্রতি একটা প্রগাঢ় অনুরাগ, শ্রদ্ধা ও ভক্তি প্রকাশ পাইতে লাগিল। স্বামীজীর প্রতি আন্তরিক শ্রদ্ধা ও ভক্তি তাঁহার প্রত্যেক কথাবার্তায় বা অঙ্গ চালনায় প্রকাশ পাইতে লাগিল। কথাবার্তা চলিতেছে এমন সময় শ্রোতৃবৃন্দ আসিতে লাগিলেন এবং দুই তিন মিনিটের ভিতর ঘর ভরিয়া গেল। সারদানন্দ স্বামী ও গুড্‌উইনকে সঙ্গে লইয়া স্বামীজী ঘরে প্রবেশ করিলেন। গুড্‌উইন তাঁহার নিজের স্থানে খাতা-পত্ৰ লইয়া বসিলেন। ঘরের ভিতর ভিড় বেশী হওয়ায় সারদানন্দ স্বামী ও বর্তমান লেখক সিঁড়িতে উঠিয়া চাতালে দুইখানি চেয়ার লইয়া বসিলেন। ষ্টার্ডি ভিতরকার ঘরে কোণের দিকের শোফার উপর বসিলেন। এই সব বক্তৃতায় ষ্টার্ডি সভাপতি ছিলেন এইজন্য তিনি ভিতরকার শোফায় বসিতেন, অবশ্য স্বামীজীর স্থান হইতে অনেক দূরে।

শ্রোতৃবর্গ ক্রমশঃ বাড়িতে লাগিল এবং চাতালও ভরিয়া গেল। সারদানন্দ স্বামী, ফক্স ও বর্তমান লেখক তেতলায় উঠিবার সিঁড়ির প্রথম ধাপে বসিলেন। নূতন লোক আসিয়া দাঁড়াইয়া রহিল। তিনজনে



## লণ্ডনে বিবেকানন্দ

ক্রমশঃ উপর উপর ধাপে উঠিতে উঠিতে শেষে তেতলার চাতালে গিয়া বসিলেন। যে যতটুকু শুনিতে পায় ততটুকুই ভাল। কিন্তু সারদানন্দ স্বামী ও বর্তমান লেখক তেতলার চাতালের ( landing place ) নিকট বসায় ঘরের ভিতরের সমস্ত কথা শুনিতে পাইতেছিলেন।

এই সময় একটি জ্বীলোক আসিতেন। তিনি হাসপাতালের নার্স ছিলেন অর্থাৎ পোষাকের উপর সাদা একটি ‘এপ্রোন’ ( Apron ) ও মাথায় একটি কৌচকান ফুলকরা কাপড়ের টুপি ছিল। লণ্ডন সহরে এইরূপ পরিচ্ছদ হাসপাতালের নার্সদিগের হইয়া থাকে সেইজন্ত তাঁহাকে হাসপাতালের নার্স বলিয়া জ্ঞান হইয়াছিল। জ্বীলোকটির বয়স আন্দাজ ৩০।৩২ বৎসর হইবে। অবয়ব ক্লশ। তিনি চাতাল বা চাতালে ঢুকিবার দরজার ঠিক নিকটে বসিয়া নিবিষ্ট মনে ক্ষিপ্ত-লিপিতে সমস্ত বক্তৃতাটি লিখিয়া লইতেন। কোনদিকে চাহিতেন না বা কাহারও সহিত কোন কথাবার্তা কহিতেন না। নিজের মনে একপ্রাণে লিখিয়া যাইতেন এবং বক্তৃতা শেষ হইলে তিনিও ত্বরিতপদে চলিয়া যাইতেন। ছুপুরবেলার প্রত্যেক বক্তৃতাটিতে তিনি আসিতেন এবং লিখিয়া লইতেন। কিন্তু তিনি কাহারও সহিত আলাপ পরিচয় কখনও করেন নাই।

প্রায় ১টার সময় বক্তৃতা সমাপ্ত হইল। উপস্থিত ব্যক্তিদের ভিতর অনেকেই স্বামীজীর সহিত একটু আধটু কথা কহিয়া চলিয়া গেলেন। মিস্ জোসেফাইন ম্যাক্‌লাউডের সহিত আর একটি রমণী ঘর হইতে বাহির হইয়া নামিতে লাগিলেন ও স্বামীজীর সহিত যেন বিশেষ পরিচিত এইভাবে কথা কহিতে লাগিলেন। তাঁহার বেশভূষা অস্বাভাবিক জ্বীলোকদিগের চেয়ে বিশেষ দামী। ইটের-রঙের গরদের পোষাক এবং মিস্ ম্যাক্‌লাউডের চাইতে তাঁর বয়স একটু বেশী। উভয়ে একখানা ‘হাণ্ডশাম্’ গাড়ী করিয়া চলিয়া গেলেন। পরে শুনা গেল যে তাহার নাম মিসেস্ লেগেট এবং

তিনি মিস্ ম্যাক্‌লাউডের জ্যেষ্ঠা ভগ্নী। বক্তৃতার পর প্রায়ই কেউ না কেউ নিমন্ত্রণ করিয়া স্বামীজীকে সঙ্গে লইয়া গিয়া খাওয়াইতেন। স্বামীজীও সেদিন কাহার সহিত আহার করিতে চলিয়া গেলেন। বক্তৃতা-ঘরে স্ত্রীলোকদিগের সংখ্যা বেশী হইয়াছিল; পুরুষের সংখ্যা কম, কারণ দিনের বেলা পুরুষেরা কাজে ব্যস্ত থাকেন সেইজন্ত আসিতে পারেন না, রাত্রে বক্তৃতার সময় তাঁহারা উপস্থিত হইতেন। তবুও দিনের বেলা পুরুষের সংখ্যা বড় কম থাকিত না। লগুনে “স্বামীজী” কথাটা গুড্‌উইন বা অপর কেহ ব্যবহার করিত না। সম্মান অর্থে যে ‘জী’ ব্যবহার করিতে হয় তা তাহারা জানিত না। তাহারা “স্বামী” এই শব্দ ব্যবহার করিত।

রাত্রি সাতটার সময় সেই বক্তৃতা পুনরায় হইত। অনেক ভদ্রলোক তখন উপস্থিত থাকিতেন। লগুনের একজন বড় পাদ্রী (canon) সপরিবারে রাত্রে বক্তৃতার সময় উপস্থিত থাকিতেন। তিনি স্বামীজীর প্রতি বিশেষ অমুরাগ ও শ্রদ্ধাভক্তি দেখাইতেন। রাত্রে বক্তৃতার পর স্বামীজী কখনও বা ষ্টার্ডিকে কখনও বা গুড্‌উইনকে লইয়া খানিকক্ষণ রাস্তায় বেড়াইয়া আসিতেন। কারণ অনবরত কথাবার্তা করিয়া শরীরটা ক্লান্ত হইয়া পড়িত সেইজন্ত অনেকক্ষণ পায়েচাষি করিয়া আসিলে রাত্রে ঘুম হইত।

মিস্ জোসেফাইন ম্যাক্‌লাউড আসা অবধি বেলা একটার সময় প্রত্যহ ‘উইলিয়ম হোয়াইটলির’ দোকান হইতে একজন স্ত্রীলোক আসিয়া কাগজে মোড়া অনেক ফল দিয়া যাইত। বাজারে ফল উঠিবার প্রায় তিন সপ্তাহ পূর্বে টাটকা ফলগুলি পৌছিয়া দিয়া যাইত। আনারস ফল লগুনে হুজাপ্য এবং তাহার উপর দাম প্রায় এক গিনি। মাঝে মাঝে সেই লোকটা আনারস ফলও দিয়া যাইত। যখনকার যে ফলটি প্রথম পাওয়া

## লগনে বিবেকানন্দ

সাইত যতই তাহার দাম বেশী হউক না কেন, সেই লোকটি তাহা দিয়া সাইত। নানা রকম ভাল ভাল ফল প্রত্যহ এগারটার সময় আসিত। কিন্তু কে দোকানে টাকা জমা দিয়াছে এবং কাহার আদেশ মত ফল আসিতেছে তাহা কেহ জানিত না। অমুমান অনেকে করিলেও কেহ জিজ্ঞাসা করিত না কারণ যিনি দিতেছেন তিনি যখন তাঁহার নাম জানাইতে ইচ্ছুক নন তখন সেই কথার পুনরুত্থান হইত না।

স্বামীজী পূর্বরাত্রে কোথায় নিমন্ত্রণে গিয়াছিলেন, আসিতে রাত্রি হইয়াছিল। বক্তৃতার দিন নয় সেইজন্ত তিনি একটু বেলা পর্য্যন্ত বিছানায় স্বামীজীর হাস্য রসিকতা। ছিলেন। সকলের প্রাতঃভোজন সমাপ্ত হইলে স্বামীজী ড্রেসিং গার্ড্‌ন্ বা কোমরে দড়ি-বাঁধা লম্বা বনাতের জামা পরিয়া পায়ে পাতলা কাল চামড়ার জুতা পরিয়া একা খাইতে বসিলেন। ষ্টার্ডি, গুডউইন, সারদানন্দ স্বামী ও বর্তমান লেখক দেওয়ালের নিকট চেয়ারে বসিয়াছিলেন। গুডউইন গৌফ কামাইতেন। প্রায় দু'সপ্তাহ গৌফ কামান নাই তাই একটু একটু গৌফ উঠিয়াছে। গুডউইন গৌফে হাত বুলাইতে বুলাইতে আফ্লাদ করিয়া বলিলেন, "A painter will give me ten pounds to make this a model" অর্থাৎ চিত্রকরেরা আমার গৌফ জোড়াকে মডেল বা আদর্শ করিবার জন্ত ১০ পাউণ্ড আমায় দিবে। স্বামীজী কৌতুকভাবে গুডউইনের দিকে খানিকক্ষণ চাহিয়া চট্ করিয়া বলিয়া উঠিলেন, "yes, it would be a pair of very nice broom" অর্থাৎ হ্যাঁ, একজোড়া বাঁটার বেশ নমুনা হইতে পারে। সেই কথা শুনিয়া সকলে হাসিতে লাগিল ও গুডউইন অপ্রস্তুত হইয়া পড়িলেন। ষ্টার্ডি খুব প্রফুল্ল, কারণ ক্লাস-লেকচার বেশ জমিয়া আসিয়াছে এবং রবিবারের বক্তৃতার চেষ্টা হইতেছে। ষ্টার্ডি বসিয়া দু'হাত দিয়া চেয়ারখানি বাজাইতে লাগিল এবং মুখে সঙ্গীতের আওয়াজ

করিতে লাগিল। “ক্যান্টনমেন্টের ঢাকের আওয়াজ অনবরত ঠিক এইভাবে বাজে” এই বলিয়া সে হাতে চেয়ারে টোকা মারিয়া বাজনা বাজাইতে লাগিল ও সুরের নকল করিতে লাগিল। তাহার পর সে বলিল, “আমি যখন স্কুলে পড়িতাম সেই সময় একটি মাষ্টার একটি ছেলের হাতে বেত মারিয়াছিল। বালকটি এত তেজী ও নির্ভীক ছিল যে সে হাত সরাইল না এবং শিক্ষককে পুনঃ পুনঃ বলিতে লাগিল, আরও মারুন আরও মারুন। ছাত্রটির হাত দিয়া রক্ত পড়িল কিন্তু সে স্থির হইয়া রহিল। অবশেষে শিক্ষক লজ্জিত হইয়া স্থির হইলেন। সেই পর্য্যন্ত I become awfully angry when I see a man beating a boy অর্থাৎ একটি লোক যদি ছোট ছেলেকে মারে তা হলে আমার ভারি রাগ হয়।” এই বলিয়া ষ্টার্ডি ক্ষান্ত রহিলেন। গুড্‌উইন প্রফুল্ল, কিছু বলিতে হইবে কিন্তু কি বলিবেন তা মাথায় ছিল না—তিনি বলিয়া উঠিলেন, “Yes, Mr. Sturdy, I too become awfully angry when I see a man beating a donkey !” অর্থাৎ যখন কোন মানুষ গাধাটাকে মারে তখন আমিও ভয়ানক রাগিয়া বাই। গুড্‌উইন যেমন এই কথা বলিয়াছে স্বামীজী ব্যঙ্গচ্ছলে স্থিরদৃষ্টিতে চাহিয়াছিলেন অমনি বলিলেন, ‘Yes because it rouses your fellow feelings’ অর্থাৎ ঠিক বলেছি গাধাকে মারিলে তোর স্বশ্রেণীর প্রেম উথলে উঠে তাহাতে তোর এত রাগ হয়। সেই শুনিয়া সকলে হোঃ হোঃ করিয়া হাসিয়া উঠিল এবং গুড্‌উইনও অপ্রতিভ হইয়া পালাইবার চেষ্টা করিলেন।

বেলা ১১টার সময় গুড্‌উইন সারদানন্দ স্বামী ও বর্তমান লেখককে সঙ্গে লইয়া সহর দেখিতে বাহির হইলেন। চেরিংক্রসে ‘কিগেন্‌ পল্’ Kegen Paul পুস্তকের দোকানে বাইবার কথাবার্তা হইল। কারণ লণ্ডনে স্বামীজীর প্রথম ছাপা বইগুলি কিগেন্‌পল্ বাহির করিয়াছিল। বইগুলি

## লাগুনে বিবেকানন্দ

যেমন ছাপা তেমন বাঁধান । কলিকাতার বটতলাও তাহার চাইতে নীচে যায় না । বাহা হউক সেটা প্রথম ছাপা হইয়াছিল এবং সেই পুস্তক অবশ্য কেহ পড়িতে ইচ্ছা করিত না । একটু খানি চটি বই । কিগেন্-পলের দোকান হইতে গুড্‌উইন নানাস্থল ঘুরিয়া সেন্ট্‌ জেম্‌স্‌ প্যালেসের ( পুরান রাজ বাড়ী ) দোর দিয়া আসিতে লাগিলেন । তিনজনেই একসঙ্গে চলিয়া যাইতেছিলেন কিন্তু চলিবার সময় ইংরাজদিগের যে কি আচার-পদ্ধতি আছে তাহা বিশেষ তাঁহাদের জানা শুনা ছিল না । গুড্‌উইন উভয়ের পদবিক্ষেপের প্রতি চাহিয়া বলিয়া উঠিলেন, “Oh Swami, I cannot keep pace with you” অর্থাৎ আমি আপনাদিগের সহিত সমানভাবে পা ফেলিতে পারিতেছি না । ইংরাজদিগের চলিবার সময় সকলের পদবিক্ষেপ সমান থাকে, আগু পেছু হয় না কারণ তাহা বড় অসভ্যতার পরিচয় । কিন্তু ভারতবর্ষীয়দের চলিবার সময় পদ-বিক্ষেপ সমান ভাবে পড়ে না । সেইজন্ত গুড্‌উইন ঐ কথা বলিয়াছিলেন । দরজায় ‘গ্রীনেডীয়ার’ গার্ড অর্থাৎ যাহাদের মাথায় ভালুকের মত চামড়ার টুপি থাকে তাহারা পাহারা দিতেছিল । হঠাৎ সিপাইয়ের সম্মুখে পড়াতে সারদানন্দ স্বামী একটু ত্রস্ত হইয়া কয়েক পদ হটিয়া আসিলেন । সেই দেখিয়া গুড্‌উইন হাস্ত কৌতুক করিয়া বলিলেন, “Oh devil, you are scared to death” অর্থাৎ একটা সিপাই দেখে যে ভয়ে মরে যাচ্ছিলে । তাহার পর হাইড্‌পার্ক ও অপর অপর স্থান দেখাইয়া বলিতে লাগিলেন, “This is our national property” অর্থাৎ আমাদের জাতের এই সম্পত্তি । চেরিং ক্রসে ‘নেলসন্-কোলাম’ দেখাইয়া বলিতে লাগিলেন, “This is our national column.” গুড্‌উইনের মুখে অনবরত এই national (জাতীয়) কথাটি এমন শুনাহঁতে লাগিল যে সারদানন্দ স্বামী ও বর্তমান লেখক উভয়ে পরস্পরের মুখের দিকে চাহিয়া ঝহিলেন । গুড্‌উইন যেন বুক ফুলাইয়া কথা বলিতে লাগিলেন এবং তাঁহার

মুখে শোভা পাইতে লাগিল। আর সঙ্গী দুজনায় জাতিভাই, তাই উভয়ে মাথা হেঁট করিয়া রহিলেন ও প্রাণে প্রাণে প্রভেদটা খুব বুঝিতে পারিলেন। তাহার পর তিনজনে বাড়ী ফিরিলেন, ফল পূর্ব হইতেই আসিয়া বসিয়াছিল। স্বামীজী উপরকার ঘরে কোন অভ্যাগতের সহিত কথা কহিতেছিলেন সেখানে তখন বাওয়া নিষিদ্ধ। তিনি পূর্বেই আহাৰ করিয়া লইয়াছিলেন। দুটা ভাত এবং ওলন্দা-কড়ায়ের মটর ডাল হইয়াছিল। ডালেতে একটু কারি-পাউডার ও নুন দিয়া সিদ্ধ করিয়া একটু মাখন দেওয়া হইয়াছিল। বাহা হটক ডাল, ভাত, একটু একটু রুটি ও আলুর তরকারী লইয়া খাইতে বসিলেন—গুড্‌উইনের মটর-ডাল খাইয়া মহা আনন্দ। মটর-ডালে একটু ঘি পড়েছিল তাহাতে ছ' চামচ ভাত দিয়া মুখে খুব ভাল লেগেছিল। গুড্‌উইন আনন্দ করিয়া বলিতে লাগিলেন, 'আমি এ রকম জিনিস খাইয়া সারা জীবন থাকতে পারি, আহা কি সুন্দর জিনিস!' সারদানন্দ স্বামী ও বর্তমান লেখক একটু মিটকি মিটকি হাসিতে লাগিলেন কারণ—হায় রে কপাল! এখানেও মটর ডাল সিদ্ধ?

আহারান্তে সকলে বসিয়া আছেন এমন সময় মিস্‌ জন্সন্‌ নামে একটি স্ত্রীলোক আসিলেন। উপরকার ঘরে স্বামীজী কাহার সহিত কথা কহিতে ছিলেন সেইজন্ত তিনি নীচে বসিয়া রহিলেন এবং সারদানন্দ স্বামী বর্তমান লেখকের সহিত কথা কহিতে লাগিলেন। স্ত্রীলোকটির বয়স ৪২।৪৩ বৎসর হইবে। দেখিতে ক্লশ ও খর্বাকৃতি। তিনি জাতিতে ইংরাজ হইলেও মস্কোতে জন্মাইয়াছিলেন ও তথায় পরিবর্তিত হইয়াছেন। বিবাহ করেন নাই ও নিজের চলিবার মত সঙ্গতি আছে। তিনি ব্যগ্র, উৎসুক ও ভক্তিপূর্ণ ভাবে বলিতে লাগিলেন যে, একদিন তিনি মস্কোতে রাত্রি নিদ্রা যাইতেছেন এবং স্বপ্ন দেখিলেন যে একটি জ্যোতিষ্ময় পুরুষ

## লগুনে বিবেকানন্দ

আসিয়া বলিলেন, ‘চলে এস।’ তিনি দ্বিধা বা আপত্তি না করিয়া সেই জ্যোতিষ্ময় লোকটির সহিত চলিতে লাগিলেন। অনেক দূর চলিয়া মাঠ পার হইয়া সগুদ্রের তীরে উপস্থিত হইলেন। ঘোর অন্ধকার রাত্রি কিন্তু সম্মুখে একটি কাঠের জাহাজ হাতে অনুভব করিলেন। সেই অন্ধকার হইতে আওয়াজ আসিল, ‘এই জাহাজে উঠ।’ তিনিও সেইমত জাহাজে উঠিলেন। জাহাজ ছাড়িয়া দিল, পালে বাতাস লাগিল—জাহাজ নক্ষত্র-বেগে ছুটিল। চারিদিকে মহাসমুদ্র, কিছুতেই দিক নির্ণয় হইতেছে না। রাত্রি ঘোর অন্ধকার, নক্ষত্রও দেখিতে পাওয়া গেল না। ক্রমে প্রাণে শঙ্কা আসিল এবং শঙ্কা ক্রমে বিভীষিকার পরিণত হইল। চারিদিক অন্ধকার, জাহাজের নায়ক কে, কয়জন আরোহী কিছুই বুঝিতে পারিলাম না। এইরূপ ভাবে কিছুক্ষণ থাকিয়া দেখিলাম যে জাহাজের মাঙ্গল হইতে ডগা (prow) পর্যন্ত দড়ি লাগান, তাহাতে একটি লণ্ঠন রহিয়াছে। হঠাৎ যেন আলোটা আসিল, আলোটা ক্ষুদ্র হইলেও প্রাণে একটু আশা হইল। দেখিলাম যে আলোর নিকট একজন লোক দাঁড়াইয়া রহিয়াছেন, তিনি জাহাজের কাপ্তেন বা অথ কৰ্মচারী হয় তো হইবেন, যাহা হউক তাঁহাকে স্পষ্ট দেখিলাম। তাঁহার চেহারার ফটো স্পষ্ট আমার প্রাণে উঠিল। লোকটি আমার দিকে চাহিয়া আমার ভীত দেখিয়া বলিলেন, ‘ভয় নাই অন্ধকার হইলেও জাহাজ ঠিক স্থানে গিয়া পৌছিবে, তোমার কোন ভয় নাই।’ হঠাৎ আমার স্বপ্ন তিরোহিত হইল, আমার ঘুম ভাঙ্গিয়া গেল। জাহাজে যে লোকটিকে দেখিলাম তিনি যে কোন্ দেশের লোক তাহা ঠিক করিতে পারিলাম না। স্বপ্ন আমার প্রাণে এত লাগিয়াছিল যে রুষিয়াতে আমি অনেক স্থান দেখিয়াছি কিন্তু সেই মুখ আর দেখিতে পাই নাই। কয়েক বৎসর আমি লগুনে বাস করিতেছি এবং স্থির করিলাম যে আমার মাথার গোল হইয়াছে সেইজন্ত এরূপ স্বপ্ন

দেখিলাম। কয়েক সপ্তাহ পূর্বে লোকপরম্পরায় শুনিলাম যে, একজন হিন্দুধর্ম বিষয়ে বেশ বক্তৃতা করিতেছেন। আমার স্বপ্ন মিথ্যা হইবে জানিয়া বক্তৃতা আরম্ভ হইবার পূর্বেই আসিয়া বসিলাম। খানিকক্ষণ পরে বক্তৃতা আরম্ভ হইল, আমি কথাবার্তা কিছু বুঝিলাম না—স্থির বা অর্ধ নিদ্রিত হইলাম। পূর্বস্মৃতি স্পষ্ট আমার মনে আসিল। জাহাজে যে মুখ, যে বর্ণ দেখিয়াছিলাম সেই মুখই এক্ষণে ঠিক দেখিলাম। আর যে কণ্ঠস্বর আমাকে আশ্বাস দিয়াছিল স্বামীজীরও সেই কণ্ঠস্বর শুনিলাম। আমার মনে যে সন্দেহ ও যন্ত্রণা ছিল তাহা আমি বলি নাই কিন্তু স্বামীজী বক্তৃতাকালে ঠিক সেই প্রশ্ন তুলিয়া তাহার উত্তর দিলেন। আমার মনে হইল যেন আমাকে মনে করেই তিনি উক্ত কথা বলিলেন। আমি মেয়ে মানুষ, স্বামীজীর সঙ্গে কথা কহিতে ভয় করে—কিছুই বলিতে পারি নাই। তা যদি এক্ষণে সময় হয় ত একবার যাব, জানিনে কি বলিবেন। মিস্ জনসন্ এই কথা বলিতে বলিতে অভিভূত হইয়া পড়িলেন। বুকে হাত জোড় করিয়া রহিলেন ও চক্ষে জল আসিল এবং কণ্ঠস্বর রুদ্ধ হইতে লাগিল, তাঁহার ভাবভঙ্গী দেখিয়া মনে হইল যে তিনি কোন অলীক কথা কহিতেছেন না। তিনি অতি ভক্তিপূর্ণ ও নিষ্ঠাভাবে কথাগুলি বলিয়াছিলেন বলিয়া আমরা সকলে তাঁহার কথা বিশ্বাস করিয়াছিলাম এবং পরে আমরা সেই বিষয় লইয়া চর্চা করিতে লাগিলাম।

মিস্ জনসন্ উপরে চলিয়া গেলে পঞ্চাশ-পঞ্চাশ বৎসরের একজন স্ত্রীলোক একটি কুকুর সঙ্গে লইয়া আসিলেন। কুকুরটির গলায় চামড়ার বিনানো দড়ি (leash) ছিল। মহিলাটি বেশ গিন্নি-বান্নি ও ভাল কাপড়-চোপড় পরিয়াছিলেন। বৈঠকখানা-ঘরে ঢুকিয়া আলমারির হাতলে কুকুরটিকে বাঁধিয়া রাখিলেন এবং কাহারও অনুমতি না লইয়া উপরে উঠিতে লাগিলেন। কেবল জিজ্ঞাসা করিলেন, “স্বামীজী কোথা আছেন?” সারদানন্দ স্বামী



## লগুনে বিবেকানন্দ

বলিলেন, “উপরে।” এই কথা শুনিয়া তিনি গম্ভীরভাবে উপরে উঠিতে লাগিলেন। কুকুরটি হাঁপাইতে হাঁপাইতে এদিক্ ওদিক্ করিতে লাগিল। পাছে কুকুর গালচে নষ্ট করে সেই জন্ত বর্তমান লেখক কুকুরটাকে প্যাসেজ বা গলিতে বাঁধিতে যাইতেছিলেন সেই দেখিয়া সারদানন্দ স্বামী বর্তমান লেখককে বলিলেন,—“ওহে ও কাজ ক’রোনা, ও এক জেনারেলের পরিবার, ওরা স্ত্রী-পুরুষে স্বামীজীকে বিশেষ শ্রদ্ধা ভক্তি করে। কাজ নাই বাপু কে বকুনি খাবে। ও যেখানকার কুকুর সেখানে থাক্।”

রাত্রি আহারের পর স্বামীজী ও ষ্টার্ডি পায়চারি করিতে লাগিলেন, সারদানন্দ স্বামী ও বর্তমান লেখক পশ্চাতে পশ্চাতে চলিলেন। স্বামীজী ষ্টার্ডিকে গুডউইনের সহিত কিরূপে আলাপ হইয়াছিল সেই কথা বলিতে আরম্ভ করিলেন। স্বামীজী বলিলেন,—“আমেরিকায় প্রথম এম্নি এম্নি বক্তৃতা দিতুম, কেই বা লেখে আর কেই বা খবর রাখে! অবশেষে সকলে জিদ্ করিল যে এমন সব সুন্দর সুন্দর বক্তৃতা নষ্ট হয়ে যাচ্ছে এগুলি লিখে রাখা ভাল এজন্ত সংবাদপত্রে এক দ্রুত-লিপি-লেখকের প্রয়োজন বলিয়া তাঁহারা বিজ্ঞাপন দিলেন। অনেক কর্মপ্রার্থী আসিল, তাহারা সকলেই আমেরিকান দেখলুম। এক ছোঁড়া ইংরেজ আমেরিকায় গিয়ে চিকাগোর প্রদর্শনী দেখে সংবাদ দেয় ও চিকাগোর বক্তৃতা নিয়ে খবরের কাগজে দিয়ে দিন চালায়। সেও কর্মপ্রার্থী হইয়া আসিল এবং তাহাকে সাহায্য করিবার জন্ত লওয়া হইল। প্রথম প্রথম সে বৃত্তিভোগী হইয়া আসিয়াছিল। অতঃপর থাকিত ও খাইত, সপ্তাহখানেক পরে সে আমার বড় অনুগত হইল এবং বলিল যে আমি আর কিছু লইব না, আপনার সব কাজ করিব। সেই থেকে গুডউইন আমার সঙ্গে রয়েছে। ও আমার ঢের কাজ করে, ও না থাকলে আমার বড় অসুবিধা হয়।” স্বামীজী

এইরূপে গুডউইনের সূখ্যাতি করিতে থাকিলে ষ্টার্ডি গম্ভীর হইয়া গেল দেখিয়া স্বামীজী কথা ঘুরাইয়া লইলেন।

তাহার পর Conjugal right বা জীবী কতক্ষণ পর্য্যন্ত স্বামীর উপর ভরণ-পোষণের অধিকার থাকে সেই সব কথা উঠিল। ষ্টার্ডি বলিল,—“ইংরাজী আইন মতে যদি পরম্পর ফারখৎ না হয় তা হলে জীবী যাবজ্জীবন অধিকার থাকে।” স্বামীজী বলিলেন,—“হিন্দুধর্মে কিন্তু পার্থক্য আছে। স্বামী যতদিন পর্য্যন্ত উপার্জন করিবে ততদিন পর্য্যন্ত জীবী অধিকার আছে কিন্তু স্বামী যদি সন্ন্যাস গ্রহণ করেন তা হলে স্বামীর উপর জীবী আর কোন অধিকার থাকে না” এই বলিয়া স্বামীজী সংস্কৃত গ্রন্থ হইতে শ্লোক উদ্ধৃত করিতে লাগিলেন।

স্বামীজী মাথার সিঁথে সম্মুখদিকের মাঝখানে কাটিতেন। বর্তমান লেখক মাথার বাঁ-দিকে সিঁথে কাটিতেন। স্বামীজী সেদিন হঠাৎ বাঁ-দিকে সিঁথি কাটিলেন। পরদিন প্রাতে টেবিলে খাইতে স্বামীজীর প্রাতঃকালীন বসিয়া পরম্পরের মাথায় দৃষ্টি হওয়ার স্বামীজী আহায়াদি হাসিলেন কারণ সেদিন তিনি অল্প প্রকারে চুল আঁচড়াইয়াছিলেন। আহাযের পর ষ্টার্ডির ‘নারদ সূত্র’ কিয়ৎ পরিমাণে অনুবাদ করা হইল। ষ্টার্ডি চলিয়া গেলে স্বামীজী আপনাদের ঘর হইতে বহুতার পরিচ্ছদ অর্থাৎ লাল রঙের জামাটা ও রেশমের কোমর-বন্ধ পরিয়া আসিলেন। রবিবারেও বহুতার বন্দোবস্ত হইয়াছে, ক্লাস্ লেকচার বেশ জমিয়াছে, লোকজনও খুব আসিতে শুরু করিয়াছে, তাই স্বামীজী বেশ প্রফুল্ল। সকালের বহুতা আরম্ভ হইতে প্রায় ঘণ্টাখানেক সময় বাকী আছে। বেলা দশটা হইয়াছে, রাত্তার অনেক লোকজন আগা-গোনা করিতেছে। ডাইনিং-ঘরের রাত্তার দিকের জানালার সমস্তটা একথানা বড় কাঁচ দিবে ঢাকা ছিল। রাত্তার লোকজন সব দেখা যাইতে-

লগনে বিবেকানন্দ

ছিল। সেই দিকে চাহিয়া স্বামীজী একটি কৌতুকপূর্ণ গান রচনা করিলেন :—

“ছাতি হাতে টুপি মাথায় আস্চে যত ছুঁড়ী,  
মুখে মেখেছে তারা ময়দা ঝুড়ি ঝুড়ি।”

গানটি এমন বিজ্রপ ও রহস্যের সহিত স্মর করিলেন যে বর্তমান লেখক হাসিতে হাসিতে দরজার সম্মুখে প্যাসেজে বাহির হইয়া আসিয়া মুখে রুমাল দিয়া হাসিতে লাগিলেন। স্বামীজী সারদানন্দ স্বামীকে বলিলেন, “ঞাখ্, মুখে মাগীরা পাউডার মেখেছে যেন কোদাল দিয়ে চাঁচা যায়।” বর্তমান লেখক পুনরায় ঘরে প্রবেশ করিলেন এবং স্বামীজী সারদানন্দ স্বামীর সহিত হাসি ঠাট্টা করিয়া কথা কহিতে লাগিলেন।

স্বামীজী ঘড়ি খুলিয়া দেখিলেন যে বক্তৃতার আর চার পাঁচ মিনিট সময় বাকী আছে। স্বামীজী ও সারদানন্দ স্বামী কৌতুক করিতে করিতে ঘর হইতে বাহির হইয়া সিঁড়ির ধাপের দিকে চলিলেন। বর্তমান লেখকও পেছনে চলিলেন। তখনও দু’জনে অল্প-বয়স্ক ক্রীড়াপ্রিয় বালকের খায় পরস্পর পরস্পরকে কল্পের গুঁতা মারিতেছিলেন ও হাসি তামাসা হইতেছিল। ক্রমেই যখন স্বামীজী এক এক সিঁড়ি উঠিতে লাগিলেন তখন তাঁহার মুখের ভাব, চক্ষুর জ্যোতিঃ ও গলার আওয়াজ সম্পূর্ণ পরিবর্তিত হইতে লাগিল। স্বতন্ত্র ব্যক্তি—মহাপ্রতাপশালী সিংহবিক্রমী আর এক ব্যক্তি সহসা আবির্ভূত হইলেন। সারদানন্দ স্বামী সহসা স্বামীজীর মুখের দিকে চাহিয়া একেবারে দ্রস্ত ও বিহ্বল হইয়া পড়িলেন। সেই পুরাতন পরিচিত ব্যক্তি এক্ষণে আর নাই— স্বতন্ত্র আর এক ব্যক্তি, কাহার সহিত তিনি চপলতা করিতেছিলেন। সারদানন্দ স্বামী চার পাঁচ পইটে উঠিয়া স্থির হইয়া কাঠের পুতুলের খায় দাঁড়াইয়া রহিলেন। স্বামীজী গম্ভীরভাবে পদ বিক্ষেপ করিয়া একলাই

উঠিতে লাগিলেন। স্বামীজী উপরে উঠিয়া গেলে সারদানন্দ স্বামী ও বর্তমান লেখক ধীরে ধীরে উঠিতে লাগিলেন এবং উভয়ে ভাবিতে লাগিলেন, ‘এ যে পূর্ব দেহের ভিতর এক নূতন জিনিস দেখিলাম !’

উপরকার লেকচার-হলে অনেক লোক বসিয়াছেন এবং তখনও অনেক লোক আসিতেছিলেন। স্বামীজী বাইয়া নিজের স্থানে দাঁড়াইলেন। গুডউইনও নিজের টেবিলের ধারে কাগজ পত্র লইয়া স্থির হইয়া রহিলেন। সারদানন্দ স্বামী ও বর্তমান লেখক তে-তলার ধাপেতে একটু একটু করিয়া উঠিতে লাগিলেন। ফক্স নীচেকার ধাপে বসিয়াছিলেন, পরে পিছু হটিয়া একটু একটু করিয়া উপরে উঠিতে লাগিলেন। বক্তৃতা আরম্ভ হইল। গম্ভীর তরঙ্গায়মান স্পষ্ট স্পষ্ট শব্দ, কণ্ঠধ্বনি বাহির হইতে লাগিল। ঘরটা নিস্তব্ধ হইয়া গেল। কাহারও মাথা নাড়িবার বা হাত নাড়িবার ক্ষমতা রহিল না। ঘরে অপর কোন লোকজন আছে কিনা তখন বোঝা যাইত না। কেবল মাত্র স্বামীজীর গম্ভীর নাদপূর্ণ শব্দ কণ্ঠ হইতে বাহির হইতে লাগিল। বক্তৃতার বক্তব্য বিষয় অনেক সময় শ্রোতার ভুলিয়া যাইত ; কেবল মাত্র সেই কণ্ঠস্বর লোকে গুনিতে এবং তাহাতেই মুগ্ধ হইয়া থাকিত।

আধ-ঘণ্টা বা পঁয়তাল্লিশ মিনিট বক্তৃতা হইয়াছে এমন সময় কলিকাতার সুবিখ্যাত বি, এল, গুপ্ত, তাঁহার পত্নী ও কে, জি, গুপ্ত তিনজনে বক্তৃতা ঘরে প্রবেশ করিলেন। নিজের দেশের লোক বলিয়া স্বামীজী বক্তৃতার ভিতরও তিনজনকে সাদরে অভ্যর্থনা করিয়া নিকটে বসিতে অনুরোধ করিলেন। তাঁহারা তিনজনে বসিলে স্বামীজী পুনরায় বক্তৃতা করিতে লাগিলেন। হাসপাতালের নার্সিঙ যথা সময়ে আসিয়া তাঁহার নির্দ্ধারিত স্থানে বসিয়া সমস্তই লিখিয়া লইতে লাগিলেন। বক্তৃতা খুব জমিয়া গেল। সকলেই একমনে গুনিতে লাগিলেন। বক্তৃতা শেষ হইলে প্রমোক্তর

## লগুনে বিবেকানন্দ

হইতে লাগিল। তাহার পর শ্রোতারা ধীরে ধীরে একে একে নামিয়া গেল। স্বামীজী মিঃ বি, এল, গুপ্ত, তাঁহার পত্নী ও মিঃ কে, জি, গুপ্তের সহিত বেশ সাদরে ছ'চার মিনিট কথা কহিলেন। শ্রোতৃবৃন্দের ভিতর জনৈক মহিলা (বোধ হয় কোন লর্ড বা ডিউকের বাড়ীর) স্বামীজীকে দুপুরবেলা খাইবার জন্ত নিমন্ত্রণ করিয়া নিজের গাড়ী করিয়া লইয়া গেলেন।

কয়েকদিন পর বর্তমান লেখক মিঃ বি, এল, গুপ্ত মহাশয়ের বাড়ী গিয়াছিলেন। মিঃ বি, এল, গুপ্ত মহাশয়ের পত্নী তাঁহাকে অতি যত্ন করিয়াছিলেন এবং সম্ভবতঃ তাঁহার পরিচয় দিয়াছিলেন যে তিনি অন্নদা কান্তগিরির কণ্ঠা ও কেশব বাবুর ভাগিনেয় বধু। গিন্নি-বান্ধী বাঙ্গালীর মেয়ে বিদেশে থাকিলে অপর বাঙ্গালীকে কিরূপ যত্ন আয়ত্তি করিতে হয় তাহা তিনি অতি সুন্দরভাবে জানিতেন ও করিতেন। অভিমানের লেশমাত্র তাঁহার ছিল না। নিজের হাতে দুধের ছানা কাটাইয়া পাস্তুরা বা বাঙ্গলাদেশের ঐরূপ খাবার করিয়া অভ্যাগতকে খাওয়াইতেন এবং সকলের সহিত অতি যত্নের সহিত কথা কহিতেন ও তাহাদের খোঁজ খবর লইতেন। এইরূপ দয়াবতী গিন্নি-বান্ধী জ্বীলোক হওয়া সকলের প্রশংসনীয় ও আদর্শ স্থানীয়।

স্বামীজী তাঁহাকে বিশেষ শ্রদ্ধা ভক্তি করিতেন। তাঁহাদের বাড়ীতে কেহ বাইতেছে শুনিলে স্বামীজী তাঁহাকে স্নেহ জানাইতেন এবং কোন কথায় তাঁহার উল্লেখ উঠিলে স্বামীজী অনেক প্রশংসা করিতেন। সম্ভবতঃ দেখা শুনা একবারের বেশী হয় নাই কিন্তু স্বামীজী মিঃ বি, এল, গুপ্তের পত্নীকে বিশেষ শ্রদ্ধা করিতেন।

স্বামীজী প্রায় বেলা চারটার সময় ফিরিয়া আসিলেন এবং চায়ে দুধ না দিয়া লেবু দিয়া খাইতে লাগিলেন। সিট্রন (citron) বা গোঁড়া লেবুর মত গোল গোল এক রকম বড় লেবু হয় তাহাকে ছভাগ করিয়া

কাটিয়া জাপানী চা'র বাটিতে চা ঢালিয়া সেই লেবুর রস ও অল্প পরিমাণে চিনি দিয়া ( lump sugar ) স্বামীজী ধীরে ধীরে এক বাটি চা খাইতে লাগিলেন এবং বলিতে লাগিলেন, “চা ভাল লাগে না খেতে। আর দুধ দিয়ে চা খাওয়া ঠিক নয় উহাতে অনেক পেটের গোল হয়। আমেরিকায় অনেকে লেবু দিয়ে চা খায় সেটা বেশ।” স্বামীজী সারদানন্দ স্বামীর প্রতি চাহিয়া পুনরায় বলিলেন, “আরে আমেরিকানদের সব বাড়াবাড়ি! চা খাবে লেবু দিয়ে তাতে আবার এক চাপ বরফ দেবে। গরমিকালে তারা ice-tea খুব খায়। আর খাবে ত এইটুকু ( হাত দেখাইয়া ) কিন্তু থালায় নেবে এতটা। ওদের সব বেয়াড়া। শীতকালে ঘরে ষ্টীম পাইপ দিয়ে বসে থাকবে কিন্তু জল খাবার বেলা গ্লাসে এক চাপ বরফ দিয়ে খাবে।”

এইরূপে আমেরিকার খাওয়ার বিষয় খানিকক্ষণ কথাবার্তা চলিল।

স্বামীজী নিজের লম্বা ইজি-চেয়ারে গিয়া বসিলেন  
আমেরিকার কথা

ও মাঝে মাঝে বড় পাইপে তামাক খাইতে লাগিলেন। ফল্গের পায়ের জুতার দিকে তাঁহার নজর পড়িল। জুতাটা ছিল ব্রাউন রঙের বুট এবং তাহার মুখটা ছিল ছুঁচাল। স্বামীজী পুনরায় বলিতে লাগিলেন, “আমেরিকায় যে জুতা পরে তার ডগা এত সরু যে পায়ের আঙ্গুলগুলো মুড়ে থাকে, টিপে চাপাট্টা হয়ে যায়। প্রথম প্রথম এক অস্বস্তি বলে বোধ হয়।” খানিকক্ষণ পরে পুনরায় বলিতে লাগিলেন, “আমেরিকাটি যেন বিদ্যুতে পরিপূর্ণ ( full of electricity ) সকলের ভিতর কি একটা উত্তম ও উৎসাহ! আমি দেখ্তুম গরীব ইটালিয়ান বা রাশিয়ানগুলো পুঁটলি ঘাড়ে নিয়ে ত ঢুকল। মানুষ দেখলে ভয় পায়, পায়ে পায়ে জড়িয়ে যায়। ময়লা কাপড় চোপড়। মাস দুই তিন বাদে দেখি যে বেশ ভাল কাপড় পরেছে, বুক ফুলিয়ে

## লগুনে বিবেকানন্দ

গট্‌মট্‌ ক'রে যাচ্ছে, রেস্তোরাঁয় ঢুকছে ও সকলের সঙ্গে খাচ্ছে ! কোন আর ভয় ভাবনা নাই। দেশটা স্বাধীন কি না তাই ওদের ভিতরও স্বাধীনতা ঢুকে গেছে। আর দেখ আমেরিকায় কেউ যদি স্পিংওয়লা বোতাম করে ওমনি সে সেটা পেটেন্ট করে নিলে ও লক্ষ লক্ষ টাকা তা থেকে পেলো। একটা লোক নখ-ঘসা উকো বা কাঁচি করে লক্ষ লক্ষ টাকা করে নিলে। পাঁচজনের উন্নতি দেখলে নূতন লোকেরও উন্নতি করবার ইচ্ছা হয়, আশা হয় তাই সেও চেষ্টা করে। দেশটা বিদ্যুতে ভরে রয়েছে। ওরা চায় নূতন কিছু ক'রবো, জগতের ভিতর শ্রেষ্ঠত্ব লাভ করবো। আর একটি জিনিস আমেরিকায় দেখলুম। কি কশ্মের ইচ্ছা ! কেউ কারুর উপর নির্ভর করে না। ছেলে বাপের উপর, বাপ ছেলের উপর নির্ভর করে থাকতে চায় না। যে যা'র স্বতন্ত্র হ'য়ে অর্থ রোজগার করতে চায় এবং নিজেও স্বাধীন হয়ে থাকতে চায়। স্বাধীনতা যে কি জিনিস সে আমেরিকায় গেলে বেশ বুঝতে পারা যায়। আমেরিকায় দেখলুম কি বড় কি ছোট সকলেই কাজ করতে মহা উৎসাহী এবং সকলেই আশা করে থাকে যে সে ভবিষ্যতে ক্রোরপতি হবে এবং এমন কি প্রেসিডেন্ট পর্য্যন্ত হবে। কশ্ম—কশ্ম—আত্মবিকাশ—প্রতিবন্ধক চূর্ণ বিচূর্ণ করা—স্বাধীনতা প্রকাশ করা—এই যেন আমেরিকার হাওয়ারতে বইছে। এইরূপ ভাবে আমেরিকার কথা চলিতে লাগিল।

স্বামীজী সাতটার সময় খাইয়া লইলেন কারণ আটটা সাড়ে-আটটার সময় বক্তৃতা আরম্ভ হইবে। গরম কাল—সূর্য্য অস্ত গিয়াছে কিন্তু তখনও বেশ আলো রহিয়াছে। ইহাকে গোম্বুলি বা twilight বলে। গরমিকালে সাড়ে আটটা পর্য্যন্ত কি তাহারও বেশী এই আলোটা থাকে এবং প্রাতে সাড়ে চারিটার পর এইরূপ আলো হয়—যদিও সূর্য্যোদয় ৬টা বা সেই রকম সময় হইয়া থাকে।

স্বামীজী বহুতা-ঘরে গেলেন। রাত্রির বহুতাকালে পুরুষের সংখ্যা বেশী হইত। তাহার ভিতর অনেক পণ্ডিত ও বিশিষ্ট ব্যক্তি থাকিতেন। বহুতা চলিতে লাগিল। শেষকালে স্বামীজী “কাল দাদার দই ছোবার” গল্প বলিতে লাগিলেন। এই গল্পটি স্বামীজী তাঁহার মাতামহী ও প্রমাতামহীর নিকট বাল্যকালে শুনিয়াছিলেন। গল্পটি সকলেই জানেন সেইজন্ত এখানে বলিবার বিশেষ প্রয়োজন নাই। কিন্তু গল্পের শেষ অংশটি স্বামীজী এমন হৃদয়গ্রাহী ভাবে ও নিজে এমন ব্যথিত হইয়া বলিলেন যে সেই গল্প শুনিয়া সকলেই মোহিত হইলেন। শেষ অংশটি হইতেছে নারদ বৈকুণ্ঠে বাইতেছিলেন। বালকের গুরুমশাই এক রুহং প্রাচীন তেঁতুল গাছতলায় বসিয়াছিলেন। নারদকে দেখিয়া গুরুমশায় সসম্মানে চরণ বন্দনা ও প্রণাম করিলেন এবং বলিলেন, “বৈকুণ্ঠে বাইয়া নারায়ণকে জিজ্ঞাসা করিবেন যে কত জন্ম পরে আমার নারায়ণ দর্শন হইবে।” নারদ গিয়া নারায়ণকে সেইরূপ জিজ্ঞাসা করিলেন। সেই কথা শুনিয়া নারায়ণ বলিলেন, “তেঁতুলগাছে যত পাতা আছে তত জন্ম পরে তাঁহার নারায়ণ দর্শন হইবে।” নারদ ফিরিয়া আসিয়া তদ্রূপই গুরুমশাইকে বলিলেন এবং মনে মনে ভাবিলেন যে লোকটি এই কথা শুনিয়া বিশেষ দুঃখিত ও বিমর্ষ হইবে। কিন্তু গুরুমশাই সেই কথা শুনিয়া আনন্দে নৃত্য করিতে লাগিলেন। নারদ গুরুমশায়ের আনন্দ-নৃত্য দেখিয়া জিজ্ঞাসা করিলেন, ‘এত বিলম্বে তোমার নারায়ণ দর্শন হবে তবুও তোমার এত আনন্দ কেন?’ গুরুমশাই বলিলেন, “গাছে কটা আর পাতা আছে, ও তো হু’দিনে ফুরিয়ে যাবে তাই এত আনন্দ কচ্ছি। তবুও তো আমার নারায়ণ দর্শন হবে।” নারদ লোকটির ভক্তি বিশ্বাস দেখিয়া বড়ই আনন্দিত হইয়া পুনরায় বৈকুণ্ঠে গেলেন এবং নারায়ণকে সমস্ত ঘটনা বলিলেন। সেই কথা শুনিয়া নারায়ণ বলিলেন,



## লগুনে বিবেকানন্দ

“ওর এত দৃঢ় ভক্তি বিশ্বাস যখন রয়েছে তখন ওকে তত দিন থাকিতেও হইবে না, দশ জন্ম পরেই ও বৈকুণ্ঠে আসিবে এবং আমার সান্নিধ্য লাভ করিবে।” স্বামীজী রাত্রির বক্তৃতাকালে এই উপাখ্যানটি এমন সুন্দর ভাবে বলিয়াছিলেন যে শ্রোতৃবৃন্দ বিশেষতঃ ভক্তিপরায়ণা স্ত্রীলোকেরা অতিশয় আনন্দিত হইলেন। তাঁহাদের সকলের মনেও একটা আশা জন্মিল, সকলেই মনে করিলেন যে তাঁহাদের মূর্তি ও ভাবদর্শন নিশ্চিত হবে। বক্তৃতা শেষ হইলে সকলেই স্বামীজীকে বেঁধুন করিয়া বলিলেন যে এমন সুন্দর কথা আর কখনও শুনি নাই। বুকে যেন একটা শান্তি এলো। সকলেই আপন আপন উল্লাস নানাভাবে প্রকাশ করিতে লাগিল। যথার্থই সেই রাত্রির বক্তৃতাটি বড় সুন্দর জমিয়াছিল। কারণ সাধারণ লোক রাজযোগের ধ্যান ধারণা, দর্শন শাস্ত্র ও শ্রায়শাস্ত্রের জটিল কথা বুঝিতেন না, শুনিতে হয় তাই শুনিতেন কিন্তু এই রাত্রে ভক্তির কথা শুনিয়া সকলেই উল্লসিত হইয়াছিলেন। স্বামীজীরও সেদিন গম্ভীর-ভাব ছিল না তিনিও ভক্তিভাবে সেদিন বিভোর ছিলেন ও মাঝে মাঝে হাসিতেছিলেন। সেদিন যেন একটা ভক্তির স্রোত চলিতে লাগিল।

স্বামীজী ও সারদানন্দ স্বামী অগ্রে নামিয়া ডাইনিংরুমে ঢুকিলেন এবং গুড্‌উইন ও বর্তমান লেখক পশ্চাতে আসিলেন। সারদানন্দ স্বামী সেদিন বক্তৃতা শুনিয়া বড়ই মোহিত হইয়াছিলেন। ঘরে ঢুকিয়া বাঁদিকে যে কাপ-বোর্ড ছিল সেখান থেকে এক গ্লাস জল গড়িয়ে এক নিঃশ্বাসে খাইলেন। স্বামীজী ষ্টাডি ও মিস্‌ মূলারের প্রতি চাহিয়া বলিলেন, “দেখ্‌ দেখ্‌ছ এর কাজটা দেখ্‌ছ? I lectured and he became thirsty অর্থাৎ আমি বক্তৃতা করিলাম আর ওর তৃষ্ণা পাইল।” সারদানন্দ স্বামীর প্রতি চাহিয়া বলিলেন,—“তুই কি বক্তৃতা করেছিস্‌ যে তোর তৃষ্ণা এত পেলে?” সারদানন্দ স্বামী কৌতুক করিয়া বলিলেন,

“আরে তোমার যে বক্তৃতার ধমক তাতে তৃষ্ণা না পেয়ে থাকি কি করে !  
এক গ্লাস নয় তিন গ্লাসের তৃষ্ণা পেয়েছে ।” কথা শুনিয়া সকলে হাসিতে  
লাগিলেন । মিস্ মূলারও বক্তৃতা শুনিয়া বড় আনন্দিত হইয়াছিলেন ।  
তিনি বারে বারে বলিতে লাগিলেন যে আজ কি সুন্দর লেক্চার হ’লো,  
কি মিষ্টি কথা, কেমন সুন্দর ! ষ্টার্ডিও খুব সুখ্যাতি করিল । তাহার পর  
স্বামীজী গুডউইনকে সঙ্গে লইয়া গায়ে কাল রঙের ক্লোক্ দিয়া, হাতে ছড়ি  
লইয়া ও মাথায় খাঁজকাটা টুপী পরিয়া বেড়াইতে বাহির হইয়া গেলেন ।

## পাঁচ

লগনে ক্লাশ লেকচার খুব জমিয়াছে এইজন্ত বৈকালবেলা পাবলিক লেকচারের বন্দোবস্ত হইল। পিকাডিল নামক রবিবারের বক্তৃতা।

স্থানে “রয়েল ইনষ্টিটিউটের ওয়াটার পেট্রিং গ্যালারিতে” বাড়ীর উপরকার হল রবিবারের বক্তৃতার জন্ত ভাড়া লওয়া হইল এবং সকলকে জানাইবার জন্ত প্রত্যেক সংবাদপত্রে বিজ্ঞাপন দেওয়া হইল। পাদ্রীদের কাগজে রটিল যে, ভারতবর্ষ হইতে একজন নাস্তিক ধর্ম প্রচার করিতে এখানে আসিয়াছে, সে ভগবান মানে না এবং খৃষ্টানদের ধর্মকে নিন্দা করে ইত্যাদি নানা প্রকার কুৎসা প্রচার করিল। সমস্ত সংবাদপত্রে পাদ্রীদের বিশেষ প্রভাব সেইজন্ত সাধারণও সেইরূপ বুঝিল। শুক্রবার বা শনিবার সন্ধ্যাকালে গুডউইন ছোট ছোট কাগজে নোটিশ লিখিয়া প্রত্যেক সংবাদপত্রে পাঠাইবার জন্ত প্রস্তুত করিল। অনেক পূর্জা লিখিতে হইত সেইজন্ত সারদানন্দ স্বামী ও বর্তমান লেখক অনেক পূর্জা অমূল্য লিপি করিতেন। যথাসময়ে সেই সকল পাঠাইয়া দেওয়া হইত কিন্তু রবিবারের সংবাদপত্রে তাহার কোন উল্লেখ বাহির হইত না। ইহা হইতে স্পষ্ট বুঝা যাইত যে ভিতরে একটি বিদ্বেষ ভাব বিশেষ ভাবে ছিল। গুডউইনও তেমনি একগুঁয়ে, তিনি প্রত্যেক হপ্তায় যথা-সময়ে পূর্জা লিখিয়া সমস্ত সংবাদপত্রে পাঠাইতেন। কিন্তু ‘চার্চ নিউজের’ (church news) সংবাদস্তুস্তে তাহার কোন উল্লেখ থাকিত না।

গুডউইন খবর পাইলেন যে রিজন্স পার্কের নিকট এক উচ্চ শ্রেণীর পাদ্রী গির্জাতে হিন্দুভাব বা স্বামীজীর কথা লইয়া বক্তৃতা দিবেন। এই পাদ্রী (canon) নিজের স্ত্রী ও কন্যা লইয়া সন্ধ্যার বক্তৃতায় প্রত্যহ আসিতেন ও স্বামীজীকে বিশেষ সম্মান ও শ্রদ্ধা ভক্তি করিতেন। সাধারণ গির্জা

পাদরীর গির্জায়  
গুডউইন।

অপেক্ষা রিজেন্স পার্কের গির্জাতে অধিক লোক বাইত ও সেই সময় উক্ত পাদ্রী সাধারণের নিকট অতি প্রিয় ছিলেন। পরদিন প্রাতঃ-আহারের পর গুডউইন কথা তুলিলেন যে, সারদানন্দ স্বামী, ফক্স, বর্তমান লেখক ও নিজে এই চারিজনে মিলিয়া ঐ পাদ্রীর বক্তৃতা শুনিতে বাইবেন। স্বামীজী এই কথাতে প্রথম সন্মত হইলেন। ফক্স সেই পাদ্রীর নাম উচ্চারণ করিল, ‘হাউইস্।’ স্বামীজী সংশোধন করিয়া বলিলেন, ‘হাউয়ে।’ তাহার একটু পরে গুডউইন বিশেষ বিবেচনা করিয়া বলিলেন যে, সারদানন্দ স্বামী ও বর্তমান লেখকের গিয়া কাজ নাই, তাহার সঙ্গে ফক্স গেলেই হইবে। কারণ দু’টা ভারতবাসীকে দেখিলে অনেকেই অনুমান করিবেন যে অথ স্বামীজীর বিষয় কি বলা হয় তাহাই শুনিবার জন্ত ইহারা আসিয়াছে। ফক্স বাইতে পারিল না গুডউইন একাই গেলেন। বক্তৃতা শুনিয়া আসিয়া গুডউইন বলিতে লাগিলেন ‘কেমন লেকচার দিলেন ব্যাকটি এণ্ড ব্যাকটো (ভক্তি ও ভক্ত)। পাদ্রী বক্তৃতা-প্রসঙ্গে বলিল যে এই ভাবটি হইতেছে ভারতবর্ষের। বর্তমানে ভারতবর্ষ হইতে যে স্বামী বিবেকানন্দ আসিয়াছেন তিনি এই ভাবটি অতি স্নন্দরভাবে ব্যাখ্যা করিয়াছেন। অনেক লোকে তাঁহার ব্যাখ্যা শুনিয়া মোহিত হইয়াছেন এবং এই ভাবটি তিনি স্বামীজীর নিকট হইতে পাইয়াছেন। খৃষ্টানধর্ম্মে এই ভাবটি প্রবেশ করিলে বিশেষ শুভকর হইবে ইত্যাদি।’ গুডউইন অনেকক্ষণ ধরিয়া ব্যাকটি ও ব্যাক্টো কথাটি লইয়া হাস্য কোতুক করিতে লাগিলেন। কিন্তু লেকচার শুনিয়া যে তিনি খুব খুসী হইয়াছিলেন তাহা বারংবার বলিতে লাগিলেন।

রবিবার বেলা ৪টা বাজিলে সকলেই পিকার্ডিলিতে বাইবার জন্ত প্রস্তুত হইলেন। মিস্ মুলার স্বতন্ত্র গিয়াছিলেন। পুরুষেরা সকলে বাসে (bus) গেলেন। তখন ঘোড়া দিয়া বাস টানা হইত। স্বামীজী ও ষ্টার্ডি

## লগুনে বিবেকানন্দ

বাসের ছাদের উপর একখানি বেঞ্চে বসিলেন ও কথাবার্তা কহিতে লাগিলেন এবং মাঝে মাঝে সিগারেট টানিতে লাগিলেন। তাহাদের পিছনে গুডউইন, সারদানন্দ স্বামী ও বর্তমান লেখক বসিলেন। অল্প সময়ের পর গন্তব্য স্থানে সকলে পৌঁছিলেন। ক্রমে শ্রোতৃবৃন্দ আসিতে লাগিল। কাঠের সিঁড়িতে উঠিয়া প্রথম দালানটাতে স্বামীজী দাঁড়াইয়া পরিচিত ব্যক্তিদিগের সহিত কথাবার্তা কহিতে লাগিলেন,—বেশ সাদাসিদে ভাব, কোন বিশেষত্ব নাই।

বক্তৃতার স্থান হইতেছে—লম্বা একটা হল-ঘর, তাহাতে চার পাঁচ শ' লোকের স্থান হইতে পারে। গুডউইন বলিলেন যে লেকচার হইলে বড় ভিড় হইবে—সারদানন্দ স্বামী ও বর্তমান লেখক পূর্বে হইতে যাইয়া লেকচারের প্লাটফর্মের নিকট একটা শোফায় (sofa) গিয়ে বসিয়া থাকুক নচেৎ পরে প্রবেশ করিতে পারিবে না। তিনি দু'জন ভারতবাসীকে লইয়া ভিতরে বসাইয়া দিলেন এবং নিজে ঘুরিয়া ফিরিয়া সকলকে অভ্যর্থনা করিতে লাগিলেন। মিস্ মুলার হলের ভিতর স্থান না পাইয়া দরজার নিকট বড় বড় জঁষং হরিদ্রা বর্ণের স্ফটিকের মালা গলায় দিয়া দাঁড়াইয়া রহিলেন।

হল-ঘরটির দেওয়ালে কয়েকখানি ছবি টাঙ্গান ছিল ও মেঝেটি কাঠে

বক্তৃতাকালে  
স্বামীজীর ভাব।

মোড়া ও পালিস্ করা ছিল। বক্তার দাঁড়াইবার  
স্থানটি হলের শেষ প্রান্তে। একটি কাঠের প্লাটফর্ম

ও তাহার উপর টেবিল ও জলের গ্লাস। ষ্টার্ভি  
কাঠের প্লাটফর্মের দাঁড়াইয়া যে বিষয়ে বক্তৃতা হইবে ও স্বামীজীয় বিষয়  
দু'এক মিনিট সকলকে বলিয়া নামিয়া আসিলেন। স্বামীজী তাহার পর  
উঠিলেন। গুডউইন ইতিমধ্যে কোন্ বিষয় লেকচার হইবে তাহা স্বামীজীর  
কাণে কাণে বলিয়া দিলেন। কারণ, কোন্ বিষয় বক্তৃতা হইবে এবং

গুডউইন সাধারণের নিকট কোন্ বিষয়ের লেকচারের কথা প্রচার করিয়াছেন স্বামীজীর তাহা কিছুই স্মরণ থাকিত না। পূর্বে হইতে ভাবিয়া চিন্তিয়া বা বক্তৃতা তৈয়ারি করিয়া বলা স্বামীজীর অভ্যাস ছিল না। কথা পড়িলে উপস্থিত মত তিনি বলিয়া যাইতেন এবং সেই সময় কোন নোট করা কাগজ সম্মুখে রাখিতেন না। তিনি উপস্থিতবত্তা ছিলেন। স্বামীজী লাল রঙের টিউনিক বা লম্বা জামাটা পরিধান করিয়াছিলেন, গলায় কলার, কিন্তু টাই ছিল না। কোমরে একটা sash বা রেশমের কোমরবন্ধ জড়ান কিন্তু মাথায় টুপি বা পাগড়ী কিছুই নাই। তিনি প্লাটফরমে উঠিয়া দুই বাহু (একের উপর আর একটি দিয়া) বৃকের উপর রাখিয়া প্লাটফরমের উপর ক্ষিপ্র সিংহের ত্রায় এদিক্ ওদিক্ পায়চারি করিতে লাগিলেন। এই সময় তাঁহার মুখের ভাব সম্পূর্ণ পরিবর্তন হইতে লাগিল। যে ব্যক্তি পাঁচ মিনিট পূর্বে সাধারণ লোকের মত সরল ভাবে হাসি ঠাট্টা তামাসা করিতেছিলেন, সিগারেট টানিতে ছিলেন হঠাৎ তাঁহার ভিতর সুষ্প্র শক্তি জাগ্রত হইতে লাগিল, স্নায়ু সকল দৃঢ় ও কঠিন হইয়া উঠিল, চক্ষু বিস্ফারিত হইয়া উঠিল এবং দৃষ্টি মহা তেজস্বী ও আক্সাপ্রদ হইয়া উঠিল। পূর্কদেহ হইতে স্বতন্ত্র লোক বাহির হইল। তাহার পর বুক হইতে হাত দুটি নামাইয়া দুই পাশে রাখিলেন এবং মাঝে মাঝে অল্পভাবে দুই হাত ছলাইতে লাগিলেন। তাহার পর সহসা স্থির হইয়া দাঁড়াইলেন। চক্ষুতে অন্তর্দৃষ্টি ভাব প্রকাশ পাইল। তিনি যেন স্থূলদেহ পরিত্যাগ করিয়া সূক্ষ্মদেহে চলিয়া গিয়াছেন এবং যেন হাওয়ার ভিতর কোন বস্তু দেখিতেছেন এইরূপ এক দৃষ্টিতে চাহিয়া রহিলেন।

তাহার পর ধীরে ধীরে অল্পে অল্পে কথা নিঃসৃত হইতে লাগিল। গলার স্বর মৃদু হইলেও শেষ পর্য্যন্ত স্পষ্ট শুনা যাইত। ক্রমে যেমন ভাব গাঢ় ও নানা প্রকার হইতে লাগিল স্বামীজীর স্বরও সেইরূপ উচ্চ হইতে

## লণ্ডনে বিবেকানন্দ

লাগিল। ক্রমেই তিনি বাম হস্ত সঞ্চালন করিতে লাগিলেন এবং অঙ্গুলি সকল কখন কুঞ্চিত বা কখন বিক্ষিপ্ত করিয়া মনের ভাব প্রকাশ করিতে লাগিলেন। তাহার পর ডান হস্ত সঞ্চালন করিতে লাগিলেন এবং যখন ভাব অতিশয় গভীর হইতে লাগিল তখন দুই হস্ত সঞ্চালন করিয়া মনের ভাব প্রকাশ করিতে লাগিলেন। এইরূপে প্রায় দেড় ঘণ্টাকাল লেকচার হইল। শ্রোতারা নিষ্পন্দ ও নিস্তব্ধ হইয়া বসিয়া রহিলেন—যেন ঘরে কোন লোক ছিল না। বক্তৃতা সমাপ্ত হইলে স্বামীজী টেবিলস্থিত গেলাসের জল পান করিয়া লইলেন এবং প্ল্যাটফর্ম হইতে নামিয়া আবার নিজের সাম্যভাব ধারণ করিলেন ও মিনিট পাঁচেক পরে সকলের সহিত মিথিবার চেষ্টা করিতে লাগিলেন। কিন্তু তখনও মুখে চোখে প্রদীপ্ত তেজের ভাব রহিয়াছে। খানিকক্ষণ পরে তিনি সকলের সহিত মিষ্ট আলাপ করিয়া পুনরায় বাস গাড়ী করিয়া বাড়ীতে প্রত্যাগমন করিলেন। শ্রোতৃবৃন্দ এই লেকচার শুনিয়া বড় আনন্দিত হইয়াছিলেন। তাঁহাদিগের মধ্যে ষাঁহারা আমেরিকান ছিলেন তাঁহারা বলিলেন যে এই লেকচার পূর্বে আমেরিকার শুনিয়াছিলাম কিন্তু ষাঁহারা নূতন ও প্রথমবার শুনিলেন তাঁহাদের পক্ষে ইহা অতি আশ্চর্যজনক হইয়াছিল। মিস্ জোসেফাইন ম্যাক্লিরডও এই লেকচারে উপস্থিত ছিলেন। বাড়ীতে রাজযোগের বিষয় বক্তৃতা হইত এবং পিকাডিলিতে রবিবারে ধারাবাহিক যে সকল বক্তৃতা হইত তাহা পরে জ্ঞানযোগ ও ভিন্ন ভিন্ন আখ্যায়িকা দিয়া বক্তৃতার ভাব অনুযায়ী পৃথক পৃথক পুস্তক হইয়াছে।

একদিন স্বামীজী ও সারদানন্দ স্বামী নীচেকার মাটির তলার ঘরে গিয়া মাখন গলাইয়া দি করিয়া খানকতক আলুর পুর দেওয়া কচুরি ও বেশ ঝাল ঝাল চচ্চড়ি করিয়া উপরকার ডাইনিং-রুমে দুজনায় আসিলেন ও তিনজনে মিলিয়া একটু একটু খাইতে লাগিলেন। ঘরে তখন অপরা

কেহ ছিল না। খাইতে খাইতে সারদানন্দ স্বামী হঠাৎ বর্তমান লেখককে বলিলেন, “ওহে, মিস্ কেমিরণের জন্ত একটু ভুলে রেখে দাও নইলে সে বিকেলে এসে ঝগড়া কোর্বে। তুমি একখানা রেকাবি (saucer) ক’রে একটুকু খাবার নিয়ে উপরকার ঘরের আলমারির টানার উপর রেখে দিয়ে এস। ভুল না, মিস্ কেমিরণ এলে পরে তাকে যেন দিও।” বর্তমান লেখক তদ্রূপই করিলেন। কিন্তু সেইদিন বৈকালবেলা মিস্ কেমিরণ আসিলেন না তাহার পরদিন বেলা চারিটার সময় একটি স্নাইন্স যুবককে সঙ্গে লইয়া আসিলেন।

মিস্ কেমিরণের বয়স আনাজ পঁয়তাল্লিশ হইবে, ষ্টার্ভার্ড বউয়ের মিস্ কেমিরণ। মিতিন। তিনি স্বামীজীকে অত্যন্ত শ্রদ্ধা ভক্তি করিতেন। বুকটা ভালবাসায় ভরা ছিল কিন্তু মুখটা বড় কড়া। তিনি দরজায় ঢুকিয়াই সারদানন্দ স্বামীকে শ্রদ্ধার সহিত গালি পাড়িতেন, “You cooky swami, devil swami ইত্যাদি।” মুখে যদিও গাল দিতেছেন কিন্তু রান্নাঘর হইতে শব্দনঘর পর্য্যন্ত সমস্ত পুঙ্খানুপুঙ্খরূপে দেখিয়া বেড়াইতে লাগিলেন। রান্নাঘরে জিনিসপত্তর আছে কি না, কি কি রান্না হইয়াছে, প্রত্যেক দিন খাবার জিনিস বদলাইয়া করিতে হয় ইত্যাদি বিষয় বুড়ি ঝির সহিত কথাবার্তা কহিলেন। তারপর প্রত্যেক ঘরে গিয়া পাট্ সাট্ ঠিক হইয়াছে কি না, বিছানা পরিষ্কার পরিচ্ছন্ন আছে কি না সব তন্ন তন্ন করিয়া দেখিতে লাগিলেন। কিন্তু মুখে সর্বদাই গাল দিতেছেন ও ঝঙ্কার করিতেছেন। চার পাচ তলা বাড়ী, প্রত্যেক ঘরগুলি তিনি একবার ভাল করে দেখিয়া গুনিয়া আসিলেন। তারপর নীচেকার ডাইনিং-রুমে আসিয়া বসিলেন। যে যুবকটি সঙ্গে আসিয়াছিল সে ইতিপূর্বে সারদানন্দ স্বামী ও বর্তমান লেখকের সহিত বসিয়া কথাবার্তা কহিতেছিল। পরে



## লাগুনে বিবেকানন্দ

যুবকটির পরিচয় পাওয়া গেল যে সে সুইজ্যারল্যান্ডের লোক এবং মিস্কেমিরণ তাহাকে পালক-পুত্রের মত গ্রহণ করিয়াছেন ।

মিস্কেমিরণ বসিয়াই কথা তুলিলেন, “তোমাদের কি রান্না হয়েছে বল ? নিজেরাই সব ভাল ভাল জিনিস খাবে আর আমার জন্ত কিছু রাখবে না ?” এই বলিয়া তিনি চোখ মুখ মাথা নাড়িয়া বগড়া ছলে সারদানন্দ স্বামীকে বলিতে লাগিলেন, “You cooky Swami, তুমি কেবল খাবে আর খেয়ে খেয়ে মোটা হবে, আমার জন্ত কিছু রাখবে না ইত্যাদি ?” সারদানন্দ স্বামী হাসিতে হাসিতে বলিলেন, “কাল তুমি আস নাই কেন ? স্বামীজী ও আমি কাল এক ভাল ইণ্ডিয়ান রান্না ক’রেছিলুম, তাই তোমার জন্ত একটু রেখেছি” এই বলিয়া বর্তমান লেখককে বলিলেন, “ওহে যাও উপরকার ঘর থেকে কচুরি নিয়ে এস ত ?” বর্তমান লেখক স্বরিৎপদে যাইয়া লইয়া আসিলেন—দু’খানা কচুরি ও একটু আলু চচ্চড়ি ছিল । মিস্কেমিরণ ও তাঁহার পোষ্যপুত্র খাইতে বসিলেন এবং সারদানন্দ স্বামীকে জিজ্ঞাসা করিলেন, “কি দিয়ে খাইতে হয় চিনি দিয়ে না নুন দিয়ে ?” এই বলিয়া চিনি দিয়া খাইতে লাগিলেন কিন্তু ভাল লাগিল না । সারদানন্দ স্বামী বলিলেন, “নুন দিয়া দেখ না ?” ( try it with salt ) তারপর তাঁহারা নুন দিয়া খাইতে লাগিলেন । তারপর চামচে দিয়ে আলু চচ্চড়ি মুখে দিয়েই মিস্কেমিরণ একেবারে চীৎকার করিয়া উঠিল, “ওঃ কি ভয়ঙ্কর জিনিস, গোল মরিচকে লক্ষ্য দিয়ে রেঁধেছে !” ( Oh it’s horrible thing ! it’s poison, it’s pepper, seasoned with cayne pepper ) এই বলিয়া দুই হাত দুই গালে চড়াইতে লাগিলেন এবং সঙ্গে সঙ্গে সারদানন্দ স্বামীকে গাল পাড়িতে লাগিলেন । চক্ষে জল বাহির হইল এবং ক্রমাগত বলিতে লাগিলেন, ‘Oh it is poison !’ Oh it is poison ! ( অর্থাৎ ইহা

বিষ, ইহা বিষ) ! কিন্তু সারদানন্দ স্বামী ও বর্তমান লেখক মনে মনে ভাবিতে লাগিলেন, এমন ঘি লক্ষ্য দিয়ে আলু চচ্চড়িটা নষ্ট হইল।

গুডউইন স্বামীজীর কাছে সৰ্বদা থাকেন, মন দিয়া স্বামীজীর সমস্ত কথা শুনে এবং বেদান্ত রাজযোগের কথা সমস্তই লিখিয়া লন। তাঁহার

ভিতর তখন বেদান্তের ভাব খুব জাগ্রত হইয়া উঠিল।

বুড়ি বি ও গুডউইনের  
ঝগড়া

একদিন প্রাতে সকলে আহার করিলে পর স্বামীজী

আপনার ঘরে চলিয়া গেলেন এবং সঙ্গে সঙ্গে

অপর সকলেও চলিয়া গেলেন। বুড়ি বি আসিয়া খাবার বাসনগুলি তুলিতে লাগিল। সকলের সহিত ঝগড়া করা গুডউইনের অভ্যাস, বিশেষ

তখন স্বামীজী ঘরে ছিলেন না, আরও স্মৃতিধা পাইলেন তখন বুড়ি বির সহিত ঝগড়া আরম্ভ করিলেন। বুড়ি বি একথানা বড় ট্রেতে থালা চা'র

বাটি সব সাজিয়ে খানিকটা তুলেছে এমন সময় গুডউইন হঠাৎ তাহাকে বলিলেন, বুড়ি তুমি খৃষ্টান, তাই নরকে যাবে (‘Mrs. you are a Christian

you shall go to hell.’) এই কথা শুনিয়া বুড়ি ত রাগিয়া ট্রে খানি আবার টেবিলে রাখিয়া গুডউইনকে জবাব দিল, তুমি বিধর্মী

তুমিই নরকে যাবে, আমি স্বর্গে যাব। ( You are a heathen, you shall go to hell. I am a Christian, I shall go to heaven.)

এক্ষণে গুডউইন ঝগড়া করিবার একটা ছুতা পাইলেন তাই পুনরায় বুড়ি বিকে জিজ্ঞাসা করিলেন, “But Mrs. what is your heaven ?” অর্থাৎ

তুমি স্বর্গ কাহাকে বল। বুড়ি বি মহা কাঁপরে পড়িল। সে ছই চক্ষু মুদ্রিত করিয়া ছই হস্তে মাথা চুলকাইতে চুলকাইতে অনেকক্ষণ ভাবিয়া

বুদ্ধিটা স্থির করিয়া বলিল, “Plenty to eat and drink and noo liber ( no labour ),” গুডউইন পুনরায় জিজ্ঞাসা করিলেন, “and

what shall you drink there ?” বুড়ি বি অনেকক্ষণ ভাবিয়া চোখ

লগনে বিবেকানন্দ

মিট্ মিট্ করিয়া কুঁতিয়ে বলিল, “of course, champagne” অর্থাৎ স্যাম্পেন্ হচ্ছে কি না বড় মানুষদের ভাল করিয়া খাওয়া দাওয়ার পর বিশেষ পানীয়। এই বুড়ি ঝিকে সমস্ত কাজ করিতে হইত তাই আক্ষেপ করিয়া বলিয়াছিল খাটুনির হাত হইতে নিস্তার পেলে আর স্যাম্পেন্ মদ পেলেই তার স্বর্গলাভ হল। গুডউইন ত এই ছুতা পাইয়া ঝগড়া শুরু করিলেন এবং বলিতে লাগিলেন, “দেখ্ দেখ্ এই খুঁটানগুলোর স্বর্ণের ধারণা দেখ্! খুঁটান-ধর্ম্মটা একেবারে গেছে, এটা আর জগতে চ’লবে না।” এই কথা শুনিয়া বুড়ী ঝি বাসনগুলি লইয়া রাগিয়া চলিয়া গেল।

স্বামীজীর থুখু ফেলার খুব অভ্যাস ছিল তাই তিনি আতসিখানার ফেণ্ডারে (fender) থুখু ফেলিতেন। একদিন ফেণ্ডারে থুখু ফেলা দেখিয়া বুড়ি ঝি ত মহা রাগিয়া গিয়া বর্তমান লেখকের উপর মহা তর্কিতর্কা করিলেন। বর্তমান লেখক বলিলেন যে, তিনি ফেলেন নাই, স্বামীজী ফেলিয়াছেন তাঁহাকে গিয়া বল না? স্বামীজীর নাম শুনিয়াই ত বুড়ি ঝি ভড়কে গিয়া বলিতে লাগিল, “না, স্বামী একজন খুব বড় লোক; আমি তাঁকে বিশেষ শ্রদ্ধা করি, তিনি সকলের প্রতিই খুব দয়ালু, তিনি একজন বড় প্রেমিক পুরুষ!” (No, Swami is a great man. I love him much. He is very kind to all. He is a great loving man) ইত্যাদি। তখন বুড়ি ঝি থুখু ফেলার কথা ভুলে গেল এবং তাহার পর থেকে ফেণ্ডারে থুখু ফেলিলে বুড়ি ঝি আর কিছু বলিত না। বুড়ি ঝি কখন লেকচার শুনিতে যাইত না, সে সর্বদাই নীচেকার রান্না-ঘরে থাকিত। কিন্তু বহু লোক স্বামীজীর সহিত সাক্ষাৎ করিতে আসিত এবং সকলেই স্বামীজীকে বড় লোক বলিত। সেই সব দেখিয়া শুনিয়াই বুড়ি ঝির স্বামীজীর প্রতি শ্রদ্ধা ভক্তি হইয়াছিল।

একদিন ষ্টার্ভি দামে সস্তা পাইয়া প্রায় এক পাউণ্ড পাইপে খাবার কুঁচান তামাক (thickened minced tobacco) লইয়া আসিল। ঝাহার ভিতর নানা রকমের তামাক ছিল। ষ্টার্ভি তামাক খাইত না সেইজন্ত সে তামাকও চিনিত না। স্বামীজী তাঁহার পাইপে একবার করিয়া তামাক ভরুছেন একবার করিয়া দিয়াশালাই দিয়া ধরাচ্ছেন ও টানছেন। কিন্তু ধোঁয়াও বাহির হইতেছে না, সুগন্ধিও বাহির হইতেছে না। স্বামীজী ঠেসান দেওয়া বেতের চেয়ারটিতে বসিয়া পায়ের উপর পা দিয়া এক একবার তামাক টানছেন আবার খানিকটা পরে বিরক্ত হয়ে উঠে ফেণ্ডারে পাইপটা ঝেড়ে আসছেন, অর্থাৎ তামাক খেয়ে কিছুই সুখ হচ্ছে না। বারকয়েক এইরূপ করিবার পর একেবারে চটিয়া গিয়াছেন এবং মাঝে মাঝে ফেণ্ডারে থুথু ফেলিতেছেন। তাহার পর গুডউইনের দিকে চাহিয়া বলিলেন, “দেখ গুডউইন, ষ্টার্ভিটা বড় দুখ্চেটে। সস্তায় পেয়েছে তাই খানিকটা রদ্দি তামাক এনেছে। না স্বাদ না গন্ধ। এই তামাক ত টানা যায় না বাপু; এই তামাকগুলি ফেলে দিয়ে যা তুই বাপু কিছু ভাল তামাক নিয়ে আয় ত’। আমরা সারাদিন খাটতে হবে, লোকের সঙ্গে কথাবাত্তা কইতে হবে, ভাবতে হবে, একটু তামাক খাব তাও হবে না। এই দুখ্চেটের হাতে পড়ে আমার প্রাণটা গেল” ইত্যাদি অনেকক্ষণ বলিতে লাগিলেন। গুডউইন একটু পরে কিছু ভাল তামাক আনিয়া দিলেন।

একদিন মধ্যাহ্ন ভোজনের পর স্বামীজী তাঁহার ঠেসান দেওয়া চেয়ার-খানিতে বসিয়া ভাবিতেছিলেন বা ধ্যান করিতেছিলেন। ফক্স ও বর্তমান লেখক অপরদিকের দেওয়ালের নিকট পাশাপাশি দু’খানি চেয়ারে বসিয়া ছিলেন। স্বামীজী অনেকক্ষণ স্থিরভাবে বসিয়াছিলেন, হঠাৎ যেন তাঁহার মুখে বড় কষ্টের ভাব দেখা গেল। খানিকক্ষণ পরে তিনি নিশ্বাস ফেলিয়া ফক্সকে বলিলেন, “দেখ ফক্স, আমার প্রায় heart-fail (সন্ন্যাস

## লগুনে বিবেকানন্দ

রোগ) কচ্ছিল। আমার বাপ এই রোগে মারা গেছেন। বুকেটা বড় যন্ত্রণা হচ্ছিল, এইটা আমাদের বংশের রোগ।” বর্তমান লেখক এই সব কথা শুনিয়া মনে মনে বড় উদ্ভিগ্ন হইয়া রহিলেন, তখন আর কাহাকেও কিছু বলিলেন না। কিন্তু ভবিষ্যতে তাহাই হইয়াছিল। যাহা হউক সেইদিন স্বামীজীর মুখে বড় যন্ত্রণার ভাব দেখা গিয়াছিল।

একদিন সকালবেলা আহারের পর স্বামীজী ও ষ্টার্ডি বাহির হইয়া গেলেন। বেলা প্রায় তিনটে সাড়ে তিনটের সময় ফিরিয়া আসিয়া বলিলেন যে তিনি ফটো তুলিতে গিয়াছিলেন। তিন চার দিন বাদে এক প্যাকেট ফটো আসিল। প্রত্যেক ফটোখানি ভিন্ন ভিন্ন প্রকৃতির। কোন-খানি একটি প্রাচীন লোকের, কোনখানি মহা তেজস্বী যুবকের, কোন খানি বা স্পুর্তিবাজ অল্প বয়স্ক যুবকের। কিন্তু স্থিরমনে নিরীক্ষণ করিয়া দেখিলে স্পষ্টই বোঝা যায় যে তিনি একই কাপড় পরিধান করিয়া একই চেয়ারে বসিয়া সকল গুলি তুলিয়াছেন। ভিন্ন ভিন্ন সময়ে তোলা হয় নাই। স্বামীজীর মনের ভাব যেমন যেমন পরিবর্তিত হইত তাঁহার মুখের ভাবও তদ্রূপ পরিবর্তন হইয়া যাইত। ইচ্ছামত মুখের স্নায়ু সকলকে তিনি নানা ভাবে পরিবর্তন করিতে পারিতেন এবং এক এক ভাবে এক এক লোক হইতেন। ইহাই তাঁহার এক আশ্চর্য্য শক্তি ছিল। তাঁহার ভাব অনুযায়ী দেহ পরিবর্তন হইত।

দেশাই নামক জনৈক গুজরাটী যুবক প্রায়ই স্বামীজীর নিকট আসিতেন। মধ্যে মধ্যে সংস্কৃতে কবিতা লিখিয়া গুজরাটী যুবক দেশাই আনিয়া স্বামীজীকে শুনাইতেন। তাঁহার কবিতা দেখিয়া স্বামীজী দেশাইকে বলিলেন, “যে কাজ কর্তে এসেছ সেই কাজ মন দিয়া করগে যাও। সংস্কৃতে কবিতা লিখবার জন্ত সাত সমুদ্র তের নদী পার হয়ে আসবার কোন দরকার ছিল না; ও তো বাড়ীতে বসেই

হ'ত ইত্যাদি ।” মাঝে মাঝে আর দু'একটি গুজরাটী যুবকও স্বামীজীর কাছে বাইত ।

দেশাই একদিন বলিলেন, “স্বামীজী, আপনি ত রাজযোগের লেকচার দিয়া থাকেন, হঠযোগের লেকচার দেন না কেন ?” দেশায়ের সঙ্গে স্বামীজীর হিন্দীতে কথা হইতে লাগিল । স্বামীজী বলিতে লাগিলেন, “ওহে বাপু, এই সাধুগিরি করে পথে ঘুরে ঘুরে এতেই অন্ত জুটতো না । তারপর আবার হঠযোগ ! হঠযোগে নিয়মিত আহার করিতে হয়, গায়ে কম্বল ফ্লানেল মুড়ি দিয়ে থাকতে হয় । এ তো অনেক হাজামার কথা । বাদের ভাল আহারের সংস্থান আছে, অল্পদিকে বিশেষ মন যায় না, বসে বসে বেষ করে শরীরটি তোয়াজ করছে তাদেরই হঠযোগ হ'তে পারে ।” দেশাই জিজ্ঞাসা করিলেন, “আচ্ছা, হঠযোগে কি মনের উন্নতি হয় না ?” স্বামীজী বলিলেন, “মনের উন্নতি ও মনের সঙ্গে যে ব্যাপার সেইটাকে রাজযোগ বলে । হঠযোগে শুধু দেহটা ঠিক থাকে । বহু বৎসর ধরে দেহটা রাখা যায় । মহারাজ রণজিৎ সিংহের দরবারে বাবা হরিদাস নামে এক সাধু ছিল । সে হঠযোগী ছিল । সে একদিন হঠযোগের ক্রিয়া দেখাল । সে প্রথমে স্থির হয়ে বসল । তখন তাকে একটা সিন্দুক পুরে শিকল দিয়ে সেটা বাঁধলে । তারপর সেটা শীলমোহর করলে । সিন্দুকটা মাটিতে পুঁতে তার উপর গম লাগাইয়া দিল । গম পাকল, তখন গম কাটল, অন্ততঃ পাঁচ ছয় মাস হবে ত ! চারিদিকে সিপাই পাহারা রহিল । তারপর সিন্দুকটা তুলে জড়ান শিকলগুলি খুললে । সিন্দুকটা খুলে দেখে বাবা হরিদাস তার মধ্যে স্থির হয়ে রয়েছে শুধু ব্রহ্ম-তলার কাছটা একটু গরম । তখন তার শিষ্যরা অনেক গাছ গাছড়ার রস নিয়ে পিঠে মাগিস ক'রে তার জ্ঞান ফিরিয়ে নিয়ে এল । মহারাজ রণজিৎ সিংহ তাকে অনেক অর্থ দিতে চাহিলেন কিন্তু সে কিছুই নিলে

লগনে বিবেকানন্দ

না। শেষ জীবনটা তার বড় ভাল ছিল না। ইঠযোগে মনের কোন উন্নতি হয় না শুধু দেহটা নিয়েই নাড়াচাড়া করে। মনের ব্যাপারে রাজ-যোগই একমাত্র পথ” ইত্যাদি বলিতে লাগিলেন।

ফক্স স্বামীজীর প্রতিভা দর্শনে এতদূর আকৃষ্ট হইয়াছিল যে কোন তর্ক

স্বামীজীর প্রতি  
ফক্সের আঁকা।

উঠিলে সে স্বামীজীকে প্রামাণ্য বলিয়া উল্লেখ করিত।

ইতিহাসের কথা উঠায় ফক্স বলিল যে স্বামীজী বলেন,

“The French are the Persians of Europe”

অর্থাৎ এসিয়াতে পূর্বে পারশ্ববাসীরা যেরূপ ভোগবিলাসিতা করিয়াছিল সেইরূপ ইউরোপে ফরাসী জাতিরা ভোগ বিলাসে মাতিয়াছে। ফরাসীরা প্রাকৃতিক সৌন্দর্য্যে এত মাতিয়া গিয়াছে যে তাহারা সাধারণ চিত্র ত্যাগ করিয়া বিবস্ত্র (naked) চিত্র অঙ্কণ করিতেছে। ফক্সের সহিত কথাপ্রসঙ্গে স্বামীজী একদিন বলিলেন, “পায়জামা বা tailoring dress ইত্যাদি প্রথম পারশ্বরা করিয়াছিল। পারশ্বদের নিকট হইতে অপর জাত গ্রহণ করিয়াছে। বর্তমানে ফরাসীদেরও সৌষ্ঠব ইউরোপের অপর জাতি গ্রহণ করিতেছে।” এইরূপে উভয় জাতির সৌসাদৃশ্য দেখাইতে লাগিলেন। স্বামীজীর সহিত ফক্সের অনেক ইতিহাসের কথা হইত। স্বামীজী এক সময় বলিলেন, “মেগেস্থানিসের সময় ভারতবর্ষের লোকেরা বেশ ফরসা ছিল। মেগেস্থানিস হচ্ছে চন্দ্রগুপ্তের সময়কার লোক। কিন্তু তাহার পর বৌদ্ধ ধর্মের প্রাবল্য হওয়ায় তাতার ও অপর জাতির সহিত ভারতবর্ষের লোকের রক্ত সংমিশ্রণ হয় তাতেই জাতটা কালো হয়ে গেছে। এই রক্ত সংমিশ্রণ হওয়ায় জাতটোর মস্তিষ্ক শক্তি অনেক পরিমাণে হ্রাস হয়ে গেছে” ইত্যাদি। স্বামীজী ইতিহাসের বিষয় যখন কথা তুলিলেন তখন পুঙ্খানুপুঙ্খরূপে নানা গ্রন্থের উল্লেখ করিয়া বহু বিষয় বলিলেন।

একদিন রোম সম্রাট ভাইটালিয়াসের কথা উঠিল। গিবনের রোমান ইতিহাসে উল্লিখিত আছে যে, ভাইটালিয়াস যে কয় রোম সম্রাটের কথা। বৎসর রাজত্ব করিয়াছিলেন সেই সময় শুধু তিনি আহারই করিয়াছিলেন। স্বামীজী বলিতে লাগিলেন যে, আসাম থেকে ময়না পাখী, ভারতবর্ষের অগ্রাগ্র স্থান হইতে ময়ূর—এ সমস্ত রোমে যেত। ময়না পাখীর মাথার ঘি-টা ছুধ দিয়ে সিদ্ধ করে ভাইটালিয়াস তাই একটু খাইতেন। সাইবেরিয়া হইতে হোয়াইট ফল্গ আনাইয়া তাহার একটু লিভার খেতেন। লোকটার খাবার নিয়ম বিটকেল ছিল। মাছুষের অজস্র অর্থ বা ক্ষমতা হইলে সে যে কি না করে তার ঠিকানা নাই, সে একটা পশু হয়ে যায়। এইরূপে তিনি গ্রীক, পারস্য, আসিরিয়া ও বাবিলিয়নদের অনেক বিষয় বলিয়া যাইতে লাগিলেন যাহা চলিত গ্রন্থে পাওয়া যায় না এবং সাধারণ পাঠকও যাহা বিশেষ জানে না। সামান্য একটি ফুল বা চিত্র উপলক্ষ্য করিয়া তিনি তদ্বিষয়ে কোন্ কোন্ জাতি কোন্ সময় কিরূপ চিন্তা করিয়াছিল সেই সকল বিষয় অনর্গল বলিয়া যাইতেন। ফল্গ মাঝে মাঝে বলিত, “আমেরিকার অনেক প্রফেসর ও পণ্ডিত স্বামীজীর সমকক্ষ নন।”

স্বামীজী ফল্গকে মাঝে মাঝে বলিতেন, “দেখ তোমাদের আমেরিকাটা

দেখ লুম, লোকগুলো টাকা টাকা ক’রে উন্মাদ হয়েছে।  
 আমেরিকায় জগত মানেই তাদের টাকা। জগতে অল্প জিনিস যে  
 বর্ণ-বিষেপ কিছু ভাববার আছে তা তাদের মোটেই হুঁস্ নাই।

আরে বল্বে কি একবার চিকাগোর এক্জিবিসন্ দেখতে গিয়ে বড় নাগর-  
 দোলার উপর উঠা গেছে। ছোটো লোকের মাথা ঠোকাঠুকি হয়ে গেছে—  
 কোথায় তারা অপ্রতিভ হয়ে পরস্পর মাথা চাইবে তা নয়, ক’রলে কি না  
 বিজ্ঞাপনের কার্ডখানি পরস্পরের হাতে দিল। এই উপলক্ষ্যে যদি



## লণ্ডনে বিবেকানন্দ

কারবারের কিছু সুবিধা হয়, মাল বেচে যদি কিছু টাকা হয়। ওরা এমন কারবারী লোক। লোকগুলোর মুখে আর কোন কথা নাই শুধু কারবারের কথা। কিন্তু যখন টাকাটা দেশে খুব জমে যাবে তখন মনটা উচ্চ চিন্তার দিকে যাবে, তখন ঐ দেশে বড় দার্শনিক, চিত্রকর ও গায়ক প্রভৃতির উদ্ভব হবে। আরে আমেরিকায় বড় একটা নাপ্তের দোকানে যাওয়া মহা বিল্লাট! সঙ্গে একজন লোক নিয়ে যেতে হয়, তিনি হলেন জীবন্ত স্যাটিফিকেট—নইলে ভদ্র দোকানের নাপ্তেরা মলিন বর্ণের লোককে কামাইবে না। কারণ মলিন বর্ণের লোক হইলে তাহারা মিশ্রিত নিগ্রো বলিয়া ধরিয়া লয়। সে এক মহা বিল্লাট! বর্ণ-বিদ্বেষটা আমেরিকায় বড় প্রবল দেখেছি।

একদিন বেলা দুইটা তিনটার সময় স্বামীজী ঘরের কোণের কাছে ঠেসান দেওয়া চেয়ারটির উপর পায়ের উপর পা দিয়া ঠেস দিয়া বসিয়া আছেন। চক্ষু ছুটি মুদ্রিত—যেন কি ভাবিতেছেন। অনেকক্ষণ এইরূপ ভাবে স্থির হইয়া রহিলেন। ফক্স, বর্তমান লেখক ও আর কয়েকজন দেওয়ালের নিকট স্থির ভাবে বসিয়া আছেন। স্বামীজী হঠাৎ পায়ের উপর পা দিয়া খাড়া হইয়া বসিলেন এবং গম্ভীর মুখে বলিতে লাগিলেন, “দেখ ফক্স, আমি পল ও খৃষ্টান ধর্মটার বিষয় ভাবছিলাম। দেখলাম কি জান, একটা নগণ্য ইহুদীদের ধর্ম গোটাকতক জেলে মালার হাতে ছিল। সে সময় গ্রীক ও রোমান এরা ছুটি প্রধান জাত। ইহুদীরা তখন পরাধীন জাত। পল সেই জেলে মালাদের ভাবগুলির অ্যাডভোকেট হল। Paul was a learned fanatic সেইজন্তু সে গ্রীক দর্শন ও রোমান সভ্যতাকে উন্টাইয়া ফেলিল। শুধু ধর্মভক্তিতে কাজ চলে না, fanatic গুলো জেতে। আমি কি জান? Paul was a learned fanatic, I am a learned fanatic and I like to create a band

of learned fanatics. দেখ, শুধু fanaticগুলো কোন কাজের নয় ওটা হচ্ছে brain disease, ওতে বড় অনিষ্ট করে। Learned fanatic হলে কাজ চলে” এইরূপ কথা তিনি উত্তেজিত হইয়া বলিতে লাগিলেন ও সকলে মোহিত হইয়া শুনিতে লাগিল। এইজন্ত অনেকেই বলিতেন যে, What Paul was to Jesus, Vivekananda is to Ramkrishna.

একদিন সকালবেলাকার বক্তৃতা হইয়া গেলে স্বামীজী ধীরে ধীরে সিঁড়ি দিয়া নামিতে লাগিলেন। বৃদ্ধা মিস্ মূলারও সঙ্গে সঙ্গে নামিতে-ছিলেন। পূর্বে মিস্ মূলার ও সারদানন্দ স্বামীর ঝগড়ার কথা উল্লেখ করিয়াছি। স্বামীজী মিস্ মূলারকে মিষ্ট ভাষায় কিছু ভৎসনা করিবার জন্ত বলিতে লাগিলেন, “We are all monomaniac, I am monomaniac for my preaching of Vedanta, you are monomaniac for your whims. The world is full of monomaniacs.” অর্থাৎ আমরা সকলেই একটু মাথা পাগল। আমি আমার বেদান্ত প্রচারের জন্ত এক পাগলামী করে বেড়াচ্ছি আর তুমিও তোমার খেয়ালের জন্ত এক পাগলামী কর। জগতটা পাগলায় পরিপূর্ণ। সারদানন্দ স্বামীর সহিত ঝগড়ার উল্লেখ করিয়া স্বামীজী এই কথা বলিলেন।

বুড়ী ঝি যাহা রাখিত মিস্ মূলারের তাহা খাইতে ভাল লাগিত না। একদিন বিকাল বেলা রাগ করিয়া বলিতে লাগিল যে এই রকম রান্না আর খাওয়া যায় না ইত্যাদি বলিয়া কতক্ষণ গজ্জ করিতে লাগিল। তারপর নিজে ভাল পোষাক পরিয়া তাহার আত্মীয়ের বাড়ীতে চলিয়া গেল। ষ্টার্ডি সেদিন ছিল না। স্বামীজী বিরক্ত হইয়া বলিতে লাগিলেন, “আর পারিনি বাপু, কেবল কৌদল, কৌদল! পান থেকে চূণ খস্লেই বুড়ী টং হয়ে যায়। বাক্, দিনকতক ওর আত্মীয়ের বাড়ী গিয়ে থাকুক। দিনকতক খেয়ে দেয়ে কিছু ঠাণ্ডা হয়ে আসবে।” তারপর স্বামীজী,

লগুনে বিবেকানন্দ

সারদানন্দ স্বামী, গুডউইন ও বর্তমান লেখক আহ্বার করিতে বসিলেন। স্বামীজী দু' চার চামচ খাইয়াছেন এমন সময় গুডউইনকে বলিলেন, “গুডউইন, ডায়েরিটা দেখ ত আজ কোন engagement আছে কি না?” গুডউইন তাড়াতাড়ি করিয়া ডায়েরিটা খুলিয়া দেখিলেন যে ঠিক সেই সময় পার্ক লেনে এক ডিউকের বাড়ীতে নিমন্ত্রণ। স্বামীজী ঘড়ি খুলিয়া দেখিলেন যে নির্ধারিত সময়ের আর মিনিট দশেক বাকী আছে। তিনি চঞ্চল হইয়া উঠিয়া পড়িলেন। সকলেই আহ্বার ত্যাগ করিয়া সঙ্গে সঙ্গে উঠিয়া পড়িলেন। সেই অল্প সময়ের মধ্যে কাপড় বদলাইতে হইবে, জুতা বদলাইতে হইবে, গাড়ী ডাকিতে হইবে এবং সেখানে পৌঁছিতে হইবে। স্বামীজী ত তাড়াতাড়ি নিজের ঘরে গিয়া সাট, কলার, ভেষ্ট ইত্যাদি পরিলেন। যে জুতা পায়ে ছিল তাহা ছাড়িয়া বুট জুতা পরিলেন। কিন্তু এত চঞ্চল হইয়াছিলেন যে বুটের ফিতা বাঁধিতে পারিতেছিলেন না এবং ক্রমাগত বলিতে লাগিলেন, “কি হবে রে গুডউইন, আমি যে পাচ্ছি না, তুই সব ঠিক করে দে।” গুডউইন তাড়াতাড়ি করিয়া বুটের ফিতাটা বাঁধিয়া দিলেন। এমন সময় স্বামীজী বলিলেন, “ওরে মাথার টুপিটা আনতে ভুলে গেছি।”

গুডউইন দৌড়িয়া গিয়া টুপিটা লইয়া আসিলেন। আবার খানিকক্ষণ

পরে স্বামীজী বলিলেন, “ওরে ছড়িটা আনতে ভুলে গেছি।” গুডউইন তাড়াতাড়ি গিয়া আবার ছড়িটা লইয়া আসিলেন। আবার বলিলেন,

“সিগারেট দে।” গুডউইন নিজের পকেট হইতে তামাক ও কাগজ বাহির করিয়া অভ্যাস বশতঃ নিজের মুখের কাছে লইয়া গেলেন। জিবের লাল দিয়া কাগজটা আঁটিতে চেষ্টা করিতেছেন এমন সময় স্বামীজী বলিলেন, “ওরে থুথু দিস্ না, থুথু দিলে বাম হয়, অমনি দে।” গুডউইন অপ্রস্তুত

হইয়া সিগারেটটা স্বামীজীর হাতে দিলেন। স্বামীজী নিজে জিবের লাল দিয়া সিগারেটটা পাকাইয়া মুখে দিলেন ও গুডউইন পকেট হইতে দেশলাই বাহির করিয়া কাঠি জ্বলাইয়া আগাইয়া দিলেন। স্বামীজী ছ'এক টান টানিয়া বলিলেন, “ওরে একটা গাড়ী ডেকে দে।” গুডউইন দৌড়াইয়া গিয়া একটা হাওশ্বাম গাড়ী ডাকিয়া লইয়া আসিলেন। সময় মাত্র পাঁচ মিনিট বাকী আছে। গাড়োয়ানকে পার্ক লেনের বাড়ীর ঠিকানা বলিয়া দিয়া বলিলেন যে তোমার যা ভাড়া তা তুমি পাবে আর তুমি ঠিক সময় পৌছাইয়া দিতে পারিলে কিছু বক্সিস্ পাবে। তুমি গাড়ী উড়াইয়া লইয়া যাও। এমন সময় স্বামীজী পকেটে হাত দিয়া বলিলেন, “ও গুডউইন, পকেটে যে কিছু নাই।” গুডউইন তখন আবার ৫ পাউণ্ড আনিয়া দিলেন।

এই সমস্ত ঘটনা ঘটিতে ছ'তিন মিনিট লাগিয়াছিল। গুডউইন এই অল্প সময়ের মধ্যে এই সমস্ত খুঁটিনাটি কাজ করিয়াছিলেন; যেন চরকীর কলের মত ঘুরিয়াছিলেন। স্বামীজী চলিয়া যাইবার পর পুনরায় সকলে আহাৰ করিতে বসিলেন। গুডউইন ছ'এক চামচ মটর ডাল খাইয়া বলিতে লাগিলেন, “কি সুস্বাদু জিনিস! কি সুন্দর জিনিস! আমি ইহা খাইয়া সমস্ত জীবন কাটাইয়া দিতে পারি” এই বলিয়া নানা প্রকার মুখভঙ্গী ও মস্তক সঞ্চালন করিতে লাগিলেন। সারদানন্দ স্বামী ও বর্তমান লেখক গুডউইনের ভাব দেখিয়া মৃদু মৃদু হাসিতে লাগিলেন।

সেদিন স্বামীজীর আসিতে রাত্রি হইয়াছিল। সকলে শয়ন করিবার পর তিনি ফিরিয়াছিলেন সেইজন্ত বেলা পর্য্যন্ত একটু নিদ্রা গিয়াছিলেন। সকলের প্রাতঃভোজন হইয়া গেলে পর স্বামীজী ড্রেসিং গ্রাউন পরিয়া আহাৰ করিতে লাগিলেন। আহাৰ হইয়া যাইবার পর তিনি নিজের চেয়ারখানিতে বসিয়া একটু তামাক খাইতে লাগিলেন। সেদিন যনটা

## লগনে বিবেকানন্দ

বেশ প্রফুল্ল। সারদানন্দ স্বামী ও বর্তমান লেখক দেওয়ালের নিকট বসিয়া আছেন। স্বামীজী কখনও চেয়ারে বসিতেছেন কখনও বা টেবিলের দিকে পায়চারি করিতেছেন।

স্বামীজী মৃদু মৃদু হাসিতে হাসিতে সারদানন্দ স্বামীকে বলিলেন, “ওরে শরৎ, দেখলি তো তোর কলিকাতার ঢের হোম্‌ড়া চোম্‌ড়া লোক যারা এখানে আসে তাদের কিন্তু কেউ পৌছে না। ডিউক্‌রা কি তাদের সঙ্গে খায় রে। অনেক সুপারিশ নিয়ে গেলে তবে তাদের সঙ্গে দেখা করে। আর ঠাখ্ আমাকে নিমন্ত্রণ করে নিয়ে গিয়ে খাওয়াচ্ছে। আমি হচ্ছি teacher class (শিক্ষক), তাই আমাকে সম্মান করে। আমি ইংরাজগুলোর মত ধনী, মানী, জ্ঞানী—সবার মাথায় পা দিয়ে চলি। আর দেখছিস্ তো এরা জুজুবুড়ি হয়ে আমার সম্মুখে থাকে। এদের হাড়ে হাড়ে বেদান্ত ঢুকিয়ে দিয়ে যাচ্ছি; এখন থেকে এরা ইণ্ডিয়াকে অল্প চক্ষে দেখবে, সম্মান করে ইণ্ডিয়ার কথা শুনবে” এই বলিয়া মৃদু মৃদু হাসিতে লাগিলেন। বেলা দেড়টা ছটোর সময় স্বামীজী ফক্সকে বলিলেন, “দুর্, রোজ রোজ একঘেয়ে খাওয়া যায় না। ফক্স, চন্—হুজনে গিয়া একটা হোটেলে খেয়ে আসি” এই বলিয়া হু’জনে বাহিরে খাইতে চলিয়া গেলেন।

গরমকাল—একটা বাক্স করে আম আসিল। মিস্ মুলারকে ভারতবর্ষ হইতে কে একজন বাক্স করে আম পাঠিয়ে দিয়েছে। বাক্সের গায়ে হাওয়া যাইবার জন্য ফুটো ফুটো দাগ করে দিয়েছে এবং প্রত্যেক আমটি কাগজ মুড়ে থাকে থাকে বাক্সের ভিতর সাজিয়েছে। আসিতে প্রায় মাসাবধি হইয়াছে, এইজন্য আমগুলি ভুবড়ে ভুবড়ে গিয়াছে; তেমন স্নাদ নাই। স্বামীজী গুডউইনকে বলিলেন, “গুডউইন, খানিকটা বরফ এনে আমগুলোকে ভিজাইয়া দাও ত, তা হলে আমটার কিছু স্নাদ হবে।”

গুডউইন তাড়াতাড়ি করিয়া মাছের দোকান হইতে বরফ আনিলেন। লগুনে মাছ পচে যায়, সেইজন্য অতিশয় যত্ন করিয়া মাছে বরফ দিয়া রাখে। বরফের দোকান ভিন্ন নাই। মাছের দোকানেই বরফ পাওয়া যায় এবং দোকানগুলিও বেশ পরিষ্কার পরিচ্ছন্ন। গুডউইন বরফ আনিয়া গোটাকতক আম বরফেতে দিয়া একটা চিনামাটির বড় বাটিতে আমগুলি রাখিয়াছিলেন। আমগুলিও পরে কনুনে ঠাণ্ডা হইল এবং খাইতে কিছু ভাল হইল। ফল্স আমেরিকাতে কখনও আম দেখে নাই। তারপর আমগুলির মাঝে আঁটি রাখিয়া দুই ধারে দুই চাকলা করে কাটা হইল। কি করিয়া খাইতে হইবে ফল্স তাহা জানে না। ফল্স ছুরি, কাঁটা, চামচে দিয়া অনেক উপায় অবলম্বন করিল, কিন্তু কিছুতেই তার আম খাওয়ার সুবিধা হইল না। স্বামীজী ফল্সকে স্নেহভাবে বলিলেন, চাম্চে দিয়ে কুরে কুরে খাও (Try with your spoon, coop it out)। ফল্স তখন তজপ করিয়া খাইতে আরম্ভ করিল। স্বামীজী তখন গুডউইন প্রভৃতিকে ভারতবর্ষের নানা স্থানের আমের কথা বলিতে লাগিলেন। বিদেশে বসিয়া নিজের দেশের জিনিস খাওয়া যে কি আনন্দদায়ক ও প্রীতিকর তাহা সকলেই বেশ বুঝিতে পারিলেন। দেশান্তরগতা সামান্য একটা আবেগেই বাড়িয়া উঠিল।

একদিন সকালবেলা গুডউইন সারদানন্দ স্বামী ও বর্তমান লেখককে

“ওয়েষ্ট মিনিষ্টার অ্যাবি” দেখাইতে লইয়া গেলেন।  
ওয়েষ্ট মিনিষ্টার  
অ্যাবি।

পাথরের প্রাচীন বাড়ী, অনেক য়ায়গায় দেখিতে  
অন্ধকার এবং স্থানে স্থানে পাথরে য়রিচা  
খরিয়াছে। তথায় বড় বড় লোকের সমাধি আছে ; কাহারও বা মেয়ের  
সঙ্গে একভাবে মিলানো এবং উপরে পাথরের উপর বর্ণনা লেখা আছে।  
রাজা বা কোন বিশিষ্ট ব্যক্তির সমাধি জমীর উপর গাঁথুনি ও পাথরে নানা

## লগনে বিবেকানন্দ

প্রকার কারুকার্য আছে। সারদানন্দ স্বামী ও বর্তমান লেখক বিশিষ্ট ব্যক্তির সমাধির নামগুলি পড়িয়া দুই হাত তুলিয়া প্রণাম করিতে লাগিলেন। গুডউইন তাহাতে মুচ্কে মুচ্কে হাসিতে লাগিলেন। অবশেষে অভিষেক সিংহাসনের কাছে লইয়া গেল। একখানা সামান্য চেয়ার (কাঠের বা পাথরের এক্ষণে ঠিক মনে নাই) তার মাঝে একখানা পাথরের চাপ। গুডউইন টুপি খুলিয়া প্রণাম করিলেন এবং তৎসঙ্গে সারদানন্দ স্বামী আর বর্তমান লেখকও প্রণাম করিলেন। তারপর William the First এর দরবার ঘর দেখাইতে লইয়া গেলেন। গুডউইন সেখানে নিজের জাতের গৌরব করিয়া বুক ফুলাইয়া নানা কথা কহিতে লাগিলেন। সম্মুখে একখানা চামড়ার কাগজে পুরান ভাষায় কি লেখা রহিয়াছে। গুডউইনের জাতিগত গর্ব-কথা শুনিয়া সঙ্গী দু'জনের একদিকে যেমন আফ্লাদ হইতে লাগিল, তেমনি অত্রদিকে নিজেদের হীন অবস্থার কথা স্মরণ করিয়া দুঃখ আসিতে লাগিল। তারপর তিনজনে নানাদিক দেখিয়া বেড়াইতে লাগিলেন। গুডউইন বলিলেন, “প্রত্যেক লম্বা লম্বা পাথরের টালির নীচে কাহারও না কাহারও সমাধি আছে।” অপরের মৃতদেহের উপর জুতা পায়ে দাঁড়ান হইয়াছে সেইজন্ত সারদানন্দ স্বামী ও বর্তমান লেখক সঙ্কুচিত হইয়া পিছু হটিয়া আসিলেন। সেই দেখিয়া গুডউইন হাঃ হাঃ করিয়া হাসিতে হাসিতে বলিলেন, “Oh you superstitious Hindus, এতে হয়েছে কি? এখানে ত সব পাথরের নীচেই সব মাটির নীচেই এইরূপ অস্থি আছে। ওতে কি হয়েছে। আমরা ওসব কিছু মানিনা।” যাহা হউক এই সামান্য কথাটিতে জাতিগত ভাব বেশ প্রকাশ পাইল। সারদানন্দ স্বামী ও বর্তমান লেখক গুডউইনের মুখের দিকে চাহিয়া বলিতে লাগিলেন “ও কি কথা, আমরা মৃত ব্যক্তিকে বিশেষ সম্মান করিয়া থাকি।”

একদিন প্রাতর্ভোজনের পর স্বামীজী আপনার চেয়ারে বসিয়া

আছেন। গুড্‌উইন ও বর্তমান লেখক দেওয়ালের নিকট চেয়ারে বসিয়া আছেন। প্রসঙ্গক্রমে আমেরিকার কথা উঠিল। গুড্‌উইন বলিলেন, “ডেট্রয়েটে আমাদের যা সভা হয়েছিল সে সন্ধ্যার চেয়ে বড়; প্রায় ছয় হাজার লোক সমাগম হয়েছিল। সেদিন আপনার (স্বামীজীর প্রতি লক্ষ্য করিয়া) অমানুষিক শক্তিতে কথা বাহির হয়েছিল। আমি সেদিন আনন্দে পাগল হয়ে গিয়েছিলুম।” স্বামীজী বলিতে লাগিলেন, “আমেরিকায় বেদান্ত প্রচারে কে কে সহায় হইবে?” গুড্‌উইন বলিলেন, “আমেরিকায় যে বড়লোকগুলো সভায় আস্তো আমি তাদের আঙ্গুলে গুণতে পারি।” স্বামীজী বলিলেন, “টেস্‌লা ও এডিসনের কি ভাব?” গুড্‌উইন বলিলেন, “টেস্‌লা স্বপক্ষে হবে কিন্তু এডিসনের সহিত আদায় কাঁচকলায়।” এইরূপ আমেরিকার অনেক বিশিষ্ট লোকের নাম উল্লেখ করিয়া কে কে সহায় হইবে এবং কে কে সহায় হইবে না, সেই সকল বিষয় কথাবর্তী হইতে লাগিল। বেদান্ত প্রচার যে আমেরিকায় স্থায়ী হইবে, এই কথা গুড্‌উইনের মুখ হইতে শুনিয়া স্বামীজী বেশ একটু উৎসাহিত ও আনন্দপূর্ণ হইলেন।

১৮৯৬ খৃষ্টাব্দে ইংলণ্ডে নাপিতের দোকান প্রায় জার্মেনরাই করিত। ইংরাজ নাপিতের দোকান অপেক্ষাকৃত কম ছিল। বাড়ীর চাকর অনেকেই জার্মান ছিল, কারণ জার্মানরা অল্প পয়সায় কাজ করিত এবং ইংরাজরা একটু বেশী পয়সা চাহিত। এইজন্য অনেকে জার্মান চাকর রাখিত ও জার্মান নাপিতের দোকানে বাইত। স্বামীজীর যখন মাথার চুল কাটিবার আবশ্যক হইত, তখন তিনি কোন বিশিষ্ট লোকের সহিত গিয়া চুল ছাঁটিয়া আসিতেন। সাধারণের সেই সকল দোকানে প্রবেশ নিষেধ। সেই সমস্ত দোকান একটা রাজবাড়ীর সমান। তবে বিশিষ্ট লোক সঙ্গে যাওয়ায় স্বামীজীকে অভ্যর্থনা করিয়া চুল কাটিয়া দিত।



## লগুনে বিবেকানন্দ

ইংলণ্ডে ও অপর দেশে নাপিতে চুল দাড়ী কাটিয়া দিবে, কিন্তু কখনও নখ কাটিয়া দিবে না। হাত পায়ের নখ নিজেদের ছুরি দিয়া কাটিতে হয়। একদিন বিকালে তিনটে চারটের সময় স্বামীজীর পায়ের নখ কাটিবার ইচ্ছা হইল। নখ কাটিবার বস্ত্রের রিংটা আনিলেন ও পায়ের বুটজুতা ও মোজা খুলিয়া নখ কাটিতে বসিলেন। স্বামীজী বলিতে লাগিলেন, “আরে, আমেরিকায় নাপিতের দোকানে যাওয়া কি ফেঁসাদ! কোন বিশিষ্ট লোক সঙ্গে করে’ না নিয়ে গেলে নাপিতের দোকানে ঢুকতে দেয় না, বলে কিনা নিগ্রো বা মিশ্রিত নিগ্রো, সে একটা মহা বিরক্তির কথা। নাপিতের দোকানে চুল কাটিতে যাবে, আবার সঙ্গে সার্টিফিকেট নিয়ে যেতে হবে। কি দুর্গতি! ইংলণ্ডে কিন্তু সেই ভাবটা তত নয়, কলেই সব জায়গায় যেতে পারে। চিকাগোতে জর্জ হেলের বাড়ীতে আছি, হাতের পায়ের নখ বড় হয়েছে। হেলের মেয়েদের কাছে pen-knife চাইলুম। তারা বলে ‘কি ক’রবেন?’ আমি বলুম, হাত পায়ের নখ বড় হয়েছে, কাটব। এই ত হেলেদের মেয়েদের হুড়োহুড়ি লেগে গেল। কতটা অতি সাগ্রহে পদানত হয়ে মেঝের গালিচার উপর বসে আমার জুতা খুলে মোজা খুলে, অতি শ্রদ্ধা ভক্তি করে দুই পায়ের আঙ্গুলের নখ কেটে দিয়ে তাহার পর পুনরায় মোজা জুতা পরিয়ে দিয়ে তবে উঠে চেয়ারে বসিল এবং নাপিতের মত আমাকে বলতে লাগলো “আমায় দাম দিন, আমরা আমেরিকান, দাম না পেলে কোন কাজ করি না। নাপিতের দোকানে গেলে দু’তিন ডলার দিতে হতো। আমি ঘরে বসে নখ কেটে দিয়েছি, আমাকে দু’তিন ডলার মজুরি দিন।” এই বলে সে হাস্য করিতে লাগল। আমিও হাসতে হাসতে বলুম, “আমার যে পা ছুঁতে পেয়েছ আর নখ কাটবার অধিকার পেয়েছ এর জন্য আমার কি দেবে দাও?” এই কথা বলিয়া সকলে খুব হাস্য করিতে লাগিল।

## ছয়

একদিন সকালবেলা বক্তৃতা শেষ হইবার পর সকলেই ঘুর হাঁসিত ও প্রফুল্ল। গুডউইন ও সারদানন্দ স্বামী আফ্লাদে যেন অধীর হইয়াছেন। আগন্তুক ব্যক্তির সিঁড়ি দিয়া নামিয়া যাইবেন। গুডউইন ও সারদানন্দ স্বামী সিঁড়ি দিয়া নামিয়া চাতালের উপরে আসিলেন। বর্তমান লেখক পূর্বেই নামিয়া আসিয়া নীচে দাঁড়াইয়াছিলেন। তিনি উপর দিকে চাহিয়া দেখেন যে, গুডউইন ও সারদানন্দ স্বামী দুই মূর্তি স্থলের বালকের মত খেলা করিতেছেন। গুডউইন সারদানন্দ স্বামীকে ধাক্কা দিতেছেন। গুডউইন ধাক্কা দিতে দিতে বলিতেছেন, “You cooky Swami, you devil Swami, you do not meditate but close your eyes and think your next meal. You meditate only upon your meal”. অর্থাৎ রাধুনি স্বামী, ছষ্ট স্বামী, তুমি ধ্যান কর না, শুধু চক্ষু ছুটি বুজিয়ে খাবার কথা কেবল ভাব। সারদানন্দ স্বামীও গুডউইনকে কিছু কিছু গাল ও ধাক্কা দিতেছেন। বর্তমান লেখক নীচে হইতে এই ছুটি মিন্সের বালকের মত খেলা দেখিতেছেন। সেইদিন গুডউইন ও সারদানন্দ স্বামীর আফ্লাদের মাত্রা কিছু বেশী হইয়াছিল। এমন সময় স্বামীজী উপর হইতে নামিয়া আসিয়া পিছন দিক থেকে তাঁহাদের ব্যাপার দেখিয়া বলিলেন, “What are you doing, you two chaps?” অর্থাৎ ছোটো ছোঁড়ায় কি কচ্ছিস্ রে? স্বামীজীর কথা শুনিয়া দুজনে অপ্রস্তুত হইয়া পড়িলেন এবং দৌড়িয়া গিয়া নীচেকার ঘরে শান্তশিষ্ট বালকের মত

লগনে বিবেকানন্দ

বসিয়া রহিলেন—যেন কিছু জানেন না বা কিছু করেন নাই। স্বামীজী নীচেকার ঘরে আসিয়া গম্ভীর হইয়া অল্প কথা কহিতে লাগিলেন।

ষ্টার্ডি “রুবাব” খাইতে বড় ভালবাসিতেন। ইহা এক রকম ছোট ছোট নলের মত ফাঁপা শিকড়, খাইতে টক ও মিষ্ট মিশ্রিত। ভারত-বাসীর মুখে ভাল লাগে না। সেইগুলি একটা চীনে মাটির বাটির ভিতর রাখিয়া একখানি ময়দার রুটি দিয়া উলুনে গরম করে। ইহাকে ষ্টার্ট বা পাই বলে। আহার করিবার সময় উপরকার রুটীখানি কাটিয়া ভিতরকার সেই শিকড়গুলি খাইতে হয়। আহার করিতে একটু মিষ্টি মিষ্টি লাগে, ষ্টার্ডি এই রুবাব খাইতে বড় ভালবাসিতেন কিন্তু অপরের তাহা খাইতে ভাল লাগিত না।

একদিন প্রাতর্ভোজনের পর সকলে বসিয়া আছেন এমন সময় ষ্টার্ডি পাইউরুটি ও চাপাটির কথা তুলিলেন। তিনি বলিলেন, “ময়দাকে খামিরা দিয়ে পচিয়ে পাইউরুটি তৈয়ারি করে; ইহাতে ময়দার স্বাদ আর কিছু থাকে না।

যা’দের হজম-শক্তি কম তাদের পক্ষে এটা চ’লতে পারে, কিন্তু আমি যখন ভারতবর্ষে ছিলাম তখন চাপাটি খেতুম। চাপাটি টাটকা ময়দায় তৈরি হয়, খামিরা দিয়ে পচান হয় না। প্রথমে ছ’ একদিন পেটের গোল হয়েছিল, তারপর বেশ হজম হতে লাগল; দেখলুম চাপাটি বেশ পুষ্টিকর আহার, loaf তরুপ নয়। আমি সেইজন্ত মাঝে মাঝে কোন গতিকে চাপাটি করে’ খাই। ইংলণ্ডে চাপাটিটা চলিলে অনেকের স্বাস্থ্য ভাল হবে। যখন ভারতবর্ষে ছিলাম তখন অতি কদর্যভাবে ভাত পরিবেশন করিত। অতি কদর্যভাবে নখওয়ালা অপরিষ্কার কালো কালো আঙ্গুল-গুলো ভাতের ভিতর জুড়ে দিয়ে ভাত তুলে সকলের পাতে দিত। সেই সবে আমার ঘৃণা হত। যদি একটা চাম্চে বা অল্প কোন রকম জিনিস

দিবে ভাত ভুলে পাতে দেয় তা হলে খেয়ে তৃপ্তি হয়। Loaf গুলি বড় নোংরা।” উপস্থিত সকলে স্থির হইয়া ষ্টার্ডির কথা শুনিতে লাগিলেন, কেহই কোন কথা কহিলেন না।

একদিন প্রাতর্ভোজনের পর আলমারীর ওপর চিনে মাটির পাত্র করিয়া কিছু ফল রহিয়াছে, তাহার ভিতর ষ্ট্রবেরী (strawberry) কিছু ছিল। ষ্ট্রবেরী আধ ইঞ্চি লম্বা পুরুষ্টো ফল, গায়ে বিনকুড়ি বিনকুড়ি ঘামাচির মত দানা, ভিতরে অনেকগুলি ছোট ছোট বীচি থাকে। খাইতে ঈষৎ টক ও মিষ্টি। ভারতবাসীদের মুখে বিশেষ ভাল লাগিত না। গুডউইন তাঁহার স্বজাতির প্রত্যেক জিনিসকে ভালবাসিতেন। গুডউইন বর্তমান লেখককে বলিলেন, “Strawberry খাও, বড় সুন্দর, ইংরাজী ফল বড় ভাল জিনিস।” বর্তমান লেখক অগত্যা অনিচ্ছায় ছ’একটি খাইলেন, বিশেষ কিছু ভাল লাগিল না, সেইজন্ত আর হাত বাড়াইলেন না। গুডউইন সেই দেখিয়া চটয়া গিয়া বলিলেন, “অমন করে কি খায়, গুঁড়ো চিনিতে জুবেড়ে খেতে হয়।” বর্তমান লেখক অগত্যা তাহাই করিলেন ও মনে মনে ভাবিতে লাগিলেন, হায়রে কপাল, যে জীব আম খায় সেই জীব কিনা বুঝে গুড়কামানী খাচ্ছে। গুডউইন কিন্তু চিনি দিয়া, সেই ষ্ট্রবেরীগুলি আচ্ছাদ করিয়া খাইতে লাগিলেন।

পূর্বেই বলা হইয়াছে যে উইলিয়ম হুইটলির দোকান হইতে বেলা ১টা বা ১-৩০টার সময় একজন চাকর আসিয়া নিত্য উৎকৃষ্ট ফল দিয়া যাইত। একদিন একটি আনারস দিয়া গেল, ইংলণ্ডে আনারস বড় দুপ্রাপ্য জিনিস; বোধ হয় এক পাউণ্ড দাম হইবে। যাহা হউক স্বামীজী আনারস দেখিয়া বড়ই আনন্দিত হইলেন। গুডউইন তাড়াতাড়ি ছুরী লইয়া আনারস ছাড়াইতে গেলেন, কিন্তু কোনদিক হইতে বা কি প্রকারে ছাড়াইতে হয় তাহা তিনি জানেন না, সেইজন্ত একটু গোলযোগ করিয়া

## লগনে বিবেকানন্দ

ফেলিলেন। স্বামীজী তখন ছুরীখানা তাঁহার নিকট হইতে লইয়া নিজেই ছাড়াইতে লাগিলেন। গুডউইন তখন ছাড়াইবার প্রণালী বুঝিয়া লইলেন এবং স্বামীজীর হাত হইতে ছুরীটা লইয়া নিজেই যতটা সম্ভব ছাড়াইতে লাগিলেন। স্বামীজী মুখে মুখে সব বলিয়া দিতে লাগিলেন। সব টুকরা টুকরা করিয়া গুঁড়ো চিনি দিয়া ছোট ছোট খালে করিয়া গুডউইন সকলকে দিলেন। আনারস খাইয়া তো গুডউইনের মহা আনন্দ! ভারতবর্ষে এমন ফল যে আছে তা তাঁহার কল্পনায় ছিল না। স্বামীজী তাহার পর আনারসের কথা বলিতে লাগিলেন, “এটা চীনে ফল, ভারতবর্ষে পূর্বে ছিল না। সম্ভবতঃ পৰ্তুগীজ বা ডাচেরা চীন হইতে এই ফলটা নিয়ে আসে। ইহাকে Annanus বলিত, সেইটা অপভ্রংশ হইয়া আনারস হয়েছে, কিন্তু ভারতবর্ষে এখন ইহা অপরিচিন্ত জন্মায়। ভারতবর্ষের মাটি এমন উর্বরা যে অনেক বিদেশী ফলও ভারতবর্ষে প্রচুর পরিমাণে উৎপন্ন হয়।” যাহা হউক, আনারস একটু মুখে দিয়ে যে কি আনন্দ হইল তাহা বলিবার নয়। দেশের ফল বলিয়া সে যেন অমৃত বলিয়া বোধ হইতে লাগিল। একেই বলে দেশের কাকের আওয়াজও মিষ্টি।

একদিন স্বামীজী দেশাইকে miracle বা আজগুবি কত রকমের হয় সেই সম্বন্ধে অনেক কথা বলিতে লাগিলেন। স্বামীজী বলিতে দেশাইয়ের সহিত লাগিলেন, “দেখ দেশাই, তাত্ত্বিক সাধুরা মদ স্বামীজীর চোরান ক’রতে জানে। কমণ্ডলু করে’ মদ কথোপকথন। নিয়ে যাচ্ছে, এমন সময় মদের গন্ধ পেয়ে লোকেরা আপত্তি ক’রলে। তাত্ত্বিক সাধু অমনি তার কেরামতি দেখাতে লাগল। খানিকটা জল নিয়ে মন্ত্র পড়ে অনেক রকম অঙ্গভঙ্গী ক’রে জলটা কমণ্ডলুর মদের ভিতর ঢেলে দিলে; সেই জলটা মদের সঙ্গে মিশাতে যেন ব্রুথের মত হ’ল। এই আর কি! সকলে সাধুর কেরামতি দেখে আশ্চর্য

হয়ে গেল। দেখ, মদে জল দিলে অনেকটা ছুধের মত দেখতে হয়। সাধুরা এইরূপ অনেক আজগুবি করে; এই সব আজগুবির জন্ত আসল ধর্মটা হাতছাড় হয়ে গেছে এবং সাধুদের প্রতি লোকেরও একটা অবিশ্বাস দাঁড়িয়েছে। দেখ, শিবাজীর এক গুরু ছিল সাধু, তাঁরই আশীর্ব্বাদে শিবাজীর উন্নতি হয়েছিল। যখন মোগলদের সঙ্গে শিবাজীর যুদ্ধ হয়, তখন শিবাজীর চরেরা সাধুর মত গেরুয়া পরে' নানা জায়গার খবর নিয়ে আসত; ভারতবর্ষে সাধুর গতিবিধির বাধা নাই। সেই থেকে এখন পর্য্যন্ত সরকার গেরুয়া-পরা লোককে বিশেষ সন্দেহের চক্ষে দেখে। এইজন্ত পুলিশ গেরুয়া-পরা লোককে বড় সন্দেহ করে ও তার উপর কড়া নজর রাখে।”

পুনরায় স্বামীজী দেশাইকে বলিতে লাগিলেন, “দেখ, ভারতবর্ষে যখন রম্ভা সাধুর মত ঘুরে ঘুরে বেড়াতুম, তখন একবার এক গাঁয়ে এক পাঠশালার কাছে বিশ্রাম লই। সেখানে গোটাকতক ছেলে ব্যাকরণ প’ড়ছিল। আমি ত দূরে একটা যায়গায় বসে আছি। আমায় দেখে কেউ কিছু ব’ল্লে না, মনে ক’রলে যে একটা অতিথি এসেছে, ছুটো খেয়ে চলে যাবে, এখন বসে **গ্র্যাক**, খাওয়ার সময় দেখা যাবে। ছেলেগুলো ভুল ব্যাকরণ প’ড়ছিল। তাদের ভুল পড়া শুনে আমার তো কান ঝালাপালা হয়ে উঠল, অবশেষে আর থাকতে না পেরে তাদের ভুল সূত্রটা সংশোধন করে দিই। এই আর কি, তখন দেখে কে, তখন ছেলেগুলো এসে আমায় মহা খাতির কর্তে লাগল এবং সেখানে থাকবার জন্ত পীড়াপীড়ি করতে আরম্ভ করল। আমার তখন মনটা বড়ই খারাপ, অস্ত্র একস্থানে চলে যাব, সেইজন্ত আমি সেখানে ছুটো খেয়েই আবার অস্ত্র দিকে চলে গেলুম। দেশাই, ভারতবর্ষে আমি ঘুরে ঘুরে দেখেছি, সাধুদের ছুটি অঙ্গের কি দুর্গতি! তুমি সেদিন যে হঠযোগের কথা বলেছিলে,

## লগুনে বিবেকানন্দ

এখন বুঝতে পারলে কিরূপ অনাহারে থাকতে হয়? রম্ভা সাধুর জায় ঘুরে ঘুরে সমস্ত ভারতবর্ষে দেখলুম, লোকগুলো কি কষ্টে, কি অনাহারেই না আছে!” এই কথা বলিতে বলিতে স্বামীজীর ভাবান্তর উপস্থিত হইল, হাসিমুখ চলিয়া গিয়া মহা গম্ভীর হইয়া অশ্রুপূর্ণ-নেত্রে স্থির ভাবে বসিয়া রহিলেন।

একদিন স্বামীজীর একখানি সংস্কৃত পুস্তকের প্রয়োজন হইল। তিনি বলিলেন, “ভারতবর্ষের অনেক যায়গায় এই পুস্তকখানি খুঁজিয়াছি কিন্তু কোথাও পাই নাই।” ষ্টার্ডি ছ’ চার যায়গায় অনুসন্ধান করিয়া “ইণ্ডিয়া অফিস লাইব্রেরী” হইতে আনিয়া দিলেন। স্বামীজী পুস্তক পাইয়া বড় খুসী হইলেন। গুডউইন বর্তমান লেখককে বলিলেন, “টনি হচ্ছে ইণ্ডিয়া অফিসের লাইব্রেরীয়ান্।” বর্তমান লেখক বলিলেন, “টনি হচ্ছে কলিকাতার লোক, প্রেসিডেন্সি কলেজের প্রিন্সিপাল ছিলেন। স্বামীজী যখন প্রেসিডেন্সি কলেজে ফার্স্ট-ইয়ার ক্লাসে পড়েছিলেন, টনি তখন প্রিন্সিপাল ছিলেন।” গুডউইন বলিলেন, “টনি তাহলে স্বামীজীকে চেনে?” বর্তমান লেখক বলিলেন, “টনি কলিকাতায় বড় চাকরি করিত, তবে এখানে এত ছোট কাজ করে কেন?” গুডউইন বলিলেন—“লাইব্রেরীয়ানের খুব বড় চাকরী, এখন তিনি বই লেখবার অনেক সুবিধা পাবেন।”

একদিন সকালবেলা স্বামীজী বেশ প্রফুল্ল, সকলে ঘরে বসিয়া আছেন। স্বামীজী আমেরিকায় চীনের কথা নকল করিয়া বলিতে লাগিলেন, “Me melican chinaman, me eat polk, me eat blandy, me eat evely thing,” চীনের ‘র’ স্থানে ‘ল’ প্রয়োগ করে, সেইজন্ত brandy স্থানে blandy ও porkএর স্থানে polk উচ্চারণ করিয়া থাকে। স্বামীজী মুখভঙ্গী করিয়া নানাভাবে কৌতুক করিয়া সকলকে হাসাইতে লাগিলেন।

স্বামীজী ষ্টার্ডিস সহিত এক আইরিস্ চাবার গল্প বলিতে লাগিলেন, “দেখ, আমেরিকায় এক আইরিস চাবার গল্প শুনেছিলুম। এক আইরিস চাবা সে কখন পূর্বে গির্জায় যায় নাই বা যীশুর কোন কথা শুনে নাই। বৃদ্ধ হয়ে তার মনে হ’ল যে গির্জায় যেতে হবে। এক রবিবারে সে তো গির্জায় গেল। গির্জায় গিয়ে পাদ্রীর মুখে সে শুনিল যে ইহুদিরা প্রভু যীশুকে মারিয়াছে। এই শুনে তো সে রেগে টং হয়ে গির্জা থেকে বেরিয়ে এসে দেখে, যে তার স্মৃতি দিয়ে এক ইহুদি যাচ্ছে। সে ইহুদিকে দেখেই তো তাকে কিলোতে লাগল, আর ইহুদিটা ভাবাচাচাকা লেগে গিয়ে মার খেতে লাগল। অবশেষে ইহুদিটি চাবাকে জিজ্ঞাসা করিল, “তুমি আমার মারচ কেন?” চাবাটি বলিল, “তুমি আমার প্রভু যীশুকে মেরে ফেলেছ, সেইজন্ত আমি তোমায় প্রহার করছি।” ইহুদিটি সেই কথা শুনে তখন বলিল, “সে ব্যাপার তো ১৯০০ বৎসর পূর্বে হয়ে গেছে, এখন তার কি?” চাবাটি বলিল, “সে সব কথা আমি জানি না, This is the first time I heard it (অর্থাৎ এইমাত্র আমি প্রথম শুনিলাম) সেইজন্ত আমি ইহুদিদের সঙ্গে যুদ্ধ করব।”—স্বামীজী “This is the first time I heard it”—অতি হাস্য কোতুক করিয়া বলিতে লাগিলেন। গল্পটি শুনিয়া ষ্টার্ডি বলিলেন, “বোধ হয় চাবাটা জীবনে এই প্রথম দিন গির্জাতে গিয়াছিল।” গল্পটি শুনিয়া সকলেই হাসিতে লাগিল।

একদিন গুডউইন সারদানন্দ স্বামীর সহিত তাঁহার জীবনের কথা বলিতে লাগিলেন। ফ্রোয়েম গ্রামে তাঁহাদের বাস। মারকুইন্স অফ ব্যাণের প্রজা এবং তাহার বিধবা মা ও অবিবাহিতা গুডউইনের জীবন কথা দুই ভগ্নী আছে। তাহারা কোন রকম করিয়া নিজেরাই খেটে চালায় এবং গুডউইন কখন কিছু অর্থ পাইলে মাকে পাঠাইয়া দেন। গুডউইনের বয়স তখন ২৩২৪ বৎসর।



স্ট-হাণ্ড ( Short hand ) তিনি ভাল জানেন। কাজ এক জায়গায় পাওয়া যায় না, সেইজন্য কখন ইংলণ্ডে, কখন আমেরিকায়, কখন অষ্ট্রেলিয়ায় ঘুরিয়া বেড়াইয়াছিলেন। প্রত্যেক জায়গার গ্রাম্যভাষা বেশ শিখিয়াছেন। গুডউইন আমেরিকা ও অষ্ট্রেলিয়ার গ্রাম্যভাষা বলিতে লাগিলেন। বর্তমান লেখক বলিলেন “ভারতবর্ষে ইংরাজী ভাষা স্বতন্ত্র ধাঁজ নিচ্ছে।” গুডউইন বলিলেন, “ইংরাজী ভাষা একই বটে, কিন্তু অষ্ট্রেলিয়ার একটু পৃথক হইয়াছে, আমেরিকায় স্পষ্টই পৃথক দেখা যায়, ক্যানোডায়ও ঐরূপ হইয়াছে। তবে ভারতবর্ষে ইংরাজী ভাষা স্বতন্ত্র রূপ ধারণ কর্বে তার আর আশ্চর্য্য কি?” দেশের আনুসঙ্গিক নানা কারণে ভাষা কিঞ্চিৎ মাত্র বদলাইয়া যায়। গুডউইন অষ্ট্রেলিয়ার অনেক কথা বলিতে লাগিলেন তাহা সব বুঝা গেল না। আমেরিকারও অনেক কথা বলিতে লাগিলেন তাহাও নূতন নূতন ঠেকিতে লাগিল।

গুডউইন বলিলেন, “আমি অনেক দেশ ঘুরিয়াছি, শুধু ভারতবর্ষে বাই নাই। অষ্ট্রেলিয়ায় আসিবার সময় কলম্বো হয়ে এসেছি” এই বলিয়া সারদানন্দ স্বামীকে হর্ষিত হইয়া বলিতে লাগিলেন, “একবার অষ্ট্রেলিয়া হতে জাহাজে করে আসছি, জাহাজে কোন কাজ কর্ম নাই। দিনই বা কাটাই কি করে, রাতই বা কাটাই কি করে! কি আর করি, নাচতে শুরু করুম, অর্ধেক রাত্রি এই করে কাটালুম। দিনের বেলা তাস খেলে বাজী ধরে অনেক টাকা হেরে গেলুম। এই রকম করে তবে দিন রাত কাটাই।” এই কথা শুনিয়া সারদানন্দ স্বামী বর্তমান লেখককে বলিতে লাগিলেন, “গুডউইন স্বামীজীর ভক্ত হইলেও ওর ইংরাজী ভাবটা বড়ই প্রবল; ক্রিকেট, ফুটবল খেলা একটা বাতিক, জুয়াখেলা ওর একটা নেশা। ইংরাজদের যেগুলো দোষ ওর ভিতর সব গুলি রয়েছে।” গুডউইন সারদানন্দ স্বামীর কথা শুনিয়া বলিলেন, “আপনাদের ভাষায় বুঝি আমরা

নিন্দা কচ্ছেন ?” সারদানন্দ স্বামী বলিলেন, “না, তোমার জুয়াখেলার কথা বলছি।”

গুডউইন বলিতে লাগিলেন যে, একদিন এ্যাসন্ট এ্যাট্‌ আর্মস্‌ (Assault at arms) রাত্রে একদল ফোজ কেপ্তা দখল কর্কে আর একদল ফোজ কেপ্তা রক্ষা কর্কে। আমরা অনেকে ত দেখতে গেলুম। রাত্রে যখন ড্রাম বাজাবে, তখন লড়াই শুরু হবে। আমরা কল্পুম কি, বাজী রেখে তাস খেলা শুরু কল্পুম। আমি ত ক্রমেই হারতে লাগলুম। এক দুই তিন করে ৪০ পাউণ্ড হারলুম। ট্রেনে করে ফিরে আসবার একটা পয়সা পর্যাপ্ত নাই। একজনের কাছ থেকে ধার করে তবে ট্রেনের টিকিট কিনি। বাজী রেখে খেলা যেন আমার একটা নেশা, পকেটে টাকা থাকলে নিজেকে সামলাতে পারি না। তার পর রাত্রি দুটার সময় ড্রাম বাজল। সকলে ত তাস ছেড়ে লড়াই দেখতে গেলুম। আসল লড়াই যে রকম হয় সেই রকমই হতে লাগল।

স্বামীজী গুডউইনের জুয়া খেলার হেরে যাবার কথা পূর্বেই জানিতেন, সেইজন্ত বলিতেন, “ভুল করে তোর নাম রেখেছিল গুড্‌-উইন, তোর নাম হচ্ছে Bad-win।” গুডউইন ওমনি মাথা নেড়ে চোখ ঘুরিয়ে বলিতেন, “I am not Bad-win, but I am Good-win, Good-win।” স্বামীজী মুহূ হাসিয়া বলিতেন, “তুই হচ্ছিস জুয়ারে, তোর জুয়া খেলাই ধোয়।”

লগুনে রবিবারে অনেক স্ত্রীলোক হাইড পার্ক বাগানে চার্চ প্যারেড নামক স্থানে গিয়া সমবেত হয়। স্থানটিতে বড় বড় গাছ থাকায় একটু ছায়া আছে এবং অপেক্ষাকৃত উচ্চ; সেখানে অনেক চেয়ার পাতা আছে, ছ’একটি পেন্নি দিলে বসিতে দেয়। স্ত্রীলোকদিগের ভিতর অনেকেই অবিবাহিতা, প্রোঢ়া বা বৃদ্ধার সংখ্যা অতি অল্প। ইহারা সকলেই ভদ্রবরের স্ত্রীলোক; কে কি নূতন পোষাক পরিয়াছে, কে কি নূতন জুতা

লগুনে বিবেকানন্দ

বা অলঙ্কার পরিয়াছে, সাধারণকে দেখাইবার জন্ত এই স্থানটি বড় সুযোগ।  
স্ত্রীলোকেৱা চেয়ারে বসিয়া থাকে এবং অনতিদূরে পুরুষেরা ঘুরিয়া ঘুরিয়া  
তাহাদের দেখিয়া বেড়ায়। পুরুষদিগের ভিতর যাহাদের বিবাহ করিবার  
ইচ্ছা, তাহারা তাহাদের ভাবী পত্নী এই অবিবাহিতা স্ত্রীলোকদিগের ভিতর  
হইতে পছন্দ করিয়া লয় এবং পরে কথাবার্তা কহিয়া বিবাহ হয়।  
পক্ষান্তরে, ইহাকে Marriage market বা বিবাহের হাট বলে। ভিন্ন  
ভিন্ন দেশে ভিন্ন ভিন্ন আচার ব্যবহার, সেজন্ত তাহাদের বিষয় মন্তব্য  
প্রকাশ করা উচিত নয়।

মিস্ মূলার সারদানন্দ স্বামীকে সঙ্গে লইয়া একদিন চার্চ প্যারেড  
( Church parade ) দেখিতে যান। সারদানন্দ স্বামী তখন নূতন  
লগুনে গিয়াছেন তাঁহার নিকট সবই আশ্চর্য্যবৎ। তিনি ফিরিয়া আসিয়া  
গল্প করিতে লাগিলেন যে, একটি স্ত্রীলোক এক জোড়া নূতন জুতা  
পরিয়াছে, জুতাটি পায়ের চেয়ে ছোট—পায়ে বিস্তর কষ্ট হইতেছে,  
কিন্তু জুতাটি ভাল, পাঁচজনকে দেখাইতে হইবে, সেইজন্ত কষ্ট স্বীকার  
করিয়াও জুতাটি পায়ে দিয়া রাখিয়াছে। চলিবার সময় অতি কষ্টে খুঁড়িয়া  
খুঁড়িয়া হাঁটিতেছে, তবু কিন্তু তাহার সেই জুতাটি পরা চাই, ইত্যাদি  
কথা নানা রকম ব্যঙ্গ করিয়া বলিতে লাগিলেন।

একদিন বেলা ৩টা ৩০টার সময় স্বামীজী বলিতে লাগিলেন যে,  
আমেরিকায় এক দম্পতী ছিল, উভয়ে চিত্রকর, দেখিতে বেঁটে বেঁটে

আমেরিকার  
চিত্রকরের কথা।  
গোল গোল শরীর। ছুটিতে বন্ধুভাবে ছবি আঁকিয়া  
বেড়াইত। তাহারা স্বামীজীকে বড় ভক্তি করিত

ও মাঝে মাঝে বাইক্ করিয়া আসিয়া তাহাদের  
যন্ত্রপাতি লইয়া উভয়ে স্বামীজীর দুই ধারে বসিত। স্বামীজী মাঝখানে  
বসিয়া থাকিতেন, আর তাহারা দু'জনায় স্বামীজীর ছবি আঁকিতে

শুরু করিত। দু'জন্য জিৎ হইত যে কে কাহার চাইতে ছবি হবহ তুলিতে পারে এবং সেইরূপ ব্যগ্রভাবে দু'জন্য ছবি আঁকিতে চেষ্টা করিত। স্বামীজী মাঝখানে আড়ষ্ট ভাবে বসিয়া রহিলেন, আর তাহারা দু'জনে ছবি তুলিতে লাগিল। তাহাদের ছবি তোলার চেয়ে পরস্পরের প্রাধাতের ইচ্ছাটাই বড় আনন্দ লাগিত। এই গল্পটি বলিতে বলিতে স্বামীজী খুব হাসিতেন।

একদিন কাপ-বোর্ডের উপর পাত্র করিয়া একটু আম-তেল রয়েছে। গুডউইন আমের আচার একটু মুখে দিয়া মুখ বিকৃত করিয়া বলিয়া উঠিলেন “What a nasty stuff!” যথার্থই তাঁহার কষ্ট হইয়াছিল। স্বামীজীর আমেরিকায় অবস্থান কালে, কলিকাতা হইতে সান্যাল মহাশয় আচার, আম-তেল, ডাল, বড়ি প্রভৃতি পাঁচ রকম জিনিস স্বামীজীকে পাঠাইয়া দেন। স্বামীজী তাঁহার প্রিয় জিনিসগুলি অতি সন্তুর্পণে সঞ্চে করিয়া বেড়াইতেন এবং যখন রান্না করিবার ইচ্ছা হইত তখন পাঁচ রকম মসলা দিয়া কিছু তরকারী রাঁধিতেন ও গুডউইনকে একটু আধটু খাইতে দিতেন। গুডউইন তো ঝাল ও হিং দেওয়া বড়ি খাইয়া একেবারে মুখ বিটকেল করিয়া উঠিতেন ও মহা রাগিয়া বলিতেন, এইরূপ বদ-গন্ধওয়ালা জিনিস ভারতের লোকেরা খায়! বড়ির হিংএর গন্ধে তাঁহার বড় কষ্ট হইত। জিনিসগুলির বাঙ্গালা নাম শুনিয়া গুডউইন বিকৃত শব্দ উচ্চারণ করিয়া ব্যঙ্গ করিয়া নানা ভাবে নামগুলি বলিতে লাগিলেন। গুডউইন বড় নকুলে ছিলেন সেইজন্ত নানাভাবে ব্যঙ্গ করিয়া সকলকে হাসাইতে লাগিলেন।

এপ্রিল বা মে মাস, তখন একটু একটু সকাল বেলা ঠাণ্ডা আছে। বর্তমান লেখক নূতন গিয়াছেন ঠাণ্ডা সহ করিবার তত অভ্যাস নাই, সেইজন্ত চেয়ারে বসিবার সময় দুই পকেটে দুই হাত দিয়া রাখিয়াছিলেন

## লগুনে বিবেকানন্দ

এবং বৃদ্ধা মিস্ মূলার ঘরে ঢুকিবার সময় তাঁহাকে সম্ভাষণ করেন নাই। বর্তমান লেখক তখন নবাগত ব্যক্তি, বিদেশী আচার ব্যবহার শিখেন নাই। অনাদৃত হইয়াছেন, এইজন্ত মিস্ মূলার মহা চটিয়া যাইয়া গজ্-গজ্ করিয়া বকিতে লাগিলেন। স্বামীজী ব্যাপারটা বুঝিতে পারিয়া বর্তমান লেখক বলিলেন যে, ঘরের ভিতর বসিয়া থাকিবার সময়, বিশেষতঃ স্ত্রীলোক উপস্থিত থাকিলে ইজেরের পকেটে হাত দিয়া বসিতে নাই, ইহাকে এদেশে অসভ্যতা বলে; হাত ছুটি হাঁটুর উপর বা অন্ত কোন ভাবে রাখিতে হয়, বুকো হাত রাখিতে নাই। মিস্ মূলার খিটখিটে, সে যখন ঘরে আসিবে তখন দাড়াইয়া উঠিয়া সম্বোধন করিও এবং কেমন আছেন এইরূপ ছ'একটি কথা বলিও, যাহাতে বৃদ্ধা না রাগ করে।

লগুনে ঝি বা চাকর দরজা খুলিয়া দিলে বা অপরিচিত লোকের সহিত সাক্ষাৎ হইলে একটা কথা কহিতে হয়। কিছু কথা না পাইলে “Oh it is a glorious day! Oh it is a fine day!” ইত্যাদি জল বাতাসের কথা বলিতে হয়। ইংলণ্ডে রোজ উঠিলে লোকেরা বড় আনন্দ করে, কারণ দেশটা মেঘলা কুয়াসা ও বৃষ্টির দেশ। রোজ উঠা বড় আনন্দের জিনিস। মেঘলা কুয়াসা হইলে বলিতে হয় “It is a nasty day, it is a beastly day!” যদি খুব স্পষ্ট রোজ হয় তাহলে বলিতে হয় “Awfully fine day.” লগুনে ‘ভাল’ এই ভাবটি প্রকাশ করিতে হইলে ‘awfully’ বলিয়া আরম্ভ করে।

লগুনে বাড়ীর সদর দরজা সব সময় বন্ধ থাকে। সদর দরজার বাহির দিকে একটা পিতলের বাহারি করা দাণ্ডার মত থাকে, সেটাকে knocker বলে এবং কপাটের গায়ে একখানা পিতলের পাত থাকে। আগন্তুক ব্যক্তি আসিয়া সেই নকার দেওয়া পিতলের পাতের উপর

তিনবার ঠুকিলে, ভিতর হইতে ঝি বা চাকর আসিয়া দরজা খুলিয়া দিয়া তু একটি জল বাতাসের কথা কহিয়া ভিতরে বসিবার ঘরে লইয়া যায়। আওয়াজ করিবার একটি নিয়ম পদ্ধতি আছে। একবার টোকা মারিলে বুঝিতে হইবে, ফেরিওয়াল। জিনিস পত্তর বিক্রী করিতে আসিয়াছে, দুইবার টোকা মারিলে ডাক পিয়ন, তিনবার টোকা মারিলে কোন ভদ্রলোক দেখা করিতে আসিয়াছে, এইরূপ অর্থ হয়। যতদূর স্মরণ হইতেছে, টোকা মারার বোধ হয় এইরূপ পদ্ধতিই হইবে।

হাতের ছড়ি বা ছাতি—বাহিরে একটা নল থাকে, অনেকটা ড্রেনের পাইপের মত—তাহার ভিতর রাখিতে হয়, এদিক ওদিক রাখিতে নাই। টুপি ও ক্লোক খুলিয়া দরজার সম্মুখের গলির দেওয়ালের গায়ে আলনা বা হকের গায়ে টাঙ্গাইয়া রাখিতে হয়। রাস্তায় বেড়াইলে জুতায় কাদা খুলা লাগিয়া থাকে, এজন্ত বাহির দরজার ধাপেতে তারের জালতিওয়ালা আসনের মত বা লোহার পাত দেওয়া একটা চৌকা রকমের জিনিস থাকে তাহাতে জুতার ধারগুলি ও পা বেশ পুঁছিয়া তবে সদর দরজার গলিতে ঢুকিতে হয়, কারণ তাহা না হইলে মেঝের পাতা-গালিচার উপর দাগ পড়ে। ভারতবাসীরা প্রথম বাইলে, এইরূপ আদব কায়দা শিক্ষা করিতে বড়ই বিব্রত হইয়া পড়ে।

ঝি চাকরকে ডাকিতে হইলে চীৎকার করিয়া ডাকা উচিত নয়। প্রত্যেক ঘরেই একটা করে হাতল আছে সেই হাতলওয়ালাটার সহিত তার দিয়া রান্নাঘরে যোগ আছে এবং পাঁচ দেওয়া স্ত্রীংএতে একটি ঘণ্টা আছে। ঘর হিসাবে ঘণ্টায় নম্বর দেওয়া আছে। হাতলটি নাড়াইলে সেই ঘরের নম্বর অনুযায়ী রান্নাঘরের ঘণ্টাটি বাজে, তাহা হইলে ঝি চাকর ঠিক ঘরে আসিয়া হাজির হয়। তবে কোন কোন বাড়ীতে তখন ইলেকট্রিক বেল প্রচলিত হইতেছিল। এই সকল প্রথা হইল ভাল গৃহস্থ

## লগুনে বিবেকানন্দ

বা বড় লোকের বাড়ীর, গরীবের বাড়ীতে এত আদব কায়দা নাই। গরীব—গরীব, তাহার কাছে এত নিয়ম নাই।

নূতন যে সব পাড়াতে বাড়ী হইতেছে, সেখানে বাড়ীর সম্মুখে একটা বাগান আছে। বাগানের ফটকের গায়ে একটা bottom বা একটা কড়া থাকে। সেই কড়া ধরিয়া টানিলে ভিতরকার ঘণ্টা বাজিয়া উঠে এবং সদর দরজা খুলিয়া দেয়। এই সকল ব্যাপার হইতেছে ভিন্ন ভিন্ন পাড়ার ভিন্ন ভিন্ন প্রথা, তবে মোটামুটি কিছু বলা হইল। স্বামীজী আচার পদ্ধতির উপর বিশেষ দৃষ্টি রাখিতেন, কোন বিশেষ তিনি খুঁত রাখিতেন না, সেইজন্ত তাঁহার আদব কায়দাতে সকলে বড় খুসী হইত।

একদিন স্বামীজী ডাকিলে বর্তমান লেখক তাড়াতাড়ি করিয়া নীচেকার ঘরে আসিলেন এবং কাপবোর্ডে ঠেসান দিয়া দাঁড়াইয়া রহিলেন। তখন বেলা পাঁচটা হইবে। বর্তমান লেখক বাহির হইতে বেড়াইয়া আসিয়াছিলেন এবং তখন মুখ ধুইবার চেষ্টা করিতেছিলেন, সেইজন্ত টাই (tie) খুলিতেছিলেন। গলার কলারটা চার পাঁচ দিন ধরিয়া বদলান নাই। স্বামীজী বর্তমান লেখককে দেখিয়াই বলিলেন যে, টাই খুলিয়া বসিবার ঘরে ঢুকিতে নাই। গলার কলারটা ময়লা হইয়া গিয়াছে, সপ্তাহে দুইবার করিয়া বদলাইবে। বর্তমান লেখক তখনই টাই পরিয়া আসিলেন কিন্তু তখন কলারটা বদলান হইল না। ভারতবর্ষে একমাসে যাহারা কাপড় বদলায় এবং যাদের কাপড়ে কোন ইত্তিরি করায় না, তাহাদের পক্ষে অমন ইত্তিরি-করা কলার সপ্তাহে একবার করিয়া বদলান বড়ই সৌখীন জিনিস! দুইবার বদলান লগুনের ভদ্র-আনা! লগুনে একটা প্রবাদ আছে “without collar and tie, a man is not fit to die.”

স্বামীজী হাতের কপ্ গলার কলার খোলা রাখিতেন, পিরানের সহিত সেলাই করা নয়। এই জন্ত হাতের কপ্টা প্রথমদিন একদিকে পরিতেন, দ্বিতীয় দিন ঘুরিয়ে পরিতেন কিন্তু তৃতীয়দিন আর সে জিনিস ব্যবহার করিতেন না। গলার কলারটা সপ্তাহে দুই তিনবার বদলাইতেন। কিন্তু কোন স্থানে বাইতে হইলে ধোপদস্ত টাটকা ইস্তিরি করা পোষাক পরিয়া যাইতেন। আদেবকেতা পরিস্কার পরিচ্ছন্নতা বিষয়ে স্বামীজী বিশেষ লক্ষ্য রাখিতেন, এইজন্ত আমেরিকাতে অনেকে বলিয়াছিল যে, সন্ন্যাসী হইয়া পথে পথে ঘুরিয়া বেড়ায় বটে, কিন্তু বড় ঘরের ছেলে—আদবকায়দা কিছুই ভুলে নাই। আদবকায়দায় নিপুণ, এটা যেন তাঁহার স্বভাবসিদ্ধ ছিল।

দাড়ী গোঁফ তিনি নিত্য কামাইতেন এবং সন্ধ্যার সময় যদি কাহারও বাড়ী নিমন্ত্রণ খাইতে যাইতে হইত, তাহলে তিনি অনেক সময় দাড়ী গোঁফ কামাইয়া সাবান দিয়া মুখ ধুইয়া, চুলটা খুব আঁচড়াইয়া টেরি কাটিয়া কলার সার্ট বদলাইয়া তবে যাইতেন। জুতাটি ব্রাস্ হইল কি না সে বিষয়েও তিনি নজর রাখিতেন।

লগুনে রোজ জুতা ব্রাস্ করিতে হয়। রাস্তায় যদি কাদা লাগে তা হলে আবার তখনি ব্রাস্ (brush) করিয়া লইতে হয়। এইরূপ প্রত্যেক দিন দুইবার তিনবার ব্রাস্ করিতে হয়। ব্রাউন জুতা হইলে ব্রাউন পালিশ মাখাইতে হয়। একবার সারদানন্দ স্বামী গুডউইনের সহিত কথা কহিতে কহিতে বলিয়া ফেলিয়াছিলেন white boot। গুডউইন ত এদিক ওদিক খুঁজিতে লাগিলেন, সেই দেখে সারদানন্দ স্বামী বলিলেন, brown boot। তখন গুডউইন সারদানন্দ স্বামীকে বলিলেন “Oh you devil, you can’t distinguish white and brown!” সারদানন্দ স্বামী ত সেই শুনিয়া অপ্রতিভ হইয়া রহিলেন ও গুডউইন



লগনে বিবেকানন্দ

হাসিতে লাগিলেন। Dey and Martinএর জুতার কাল কালী সেই সময় খুব বিখ্যাত ছিল। কলিকাতায়ও তাহার খুব চলিত হইয়াছিল।

অনেক বাড়ীতে রাত্রিতে শুইবার সময় বুট জুতাটি চাতালে রাখিয়া শুইতে হয়। ঝি সকালবেলা একটা নলওয়ালা হাতলযুক্ত টিনের টব করিয়া গরম জল রাখিয়া বায় এবং জুতা জোড়াটি ত্রাস করিয়া যার যার জায়গায় ঘরের দরজায় রাখিয়া যায়। অনেক জায়গায় জুতায় ত্রাস করা ঝিদের কাজ।

রাস্তার মোড়ে মোড়ে জুতা ত্রাসওয়ালা আছে, তাহাদের দৃষ্টি কেবল লোকের পায়ের জুতার দিকে। কাহার জুতাটি একটু কাদা লাগিয়াছে সে ঠিক দেখিতে পাইয়াছে, আর শিস্ দিয়া গান করিতে লাগিল—Shine your boot. ভদ্রলোক যাইলে একটা কাঠের বাস্তের উপর পা রাখে আর মুচির ছেলেটা হাঁটু গেড়ে বসিয়া ইজেরের পায়ের দিকটা গুটাইয়া দিয়া তার কালী জুতায় মাখাইয়া ছই হাতে ছুটি ত্রাস লইয়া ঘসিতে থাকে। খুব চক্চকে হইয়া উঠিলে তাহার পর পুনরায় ইজেরটা নামাইয়া দিয়া, আর একখানি ত্রাস দিয়া ইজেরটা পরিষ্কার করিয়া দেয়।

ফ্রান্সে ও তাহার উপনিবেশে যে যে সহর দেখা গিয়াছে, তথায় জুতা ত্রাসের অল্প প্রকার প্রথা আছে। খুব উঁচু পাওয়ালা মথমলের গদি দেওয়া একটা চেয়ার থাকে, ভদ্রলোক গিয়া আরাম করিয়া সেই চেয়ারে বসিয়া পা দুটি একটা বাস্ত'র উপর রাখিয়া দেয়, আর তাহার জুতা ত্রাস করিয়া দেয়। লগনে রাস্তায় জুতা ত্রাস করিতে তখন ছই পেনী লাগিত। পেনীগুলি দেখিতে আগেকার ডবল পয়সার মত, আধপেনী এখানকার পয়সার মত, সিকি পেনী বা ফার্ডিং এখানকার আধলার মত।

একদিন সকালবেলা নীচেকার ঘরে সকলে বসিয়া আছে, স্বামীজী আমেরিকার কথা তুলিলেন। আমেরিকায় এমন সহর নাই যেখানকার

২০।৩০ হাজার লোক তাঁহাকে চিনে না। অনেকের সঙ্গে ঘনিষ্ঠ সম্পর্কও হইয়াছে। অনেক চেলোও জুটিল, কিন্তু সেগুলো হইল চেলো কাঠ, সব চলিয়া গেল। শুধু একটা গুডউইন রয়েছে, দেখছি ওটা না খয়ে দেয়ে পড়ে আছে। তবে আমেরিকান ও ইংরাজদিগের ভিতর তফাৎ আছে। দেখছি, আমেরিকানগুলো বড় হজুকে আর ইংরাজগুলো এখন ভিড়তে চায় না, কিন্তু এরা দেড়ে পিপড়ের মত কামড়াইয়া থাকে। তাহার পর স্বামীজী অন্ত কথ্য বলিতে লাগিলেন।

একদিন প্রাতর্ভোজনের পর স্বামীজী তাঁহার চেয়ারখামিতে বসিয়া আছেন। নানাপ্রকার কথাবার্তা হইবার পর স্বামীজী তাঁহার নিজের দেশের কথা

কথ্য তুলিলেন। স্বামীজী সারদানন্দ স্বামীকে বলিলেন, “দেখলি ত আমি সব পথ চেষ্টা করেছি; মাষ্টারী করবার চেষ্টা করেছি, ওকালতী করবার চেষ্টা করেছি, দেখলুম সব পথ বন্ধ। তারপর এই পথটা দেখলুম। এই পথটা আমার খুলে গেল, এতেই success হ’ল। মানুষকে সব পথ চেষ্টা করতে হয়, তাহলে একটা পথ খুলে যাবে, তাতেই তা’র সফল হবে।” তারপর পুনরায় দেশের কথা উঠিল। “হাঁ রে, দেশের লোকগুলো এত শীঘ্র শীঘ্র মরে যায় কেন? বা’র কথা জিজ্ঞাসা করি খবর নেই, সে মারা গেছে। জাতটা কি মরে লোপ পেয়ে যাবে না কি! আমেরিকাতে দেখতুম, ৮০।৯০ বৎসরের অনেক লোক ৬০ বৎসরকে প্রৌঢ়ের ভিতর ধরে। আমেরিকার লোক বহুকাল বাঁচে, ইংলণ্ডের লোকগুলোও দেখি খুব বাঁচে। কিন্তু ভারতবর্ষের লোকগুলি মরে যায়। তা’রা যে wretched (ছখ্‌চুটে) হয়, তাতে এত শীঘ্র মরে যায়। ওদের খাওয়াটা বদলে দেওয়া দরকার। আমেরিকাতে যখন ছিলুম, তখন কয় বৎসরের ভিতর কোন ব্যামো হয় নাই, সাগাণ্ড কয়দিন সর্দি কাশী হইতছিল। ঐ ভূতের মত পরিশ্রম করেছি, তাতে কিন্তু

## লগনে বিবেকানন্দ

শরীর খারাপ হয় নাই। জল বাতাস সে দেশের খুব ভাল, আর লোকগুলো কতকালই না বাঁচে, মরতে যেন চায় না। কি সাহস! কি উত্তম! লোকগুলো যেন চন্‌মন্‌ করে বেড়াচ্ছে, আর ভারতবর্ষের লোকগুলো নিব্বুম, যেন বসে বসে চলছে। ঐ যে বেদান্তের কথা আমি হেঁটে হেঁটে সমস্ত ভারতবর্ষের গায়ে গায়ে ঘুরে লোকদের বলেছিলুম, যদি তারা নেয় কিন্তু নেওয়া ত চুলোয় গেল, উণ্টে তা'রা আমায় বিদ্রূপ করতে লাগল। আমার মনে বড় লাগল। মনে করুম, একটা স্বাধীন দেশে গিয়ে এইটা বলব, স্বাধীন জাত না হলে এ ভাব নিতে পারবে না। তাই দেখলুম, চিকাগোতে একটা সভা হবে, আমি ত চোঁ চোঁ দৌড়ে চিকাগোতে হাজির হলুম। তারাই ত প্রথম বেদান্তের ভাবটা appreciate করলে, ভারতবর্ষ নিব্বুম, তারা নিলে না। স্বামীজী সেদিন এইরূপ আক্ষেপ করিয়া অনেক কথা বলিতে লাগিলেন।

রবিবার স্বামীজী ত্রাশনাল ওয়াটার পেটিং গ্যালারিতে বক্তৃতা দিয়া আসিয়াছেন। সোমবার প্রাতর্ভোজনের পর স্বামীজী ষ্টার্ডির সহিত

বেদান্তের কথা কহিতে লাগিলেন। স্বামীজীর মন খুব

প্রফুল্ল, তিনি বলিতে লাগিলেন, “এই বেদান্তের ভাব পুরাকালে হিন্দু ঋষিরা বাহির করেছিল। তাদের বুকটা তখন বড় ছিল, মনটা খুব উন্নত ছিল, সেজন্ত সকলের ভিতর ভাবটা ছড়িয়েছিল। কিন্তু জাতটা পরে যখন প’ড়ে গেল, তখন এটাকে পুঁটুলি বেঁধে কোণে ঠেলে রেখে দিলে—cooped it up in a corner। হল কি, কতকগুলো অল্পপয়স্ক লোকের হাতে জিনিসটা প’ড়ে অশ্রদ্ধেয় হয়ে গেল। এখন কিন্তু সেই বেদান্তের ভাবটাকে জগৎময় ছড়াতে হবে, Make it an universal property. ভিন্ন ভিন্ন ধর্ম নিজের সম্বোধনযোগী ভক্তির ভাব, ব্যক্তিগত জ্ঞান ও নিয়ম পদ্ধতি বলিয়া থাকে, কিন্তু তার ফিলসফিটা কেউ

বলে না। বেদান্ত সকল ধর্মের ফিলসফিটা বলে যায়, যা কোন ধর্ম বিশেষের অন্তর্ভূত নয়, এজন্য বেদান্ত universal religion ( সার্বজনীন ধর্ম ) হবে।” এই বলিয়া তিনি পায়েচারি করিতে লাগিলেন ও পাইপ টানিতে টানিতে উৎসাহিত হইয়া প্রায় বলিতে লাগিলেন Make it an universal property. কতকগুলো narrow-minded লোকের হাতে থাক্বে না।

গুডউইন ও মিস্ মূলারে একটু খিটিখিটি হইত, অর্থাৎ মিস্ মূলার গুডউইনকে তত পছন্দ করিত না। অত্ৰ কোন তেমন কারণ ছিল না,

গুডউইন ও মিস্  
মূলারের বিবাদ

তবে এক কারণ হইতে পারে যে, স্বামীজী গুডউইনকে বিশেষ ভালবাসিতেন এবং সকল কাজেই গুডউইনকে ডাকিতেন। গুডউইন একদিন স্বামীজীকে বলিলেন

“স্বামীজী, এখানে থাকা তত সুবিধা হচ্ছে না, পার্শ্বের কোন স্থানে বাস করে’ এখানে কাজ ক’রে গেলেই হবে।” স্বামীজী শুনিয়া সমস্ত কথা বুঝিতে পারিলেন এবং বড় চ্ঃখিত হইয়া বলিতে লাগিলেন, “সেই রকম করলেই কি হবে! চব্বিশ ঘণ্টা দরকার আছে, কাছে না থাকলেই বা কি করে হবে?” গুডউইন বলিলেন, “আর কি করা যায়, যখন এদের সঙ্গে সুবিধা হচ্ছে না; পেটে ত খেতে হবে, তখন অত্ৰ যায়গায় কাজ ক’রে কিছু রোজগার হবে, তাতেই নিজের এক রকম চালিয়ে নেওয়া যাবে। আর বহুতার সময় এখানে এসে নোট নেওয়া যাবে।” স্বামীজী এই সকল কথা শুনিয়া চুপ করিয়া রহিলেন, কোন কথাই আর বলিলেন না, শুধু মাঝে মাঝে গুডউইনের দিকে চাহিতে লাগিলেন। তাহার পর স্বামীজী চলিয়া বাইবার পরে, গুডউইন মিস্ মূলারের উপর একটু আক্রোশ প্রকাশ করিলেন, “She is not an English, she is a Chillian woman” ইত্যাদি নানা কথা বলিতে লাগিলেন। মিস্ মূলারের বাপ

## লগুনে বিবেকানন্দ

জার্মান ছিলেন, দক্ষিণ আমেরিকার চিলি দেশে গিয়া কাঠের জাহাজের ব্যবসা করিয়া খুব ধনবান হন। পরে কারবারটা বেচিয়া দিয়া নগদ টাকা করিয়া ইংলণ্ডে আসিয়া বাস করেন ও ছেলে মেয়েদের ভিতর টাকা ভাগ করিয়া দেন। এই জন্ত গুডউইন চটিয়া গেলে, মিস্ মুলারকে Chillian woman ( চিলি দেশের মেয়ে ) বলিতেন।

একদিন গুডউইন, সারদানন্দ স্বামী ও বর্তমান লেখক তিনজনে বেড়াইতে গিয়াছিলেন। গুডউইন সেন্ট্ জেম্‌স্‌ প্যালেসের ( পুরাতন রাজবাড়ীর ) নিকট দিয়া যাইবার সময় বলিতে লাগিলেন যে পূর্বকালে রাজারা এই বাড়ীতে বাস করিতেন। সারদানন্দ স্বামী বলিলেন, “বাড়ীটা নিতান্ত ছোট, সেকালে রাজারা কিরূপে থাকিতেন?” গুডউইন বলিলেন, “না, ভিতরে খুব বড় বড় ঘর আছে।” তাহার পর চলিবার সময় গুডউইন ও বর্তমান লেখক এক মাপে পা ফেলিয়া চলিতে লাগিলেন কিন্তু সারদানন্দ স্বামী মোটা মানুষ, পা হেলিয়া ছলিয়া ফেলিতেছিলেন, কখন আগে বা কখন পেছনে ফেলিতেছিলেন। গুডউইন যাহাতে তিনজনের পা সমান সমান পড়ে সেই জন্ত এগিয়ে পেছিয়ে গিয়া গুধরে নিচ্ছিলেন। বর্তমান লেখক এ প্রথাটা জানিতেন, সেইজন্ত সমান পা ফেলিয়া চলিতেছিলেন। গুডউইন কয়বার যদিও পা ফেলিয়া গুধরাইয়া লইলেন, কিন্তু সারদানন্দ স্বামী সে বিষয়ে কিছু লক্ষ্য না করিয়া হেলিয়া ছলিয়া নিজে চলিতে চলিতে এদিক্ ওদিক্ মাথা ঘুরাইতে লাগিলেন। গুডউইন তখন স্পষ্ট বলিলেন “স্বামী, এদেশে রাস্তায় চলবার সময় সকলে সমান পা ফেলে চলে, এদিক ওদিক করা, আগে পেছু করা ঠিক নয়।” সেই কথা শুনিয়া সারদানন্দ স্বামী অপ্রতিভ হইয়া পায়ের দিকে দৃষ্টি রাখিয়া একসঙ্গে পা ফেলিয়া চলিতে লাগিলেন। তাহার পর মৃদুস্বরে বর্তমান লেখককে বলিতে লাগিলেন, “বাবা, এ যে ড্রিল প্যারেড, রাস্তায় চলবার

সময় যে আদব কায়দা!” রাস্তায় চলবার সময় সকলে একসঙ্গে পা ফেলিয়া যাইবার সময় ভাব হইতেছে, বোধ হয় সকলেই সমান, কেহ কাহারও তাঁবেদার নয়। যাহা হউক, এই রকম চলাটা দেখিতে বড় ভাল হয়।

সারদানন্দ স্বামী ত বাড়ীতে আসিয়া মাথার টুপিটা প্যাসেজের ত্বেকে এবং ছড়িটা বগাস্থানে রাখিয়া দিলেন। গুডউইন ও বর্তমান লেখক সেইরূপ করিলেন। গুডউইন ও সারদানন্দ স্বামী ঘরে চেয়ারে বসিয়া বিক্রম প্রকাশ করিতে লাগিলেন। সারদানন্দ স্বামী বলিলেন, “বাবা এদেশে কি আবার আস্তে আছে, সব সময় তাদের কায়দা কেতা! ছুরি কাটা চাম্চে ধরবার আদব-কেতা, নাক ঝাড়বার আদব কেতা, রাস্তায় চলবার আদব কেতা, এ সে দেখছি আদব-কেতায় মেরে ফেলবে! আরে আমি সন্ন্যাসী মানুষ, যেখানে সেখানে থাকব, নিজের ইচ্ছামত চলা ফেরা করব, এ তা নয়, আটেকাটে মারছে। নরেনের কাছে এসে প্রাণটা গেল, ছেড়ে দেয় তো একেবারে চোঁ চোঁ দৌড় মেরে পালাই” এই বলিয়া মৃদু মৃদু হাসিতে লাগিলেন।

পূর্বেই কথিত হইয়াছে যে স্বামীজী বর্তমান লেখকের জীবীকেশের ম্যালেরিয়া জ্বর নিজের শক্তি সঞ্চার করিয়া আরাম করিয়া দিয়াছিলেন, কিন্তু পেটের অজীর্ণ রোগ তখনও তাঁহার ছিল। স্বামীজী একদিন প্রাতে তাঁহার বাগ্ন খুলিয়া ছোট মোটা শিশি আনিলেন ও বর্তমান লেখককে বলিলেন, “প্রাতর্ভোজনের পর এই carlsabad salt একটা চায়ের বাটিতে গরম জল দিয়ে এক চাম্চে বা দুই চাম্চে খাবে, তা হলে পেটটা খুব পরিষ্কার হয়ে যাবে। এই ঔষধে আহার বন্ধ করবার দরকার নাই।” এই বলিয়া তিনি পুনরায় বলিতে লাগিলেন, “হাঙ্গারি বা অষ্ট্রিয়া অঞ্চলে Carlsabad নামক একটা ছোট নগর আছে। সেইখানে ধাতু-জলের

## লণ্ডনে বিবেকানন্দ

উৎস আছে এবং সেখানে ভাল ভাল হোটেল আছে। উৎসের চতুর্দিকে বেশ বাগান করা জমী আছে, সেখানে বাজনা বাজান হয়। সেই বাগানের ভিতর ভাল ভাল পায়খানাও আছে। ইউরোপের যত পেট রোগা বড় মানুষগুলো সেখানে যায়, গেলাসে করে টাটকা জল ফোয়ারা থেকে তুলে খায়, আর Band বাজে তা'র কাছে ঘুরে ঘুরে বাজনা শুনে বেড়ায়। খানিকটা পরেই বাহের বেগ আসে আর পায়খানা গেলে খুব পেট পরিষ্কার হয়ে যায়! আর ক্ষুধা লাগে, হোটলে গিয়ে বারে বারে খায়। এইরূপে ইউরোপের পেট রোগা লোকগুলো সেখানে গিয়ে মাসখানেক থেকে শরীরটা সুস্থ হয়ে আসে। সেই জলটাকে কোন রকম করে শুকিয়ে এই নুন করেছে, সেইজন্তু একে carlsbad salt বলে”—এই বলিয়া বর্তমান লেখককে শিশিটা দিয়া দিলেন এবং বর্তমান লেখকও সেইদিন থেকে খাইতে লাগিলেন।

একদিন প্রাতের খবরের কাগজে একটা খবর বাহির হইল যে, একজন চীনা যুবক লণ্ডনে আসিয়াছিল এবং চীনের রাজদূত তাহাকে ভুলাইয়া আপন বাটীতে লইয়া গিয়াছিল। তথায় চীনা যুবকের বিপদ তাহাকে মারিয়া ফেলিবার উপক্রম করিয়াছে বা বন্দী ভাবে জাহাজে করিয়া চীন দেশে পাঠাইয়া দিবার চেষ্টা করিতেছে। সেই খবর পড়িয়া স্বামীজী গুডউইনকে বলিলেন, “কি গুডউইন, তোদের. ত free country ( স্বাধীন দেশ ) না? সকলের সমান liberty? ( স্বাধীন ভাব ) এখন right of hospitality কোথায়? এই ত একটা গরীব চীনে ছোঁড়াকে লণ্ডন সহরে ঘেরে ফেলবে বা অত্যাচার করছে, তোদের national idea of liberty কোথায়?” গুডউইন ত দাঁড়াইয়া উঠিয়া, হাত নাড়িয়া, পা ঠুকিয়া, লম্বন্ধম্প করিয়া মহাগরম হইয়া বলিতে লাগিলেন, “ইংলণ্ডে এরূপ অত্যাচার! যে কোন লোক ইংলণ্ডের জমিতে

পা দিলে সেই মুহূর্ত থেকে স্বাধীন হয়। চীন রাজদূতের কি অশ্রায়! সে জানে না যে এটা ইংলণ্ড? রুশিয়ার নিহিলিষ্ট, অ্যানার্কিষ্ট বা অনেক প্রকার রাজদ্রোহীরা ইংলণ্ডে স্বাধীনভাবে বাস করিতেছে। তাহাদের সভা সমিতি, সংবাদপত্র প্রভৃতি স্বাধীন ভাবে চালাচ্ছে; কাহারও বলিবার কিছু নাই। আর চীন রাজদূত এইরূপ করিয়া চীনে ছেলেটাকে আটক করিল।” এইরূপ নানা কথা বলিতে বলিতে গুডউইন অগ্নিশর্মা হইয়া উঠিলেন। ষ্টার্ডি বলিতে লাগিলেন, “এতে যদি চীনের সঙ্গে লড়াই করিতে হয়, তাতেও আমরা রাজী। আমি নিজে সিপাই হয়ে যাব। এটা ইংলণ্ডের বন্দনাম।” খবরের কাগজ সেই বিষয় লইয়া দুই ঘণ্টা অন্তর বাহির হইতে লাগিল। সন্সবেরি তখন প্রধান মন্ত্রী, তিনি চীন রাজদূতের বাড়ীতে সিপাই ঘেরোয়া করাইয়া দিলেন এবং প্রত্যেক বন্দরের প্রত্যেক জাহাজে পুলিশ দাঁড় করাইয়া দিলেন যাহাতে চীন যুবককে ইংলণ্ডের বাহিরে না লইয়া যাইতে পারে। এবং সেই সঙ্গে চীন রাজদূতকে পত্র লিখিয়া দিলেন যে কয়েক ঘণ্টার ভিতর সে যেন চীন যুবককে স্বয়ং সঙ্গে লইয়া প্রধান মন্ত্রীর নিকট দিয়া যায়। গুডউইন ত সেদিন মতা গরম, ক্রমাগত ঐ কথাই বলিতে লাগিলেন, কোন কাজকর্ম আর সেদিন করিলেন না। মাঝে মাঝে খবরের কাগজ কিনিয়া আনিতে লাগিলেন। স্বামীজীর মুখ অতি বিষন্ন, ভিতরে যেন মহাচিন্তিত হইয়া পড়িয়াছেন, মাঝে মাঝে একটি আধটি কথা কহিতেছেন যে, প্রবল লোকেরা গরীবের উপর এইরূপ অত্যাচার করে। স্বামীজী অতি বিষন্ন হইয়া শোকার্তভাবে গম্ভীর হইয়া বসিয়া রহিলেন। কেহ আর তাঁহার সহিত কথা কহিতে সাহস করিল না। স্বামীজীর সমস্ত মনোভাব ভাষায় না হউক মুখ দিয়া প্রকাশ পাইতে লাগিল। বেলা ২টা ৩টার সময় খবর বাহির হইল যে, চীন যুবককে মুক্ত করিয়া দেওয়া হইয়াছে। গুডউইন তাড়াতাড়ি আসিয়া



## লগনে বিবেকানন্দ

উত্তেজিত উল্লসিত ভাবে স্বামীজীকে খবর দিলেন। স্বামীজী খবর শুনিয়া যদিও মূহু হাসিলেন, কিন্তু পরক্ষণেই সেই প্রকার শোকার্তভাবে বসিয়া রহিলেন।

বর্তমান লেখক ব্রিটিশ মিউজিয়মে গিয়াছেন। একটি নবাগত চীনযুবক সঙ্কুচিতভাবে এদিক ওদিক দেখিতেছেন এবং পড়িবার ঘরে প্রবেশ করিয়া কোথায় কি করিতে হয় না জানার জন্ত কুণ্ঠিত ভাবে একস্থানে দাঁড়াইয়া আছেন। বর্তমান লেখক কার্যাবশতঃ সেই চীন যুবকের পাশ দিয়া যাইতেছিলেন। তিনি যুবকটিকে দেখিয়া জিজ্ঞাসা করিলেন, “আপনি কোন দেশের লোক?” চীন যুবকটি বলিলেন যে তিনি চীন দেশের লোক। বর্তমান লেখক পুনরায় জিজ্ঞাসা করিলেন, “তুমি শান্‌ইয়াংসেনকে চেন?” যুবকটি আধ আধ ভাঙ্গা ইংরাজীতে উত্তর দিলেন “I am the kidnapped Chinese ( আমিই সেই চুরিকরা চীন যুবক )।” বর্তমান লেখকের সেই সময় অল্পবিস্তর শান্‌ইয়াংসেনের সহিত আলাপ হইয়াছিল। সেই যুবকই পরে চীনের বিখ্যাত লোক হইয়াছিলেন।

একদিন খবরের কাগজে বাহির হইল যে Mrs. Dyre নামক এক বৃদ্ধার বিচারে ফাঁসির হুকুম হইয়া গেল। সেই খবর পড়িয়া স্বামীজী

ষ্টার্ডিকে কোতুক করিয়া বলিতে লাগিলেন, “The  
মিসেস  
ডায়ারের কথা।  
Thames’ water is turned into baby’s soup”

অর্থাৎ টেম্‌স নদীর জলটা শিশুর মাংসের স্নায়ু হইয়াছে। ব্যাপারটা হইতেছে এই যে, ইংলণ্ডের বড় ঘরের অনেক অবিবাহিতা মেয়েদের সন্তান হয়। সেই সমস্ত স্ত্রীলোকেরা সন্তজাত শিশুটিকে মিসেস ডায়ারের হাতে লালন পালন করিতে দিত এবং তৎসঙ্গে কিছু অর্থও দিত। ডায়ার বুড়ী রেডিং নামক স্থানে বাস করিত। সে

সেই সমস্ত শিশুগুলিকে পরে গলা টিপিয়া মারিয়া টেম্‌স্‌ নদীতে ফেলিয়া দিত। এমন কত বৎসর ধরিয়া কত ছেলেকে সে নদীতে ফেলিয়া দিয়াছে। ১৮৬৬ সালে টেম্‌স্‌ নদীর জল শুকাইয়া যায়, তাহাতে অনেক ছোট ছেলের অস্থি বাহির হইয়া পড়ে। সেই অস্থির অনুসন্ধানের ফলে পুলিশ সেই বুড়ী মিসেস ডায়ারকে ধৃত করে ও মকদ্দমায় তাহার কাঁসি হয়। যাহা হউক, স্বামীজী খবরের কাগজে সমস্ত বিসয়টি পড়িয়া ষ্টার্ডিকে বলিতে লাগিলেন, “এ যে দেখছি সমাজটা পচে গেছে ; ঘরে ঘরে যে শিশুহত্যা হচ্ছে। জাতটার আগে ভিতর থেকে পচতে শুরু হয়, তারপর বাহিরে থেকে শত্রু এসে ধ্বংস করে। এ জাতটার এইরূপে যদি চলে, তাহলে জাতটা যে ধ্বংসের দিকে যাচ্ছে দেখছি। Social evil ( সামাজিক পাপ ) থেকে সব evil আসে।” ষ্টার্ডি বলিতে লাগিলেন, “স্বামীজী, ইংরাজ জাতটার সমাজের ভিতরটা পচে যাচ্ছে, ভোগবিলাসটা যেমন একদিকে বাড়ছে, তেমনি ভিতরে corruptionও বেড়ে যাচ্ছে। আর কি জানেন, এদেশে খুব ভাল খায়-দায়, খুব স্বখে স্বচ্ছন্দে থাকে, এতে human nature যা হয় তা’ত হবেই, এইজন্য এতে social evil হচ্ছে।” স্বামীজী সেদিন এই সব কথাতে ঘণার মুখ ধারণ করিয়া একটা বিরক্ত ও অবজ্ঞার ভাবে রহিলেন।

এই সময় মোক্ষমূলার লিখিত স্মবিখ্যাত Nineteenth Century নামক কাগজে “প্রকৃত মহাত্মা” নামক একটি প্রবন্ধ বাহির হয়। প্রবন্ধের কথাগুলি সব এক্ষণে স্মরণ নাই, কিন্তু শ্রীশ্রীরামকৃষ্ণদেবের বিষয় বেশ প্রশ্লাম ভক্তি করিয়া লেখা হইয়াছিল। এই প্রবন্ধটি পরিবর্দ্ধিত করিয়া ও স্বামী সারদানন্দ লিখিত ঠাকুরের জীবনী সংমিশ্রিত করিয়া, মোক্ষমূলর শ্রীশ্রীরামকৃষ্ণদেবের জীবনী নামক পুস্তক প্রকাশ করেন।

অল্পদিন পরেই প্রেসিডেন্সি কলেজের ভূতপূর্ব প্রিন্সিপাল টনি

লগুনে বিবেকানন্দ

শ্রীশ্রীরামকৃষ্ণদেবের বিষয় একটা প্যাম্ফ্লেট প্রচার করিয়াছিলেন। স্বামীজীর লগুনে বক্তৃতা করার ও বিশিষ্ট লোকদিগের সহিত মেলামেশা করার, ইংরাজ পণ্ডিতমণ্ডলীর ভিতর শ্রীশ্রীরামকৃষ্ণদেবের বিষয় একটু আলোচনা হইতে লাগিল। ১৯১৭ সালে কঙ্কালে বরিশালের সুবিখ্যাত অশ্বিনীকুমার দত্ত একদিন বর্তমান লেখককে বলিয়াছিলেন, যে তাঁহার পূর্বতন অধ্যাপক টনির সহিত সর্বদাই চিঠি পত্র লেখালিখি আছে। এক পত্রে অধ্যাপক টনি লিখিয়াছিলেন যে, তিনি “শ্রীম” লিখিত শ্রীশ্রীরামকৃষ্ণ কথামৃত বাঙ্গালায় পাঠ করিতেছেন কিন্তু ভাষাটা এত গ্রাম্য যে অনেক স্থানে তিনি ভাল বুঝিতে পারিতেছেন না। বৃদ্ধ টনি প্রাতে যেমন বাইবেল পড়েন সেইরূপ রামকৃষ্ণকথামৃতখানি ভক্তি-ভাবে পড়েন এই কথা অশ্বিনীবাবু খুব আনন্দ করিতে করিতে বলিতে লাগিলেন।

একদিন প্রাতে ডাকওয়াল ভাৰতবর্ষের মেলের চিঠি দিয়া গেল।

অখণ্ডানন্দ স্বামীর চিঠি।  
গুডউইন স্বামীজীকে সেই চিঠিগুলি দিলেন। অখণ্ড-  
নন্দ স্বামী একখানি পত্র স্বামীজীকে লিখিয়াছিলেন।

অখণ্ডানন্দ স্বামী বরাহনগর মঠ হইতে চলিয়া গিয়া  
তিব্বত পরিভ্রমণ করিয়াছিলেন। তাহার পর, তথা হইতে ফিরিয়া  
আসিয়া পুনরায় নানা স্থানে ঘুরিয়া রাজপুতনায় কিছুকাল থাকিয়া  
আলমবাজার মঠে ফিরিয়া আসেন। তিনি পুনরায় মধ্য এশিয়ার  
অত্রান্ত স্থানগুলি ভ্রমণ করিতে ইচ্ছা করিয়াছিলেন এবং সেই মর্মে স্বামীজীর  
নিকট অনুমতি লইবার জন্ত একখানি পত্র স্বামীজীকে লেখেন। স্বামীজী  
পত্রখানি পড়িয়া খানিকক্ষণ স্থির হইয়া রহিলেন ও তৎপরে বলিতে  
লাগিলেন, “গঙ্গা রাজপুতনায় ছিল, খেতড়ির রাজা তাকে বেশ যত্ন করে  
রেখেছিল, সে চলে এলো কেন? কেবল ঘুরে ঘুরে মরা ওর অভ্যাস।”

বর্তমান লেখক বলিলেন যে, খেতড়ির রাজা প্রথম যেমন বদ্ধ করেছিলেন পরে সেরূপ করেন নাই। স্বামীজী বলিলেন, “সে সব কথা আমি জানি, আমি শুনেছি গঙ্গারই ত দোষ। তুই বাবু সাধুর মত থাকবি, তা না হয়ে তা’দের রাজনীতিতে হাত দিতে যাচ্ছিলি কেন? তা’রা রাজপুতনার রাজা, পুরান রাজবংশ, তারা রাজনীতি ছেলেবেলা থেকে শিখেছে। গঙ্গা সাধুর মত না থেকে তাদের রাজনীতিতে হাত দিতে গেল, তাইতো রাজা অজিতসিং চটে গেল, শুধু আমার খাতিরে বিশেষ কিছু বলত না। যা ইচ্ছে করুকগে যাক”—এই বলিয়া গঙ্গাধর মহারাজকে একটু ভৎসনা করিতে লাগিলেন।

স্বামীজী পুনরায় বলিতে লাগিলেন, “রাখালকে বল্লম, যা মঠে ফিরে,

খেতড়ির রাজার  
প্রশংসা।

যা খেতড়ীর রাজাকে বলে দিচ্ছি তোদের মাসে ১০০৮

টাকা দেবে, তা হলে এক রকম চলতে পারে, তা নয়

রাখালের বৈরাগ্য হল, টাকা নিলে না। যা খুসী

করুকগে, কষ্টে মরুকগে! আর রাজা অজিত সিং তেমন হোমরা চোমরা রাজা কি! সামান্য একটা petty chief, তিন চার শ টাকার ভিতর মাস চালায়। একটা বকরা কাটে, তাই খায়, আর একটু একটু মদ খায়, এইত তা’দের খরচ, তবুও ত সে রাখালকে দিতে রাজী হয়েছিল। খেতড়ীর রাজা যে আমার অভিনন্দন দিয়েছিল, তার জবাব রং বেরং করে লিখেছিলুম। রাজাগুলোর ভিতর যেন একটা ক্ষত্রিয় ভাব আসে, সেইটা ভুলবার জন্য খেতড়ীর রাজার অভিনন্দনের ঐরূপ জবাব দিয়েছিলাম। তবে দেখলুম, রাজাটার প্রাণটা বড় সরল, বুকটা খুব বড়। আর রাজারা ত মদ খেয়েই থাকে, তাতে ওদের কিছু এসে যায় না। তবে লোকটার ভেতর অনেকগুলি গুণ আছে দেখলুম, আর আমার প্রতি অগাধ বিশ্বাস”—এইরূপে রাজা সাহেবের অনেক স্নখ্যাতি করিতে লাগিলেন।

## লগুনে বিবেকানন্দ

একদিন বেলা আড়াইটা তিনটার সময় স্বামীজী নীচেকার ঘরে নিজের চেয়ারে বসিয়া আছেন। ষ্টার্ডি প্রভৃতি অনেকেই আছেন। স্বামীজী বলিতে লাগিলেন, “দেখ জাম্বাণরা বিজ্ঞানে খুব উন্নতি করেছে। এই যে পচা ছর্গন্ধ ড্রেন তার জল, সেটাও তারা পরিষ্কার ক’রে কাজে লাগাচ্ছে। একটা খালওয়ালা বড় মাঠ নিচ্ছে, রাস্তার নীচে ময়লা ড্রেনের জলটা pump করে’ সেই মাঠের একধারে ফেলছে। জলটা ধীরে ধীরে গড়িয়ে গড়িয়ে মাঠের উপর দিয়ে ও ঘাসের ভিতর দিয়ে যাচ্ছে, তাতেই জলটা filter (পরিষ্কার) হয়ে গেল। জলটা যখন মাঠের অপর ধারে গেল তখন পরিষ্কার জল হয়ে গেল, কোন ছর্গন্ধ নাই। যে ডাক্তার এর experimentএ ছিল, সে মাঠের শেষ ধারের জল এক গ্লাস নিজে খাইল ও অপরকে খাইতে দিতে লাগিল। তখন জলে কোন ছর্গন্ধ আর নাই, পরিষ্কার পরিচ্ছন্ন। ঘাসের একটা গুণ আছে যে, সে জলের দূষিত জিনিসগুলি পরিষ্কার করে দেয়। তারা ছুটো মাঠ নিয়েছে, প্রথমে যে মাঠে এই কাজ করলে সে মাঠ কিছুদিন বাদে দ্যাঁতস্যাঁতে হয়, তখন সে মাঠে আর এ কাজ করে না। অত্ন মাঠে করে, ইত্যবসরে পূর্বের মাঠও শুকিয়ে যায়। এই রকম অদল বদল ক’রে তারা কাজ চালাচ্ছে।” সেই-দিন তিনি জল পরিষ্কার করিবার বিজ্ঞানের অনেক কথা বলিতে লাগিলেন।

একদিন বর্তমান লেখক মিসেস্ টার্ণার নামক জনৈক স্ত্রীলোকের বাড়ীতে খাইতে যান। স্ত্রীলোকটা গৃহস্থ, স্বামী পুল কত্তা আছে, তবে ভারতবর্ষীয় লোকের মত কিছু রাঁধিতে শিখিয়াছে, এইজন্য ভারতীয় লোকেরা মাঝে মাঝে তাহার বাড়ীতে গিয়া খাইয়া আসে। এক রকম ঘরোয়া হোটেল। স্বামীজী বর্তমান লেখককে জিজ্ঞাসা করিলেন, “আজ সন্ধ্যার সময় কোথায় গিয়েছিলে?” বর্তমান লেখক বলিলেন, “মিসেস্

টার্ণারের বাড়ীতে খাইতে গিয়াছিলাম। মিসেস্ টার্নার খুব রাঁধিতে পারে।” স্বামীজী জিজ্ঞাসা করিলেন, “কি র়েঁধেছিল?” বর্তমান লেখক বলিলেন, “চাপাটি রুটী, মাংসের একটা তরকারি এবং আর দু একটা তরকারি, পুদিনার চাটনি, আর চাউলের পায়েস।” স্বামীজী হাসিয়া বলিলেন, “তাতে বেশ একরকম খাওয়া চলে। একদিন সে এখানে এসে র়েঁধে যায় না, তাহলে একটু খেয়ে বাঁচি, একটু মুখ তারাই।” বর্তমান লেখক বলিলেন “সে গৃহস্থ লোক, সে ত ঝি চাকরাণী নয়, অপরের বাড়ীতে রাঁধিতে আসবে কেন?” স্বামীজী একটু হাসিয়া বলিলেন, “তা নয়, একদিন তার বাড়ীতে গিয়ে খেয়ে আস্বে।” কিন্তু তারপর সে কথা কাহারও মনে ছিল না।

## সাত

গরম কাল—বেলা ৩টার সময় নীচেকার ঘরে স্বামীজী চেয়ারটিতে বসিয়া আছেন। ষ্টার্ডি, গুডউইন, সারদানন্দ স্বামী, ফক্স ও বর্তমান লেখক সকলেই ভিন্ন ভিন্ন চেয়ারে বসিয়া আছেন। রুসের সম্রাট দ্বিতীয় নিকোলাসের অভিষেকের বর্ণনা খবরের কাগজে বিশেষভাবে বাহির হইয়াছে। গুডউইন একখানি সংবাদ পত্র লইয়া বর্ণনাটা পড়িতে লাগিলেন। অভিষেকের স্মৃতিস্বরূপ বহুপ্রজাবর্গের অপ্রদত্ত খাজনা এক বৎসরের জন্ত রদ হইয়াছিল এবং সিজারের অভিষেকের সন তারিখ লেখা এনামেলের একটি করিয়া গ্লাস বহু সংখ্যক লোককে দেওয়া হইবে সেইজন্ত বিরাট আয়োজন করা হইয়াছিল। গরীব প্রজা একটি করিয়া গ্লাসের লোভে মস্তোতে সমবেত হয় কিন্তু জনতা অত্যন্ত অধিক হওয়ার সাধারণ লোক কিছু পরিমাণে চঞ্চল হইয়া উঠে। পুলিশ জনতার অশৃঙ্খলতার কোন বন্দোবস্ত করিতে না পারিয়া অবশেষে গুলি চালায় এবং তাহাতে বহু সংখ্যক লোক মৃত্যুমুখে পতিত হয়। অবশেষে পুলিশের কর্তা নিজেকে গুলি মারিয়া আত্মহত্যা করে। সকলেই এই ভীষণ বর্ণনা শুনিয়া স্তম্ভিত হইয়া রহিল। খানিকক্ষণ পরে ষ্টার্ডি বলিলেন, “বাকি খাজনা রদ—ও তো নাম মাত্র। বড় বড় কর্মচারীরা যেমন করে হোক পেট ভরিয়ে নেবে, প্রজাদের ইহাতে কোন উপকার হবে না বরঞ্চ একটা ছুঁতো করে বেশী খাজনা আদায় করবে। জঙ্ঘলি অসভ্য জাত রাজ্য শাসন কিছুমাত্র জানে না, কেবল জবরদস্তি করে রাজ্য চালায়।” ষ্টার্ডি ইংরাজের শাসন ও অপরের কুশাসন সম্বন্ধে কথাবার্তা বলিতে লাগিলেন। গুডউইন উত্তেজিত হইয়া হাত মাথা নাড়িয়া বলিয়া উঠিলেন, “এ বড় অত্যাচার, এরকম

করা উচিত নয়। যদি ইংলণ্ডে এরূপ অত্যাচার হইত তা হলে আমরা দেখে নিতুম” ইত্যাদি নানা প্রকার আশ্বাসন করিতে লাগিলেন।

স্বামীজী এতক্ষণ ঠেসান দেওয়া চেয়ারটিতে স্থিরভাবে নির্বাক হইয়া বসিয়াছিলেন—যেন কি একটা গভীর চিন্তায় মগ্ন হইয়া আছেন; মুখ অতি গম্ভীর, চক্ষুদ্বয় বড় বড় হইয়া উঠিল, শোকে ও দুঃখে চোখ যেন ভরে গেছে। সহসা তিনি স্থির হইয়া বসিলেন এবং গম্ভীরভাবে এদিক ওদিক চাহিতে লাগিলেন। তারপর হঠাৎ বলিয়া উঠিলেন, “কি দুঃখ! কি কষ্ট! একটা এনামেলের গ্লাস পাবার জন্ত শত শত লোক নিজের গাঁ ছেড়ে সহরে এল এবং কত লোক গুলিতে মরুলো। দেশটা কি গরীব! লোকগুলো খেতে পায় না। নিজেদের এত হীন বলে মনে করে যে ছ গুণা পয়সার জন্ত, একটা গ্লাসের জন্ত প্রাণটা দিলে। জারের অভিষেকের এই হল একটি আনন্দ উৎসব না বীভৎস হত্যাকাণ্ডের স্মৃতি রহিল? এ যে অভিষেকের কথা বলেই লোকের মনে নরহত্যার কথা উঠবে। এটা স্বয়ং সিজারের সম্মুখে হইল? কি দুঃখ, কি দুঃখ! লোকগুলো এত হীন হয়ে গেছে” এই বলিয়া স্বামীজী মেজেতে শোকার্ত, গম্ভীর ও বিষম হইয়া পাইচারি করিতে লাগিলেন। কখনও বা হাত দুটো বুকের উপর রাখিতেছেন কখনও বা হাত দুটো পার্শ্বে নাগাইয়া দিতেছেন। এতই শোকার্ত ভাব যে অপরে আর কোন কথাই কহিতে পারিল না। সকলেই শোকার্ত হইয়া বসিয়া রহিল। তাহার পর সকলে একে একে উঠিয়া চলিয়া গেল।

একদিন প্রাতর্ভোজনের পর স্বামীজী বেশ প্রফুল্ল, পাইপে করিয়া তামাক টানিতেছেন ও মৃদু মৃদু হাসিতেছেন—যেন কাহার সঙ্গে কথা কহিতেছেন। সপ্তম এডওয়ার্ড তখন যুবরাজ। তাঁহার ‘পারমিসন’ বলিয়া এক ঘোড়া ডারবি রেসে এক বাজি জিতিয়াছে। ইংলণ্ড রেস খেলার



## লগনে বিবেকানন্দ

দেশ তাহাতে যুবরাজের ঘোড়া জিতিয়াছে তাই খুব হৈ চৈ পড়িয়া গিয়াছে। সকলেরই খুব আহ্লাদ। গুডউইন উত্তেজিত হইয়া নানা ভাবে ঘোড়দৌড়ের কথা বলিতেছেন, তাঁহার ভারি আমোদ। তিনি ঘোড়দৌড়ের নানা কথা বলিতেছেন কিন্তু স্বামীজী, বর্তমান লেখক ও সারদানন্দ স্বামীর সে সব কথা ভাল লাগিতেছে না। কিন্তু গুডউইন ততই উত্তেজিত হইয়া নানা কথা বলিতেছিলেন ও বহুবার ‘পারমিসন’ কথাটি উচ্চারণ করিতেছিলেন। স্বামীজী পায়চারি করিতে করিতে নানা রকম মুখ ভঙ্গি করিয়া ঠাট্টার ছলে সবে পারমিসন কথাটি বলিতে যাইতেছেন এমন সময় গুডউইন স্বামীজীর কাছে গিয়া নতজানু হয়ে জোড়হাত করে বসিলেন। গুডউইন স্বামীজীর সমস্ত ভাবগতিক জানিতেন সেইজন্ত তিনি বুঝিয়াছিলেন যে স্বামীজী এইবার ঠাট্টা তামাসা করিবেন। গুডউইন স্বামীজীকে বলিতে লাগিলেন “স্বামীজী, গরীব গুডউইনকে ঠাট্টা তামাসা গাল মন্দ যাহা কিছু করিতে হয় করুন কারণ গরীব গুডউইন আপনার শিষ্য, আপনার ভৃত্য কিন্তু রাজপরিবারের উপর কিছু বলিবেন না, এটা এ’ দেশে বড় দুষ্টীয় মনে করে আপনি আমার উপর কৃপা করুন।’ গুডউইনের কথা শুনিয়া সকলে স্তম্ভিত হইয়া রহিল। যে গুডউইন একজন পাকা radical schoolএর লোক তাঁহার কিন্তু রাজ পরিবারের উপর কি অচলা ভক্তি! স্বামীজী গুডউইনের কথা শুনিয়া স্তম্ভিত হইয়া বার কতক তাঁহার পানে চাহিয়া নিজের চেয়ারে গিয়া বসিয়া রহিলেন।

একদিন সকাল বেলা আহ্বানের পর স্বামীজী নীচেকার ঘরে নিজের চেয়ারে বসিয়া আছেন। ষ্টার্ডি, সারদানন্দ স্বামী আমেরিকার পাদ্রীদের কথা। ও বর্তমান লেখকও নিজের নিজের চেয়ারে বসিয়া আছেন। ষ্টার্ডির সহিত স্বামীজীর আমেরিকার পাদ্রীদের কথা উঠিল। স্বামীজী বলিতে লাগিলেন, “আমেরিকার পাদ্রী-

শুধু কেবল টাকা রোজগারের ফন্দিতে বেড়ায়। শ্রদ্ধা, ভক্তি এসব তাহাদের ভিতর কিছুই নাই। আমেরিকার কারবারীগুলো যেমন টাকা টাকা করে বেড়ায়, ও দেশের পাদ্রীগুলোও তেমনি শুধু টাকা রোজগারের ফন্দি করছে। বীশু কোথায় মহা ত্যাগ বৈরাগ্য দেখিয়ে গেল, এক কঞ্চল গায়ে দিয়ে পথে পথে ঘুরে ভগবানের নাম শুনিয়ে গেল আর এই পাদ্রীগুলো কেবল টাকা, টাকা করে বেড়াচ্ছে। আমি একদিন চটে গিয়ে ছুঁচার কথা বলে দিলুম। তারা তো আমার উপর খুব চটে গেল কিন্তু সাধারণ লোকে আমার উপর খুব খুসী—কারণ পাদ্রীর দপ্-দপানিতে মুখ খুলে কেউ ধম্কানি দিতে পারে না।” ষ্টার্ডি বলিলেন, “থুঁটান ধর্মটা একেবারে পচে গেছে, এটা নিতান্ত Military ও Commercial ধর্ম হয়েছে। লড়াই ও কারবার এই দুইটা হচ্ছে সার। এই ধর্ম জগতে আর টিকবে না, একেবারে গোড়া বদলে ফেলে নূতন ধর্ম স্থাপন করতে হবে, বোদাস্ত ধর্মই একমাত্র শুধু এখন চলবে”—এই সব কথা বলিতে বলিতে ষ্টার্ডি কিছু উত্তেজিত হইয়া থুঁটানধর্মের ভিতরকার নানা রকম গ্লানির কথা বলিতে লাগিলেন। টাকা না নিয়ে গেলে কোন গির্জাতে ঢোকবার যো নাই, যে যত পরিমাণে টাকা ঢালবে সে তত পরিমাণে ধর্মপরায়ণ হবে। শ্রদ্ধা ভক্তির তো নাম গন্ধ নাই। গির্জাটা হল একটা টাকা রোজগারের দোকান”—ষ্টার্ডি এইরূপ নানা রকম কথা বলিতে লাগিলেন।

একদিন একটা ভদ্রলোক স্বামীজীর সহিত দেখা করিতে আসিলেন। তিনি স্বামীজীর সঙ্গে কথা কহিবার সময় মাঝে মাঝে বলিতে লাগিলেন, “Do you not think so and so?” যেন তাহার সিদ্ধান্ত মত স্বামীজীকেও ভাবিতে হইবে, নিজে স্বাধীন ভাবে চিন্তা করিবার কাহারও অধিকার নাই, তা’র মতেই মত দিতে হইবে এবং ভিন্ন মত হইতে

## লগুনে বিবেকানন্দ

পারে না। স্বামীজী স্থির হইয়া মুখ গম্ভীর করিয়া সমস্ত কথা শুনিতে লাগিলেন। অবশেষে ছুই একটি কথা কহিয়া তাহাকে বিদায় দিলেন। লোকটি চলিয়া গেলে স্বামীজী ষ্টার্ডিকে বলিতে লাগিলেন, “This is a bad way of conversation. লোকটা ওর কথাই যোল আনা বলে গেল যেন আর কোন রকম কেউ ভাবতে পারে না; মাতব্বরি হিসাবে লোকের সঙ্গে কথাবার্তা কয়, I cannot bear this patronising tone. তাতেই লোকটির কথায় বেশী যোগ দিলাম না, অল্প ছুই একটা কথা কয়ে লোকটাকে উঠিয়ে দিলাম।” ষ্টার্ডি বলিলেন, “কথাবার্তায় অনেকের ওই দোষটা আছে, ওপর পরোয়া হয়ে নিজের মত চালায় কিন্তু শ্রোতার যে ভিন্ন মত হতে পারে সেটা সে বুঝতে পারে না, এই মাতব্বরি ভাবে কথা বলা অনেকেরই দোষ আছে।”

একদিন ষ্টার্ডি সকালে স্বামীজীর চেয়ারখানিতে ঠেস দিয়া বসিলেন। বক্তৃতা খুব চলিতেছে এই জ্ঞান মন প্রফুল্ল। তিনি বলিতে লাগিলেন, মিসেস ষ্টার্ডি তাহার একটা আলাপী লোকের বাড়ী দিনকতক গিয়ে থাকবে। আর তিনি হয়ত এইখানে দিনকতক থাকবেন, না হয় অল্প বেড়াইয়া আসিবেন। এখানে ঘর তো কম। তা যাহা হউক লেকচার ঘরের শোফার উপর শোওয়া যাবে তো। ষ্টার্ডি এইরূপ ঘরোয়া কথা অসঙ্কুচিত চিন্তে বলিতে লাগিলেন। সকলের ভিতর পদস্পর্শ বেশ আপনাআপনি ভাব হয়েছিল, বিদেশী লোক বলে কোন কিছু দ্বিধা ছিল না।

একদিন একটা লোক আসিয়া তার সাংসারিক নানা কথা স্বামীজীর সহিত বলিতে লাগিল এবং এইরূপ স্থলে কি করা উচিত সে বিষয়ে পরামর্শ জিজ্ঞাসা করিতে লাগিল। স্বামীজী শুনিয়া বিবেচনা মত যাহা উচিত হয় তাহাই বলিলেন। লোকটা সমস্ত মনের কথা স্বামীজীকে বলিয়া যেন আশ্বস্ত হইল। অনেক লোকই স্বামীজীকে আত্মপরিবারের

মধ্যে গণ্য করিত, সেইজন্য যার যা সংসারের কথা ও মনের কথা আসিয়া খুলিয়া বলিত। বিদেশী লোক—তার সঙ্গে আবার কি মিশিব এইরূপ ভাবটা মোটেই ছিল না, অনেকের সহিত স্বামীজীর এইরূপ মেশা-মেশি হইয়াছিল।

পারলামেন্টের একটি বাই-ইলেকসন বাহির হইল বা ব্যক্তিগত নির্বাচন হইল। গুডউইন হুজুগে লোক, দিনকতক খুব মেতে গেলেন। একদিন তিনি একজন আরমনি-ইংরেজের নকল করিতে লাগিলেন এবং আরমনির বক্তৃতা লইয়া কোতুক করিতে লাগিলেন। তাহার পরদিন বেলা নয়টার সময় একটা গ্রাম্য লোক মজুরের বুট পায়ে দিয়া দরজায় ধাক্কা মারিল। গুডউইনের সহিত বর্তমান লেখক দরজার কাছে গেলেন। গুডউইন তাহার সহিত সদর দরজায় কথা বলিয়া তাহাকে বিদায় করিয়া দিলেন। বর্তমান লেখক বলিলেন, “ওকে বাড়ীর ভিতর আনলে না কেন?” গুডউইন বলিলেন “He belongs to a labouring class.” অর্থাৎ মুটের শ্রেণীকে ভদ্রলোকের বাড়ীতে ঢুকিতে দেওয়া যাইতে পারে না। বর্তমান লেখক গুনিয়া মনে মনে ভাবিলেন, এই গুডউইন বলেন সকল ইংরেজই সমান, One man one vote অর্থাৎ প্রত্যেক লোকের একটি ভোট। কিন্তু ইহাকে বাড়ীতে ঢুকতে দিলে না, এদের ভিতরেও সমাজের উঁচু নীচু জ্ঞান এত বেশী। ঘরে আসিয়া সারদানন্দ স্বামী বলিতে লাগিলেন যে, গুডউইন এদিকে স্বামীজীর এত ভক্ত—সেবা, গুশ্রাষ করে। কিন্তু Politics পেলে একেবারে মেতে যায়। ইংরেজ জাতির হাড়ে হাড়ে এত Politics ঢুকে গেছে। স্বামীজীর সংস্রবে আসিয়া গুডউইনের শ্রদ্ধা, ভক্তি, সেবার ভাব খুব হয়েছে কিন্তু জাতে ইংরেজ তো, ইংরেজের দোষগুণগুলো সব রয়েছে। জাতের দোষগুণ কিছুতেই যায় না। তাহার পর সকলে উঠিয়া গেলেন।

## লণ্ডনে বিবেকানন্দ

গুডউইন একদিন ছপ্পুর বেলা বসে রাজনীতির কথা বলিতে লাগিলেন। গুডউইন Liberal বা Radical দলের লোক ছিলেন।

গুডউইনের রাজনৈতিক অভিমত যদিও স্বামীজীকে অত্যন্ত ভক্তি করিতেন, ছায়ায় মত স্বামীজীকে অনুসরণ করিতেন, কিন্তু রাজনীতির ছুটা কথা বলিতে পারিলে তাঁর প্রাণে বড় ক্ষুষ্টি হইত, তখন যেন তিনি নিজের ধাতে আসিতেন। তিনি বলিতে লাগিলেন, “Gladstoneএর মত এই যে ইংরেজদিগের যত উপনিবেশ আছে সবগুলিকে Republic করিয়া (স্বাধীন করিয়া) দেওয়া চাই। যে যার নিজের স্বাধীন ভাবে কার্য করিবে, শুধু একটা Commercial Treaty এবং offensive ও defensive allowance থাকিবে। Irelandকেও ঠিক সেই ভাবে দেওয়া চাই। কারণ একজন প্রধান মন্ত্রী এত বড় রাজ্য স্মৃঙ্খল ভাবে চালাতে পারে না, অনেক ভুল হইয়া যায়।”

সারদানন্দ স্বামী বলিলেন, “আয়ারলণ্ড চলে গেলে ইংরেজের রাজত্ব নষ্ট হয়ে যাবে।” গুডউইন চট্ ক’রে উত্তর করিলেন  
আয়ারল্যান্ডের কথা “কেন, আয়ারলণ্ড আগে তো ভিন্ন রাজ্য ছিল, তারা নিজের কাজ নিজে ক’রত, শুধু নেপোলিয়ানের লড়াইয়ের সময় উইলিয়াম পিট সেই আয়ারলণ্ডকে মিলিয়ে নিয়েছিল। এক একজন জমীদারকে এমন কি, এক ক্রোর টাকা যুস দিয়েছিল, বড় বড় উপাধি দিয়ে বশ করেছিল। পিট একজন বড় রাজনীতিজ্ঞ লোক ছিল, তখন সে কি বুঝেছিল এখন ঠিক বলা যায় না কিন্তু এখনকার সময় সে কাজটা কুফল হয়েছে এইজন্য আয়ারলণ্ডকে মুক্ত করে দেওয়া নিতান্ত আবশ্যক, তা না করিলে রোজ খিটি মিটি হয়, ইহাতে স্মৃঙ্খলভাবে কাজ চলে না।”  
সারদানন্দ স্বামী চুপ করিয়া রহিলেন।

তাহার পর ভারতবর্ষ ও ইজিপ্টের কথা উঠিল। গুডউইন বলিলেন,

“ভারতবর্ষ ও ইজিপ্ট এখন নিজে নিজে রাজ্য চালাইতে তেমন পারগ ভারতবর্ষ ও ইজিপ্ট নহে, বিশেষতঃ ভারতবর্ষে রুস আক্রমণের বড় ভয় আছে সেইজন্য এই দুইটা দেশকে কিছুদিন হাতে রাখিয়া কার্য প্রণালী শিখাইতে হইবে। পরে স্বতন্ত্রভাবে ছাড়িয়া দেওয়া হইবে শুধু একটা ব্যবসায়ী সন্ধি রাখিলেই হইবে। কারণ একটা জাত অপর একটা জাতকে বেশী দিন দাবিয়ে রাখতে পারে না। আর ভারতবর্ষে ইংরেজের সংখ্যা অল্প, তার বিদেশী। তাহারা এ দেশের লোকের আচার ব্যবহার জানে না। ভারতের জাতিগত ভাব স্বতন্ত্র, ইংরেজেরও জাতিগত ভাব স্বতন্ত্র, দুটো জাতে কখনও মিল হতে পারে না, অল্পসংখ্যক লোক বহু সংখ্যক লোককে কিছুতেই দাবিয়ে রাখতেও পারে না। তবে উপযুক্ত ক’রে যত শীঘ্র ছেড়ে দেওয়া যেতে পারে ততই ভাল, তা না হ’লে ইংরেজ জাতের যত শক্তি ভারতবর্ষ চুষে খাবে। কিছুদিন পরে ইংরেজ জাতটা ভুয়ো হয়ে যাবে, ইংরেজ জাতের আর কোন শক্তি থাকবে না।”

তাহার পর রুস আক্রমণের কথা উঠিলে গুডউইন বলিলেন, “রুস এখন আর ভারতবর্ষ আক্রমণ করিতে পারিবে না।” সারদানন্দ স্বামী বলিলেন, “তাইমুর প্রভৃতি মধ্য এশিয়া হইতে পুনরায় ভেদ করিয়া ভারতবর্ষে আসিতে পারে না।” গুডউইন বলিলেন, সে সেকালে পারত এখনকার দিনে হয় না ; সেকালে ফোজের সঙ্গে মাল পত্র সামান্য থাকত। কতকগুলি Rabel (গোলা লোক) একসঙ্গে চলিলেই ফৌজ বলিত। কিন্তু এখনকার ফোজের সঙ্গে বড় বড় তোপ অনেক থাকে। হিমালয় ভেদ করিয়া আসা এখন অসম্ভব। রুসের ফৌজ কিছুতেই হিমালয় ভেদ ক’রে ভারতে আসতে পারে না, এটা শুধু খবরের কাগজের হৈ চৈ মাত্র, বিশেষতঃ

## লগুনে বিবেকানন্দ

আফগানিস্থানকে ষাট্টিদার ( Buffer state ) ক'রে রাখা হয়েছে।  
রুসের শক্তির প্রকোপটা আফগানিস্থানের উপর পড়িবে—সেই খানেই  
শক্তি খরচ হয়ে যাবে তা হলে ভারতবর্ষে আসিতে পারিবে না।

গুডউইন স্বামীজীর কাছে মুখ বন্ধ ক'রে থাকিতেন এইজন্ত দুইটা  
শ্রোতা পাইয়া মুখ খুলিয়া রাজনৈতিক বিষয়গুলি বলিতে আরম্ভ করিলেন।  
তাহার পর ইংলণ্ডের রাজনীতির কথা তুলিলেন। গুডউইন বলিলেন,  
“House of Commons এবং House of Lords দুটা রাখিবার কোন  
আবশ্যক নাই। সাধারণ লোকের প্রতিনিধি House of Commons,  
ইহারাই স্বার্থ কাজ করিয়া থাকে কিন্তু হাউস্ অফ লর্ডস এরা কাহারও  
প্রতিনিধি নয়, নিজেরাই নিজেদের প্রতিনিধি। অপরের সাথে বসবার  
তার কোন অধিকার নাই আর অনেক সময় নিজেদের স্বার্থ রাখিবার  
জন্তে তাহারা স্বার্থপরতা প্রকাশ করে এবং জাতির উদ্দেশ্যের অন্তরায়  
হইয়া থাকে। বিশেষতঃ হেরেডিটারী লেজিস্লেটার ( বংশগত  
নীতিকারক ) কেহ হইতে পারে না। হইতে পারে তার বাপ বড়  
বিচক্ষণ লোক ছিল তা বলে তার বেটাও উপযুক্ত হইবে ইহা কোন  
যুক্তিসঙ্গত কথা নহে। House of Lordsএ অনেক লোকই দেখা যায়  
যারা অপদার্থ, শুধু নামের দোহাই দিয়ে সভায় এসে বসে।”

বর্তমান লেখক জিজ্ঞাসা করিলেন, “হেরেডিটারী লেজিস্লেটার তুলে  
দিলে রাজাও ত একজন হেরেডিটারী লেজিস্লেটার, তাহা হইলে তাহারও  
তো চাকরী উঠিয়ে দিতে হবে। কারণ রাজাও নিজে একজন House  
of Lordsএর Member এইজন্ত তাহাদিগকে Peer বা স্বশ্রেণী বলে।  
Peerএর পদ উঠিয়ে দিলে রাজাকেও উঠাতে হবে। গুডউইন বলিলেন,  
“তা আবশ্যক নয়। রাজা—রাজা। আমাদের রাজা ইচ্ছামত  
কিছু করিতে পারে না, Constitutional King. অনেক দেশেও

তো Single Chamber ( একক সভা ) তাদেরও ত রাজা আছে ? কিন্তু House of Lords কোন মতেই রাখা যাইতে পারে না।” গুডউইন সেদিন মহা উত্তেজিত হইয়া ক্রমাগতই রাজনীতির কথা বলিতে লাগিলেন। অবশেষে সারদানন্দ স্বামী ও বর্তমান লেখক উঠিয়া গেলেন।

ফল্স একদিন আমেরিকার রাজনীতির কথা তুলিল। সে নিজের আমেরিকান রিপাবলিকান, সেই জ্ঞাত ইংরেজদের রাজ্য শাসন প্রথা হচ্ছে বুড়োটে, প্রাচীনকালের রাজ্যশাসন প্রথা ইত্যাদি

আমেরিকার  
রাজনীতি

বলিয়া একটু শ্লেষ করিয়া কথা বলিলেন। ফল্স বলিল, “ইংরেজ জাত আমেরিকান জাতের ৫০

বৎসর পিছনে। ইহারা বড় কনসারভেটিভ ( conservative ) লোক, কোন একটা নূতন ভাব শীঘ্রই নিতে চায় না। সমস্ত জগতে যে ভাবটা নিতে চায় ইংরেজেরা বিবেচনা করে যে সে ভাবটা নেওয়া যেতে পারে কি না। একটা কারণ হইতে পারে যে দেশটা সেঁতালে ও মেঘলায় ঘেরা, লোকের মন যেন ভিজে রয়েছে, গরম হ’তে অনেক সময় লাগে, এইজন্ত আধুনিক সভ্যতার পঙ্কতিতে ইংরেজেরা ঢের পেছনে। তবে ইংরেজের একটা জাতিগত ব্যায়রাম হয়েছে সেটার নাম হচ্ছে Land hunger ( জমির খিদে )। পৃথিবীর যেখানে যত জমি পাবে গ্রায়তঃ বা অগ্রায়তঃ সে জমিটা ইংরেজেরা খেয়ে ব’সবে। এত মাইল জমি নিয়ে কি আবশ্যক ? এটা শুধু জাতির দুর্বলতা। অল্প জমি উন্নত করিলে ঢের ভাল ফল হয়। অনেক জমি দখল করে রাখলে জাতির শক্তি ক্ষয় হইয়া যায়, জাতের সব শক্তি ও মনোবৃত্তি লয় হইয়া যায়। তার বিশেষ একটা লক্ষণ হচ্ছে এই যে আমেরিকায় বা অল্প দেশে বড় বড় চিন্তাশীল লোক আছে, জাতের ভিতর যে তেজঃপূর্ণ একটা প্রাণ আছে তাহার পরিচয় দেয়। কিন্তু ইংরেজ জাতের ভিতর প্রখর মস্তিষ্কের লোক বেরুচ্ছে



## লগনে বিবেকানন্দ

না, জগৎকে নূতন ভাব আর দিতে পারছে না। ইহারা শুধু Diplomacyর চুড়ান্ত হইয়াছে। শুধু কথা বেচে ছুঁর্বল জাতের উপর প্রাধান্য স্থাপন করা যায় কিন্তু শক্তিমান্ জাতের কাছে হটে আসতে হয়। আর যে জাত ইংরেজকে বিশ্বাস করে না সেখানে ইংরেজ পরাস্ত হয়। এখন সমস্ত জগৎ নূতন ভাবের জন্ত আমেরিকার দিকে চাহিয়া আছে। এখন যদি নূতন সঙ্গীতের রাগ, চিত্র, দর্শন বা কবিতা বেরোয় তো শুধু আমেরিকায় বেরবে। পুরান জাত ইংরেজের নিকট হতে বেরবে না। এ জাতটার আর উচ্চ চিন্তা করিবার ক্ষমতা নাই।”

তাহার পর আমেরিকার প্রেসিডেন্টের ক্ষমতার কথা উঠিল। ফল্ল বলিল, “যদি পার্লামেন্ট কোন একটা আইন করে, রাজার তাহা নামঞ্জুর করিবার একতার আছে এবং প্রত্যেক আইনে রাজার মত আবশ্যক হয় কিন্তু আমরা রিপাব্লিকান, আমাদের রাষ্ট্রপতির এ সবে কিছু ক্ষমতা নাই; সাধারণ ভাবে বা রাষ্ট্রপতির মত স্বাক্ষর করিয়া প্রকাশ করিবে। কিন্তু যদি রাষ্ট্রপতির কোন আইনে মত না থাকে তাহা হইলে কংগ্রেস নিজের একতারে সেই আইন চালাইতে পারে, রাষ্ট্রপতির স্বাক্ষর কোন আবশ্যক হইবে না। তাহার পর কথা উঠিল, ইংলণ্ডে ও আমেরিকায় অনেক টাকার ঋণ কর্জ নেয় সে টাকার দরুণ কে দায়ী? সারদানন্দ স্বামী বলিলেন “যারা ঋণ নিয়েছে তাদের প্রত্যেক লোকেই দায়ী।” বর্তমান লেখক বলিলেন, “নিজের ঋণ হ’লে নিজে দায়ী কিন্তু জাতির ঋণ হলে প্রত্যেক লোক ব্যক্তিগতভাবে দায়ী। শুধু রাষ্ট্রপতি সকলের প্রতিনিধিস্বরূপ দায়ী। প্রত্যেক লোক রাষ্ট্রীয় বিধিতে স্বাক্ষর করিতে পারে না এইজন্ত রাষ্ট্রপতির পর রাষ্ট্রসচিব—তাহার স্বাক্ষর গণ্য করিয়া লওয়া হয়।” গুডউইন বলিলেন ‘তোমার ঠিক কথা, প্রধান একজনের মত বা স্বাক্ষর সকলের মত বা স্বাক্ষর বলিয়া পরিগণিত হয় এই হচ্ছে

রাজনীতির প্রধান নিয়ম। একজনকে সকলে মানিয়া চলিবে। ব্যক্তিগত ভাবে ভিন্ন ভিন্ন মত চলিবে না তাহাকে Mobocracy বা হাউড়োর দল বলে।' ক্রমেই ইংরেজ ও আমেরিকানদের প্রাধান্ত লইয়া কথাটা বেশী গরম হইয়া উঠিল। কাজেই কথাটা বন্ধ করিয়া দিয়া অতঃপর সকলে চলিয়া গেলেন।

যেদিন রাত্রে বক্তৃতাকালে একটি ইংরাজের সহিত স্বামীজীর ঝগড়া হইয়াছিল তাহার পরদিন প্রভাতে শব্দা হইতে ভারতীয় সংগ্রামের কথা। উঠিতে স্বামীজীর অনেক দেৱী হইয়াছিল। কারণ

সে রাত্রে মন চঞ্চল থাকায় তিনি গুডউইনকে লইয়া অনেক রাত্রি পর্যন্ত রাস্তায় বেড়াইরাছিলেন। রাত্রে ঠাণ্ডা লাগায় চোক-গুলা ফুলিয়াছিল। স্বামীজী তাঁহার ড্রেসিং গার্ডিন গায়ে দিয়া ও পায়ে নরম চামড়ার পেছন উঁচু শ্লিপার দিয়া প্রায় ৯টা বা ৯টার সময় খাইতে বসিলেন। প্রাতর্ভোজন সমাপন করিয়া তিনি তাঁহার টেস্ট দেওয়া চেয়ার-খানিতে বসিলেন। এত দিন পর্যন্ত গুডউইনের সহিত ধর্মচর্চা ও আমেরিকার বক্তৃতার কথা চলিত কিন্তু আজ হঠাৎ স্বামীজীর ভাষা ও স্বর বদলাইয়া গেল। তিনি ভারতীয় যুদ্ধের বিষয় বলিতে লাগিলেন। কারণ পূর্ব রাত্রে তিনি অনর্গল ইতিহাসের কথা বলিয়াছিলেন। এখনও ভিতরে সেই ভাবটা রহিয়াছে, সেইজন্ত ইতিহাসের নানা কথা আরম্ভ করিলেন।

স্বামীজী স্মরণ করিলেন যে যখন ইংরেজরা প্রথম মাদ্রাজে আসে তখন ফরাসীরা খুব উন্নত জাতি ছিল। যুদ্ধ ও রাজনীতিতে তাহাদের অসাধারণ ক্ষমতা ছিল। কিন্তু ফরাসীদের বিরুদ্ধে বড়যন্ত্র করায়, স্থানীয় মুসলমান ও ফরাসী এক হইয়া যায় এবং ইংরেজদিগের আরকট দুর্গে অবরোধ করে; ইংরেজদের তখন অল্প মাত্র দেশী সেপাই ছিল। লড়াই ও অবরোধ ক্রমেই বাড়িতে লাগিল। ইংরেজরা ক্রমেই ব্যতিব্যস্ত হইয়া পড়িল, অনেক লোক মারা গেল। এদিকে তাদের রসদ একেবারে কমিয়া আসিলে

## লগনে বিবেকানন্দ

লাগিল। খাওয়া না থাকায় অবরোধকারীদের বা শত্রুহস্তে আত্মসমর্পণ করিতে হইবে, না হয় শুকাইয়া মরিতে হইবে, কিন্তু ভারতীয় সেপাইরা এত কৃতজ্ঞ ও উচ্চমনের লোক যে তাহারা বলিল আমরা ভারতীয় লোক, লঘু আহায়েই থাকিতে পারি। সেইজন্ত তাহারা ভাত রাঁধিয়া নিজেরা ফেন খাইতে লাগিল এবং ইংরেজ সেপাইদিগকে ভাতটা দিতে লাগিল। এইরূপে কয়েক দিন চলিল। একজন মারাঠা সেনানী দূরে নিজের সেনা সহ ছাউনী করিয়া কয়েক দিন ইংরেজদিগের বীরত্ব দর্শনে অতিশয় প্রীত হইয়া বলিলেন, “যাহারা এরূপ সুকৌশলে আত্মরক্ষা করিতে পারে আমি তাহাদের সাহায্য করিব” এই বলিয়া তিনি নিজে তাঁহার দলবল লইয়া অগ্রসর হইলেন। মহারাজের তখন প্রবল প্রতাপ। তিনি ফৌজ লইয়া ইংরেজদের সাহায্যে অগ্রসর হইতেছেন এই খবর পাইয়া মুসলমান ও অল্পসংখ্যক ফরাসী সৈনিকেরা সরিয়া পড়িল এবং দুর্গস্থিত ইংরেজের প্রাণ রক্ষা হইল।

এই হইল হিন্দুদিগের উদার ভাব, বীরত্বের ভাব—তার পরিবর্তে তোমাদের জাতেরা হিন্দুদের অবজ্ঞা, অত্যাচার করিতে লাগিল। মৃত্যুর মুখ হইতে বাঁচাইয়াছিল বলিয়াই তোমরা এখন হিন্দুদিগের উপর নানা প্রকার অত্যাচার করিয়া থাক। তোমাদের জাতের ভিতর কৃতজ্ঞতা নাই, তোমরা হ'চ্ছ স্বার্থপর, অকৃতজ্ঞ জাত। তাই জগতের লোকেরা তোমাদের কেউ বিশ্বাস করে না।

সিলিয়া মহারাজ এই সময় অনেক সুশিক্ষিত ফরাসী সেনাপতি  
নিজের চাকরীতে রাখিয়াছিলেন এবং নিজের ফৌজ  
পালিপথে সিলিয়া ফরাসী যুদ্ধ প্রণালীতে গঠন করিয়াছিলেন। ফৌজ  
মহারাজের ফৌজ। খুব সুশিক্ষিত, তাহারা অনেক তোপ সংগ্রহ করিয়া  
ছিল। আন্দাদ সা আবদালি দিল্লীর সম্রাটের বিরুদ্ধে যুদ্ধ করিতে আসে।

দিল্লীর সম্রাট তখন নামতঃ রাজা, কোন কিছুই শক্তি ছিল না। সিন্দিয়া তাঁহার ফরাসী ফৌজ লইয়া পানিপথের যুদ্ধে চলিলেন এবং নানা স্থান থেকেও ফৌজ একত্রিত হইয়াছিল। পাছে যুদ্ধে জয় হইলে অপর রাজাদের ও দিল্লীর বাদশাহের আধিপত্য বাড়ে এইজন্ত সিন্দিয়া মহারাজ বিশেষ লড়াই না করিয়া নিরপেক্ষভাবে রহিলেন, অবশেষে পানিপথের লড়াইয়ে দিল্লীর বাদশাহের হার হইল ও আক্কাদ সা আবদালির জিত হইল। মহারাজা সিন্দিয়া এই অবসরে নিজের রাজ্য ও আধিপত্য বাড়াইবার চেষ্টা করিতে লাগিলেন কিন্তু পানিপথের লড়াইয়ে তাঁহার পুত্র মারা যায়, এই শোক তাঁহার প্রাণে এত লাগিয়াছিল যে তাহাতেই তিনি এক প্রকার উন্মাদ হইয়া যান। অবশেষে বৃন্দাবনে এক বিশিষ্ট মন্দির দর্শন করিতে গেলেন। হিন্দুরাজা মন্দির দর্শন করিতে গিয়াছেন, সকলেই তাঁহাকে খুব অভ্যর্থনা করিল, সিন্দিয়া ঠাকুরের কাছে ক্রমাগত মাথা খুঁড়িতে লাগিলেন ও চীৎকার করিতে লাগিলেন, “ঠাকুর, আমার ছেলে মল কেন?” বিগ্রহ তো কথা কহিল না। অবশেষে ঠাকুরের ঘরে ঢুকে ঠাকুরের অলঙ্কার সোণা, রূপা, হীরে সব নিজের হাতে খুলে নিলেন। সকলে দেখিয়া অবাক, অবশেষে মন্দিরের সব জিনিস পুঁটুলী বাঁধিয়া লইয়া নিজের দেশে চলিয়া গেলেন, শেষটা শোকে পাগল হইয়া মারা গেলেন।

গুডউইনের সহিত স্বামীজীর ইতিহাসের কথা বাহা হইয়াছিল তাহা কেবল একদিন প্রাতঃকালেই হয় নাই, এই সময় রোজই কিছু কিছু হইত। এইজন্ত সমস্ত উপাখ্যানগুলি একত্র সন্নিবেশিত হইল।

নাদের সাহ দিল্লী লুণ্ঠন করিয়া ময়ূর সিংহাসন লইয়া দেশে চলিয়া গেল। কয়েক বৎসর পর তাহার মৃত্যু হইল এবং তাহার এক সেনাপতি আক্কাদ সাহ ছরানী বা আবদালি আফগান দেশে স্বয়ং

## লগুনে বিবেকানন্দ

রাজা হইয়া বসিল। এই ছরানী আফগান দিল্লীর বাদসাহের দুর্বলতা বুঝিয়া কয়েক বার লুণ্ঠন করিতে আসিয়াছিল। লোকটি অতি নিষ্ঠুর এবং লুট তরাজ ভিন্ন অপর কিছু বুঝিত না। তাহার বিষয় একটা গল্প আছে। ছরানী সব্দার অনেক বিবাহ করিয়াছিল, ছেলে মেয়েতে তার প্রায় ১৫০টা জন্মিয়াছিল। লোকটি এত নিষ্ঠুর ও এত বর্বর যে মেয়ে ভূমিষ্ঠ হইলেই তাহাকে মারিয়া ফেলিত; একটা মেয়েও সে জীবিত রাখিত না। পাছে ভূমিষ্ঠ হইলেই মারিয়া ফেলে এইজন্ত একজন ধাই বা ধাত্রী ভূমিষ্ঠ হইলেই একটা মেয়েকে লুকিয়ে নিয়ে রাখে। এবং এ বিষয়ে এত গোপন করিয়াছিল যে সব্দার কোন খবর পায় নাই। এইরূপে প্রায় ১৬ বৎসর কাটিয়া গেল। ধাইয়ের মনে হইল মেয়েটী এখন ১৫।১৬ বৎসরের হইয়াছে, দেখিলে বাপের হয়ত মনে স্নেহ হইবে, আর প্রাণে মারিবে না। এইরূপ চিন্তা করিয়া মেয়েটিকে একদিন বাপের সামনে আনিয়া তাহার পরিচয় দিয়া দিল। জঙ্গলী সব্দার এমনি নিষ্ঠুর ছিল যে গুনিবামাত্রই কোমরের তলোয়ার খুলিয়া তখনই মেয়েটিকে কাটিয়া ফেলিল। কি লোমহর্ষণ ব্যাপার! এই হ'ল জঙ্গলী আফগানদের কাণ্ড! স্বামীজী এই কথা বলিতে বলিতে মুখ বিবর্ণ করিয়া মৌন হইয়া রহিলেন, সকলেরই মনে একটা বিষাদ ভাব হইল কারণ স্বামীজীর বর্ণনা শক্তি অতি সুন্দর ছিল। অভিনেতারোগ সেইরূপ ভঙ্গি করিয়া ভাবপ্রকাশ করিতে পারে না এই জন্ত তাহার কথা ও বর্ণনা সকলের এত হৃদয়গ্রাহী হইত।

স্বামীজী একদিন নাদের শাহের কথা পাড়িলেন। নাদের জাতিতে তাতার। Caspian সাগরের ধারে মরুতটে ভেড়া নাদের শাহের কথা।

চরাইত। তাহাতে তাহার মন উঠিল না, একটা দল ক'রে ডাকাইতি সুরু করিল। অবশেষে সে পারস্ত রাজ্যের ফৌজের সিপাই হইয়া প্রবেশ করিল। ডাকাতি করিয়া লোক মারপিট, খুনখারাপী

করিয়া অবশেষে সেনাপতি হইল এবং পারস্ত দেশের রাজাকে মারিয়া ফেলিয়া সে নিজে রাজা হইল। কিন্তু যে জঙ্গলী সেই জঙ্গলীই রহিল। খুনখারাপী ছাড়া অল্প কিছু বৃদ্ধি না, মানুষ মেরে মেরে মানুষ মারা তার মাথায় একটা ব্যামো হইল। কিন্তু লোকটার একটা গুণ ছিল মুখ দিয়ে যা বলবে ঠিক সে কাজ সে ক'রবে তা এতে লাভ হ'ক আর লোকসান হ'ক। তার কথাই ছিল—“নাদের দু'কথা বলে না।” অবশেষে এক সময় খোঁরাসানে (মসেন্দ বা প্রাচীন তুস সহরে) ছাউনি করিতেছে, তাহার প্রধান কর্মচারী কাজরও তাতার বংশীয় ছিল। নাদের গুইবার সময় শপথ করিল, প্রাতে উঠিয়া সমস্ত তাঁবুর কাজারদের নিশ্চল করিবে। একটিকেও বাঁচিতে দিবে না। এই কথা শুনিয়া সকলে পরামর্শ করিল যে নাদের যখন বলিয়াছে সে তখন নিশ্চয় করিবে। তখন তাঁবুতে প্রায় পাঁচ হাজার কাজার ছিল। তাহারা একজোট করিয়া নাদেরের শোবার তাঁবুতে ঢুকিয়া নাদেরকে কাটিয়া ফেলিল। তাই থেকে কাজাররা পারস্যদেশের রাজা হইয়া আসিতেছে।

একদিন গুডউইন ইংরেজ সেপাইদের খুব বীরত্বের কথা বলিতে লাগিলেন। গুডউইনের কথার মর্ম্ম এই যে, ইংরেজ সেপাইয়ের মত অল্প কোন সিপাই সাহসী হয় না। স্বামীজী চুপ করিয়া শুনিতেছিলেন। গুডউইনের কথা সমাপ্ত হইলে স্বামীজী তেজ করিয়া নিজের চেয়ারটাতে সোজা হইয়া বসিলেন। তারপর বলিলেন, “ইংরেজ গুডউইন, তোর ইংরেজ সেপাইদের বীরত্বের তো সে বৎসর আফগান সীমান্তের লড়ায়ে পরিচয় পাওয়া গিয়েছে। একদল আফগান পাহাড়ের উপর হইতে লড়াই করিবার জন্ত ধীরে ধীরে নীচে নামিতে লাগিল। একজন একটা নিশান নিয়েছে আর একটা মোল্লা গলায় একটা বড় ঢোল ঝুলিয়ে বাজাচ্ছে। যত আফগানরা তাদের বন্দুক তলোয়ার নিয়ে হৈ হৈ ক'রে ভীষণ চীৎকার

## লণ্ডনে বিবেকানন্দ

করছে এবং ক্রমেই এগুচ্ছে। এদিকে ইংরেজের তরফে এক পলটন দিশি সেপাই আফগানদের আক্রমণ করিতে দিশি সেপাইদের ভিতর একজন লক্ষ্য করিয়া ঢোল বাজানওয়ালা মোল্লাকে গুলি মারিল। মোল্লা পড়িয়া গেল। কিন্তু পাছে ঢোলের আওয়াজ বন্ধ হয় ও আফগানরা পাছে ভয় পায় এইজন্ত আর একজন লোক তাড়াতাড়ি ঢোলটা গলায় ঝুলিয়ে নিয়ে বাজাইতে লাগিল। ক্রমে ক্রমে ভারতীয় সেপাইরা পাঁচ জন আফগান ঢোল বাজানওয়ালাকে গুলি দিয়া মারিয়া ফেলিল। ষষ্ঠ লোক তখনি ঢোলটা গলায় ঝুলাইয়া লইতে তাহাকেও দিশি সেপাইরা গুলি মারিল। আফগান ঢোলওয়ালা তার সঙ্গীদের বলিল, তাহারা যেন নিশানের গায়ে ঠেস্ দেয়, তখন চোখ বুজে আস্ছে ও হাত ছুটীও নিস্তেজ হ'য়ে আস্ছে কিন্তু তখনও সে ঢোলের চামড়াতে গুলি মারিয়া চামড়া ছিঁড়িয়া দিল এবং ঢোলের আওয়াজ বন্ধ হইল। তখন আফগানরা ভয় পেয়ে ছোড় ভঙ্গ হ'য়ে পলাইয়া গেল। এই বে দিশি একজন সেপাই সমস্ত আফগানদের হারিয়েছিল এর পুরস্কার হল কি জানিস্? একজন ইংরেজ সেপাই V. C. ( Victoria Cross ) পাইল, দিশি সেপাইটার নাম উল্লেখ পর্য্যন্ত করিল না। লড়ে মরে ভারতীয় সেপাইরা, বাহবা পায় ইংরেজ সেপাইরা। তাদের জাতের তো এই বীরত্ব, এই শ্রায় বিচার!

দেখ্ এই ভারতবর্ষটিকে Hypnotism করে ফেলেছে তাহাতেই অল্প সংখ্যক ইংরেজ ভারতবাসীদের বুকের উপর ব'সে রক্ত চুষে খাচ্ছে। কিন্তু যে দিন Hypnotism ( যোহিনীশক্তি ) চুলোয় যাবে এবং ভারতবাসীরা নিজেদের ভিতরকার শক্তি বুঝিতে পারিবে সেদিন তাদের চেপটে মেরে ফেল্বে “will squeeze you like lemon” এই বলিয়া নিজে হাতে হাতে ঘর্ষণ করিয়া দেখাইতে লাগিলেন।

দেখ, তোদের ইংরেজ জাতটা এখনও টিকে আছে কেন জানিস্ ? ফরাসীরা খুব বড় জাত হয়েছিল, খুব বীরের মত কাজ করেছিল। ওদের একটা দোষ হয়েছিল সেনাপতিরা, মন্ত্রীরা, বিদেশীর কাছে ঘুষ খেয়ে নিজেদের জাতের অনিষ্ট করত। লড়াইয়ের মাঠে নিজের ফোজ ধরিয়ে দিত। তাহাতে ফরাসী জাতটা পড়ে গেল। তোদের হাজার দোষ দেখছি। তোরা অতি নিষ্ঠুর ও স্বার্থপর জাত। কিন্তু একটা গুণ দেখছি, জাতির প্রতি ভালবাসাটা খুব প্রবল রয়েছে, মন্ত্রীরা, সেনাপতিরা ঘুষ খেয়ে সেপাই ধরিয়ে দেয় না। নিজের জাতের অনিষ্ট করে না, শুধু এই গুণটার দরুণ তোদের জাতটা এখনও টিকে রয়েছে। যে দিন তোদের মন্ত্রী ও সেনাপতিরা শত্রুর কাছে ঘুষ খেয়ে নিজের জাতের অনিষ্ট করবে সেইদিন থেকে তিন দিনের ভিতর চূর্ণ হ'য়ে যাবে, সব গুঁড়িয়ে যাবে ; আর আগে তোরা বা জঙ্গলী ছিলি সেই জঙ্গলী থাকবি।”

একদিন মোগল সাম্রাজ্যের কথা উঠিল। কেন এতবড় রাজ্য চূর্ণ হয়ে গেল ? স্বামীজী বলিতেন যে, মোগল সাম্রাজ্য নিজের মোগল সাম্রাজ্যের  
কথা।  
পাপে নিজেই ধ্বংস হয়ে গেল।

স্তার টমাস্ রো যখন ইংরেজদূত হইয়া জাহাঙ্গীরের দরবারে যান, তিনি লিখিয়াছেন, মোগল সম্রাট যখন একস্থান হইতে অপর স্থানে যায় তখন তাহার সঙ্গে একটা সহর চলে, সহরে যত শ্রেণী লোক বাস করে বাদশাহের তাঁবুর সহিত তত শ্রেণী লোক চলিয়া থাকে। কয়েক লক্ষ লোক শিবিরের সহিত গমন করিয়া থাকে, কোন জিনিসের অনাটন বা অভাব থাকে না। স্নানাগার বা হামম খানা, সে এক বৃহৎ ব্যাপার হইয়াছিল। তারপর রান্নাবাড়ার ব্যাপার, তা আর কহিব্য নয়। পৃথিবীর মধ্যে ঐশ্বর্য্যে ও প্রতাপে মোগল বাদশাহ সর্ব্বশ্রেষ্ঠ হইয়াছিল। কবির কল্পনার বস্তু হইয়াছিল।



## লণ্ডনে বিবেকানন্দ

জাহাঙ্গীরের পর সাজাহান ও আওরঙ্গজেবের ঐশ্বর্য ও ভোগবিলাস আরও বাড়িতে লাগিল। সেপাইয়ের সংখ্যা এত বেশী হইয়াছিল যে এক টাকা মাসিক বৃত্তিতে একজন সেপাই নিযুক্ত হইত। কিন্তু এত সেপাই রাখার ব্যবস্থায় বিশৃঙ্খলা আরম্ভ হইল। সেপাইরা নিজেরাই গ্রাম, নগর লুণ্ঠ করিতে লাগিল। এইরূপে প্রজার উপর নানা অত্যাচার হইতে লাগিল, অতিরিক্ত ভোগ-বিলাস ও অতিরিক্ত সেপাই রাখার দরুন রাজ্য-ব্যয় সঙ্কুলান হইল না, সেইজন্ত চাপে সাম্রাজ্য চূর্ণ হইয়া গেল।

ইংরেজরা অসাবধান ও লোভের বশবর্তী হইয়া অতি বিস্তৃত রাজ্য ইংরেজ রাজ্য করিতেছে এবং প্রায়ই রাজ্যের পরিধি বাড়াইতেছে। ঋংসের কথা। উপযুক্ত পর্যবেক্ষণের লোক তেমন নাই। প্রায়ই তো বিশৃঙ্খলার সংবাদ পাওয়া যাইতেছে। গুটিকতক স্বার্থপর ইংরেজ মন্ত্রী এত বড় সাম্রাজ্য নিজের স্বৈচ্ছায় চালাইতেছে এবং নানাবিধ সিপাই সান্দ্রীর খরচা উত্তরোত্তর বৃদ্ধি পাইতেছে, “It will crumble to pieces out of sheer weight” এই চাপেই ইংরেজ রাজ্য চূর্ণ হয়ে যাবে, এত বড় রাজ্য কখনও চলতে পারে না।

রোমের বাদশাহেরা সহরের লোককে ঠাণ্ডা রাখিবার জন্ত নিজ ব্যয়ে সহরের গরীব লোককে খাইতে দিত। তাহার রোমান বাদশাহের কথা। নির্ভাবনায় খাইতে পাইয়া গুণ্ডার দল তৈয়ারী করিত এবং নানা প্রকার উপদ্রব করিত। মোগল বাদশাহেরা দিল্লীর অনেক গরীব লোককে বিশেষতঃ মুসলমানকে নিজের ব্যয়ে খাইতে দিত। তাহাতে একদিকে যেমন ভাল হইত তেমনি অপর দিকে গুণ্ডা, চোর ছাঁচোড়ের সংখ্যা বৃদ্ধি পাইত। পরিশেষে ইহারই কুফল হইয়াছিল। ইহাও মোগল সাম্রাজ্য ঋংসের একটা কারণ। গুণ্ডা বদমাস লোকেরা জোর জবরদস্তি করে সরকারী খরচায় নিজেদের সংসার প্রতিপালন

করিত, আর না পাইলেই বিপ্লব করিত, ইহাতে রাজ্যের স্বেশাসন  
চলে না ।

একদিন স্বামীজী বলিতে লাগিলেন, ভারতবর্ষের লোকের বর্ণ সাদা  
ছিল, White Indians এইরূপ উল্লেখ পাওয়া যায় । তারপর বৌদ্ধধর্মের  
বহুল প্রচার হওয়ায় নানা শ্রেণীর রক্ত সংমিশ্রণ হয় এবং তাতার ও  
ভিন্ন জাতির সহিত রক্তের সংমিশ্রণ হয় । তারপরই ভারতবর্ষে  
লোকের বর্ণ মলিন হয়, এইটী বৌদ্ধ ধর্ম প্রচারের একটি দোষ রহিয়া  
গিয়াছে ।

## আট

একদিন ইংরেজের ও চীনের লড়াইয়ের কথা উঠিল। গুডউইন বলিতে লাগিলেন, ইংরেজেরা নিজের বীরত্বে তাহাদের বিরাট রাজ্য চীনের লড়াই স্থাপন করিয়াছে, ইংরেজই তাহা নিজের বলে সংরক্ষণ ও করিবে। স্বামীজী শুনিয়া একটু বিরক্তভাবে প্রকাশ হিন্দুর বীরত্ব। করিয়া প্রকৃত ইতিহাসের কথা বলিতে লাগিলেন। তিনি বলিতে লাগিলেন, “চীনের লড়াই বা অল্প যায়গাকার লড়াইয়ে ইংরেজরা কি ক’রেছিল? আমার হিন্দু-সেপাইরা সর্বত্র গিয়ে লড়াই করেছে, লড়াইয়ে জিতেছে, নিজের গায়ের রক্তপাত করে রাজ্যস্থাপন করেছে আর সেই রাজ্য ইংরেজের হাতে তুলে দিয়েছে। হিন্দুর রক্তেও হিন্দুর অর্থে এত বড় সাম্রাজ্য হয়েছে। তোরা ইংরেজরা কি করেচিস? হিন্দুর রোজকারের জিনিস, মাঝখান থেকে তোরা মুনাফা খাচ্ছিস। ইজিপ্টের যুদ্ধে কারা লড়াই ক’রেছিল? আমার হিন্দু সেপাইরা গেছলো। তাদের মত সাম্রাজ্য বাড়িয়েছিল, যে জায়গাটা অধিকার করেছিল সবটায় আমার হিন্দু সেপাই লড়েছে। তাহাদের গায়ের রক্ত জলের মত ঢেলেছে, আর তাদের টাকা অজস্র ঢেলেছে, তবে তোরা তো বড় সাম্রাজ্য স্থাপন করেছিস। পলাশীর লড়াইয়ে কয়টি ইংরেজ ছিল? সবই তো আমার দেশী সেপাই, এরাই তো ইংরেজ রাজ্য জয় করলে। মিউটিনির সময় কয়জন ইংরেজ ছিল? আমার দেশী সেপাইরাই তো রাজ্য জয় করে

ইংরেজের হাতে ভুলে দিলে। তাদের জাত লড়ায়ে কবে বীরত্ব দেখিয়েছে? নিজেরা তো কাপুরুষ, লোককে ভুলিয়ে (Hypnotise) জগতের উপর আধিপত্য ক'রছি। হিন্দুর রক্তে ও হিন্দুর অর্থে এই ব্রিটিশ সাম্রাজ্য স্থাপন হয়েছে—জেনে রাখিস, আজকের ব্রিটিশ এম্পায়ার একদিন হিন্দু সাম্রাজ্য হ'য়ে যাবে। রোমানরা যেমন স্পেন, জার্মানী, গ্রীস প্রভৃতি নানা দেশ জয় করেছিল, পরে স্পেনিয়ার্ডরা ও জার্মানরা রোমের বাদশাহা হয়ে বসল। রোমানরা তখন অধীনস্থ হ'য়ে রইলো, তাদের ব্রিটিশ সাম্রাজ্যটা ঠিক সেইরূপ হয়ে যাবে।”

এইরূপ তীব্র কথা শুনিয়া গুডউইনের মনে জাতীয় ভাব প্রদীপ্ত হইয়া উঠিল। গুডউইন বলিতে লাগিলেন, “No Swami, your men do not know how to fight.” স্বামীজী আরও উত্তেজিত হইয়া তাঁহাকে বলিলেন, আমার হিন্দুরা লড়াতে জানে না? গ্রীকদের আলেকজান্ডার যখন পারস্ত জয় ক'রে গর্কে মহা স্ফীত হ'য়ে ভারতবর্ষ আক্রমণ করে কে তাহাকে প্রথম রুকে ছিল? সেই একজন হিন্দুরাজা পোরাস (Porus) আলেকজান্ডারের যুদ্ধতৃষ্ণা মিটিয়ে দিয়েছিল। Battle of Arbelaতে ভারতীয় সৈন্য পারস্ত সম্রাট Danu Codomanusএর সহায় হয়ে ভীষণ যুদ্ধ করেছিল এবং আলেকজান্ডারের সেনাপতি পারমীনীয়াসের সেনা বিভাগকে বিধ্বস্ত ও বিদ্রোপিত করেছিল। এইজন্ত আলেকজান্ডার ভারতবাসীদের সহিত যুদ্ধ করিতে মনস্থ করে। দেখ, তুমি বলো আমার হিন্দুরা লড়াতে জানে না। আবহমান কাল থেকে হিন্দুরা বীরত্বের জন্ত বিখ্যাত। তবে তাহারা ইংরেজ জাতের যত নিমক-হারামী জানে না ও অকৃতজ্ঞ নয়। জান না—মিউটিনির সময় সিপাইরা বল্লো, অনেক দিন ইংরেজের নিমক খেয়েছি, তাদের এখন বিপদ, তাদের এখন কোনরূপে বাঁচাতে হবে। এইজন্ত তাহারা নিজের লোক উচ্ছন্ন দিয়ে

লগনে বিবেকানন্দ

বিদেশী রাজ্য পুনরায় স্থাপন করল। হিন্দুদের হচ্ছে chivalrous spirit, তারা অতো নিমকহারামী বা বেইমানী জানে না। আর তোমরা যে বড় জাত বলে এত বড়াই কর, ভারতবর্ষ তো জোচ্চুরি করে নিয়েছ। তোমাদের মাথায় তো একটি নরম বালিশ ছিল না, অতি গরীব নগণ্য জাত ছিলে। ইয়োরোপের ইতিহাসে ইংরেজরা পিছনে-পড়া জাত। ফরাসীরাই তখন প্রধান জাত ছিল; শুধু ভারতবর্ষ পেয়ে, ভারতবর্ষের ধনরাশি পেয়ে তোমাদের তো এখন এত বল হয়েছে। কিন্তু দেখ, যে দিন হিন্দুদের মোহ কেটে যাবে এবং ভিতরকার সুসুপ্ত শক্তি জাগ্রত হবে সে দিন লেবু নিচড়োনার মত তোমাদের সব চেপটে ফেলবে, will squeeze you like lemon—এই বলিয়া নিজের করছয় নিষ্পেষণ করিয়া দেখাইতে লাগিলেন।

গুডউইন বলিতে লাগিলেন, “You are a great man, no doubt, but your men do not know how to govern themselves. We, British people are the best men to govern India.”

স্বামীজী গুডউইনের এই কথা শুনিয়া একেবারে উত্তেজিত হইয়া উঠিলেন। তিনি বলিতে লাগিলেন, চন্দ্রগুপ্তের সময় মেগাস্থেনিস যখন ভারতে আসিয়াছিল, সে সমস্ত লিখিয়া গিয়াছে। তাহার লেখা হইতে পাওয়া যায় যে, গ্রামগুলি এক একটি ছোট Republic, গ্রামবাসীরা একজনকে প্রধান নিযুক্ত করে, এই নিযুক্ত ব্যক্তিই গ্রামের সমুদায় কার্য দেখিয়া থাকে। চুরি, ডাকাতি নাই বলিলেও হয়। প্রত্যেকে নিজে নিজে ব্যবসা করে এবং স্বখে স্বচ্ছন্দে দিনপাত করে। লোকেরা অতিশয় সত্যবাদী ও ধর্মপরায়ণ, কুটিলতা বা প্রবঞ্চনা তাহাদের মধ্যে নাই বলিলেও অত্যাুক্তি হয় না।

স্বামীজী আরও বলিতে লাগিলেন যে, সব স্থানে ইংরেজের প্রভাব

প্রবেশ করে নাই বা হিন্দু রাজাদের রাজ্যে প্রজারা এখনও অনেক  
 পরিমাণে সুখে বাস করে। কিন্তু যেখানেই ইংরেজের  
 ইংরেজ রাজত্বে কিছু প্রভাব প্রবেশ করেছে সেখানেই হুঃখ, দারিদ্র্য  
 ভারতের দুর্দশা ও নানা রকম উৎপাতের স্রু হইয়াছে। ইংরেজেরা ছলে  
 বলে গরীব প্রজাদের লুটতরাজ করচে। তাহারা কেবল নিজেদের দেশেরই  
 শ্রীবৃদ্ধি, ঐশ্বর্য্য বিস্তারের চেষ্টা করছে। ভারতবাসীরা ক্রমশঃই গরীব হ'য়ে  
 পড়ছে। গুডউইনের দিকে দৃষ্টি রাখিয়া বলিলেন, “এই ত’ তোমাদের  
 শাসন প্রণালী, তবুও বলছ, ভারতবাসীরা নিজেদের শাসন করতে জানে  
 না?” স্বামীজী ঐতিহাসিক বিষয়ে সর্বদাই উত্তেজিত হইয়া উঠিতেন।

গুডউইন কিন্তু স্বামীজীর একজন প্রধান ভক্ত হইলেও ইংরেজের যা  
 গোড়ামি তা সম্পূর্ণভাবে প্রকাশ করিতে লাগিলেন। গুডউইন  
 radical দলের লোক হইলেও তাঁহার ঐ একই কথা “No Swami,  
 your men do not know how to fight. We, the British people  
 are the best fighters. No Swami, you are a great man, no  
 doubt, but your men do not know how to govern themselves.”  
 স্বামীজী এবারেও উত্তেজিত হইয়া অনেক কড়া কথা বলিলেন, যথা,  
 ক্লাইভের ‘Red treaty and white treaty’ অর্থাৎ উমিচাঁদের সহিত  
 সন্ধিপত্র ও মিরজাফরকে সন্ধি পত্র দেওয়া, নিজের নাম সহি করা  
 প্রভৃতি। এই প্রসঙ্গে ইহার বিস্তারিত আলোচনা করা হইল না।

একদিন কথা উঠিল যে Sir M. M. Bhowmagiri নামক একজন  
 পাশী Parliamentএর সদস্য হইয়াছেন। গুডউইন  
 পার্লামেন্টের বড় নাম উচ্চারণ করিতে না পারিয়া অনেক প্রকার  
 সদস্যপদ ব্যঙ্গ করিয়া উচ্চারণ করিবার চেষ্টা করিতে  
 লাগিলেন। স্বামীজী বলিলেন, প্রথম Parliamentএ সদস্য হইবার চেষ্টা

## লণ্ডনে বিবেকানন্দ

একজন বাঙ্গালীর মাথা হইতে উঠে। লালমোহন ঘোষ কলিকাতার একজন ব্যারিষ্টার। তিনিই প্রথম এই চেষ্টা করেন কিন্তু কৃতকার্য হন নাই ও পরে একেবারে নষ্ট হইয়া যান। তারপর এই চেষ্টারই ফলে নাগরাজী একজন পার্শী Parliamentএ প্রবেশ করেন ও তারপর এই Sir Bhownagiri সদস্য হন। কিন্তু প্রথম একজন বাঙ্গালীই এ পদের জন্ত চেষ্টা করেন।

যেদিন গুডউইনের সহিত ভারতীয় রাজনৈতিক ব্যাপার সম্বন্ধে কথা হয় স্বামীজী বলেন, “দেখ, আমি কয়েকদিন পূর্বে এক Generalএর ভারতীয় রাজনীতি সহিত ভারতীয় রাজনীতির বিষয় আলোচনা করিয়া- সম্বন্ধে জেনারেলের ছিলাম। আমি কথাপ্রসঙ্গে কহিলাম যে, ভারত-মন্তব্য বর্ষ পাইবার পূর্বে ইংরেজদের মাথায় এত নরম বালিশ ছিল না, তাহারা সামান্ত নগণ্য জাতি বলিয়া পরিচিত ছিল—শুধু ভারতবর্ষ হাতে পাইয়া এবং ভারতের সোণা, দানা লুট করিয়া আজ তাহারা ভোগ বিলাসী হইয়া উঠিয়াছে।” জেনারেলটী নিজেই এই কথা স্বীকার করিয়া বলিলেন যে, ভারতবর্ষই ইংরেজদের সকল দিক দিয়া বাড়াইয়া দিয়াছে। গুডউইন ভারতের ইতিহাস বা নিজের দেশের প্রাচীন ইতিবৃত্ত বিশেষ জানিতেন না, শুধু খবরের কাগজ হইতে বর্তমান সময়ের কথা পাঠ করিয়া যতটুকু জ্ঞান থাকা সম্ভব তাহাই তাঁহার ছিল। এইজন্ত উভয় দেশের ইতিহাস পুঙ্খানুপুঙ্খরূপে স্বামীজীর নিকট হইতে শুনিয়া বিস্মিত হইতেন। নিজেদের জাতের বিরুদ্ধে কথা শুনিলে আপত্তি করিতে যাইতেন বটে, কিন্তু এরূপ আলোচনায় স্বামীজীর উপর তাঁহার শ্রদ্ধা আরও অকপট হইয়া উঠিত। মুখে তাঁহার একই বুলি ছিল, “ইংরেজরাই পৃথিবীর মধ্যে সর্বশ্রেষ্ঠ জাতি, ভারতের লোকেরা সমস্ত কাজেরই অল্পযুক্ত।”

স্বামীজী সময় সময় দু'চার দিন ধরিয়া উত্তেজিত হইয়া থাকিতেন। এইরূপ এক সময়ে সারদানন্দ স্বামীর সহিত কংগ্রেস লইয়া কথাবার্তায়া তিনি বলিলেন—“ভারতের লোকগুলো কংগ্রেস, কংগ্রেস কংগ্রেস ও ভারতের দাবী করে মিছামিছি হৈ চৈ কর্চে কেন? কতকগুলো হাউড়ো লোক এক জায়গায় জুটে কেবল গলা বাজি করলেই কি কাজ হয়? চেপে বসুক, নিজেদের Independent ব'লে declare করুক, হেঁকে বলুক আজ থেকে আমরা স্বাধীন হ'লাম, আর সমস্ত স্বাধীন Governmentকে নিজেদের Declaration পত্র পাঠিয়ে দিক্, তখন একটা হৈ চৈ উঠবে।” তারপর তিনি বলিতে লাগিলেন, “জগতে ভারতবর্ষ ব'লে যে একটা দেশ আছে, তা বেশীর ভাগ লোক জানেই না, আমেরিকানরা কি করে সারা জগতে সাড়া তুলেছিল? কেবল কি গলা-বাজিতে কাজ হয়? বেপরোয়া হ'য়ে কাজ করতে হবে, বিধিমতে কাজ করে যাব, তাতে যদি গুলি বৃকে পড়ে, প্রথমে আমার বৃকে পড়ুক,”—এইরূপ বলিতে বলিতে দাঁড়াইয়া উঠিয়া পাঁয়চারি করিতে লাগিলেন।

পরে আবার বলিতে লাগিলেন—“পড়ুক গুলি আমার বৃকে, আমেরিকা, ইউরোপ একবার কি রকম কেঁপে উঠবে! তখন বুঝবে; বিবেকানন্দ কি জিনিস! আমেরিকায় এমন স্থান নেই যেখানে ২০।৩০ হাজার লোক নিতান্তই আমার অনুগত নয়। আমার রক্ত পড়লে সারা জগতে একটা সাড়া পড়ে যাবে। Congress জোর গলায় নিজেদের স্বাধীনতা declare করুক, শুধু মাগীদের মতন ব'সে ব'সে কাঁছনি গাইলে কি হবে?” স্বামীজীর এই উত্তেজিত ভাবের কথাবার্তা শুনিয়া সারদানন্দ স্বামী ও বর্তমান লেখক নীরবে স্তম্ভিত হইয়া শুনিতে লাগিলেন।



## লগনে বিবেকানন্দ

স্বামীজী একদিন রুবিয়ার কথা বলিতে লাগিলেন। জঙ্গলী রুশগুলো ইউরোপ ও এসিয়ার মাথার উপর চেপে বসে আছে। রুবিয়ার কথা। তাদের জমিজমা সব একলাস্ত অর্থাৎ এক সঙ্গে। রুশ গভর্নমেন্ট খুব জবরদস্ত। সেন্ট্রাল এসিয়ার তাতারগুলো চিরকাল জগতে উৎপাত করে এসেছে, কিন্তু সেই দুর্ভিক্ষ তাতারগুলোকে সায়েস্তা করেছে রুশেরা, তাদের টুঁ শব্দটী পর্য্যন্ত করবার উপায় নেই। এখন রুশেরা যখন যার উপর ইচ্ছা অত্যাচার করে, তাদের জমি একলাস্ত থাকায় বিশেষ সুবিধা। ইংরেজদের এ বিষয়ে বড়ই অসুবিধা, কারণ রুশদের মত তাদের জমি এক জায়গায় না থেকে বিভিন্ন বড় বড় টুকরা টুকরা যায়গা নিয়ে তাদের ঘর করতে হয়। স্বামীজী প্রায়ই বলিতেন, এই রকম বিচ্ছিন্ন সাম্রাজ্য চিরকাল চলতে পারে না—শীঘ্রই আলগা বাঁধন একেবারেই খুলে বাবে।

একদিন ঐতিহাসিক প্রসঙ্গ ব্যাপারে নুরজাহানের কথা উঠল। স্বামীজী প্রাতর্ভোজনের পর নুরজাহানের ইতিবৃত্ত নুরজাহানের কথা। আরম্ভ করিলেন। জাহাঙ্গীর সিংহাসনে বসেই কিরূপে সের খাঁকে হত্যা করিয়ে নুরজাহান ও তার কন্যাকে আগ্রায় কয়েদ করে আনল সে বিষয়ে স্বামীজী আগাগোড়া বলে যেতে লাগলেন। নুরজাহানকে রাজবাড়ীর একটা নীচু ঘরে রাখা হ'ত, প্রথম প্রথম নুরজাহান জাহাঙ্গীরের সঙ্গে কথাবার্তা কওয়া দূরে থাক্, স্বামীহস্তা বলে তাকে খুবই ঘৃণার চক্ষে দেখত। জাহাঙ্গীর মনে করল, নুরজাহান নিরাশ্রয়া হ'লেই অচিরেই তাহার শরণাগত হবে কিন্তু নুরজাহানও জাহাঙ্গীরকে পরাজয় করতে দৃঢ় সঙ্কল্প করল। নুরজাহান নতুন নতুন বেশ পরে' জাহাঙ্গীরের সুমুখ দিয়ে মাঝে মাঝে চলে যেত এবং জাহাঙ্গীরের দিকে বেশ অবজ্ঞার দৃষ্টি দিয়েই মুখ ফেরাত। এই রকম

কিছুদিনের পর জাহাঙ্গীর কাবু হ'য়ে পড়ল। জাহাঙ্গীরকে পরাজয় স্বীকার করিয়ে হুরজাহান তাকে বিবাহ করে। হুরজাহানের কথা-প্রসঙ্গে স্বামীজী তার জন্মবৃত্তান্ত আরম্ভ করলেন। হুরজাহান পারস্যদেশীয় এক বণিকের কন্যা, বণিকের কাজকর্ম নষ্ট হতে যায়। সেই সময় ভারতবর্ষে আকবর বাদশার খুব নাম। বাদশার আশ্রয় পাবার জন্তে বণিক ভারতবর্ষে আসে। তখন তার স্ত্রী গর্ভবতী ছিল। পথিমধ্যেই একটা কন্যারূপে প্রসব করে। বণিকের অবস্থা সে সময় এত বিপর্যস্ত যে মেয়েটিকে দুধ খাওয়াবার পর্য্যন্ত সঙ্গতি ছিল না। মরুদেশে জল মেলাও কঠিন। তাই গায়ের ঘাম খাইয়ে মেয়েটির জিভ ভিজিয়ে রাখতে হ'ত। যখন কোনও মতেই মেয়েটিকে বাঁচাবার সুবিধা হ'ল না, একটা স্ত্রীলোকের কাছে মেয়েটিকে বিক্রী করে ফেললে। স্ত্রীলোকটি মেয়েটিকে অপরের কাছে থেকে কিনলেও তার উপর এত মায়া পড়ে গেল যে নিজের কন্যার অধিক স্নেহ করতে লাগল। সেও বণিকের সঙ্গে সঙ্গে ভারতবর্ষে এসেছিল। ভারতবর্ষে পৌঁছিলে ভারতসম্রাট আকবর বাদশা বণিকের থাকবার স্থানের বন্দোবস্ত করে দিলেন, বণিকের আবার হস্তান্তর পরিবর্তন হল।

স্বামীজী একদিন বলতে লাগলেন, তাইমুরের জন্ম হয় মধ্য-এসিয়ার।

লোকটা লেঙ্গড়া ছিল, এইজন্তে লোকে তাকে তাইমুরের কথা।

তাইমুরলঙ্গ বলত। প্রথম জীবনে তাইমুরের দুর্দশার অবধি ছিল না, তারপর যুদ্ধ জয় করে পৈত্রিক রাজ্য হস্তগত করে। এই সময় সে বর্কর তাতারদের এককাটা করে এবং লুটের অংশ পাওয়া বাবে এই লোভে অনেক জঙ্গলী তাতার তাইমুরের খোঁজে আসতে লাগল। তাইমুর দেশ বিদেশ লুণ্ঠ করতে লাগল এবং নগর,

## লগুনে বিবেকানন্দ

গ্রাম যেখানেই যেতো, সেগুলোকে একবারে ধ্বংস করে ফেলায় তার পৈশাচিক আনন্দ ছিল, আর অধিবাসী লোকগুলোকে নিশ্চয় ভাবে মেরে ফেলত। জঙ্গলী তাতার তাইমুরের সঙ্গে এত জড় হ'ল যে, কোন রাজ্যই তাইমুরের বর্বরতার প্রতিরোধ করতে সক্ষম হ'ল না। এই রকম করে নানা দেশ উচ্ছন্ন দিয়ে, শেষে ভারতবর্ষে সদলবলে তাইমুর প্রবেশ করে ও ভারতবর্ষকে রীতিমত আক্রমণ করে। দিল্লী, মথুরা প্রভৃতি সহরে লোকগুলোকে মেরে উজাড় করে দিতে লাগল এবং যত মানুষ মারতে লাগল, ততই মারবার ইচ্ছেটা আগুনের মত হুঙ্কা দিয়ে উঠতে লাগল। ভারতবর্ষ থেকে ফিরতি মুখে বহুসংখ্যক লোককে গোলাম করে' বেচবার জন্ত নিয়ে গেল। যখন হিমালয় ভেদ করে নিজের দেশ মধ্য এসিয়ার দিকে যাচ্ছে, তখন হঠাৎ দেখল তার সঙ্গে খোরাক আর বেশী নেই। পথও অনেক বাকী—অবশেষে এক লক্ষ ভারতীয় করেদীকে কেটে ফেলবার ছকুম দিল। তার জঘন্ত অল্পচরেরা আজ্ঞা পাবামাত্রই তাদের মাথা এক এক করে উড়িয়ে দিল। এত নির্ধূরতা ইতিহাসে বিরল—এক লক্ষ লোকের মাথা কাটা ছেলেখেলার মতই তাইমুরের কাছে মনে হ'ত। তাইমুরের নৃশংস হত্যাকাণ্ড স্বামীজী এরূপ ভাবব্যঞ্জক ও বিরক্তিপূর্ণ উত্তেজনা সহকারে বলতে লাগলেন যে শ্রোতার যেন সেই ছবিগুলি চোখের সামনে বিভীষিকার মত দেখতে লাগল। ভয়ে সকলের মুখ বিবর্ণ হয়ে উঠেছিল।

একদিন স্বামীজী কাশীর রাজা চৈৎ সিংএর কথা স্মরণ করলেন। ওয়ারেন

চৈৎ সিংয়ের  
ইতিহাস।

হেষ্টিংসের সেপাইরা কি করে চৈৎ সিংএর রাজ্য লুট করেছিল ও লোকের উপর অত্যাচার করেছিল সমস্ত বলতে লাগলেন। ওয়ারেন হেষ্টিংসে-এর সেপাইদের

অত্যাচার দেখে কাশীর লোকেরা রাজবাটীতে গিয়ে চৈৎসিংকে বললে—

“শিগগীর পালান, নইলে আপনিও মারা যাবেন।” এই বিষয়ে তারা একটা ছড়া বেঁধেছিল।

“হাতিপর হাওলা, নেইত ঘোড়ে পর জিন্।

ভাগো ভাগো আতে ওয়ারাণ হেষ্টিং ॥”

কিছুদিন পরে ওয়ারেণ হেষ্টিংস যখন নিজে কাশীতে আসে, তখন সহরের লোকেরা যে যেখানে পারল, বাড়ী ঘর ছেড়ে পলায়ন করেছিল। তখন নৌকা বা বজ্রা করে কাশী যেতে হ’ত। ওয়ারেণ হেষ্টিংস নিজের লোকদের জিজ্ঞেস করল, “লোকগুলো পালায় কেন?” হেষ্টিংসের লোকেরা খবর নিয়ে এসে জানাল যে, কোম্পানীর লোকেরা আগে এরূপ অত্যাচার করেছে যে তা বলবার নয়, এখন ওয়ারেণ নিজে আসছে শুনে তাদের ভয় হয়েছে এবার অত্যাচারের পরাকাষ্ঠা হবে, এইজন্তে প্রাণ-ভয়ে তারা যে যেদিকে পারে পলায়ন আরম্ভ করেছে। হেষ্টিংস শুনে স্তম্ভিত হয়ে গেল। ইষ্ট ইণ্ডিয়া কোম্পানীর লোকেরা প্রথম প্রথম এইরূপ অত্যাচার করত।

তারপর মিউটিনের কথা উঠল। স্বামীজী বলতে লাগলেন, প্রথমে ইষ্ট ইণ্ডিয়া কোম্পানী মহা অত্যাচার করিতে আরম্ভ মিউটিনের কাণ্ড।

করে। তারা পার্লামেন্ট বা কিছুই মান্ত না। কারবারী কোম্পানী একটা বিপুল সাম্রাজ্য পেয়ে গেল। কারবার চালাবে না রাজত্ব করবে? লাভ করাই প্রথম প্রথম তাদের একমাত্র উদ্দেশ্য ছিল, এইজন্তে নানা বিষয়ে যথেষ্টাচার করতে লাগল। এই-রূপে কিছুদিন কারবার করার পর কোম্পানীর ভারতীয় সেপাইরা পর্য্যন্ত চটে গেল। তারা কোম্পানীর হাত থেকে ভারতকে বাঁচাবার জন্ত লড়াই করতে পেছপাও হ’ল না। কিন্তু নায়ক ত সে সময় একটা নয়, ভিন্ন ভিন্ন নায়ক। মুসলমানেরা বলল, তারা দিল্লীর বাদশাকে পুনরায়

## লগুনে বিবেকানন্দ

ক্ষমতাশালী করবে, হিন্দুরা ককে উঠল, তারা বাজীরাওএর ছেলে নানা সাহেবকে হিন্দু সম্রাট করবে। ছোট ছোট নেতারাও যে যার স্বাধীন রাজা হবার চেষ্টা করলে। সকলেই স্ব স্ব প্রধান, কেউ কারুর কথা কাণে দেয় না—সেপাইরা ইংরেজী ভাবে লড়াইয়ে শিক্ষিত, কিন্তু না আছে তাদের নায়ক, না আছে খোরাক। অবশেষে এক মুঠো চালের জন্তে তারা লুটপাট আরম্ভ করল এবং নিজেদের পর্যাস্ত রাজ্য লুট করতে শুরু করল। হিন্দুরা মুসলমানদের, মুসলমানরা হিন্দুদের লুট তরাজ করতে লাগল। এমন চরবস্থায় সেপাইরা পড়েছিল যে খোরাকের জন্ত তাদের এক গাছা মুক্তার মালা বেচতে হয়েছিল। এই সুযোগ পেয়ে ইংরেজরা নতুন দেশী সেপাই তৈরী করে মিউটিনি (mutiny) দমন করে ও দ্বিতীয় বার ভারতবর্ষ জয় করে। ইষ্ট ইণ্ডিয়া কোম্পানীর অত্যাচারের ফলে ভারতের রাজ্যাশাসন হস্তান্তরিত হ'ল—পার্লামেন্টের হাতে গেল। আগে কোন বিচার করতে হ'লে কোর্ট অফ ডিরেক্টরস্ (Court of Directors) ছাড়া অপর কেহ ছিল না। তারা যা ইচ্ছা তাই করত, এখন পার্লামেন্টের হাতে যাওয়ার শৃঙ্খলা অনেক পরিমাণে এসেছে, কিন্তু অপমানের লাঞ্ছনা যেমন ছিল তেমনই আছে, কেবল প্রকার-ভেদ।

গুড্‌উইন radical পন্থীর লোক ছিলেন, এইজন্ত জমিদারের উপর বড় চটা ছিলেন। একদিন বলিতে লাগিলেন, ভারতবর্ষের গবর্ণমেন্টের ইংলণ্ডের জমির খাজনা ও লবণ শুল্ক।  
আয় কি ? সারদানন্দ স্বামী বলিলেন যে, জমির খাজনা বা land revenue এইটাই বিশেষ আয়, তা ছাড়া অল্প সকল বিষয়েই টেক্স আছে, গবর্ণমেন্ট এত টেক্স নেয় যে প্রজারা জর্জরিত হইয়াছে। এমন কি লবণের উপরেও টেক্স দিতে হয়। ভারতবর্ষে প্রত্যেক জিনিসের উপর টেক্স ; মুসলমানদের সময়ে আরঙ্গজেবের জেজিয়া বা খাজনা ছিল। সেটা খালি হিন্দুর উপর কর

ধাৰ্য্য হইয়াছিল, মুসলমানেরা বাদ ছিল। সেটা শুনি যে ভীষণ, তবু লোক তখন খাইতে পাইত কিন্তু ইংরাজ আমলে টেক্স এত বেশী যে লোক খাইতে পায় না। গুড্‌উইন এই কথাগুলি শুনিয়া চটিয়া গেলেন এবং ইংরাজকে গালি দিতে লাগিলেন। তারপর গুড্‌উইন নিজেদের দেশের কথা বলিতে লাগিলেন। দেখ দেখি, এই দেশে কি অত্যাচার ? এইখানকার জমিদারেরা হইতেছে জায়গীরদার, তাহারা এক পয়সা খাজনা দেবে না। Land revenue সমস্ত ইংলণ্ডে মাত্র পাঁচ হাজার পাউণ্ড। আর প্রজারা টেক্স, খাজনা সব দেবে। সারদানন্দ স্বামী ও বর্তমান লেখক ইংলণ্ডে জমীর খাজনা নাই, কেবল মাত্র Land revenue পাঁচ হাজার পাউণ্ড শুনিয়া অবাক হইয়া রহিলেন। সারদানন্দ বলিলেন, ভারতবর্ষে গভর্ণমেন্ট হচ্ছে বড় জমিদার ও জমির মালিক। গভর্ণমেন্ট ছোট ছোট জমী ভাগ করিয়া লোককে দেয় ও খাজনা লয়। গুড্‌উইন বলিলেন, আমাদের দেশে জমী জাইগীরদারদের। রাজার নিজের দরুণ খানিক জমি আছে তাহাকে crown land বলে। তাহা ছাড়া গভর্ণমেন্টের বিশেষ জমি নাই। এই জমিদারগুলি নিজেরা ভাড়া নেবে, নানা রকম করে টেক্স খাজনা নেবে, আর খাজনা টেক্স কিছু দেবে না। রাজস্ব সমস্ত পড়ল গরীব প্রজাদের উপর। এই সব জমিদারেরা বাইতে পারে না। নিজেরা শুধু লাভটা খাবে, আর গরীব প্রজারা টেক্স খাজনার ভার বহিবে। দেখ দেখি এই বিশপগুলো, উহার তো জমীদার, অট্টালিকা বাড়ীতে থাকবে। কি রকম চেয়ার, কি খোস তোয়াজে থাকবে, আর গরীবগুলো শক্ত কাঠের চেয়ারে বসবে, আর লর্ড বিশপের দরুণ টেক্স খাজনা যোগাবে। এই সব দেখিয়া সাধারণ লোকেরা চটিয়া গেছে, কেন বিশপেরা কি সাধারণ লোকের মত থাকতে পারে না ? খোস তোয়াজে না থাকিলে কি ধর্ম হয় না ? যৌশু কি এত খোস তোয়াজে থাকিত ?

## লণ্ডনে বিবেকানন্দ

বিশপ ও জমিদার এদের একতার কেড়ে লওয়া চাই। এই সব নিয়ম বদলে ফেল, তাহা না হইলে দেশে সুখ শান্তি হইবে না। গুড্‌উইন এই কথা বলিতে বলিতে কিছু উত্তেজিত হইয়া গাল মন্দ করিতে লাগিলেন। সারদানন্দ স্বামী ও বর্তমান লেখক আর কোন কথা না বলিয়া চুপ করিয়া রহিলেন।

কথাপ্রসঙ্গে ঘোড়ার গাড়ীর চাকার কথা স্বামীজী বলিতে লাগিলেন।

আমেরিকায় কয়েক বৎসর থাকিয়া দেখিলাম যে, আমেরিকা সর্ব্ব বিষয়ে

আমেরিকা	নূতন জিনিস করিতেছে। আর ইউরোপে অনেক স্থান
ও	যুরলুম ও দেখলুম, পুরান সেকলে জিনিস সব
ইউরোপ	ধেব্ড়া ধেব্ড়া, মোটা মোটা জিনিস, চোস্ত নূতন রকম

জিনিস খালি আমেরিকায় দেখতে পেলুম। কি বাড়ী করা, কি জুতা, কি পোষাক, কি জামার বোতাম, আমেরিকায় সব পরিষ্কার পরিচ্ছন্ন, সব নূতন ধাঁজের। প্রত্যেক জিনিস দেখলে বোধ হয় যে জাতিটার ভেতর একটা সতেজ জীবন্ত শক্তি রহিয়াছে। আর ইংলণ্ডে সব পুরানো ধাঁজের জিনিস। ঘোড়ার গাড়ীর চাকাগুলো আমেরিকায় দেখলুম ; পাতলা ফিন্-ফিনে, দেখলে বোধ হয় যে চাপলে যেন ভেঙ্গে যাবে, কিন্তু এত মজবুত ও শক্ত যে খুব টেকে। ওরা করে কি জান, প্রথম কাঠখানা লইয়া season করে (পাকায়) তারপর ভয়ানক pressure (চাপ) দেয় ; সেই কাঠটা শক্ত হয়ে যায়, তারপর গড়ন করে। এইরূপ কাটা পাত সক্রল ও এত মজবুত। দেখতে যেমন পরিষ্কার, ওজনেও তেমনি হালকা হয়। আমেরিকার সব জিনিসগুলো দেখলে বুকে যেন একটা আফ্লাদ ও উৎসাহ হয়। তাহারা মানুষের শক্তির পরিচয় দিচ্ছে। স্বামীজী তাই বলিতে বলিতে বিশেষ হর্ষিত হইয়া উঠিলেন। বর্তমান লেখককে বলিলেন, যা আমেরিকায় যা, ইংলণ্ডে থেকে কি হবে, সেটা হচ্ছে নূতন দেশ, নূতন উৎসাহ সেটা দেখলে মাথাটা খুলে যাবে। একটা নূতন ভাব আসবে।

তাই বুড়টে দেশে নূতন ভাব আসে না, নিজের উদ্ভমে কিছু করতে হলে আমেরিকা দেখতে হয়। বুড়টে দেশে থাকলে লোক বুড়টেই হইয়া যায়, নূতন ভাব আর কিছুই আসে না। সেদিন স্বামীজী আনন্দিত হইয়া আমেরিকার অনেক স্মৃতিচিহ্ন করিতে লাগিলেন।

একদিন বিকাল বেলা রান্নার কথা উঠিল। স্বামীজী বলিলেন, মাংসের সঙ্গে পেঁয়াজ খাওয়া একটা বহু প্রাচীন প্রথা। পেঁয়াজকে পলাণ্ড বলে— পল মানে মাংস, মাংসের সহিত সেটা ব্যবহৃত হয়, এই জন্ত উহাকে পলাণ্ড বলে। পেঁয়াজ ভেজে খেলে হৃৎপিণ্ড, পেটের ব্যাম করে, কিন্তু পেঁয়াজ সিদ্ধ করিয়া খাইলে উপকার করে এবং মাংসের যে costiveness থাকে সেটা নাশ করে, bowels clear করে। এইজন্ত সর্বদেশে বহুকাল হইতে পেঁয়াজ চলিত।

স্বামীজীর মনে আনন্দ হইলে এক একদিন গুন্ গুন্ করিয়া বাংলা গান করিতেন। গুড্‌উইন বাংলা গান কিছুই বুঝিতে পারিতেন না বা সুরও তাঁহার ভাল লাগিত না। একদিন প্রাতঃস্বামীজীর গান গাওয়া।

ভোজনের পর স্বামীজী উপরকার ঘরে গেলেন, ঘরে গুড্‌উইন, সারদানন্দ স্বামী ও বর্তমান লেখক রহিলেন। কথাপ্রসঙ্গে ভারতীয় সঙ্গীতের কথা উঠিল এবং ইউরোপ ও ভারতবর্ষের সঙ্গীতের বিষয় অল্পবিস্তর সারদানন্দের সঙ্গে কথা হইতে লাগিল। ভারতবর্ষে বড় বড় গাইয়ে আছে এবং তাঁহাদের সঙ্গীত প্রণালীও ভিন্নরকম। সারদানন্দ স্বামী এইটা বুঝাইবার চেষ্টা করিলেন। কলিকাতায় যাহারা বিশিষ্ট ধ্রুপদ গায়ক, স্বামীজী তাহাদের মধ্যেও একজন বিশিষ্ট গায়ক বলিয়া পরিচিত। গুড্‌উইন কথাটা ভাল বুঝিতে পারিলেন না। সারদানন্দ স্বামী সহজ করিয়া বুঝাইলেন যে, স্বামীজী একজন বড় গাইয়ে এবং গাইয়ে হিসাবে তাঁহার কলিকাতায় বেশ নাম আছে।



## লগুনে বিবেকানন্দ

গুডউইন গুনিয়া আশ্চর্য্যান্বিত হইয়া হাততালি দিয়া বলিলেন, তা তো আমি জানিতাম না। স্বামীজী যে একজন বড় গায়ক, এই কথা এখন শুনিলাম। আমি জানি স্বামীজী খুব philosopher, খুব ভাল বাগ্মী, কিন্তু তিনি যে বড় গায়ক একথা আমি আদৌ জানিতাম না। গুডউইনের মহা আনন্দ, তিনি নানা রকম ভঙ্গী করিয়া আহ্লাদ করিতে লাগিলেন আর ক্রমাগত বলিতে লাগিলেন, স্বামীজী যে বড় গায়ক এটা আমি আগে জানিতাম না। স্বামীজীর কোনরূপ সূখ্যাতি ও কার্য সফল হইলে তিনি আনন্দে আহ্লাদিত হইতেন। কি তাঁর ঐকান্তিক ভক্তি !

Doctor Andruie নামক নরওয়ে বা সুইডেনের জনৈক পণ্ডিত বেলুন করিয়া কয়েকটা সঙ্গী সঙ্গে করিয়া উত্তর মেরু আবিষ্কার করিতে গেল।

খবরের কাগজে খুব লিখিতে লাগিল। ২টার সময়কার  
ডাঃ এনড্রুয়ের উত্তর  
মেরু যাওয়া।

আহারের পর, গুডউইন ও অগ্নাত সকলে বসিয়া সেই  
বিষয়ে কথোপকথন হইতে লাগিল। স্বামীজী নীরব  
হইয়া চুপ করিয়া শুনিতে লাগিলেন। গুডউইন ও ষ্টার্ডি খুব ত এই  
ব্যাপারটির প্রশংসা করিতে লাগিলেন এবং জগতে এক নূতন পথ খোলা হল  
এই সব কথা কহিতে লাগিলেন কিন্তু স্বামীজী কোন কথাই বলিলেন না ;  
বরং বিষম হইয়া রহিলেন। স্বামীজী বলিলেন, “বেলুনে করে গেছেন বটে,  
কিন্তু ফিরিবেন কি না তাহার কোন নিশ্চয়তা নাই।” কথাটা গুনিয়া  
সকলেই যেন চমকিয়া উঠিল। লোকে যে আনন্দ করিতেছিল, হঠাৎ  
নিবিয়া গেল। একটা কাজের যে আর একটা দিক আছে তা’ তখন  
সকলের চোখে পড়িল এবং সকলে নিস্তব্ধ হইয়া গেল। কিন্তু প্রকৃতই  
Andruie ও তাহার সঙ্গী ফিরিয়া আসে নাই, তাহাদের আর কোন  
খবর পাওয়া যায় নাই।

ভারতবর্ষে cloak ও জামা পরিতে হইলে প্রথমে ডান আঙ্গিনের ভিতর

নিজের হাত পরাইয়া দিতে হয়। ক্লোক বা জামা সকলেই নিজে পরিয়া লয়, অপরের সাহায্যের আবশ্যক হয় না। ইংলণ্ডে কিন্তু অল্প ক্লোক পরার প্রথা। প্রকার, cloak হইলে দুটি আস্তিনের ভিতর দুটি হাত জুড়িয়া দেয়, তাহা হইলে জামাটা পিঠে ও গলায় ঠিক হয়। ক্লোক একটা বড় ভারী জামা, এইজন্য নিজে সব সময়ে সামলাইতে পারে না। দেশের প্রথা—সম্মুখে যে কেউ লোক থাকিবে তখনই দাড়াইয়া উঠিয়া cloakটা ধরিবে এবং লোকটা একসঙ্গে দুই হাত আস্তিনের ভিতর দিয়া cloakটা পরিয়া লইবে। যে ব্যক্তি cloakটা ধরিয়াছে, তাহাকে thank you বলিলেই কার্য মিটিয়া যায়। বাড়ীতে চুকিলে ঘরের ভিতর cloak পরিয়া যাওয়া প্রথা নয়। cloak, টুপী, ছাতা, ছড়ি এই সব সদর দরজার কাছে যে রাখিবার স্থান আছে সেইখানে রাখিয়া আসিতে হয়। এই সব হচ্ছে ভদ্র আচারের কথা, গরীব লোকের কথা স্বতন্ত্র।

ভারতবর্ষে ঘরের বাহিরে যাইয়া জল ফেলিয়া মুখ ধুইয়া থাকে। কিন্তু ইংলণ্ডে ঘরের ভিতর মুখ ধুইতে হয়। একটা লোহার Tea-poy বা একটা কাঠের টেবিলে একটা গামলা থাকে এবং একটা বিলাতে মুখ ধুইবার প্রথা। টিলা jug এতে মাটির পাত্রে জল থাকে, ঠাণ্ডা বা গরম জল, শীত বা গরম হিসাবে। সেই টেবিলটাতে সাবান থাকে। jug থেকে জলটা গামলায় ঢালিতে হয় এবং অল্প জল লইয়া মুখে দিতে হয়, তারপর সাবান দিয়া মুখ ঘসিয়া সেই গামলার জলে চোখ ধোয়া, মুখ ধোয়া, দাঁত মাজা সব কাজই করিতে হয় এবং ধুইয়া লইতে হয়। বাহারি brush দিয়া দাঁত মাজে, তাহারি সেই গামলার জল মুখে দিয়া দাঁতে brush ঘসিয়া লয়। জল মেঝেতে ছড়াইতে নাই। ভারতবর্ষের লোকের এই কথা শুনিলে ঘৃণা আসে। কিন্তু ভিন্ন দেশের ভিন্ন প্রথা, এই সব সহ করিয়া যাইতে হয়। মুখ ধুইবার সময় একখানি

## লগনে বিবেকানন্দ

তোয়ালে বুকে ও গলায় জড়াইতে হয়, যেন ভিতরের পিরান জামা নষ্ট না হয় এবং আর একখানি তোয়ালে পিঠের দিক থেকে গলায় গুঁজিয়া দিতে হয় এবং তৃতীয় রুমাল খানি দিয়া মুখ ও জামা মুছিতে হয়। কেহ কেহ বা দুখানিতে কার্য্য সারিয়া লন। পিঠের রুমালের আবশ্যক হয় না, তারপর চুল আঁচড়াইয়া ঘর হইতে বাহির হইতে হয়। চুল ও নখ অপরিষ্কার রাখা বড় অসভ্যতার কথা, এইজন্য সব সময় আরসী brush দিয়া চুল আঁচড়াইতে হয় এবং কোন জায়গায় যাইতে হইলে আরসী দিয়া দেখিতে হয় collar, জামা, মাথার চুল ঠিক আছে কি না। ময়লা বা অপরিষ্কার থাকাকে অসভ্য বলিয়া থাকে। নূতন লোক গেলে তাহাকে প্রথমে বড় বিব্রত হইতে হয়। তারপর অভ্যাস হইয়া যায়। ইজের কোট বারে বারে নরম brush দিয়া ঝাড়িতে হয় এবং খুলিয়া রাখিবার সময় hook এতে টাঙ্গাইয়া রাখিতে হয়। এই দেশের ছায় পুটুলি করিয়া রাখিতে নাই, তাহা হইলে ভাঁজ পড়ে। Boot জুতা সকালে একবার brush করিয়া ফেলিতে হয়। পরে রাত্তায় কাদা লাগিলে পুনরায় brush করিতে হয়। নূতন লোকের পক্ষে ইহা বড় হাঙ্গামা। Dey & Martinএর কেক কালী এক রকম আছে, এর শক্ত টুকরাটা এক বোতল গরম জলে ফেলে দিলে গুলিয়া যায় আর একটা কর্ক (cork), তাহাতে একটা জড়ান তার থাকে, তারের উপর এক টুকরা sponge থাকে, এই sponge খানা দিয়া বোতলের ভিতর গোলা কালি উঠাইয়া boot জুতাটাতে মাখাইয়া লইতে হয়। তারপর দু'হাতে দু'খানা নরম brush লইয়া ঘসিলেই বেশ চক্চকে হয়। নিজের নিজের জুতা বুরুস করিয়া লওয়া কোন লজ্জার কথা নয়, তবে ছেলেদের ঝি বা চাকর বুরুস করিয়া দেয়।

মেয়েদের সাবান দিয়া মুখ ধোয়ার একটু বিশেষত্ব আছে। এক টুকরা ক্লানেল ভিজাইয়া লইয়া প্রথমে তাহাতে সাবান ঘসিয়া লয়, তারপর সেই

সাবান-যুক্ত ফ্রানেল মুখে খুব করে ঘসে, তাতে চামড়া বেশ পরিষ্কার হয় এবং সাবানও খুব কম লাগে। কলিকাতায় এই প্রথাটা মেয়েদের মধ্যে প্রচলন করা খুব ভাল।

অনবরত স্বামীজীর কথোপকথনে পাঠকের ধৈর্য্যচ্যুতি হইতে পারে, এইজন্তু এ স্থানে অপ্রাসঙ্গিক হইলেও, ও দেশের সামাজিক রীতিনীতির কথা'র সামান্য অবতারণা করিলাম। প্রথমে ওদেশে লবণ ব্যবহারের কথা বলিব। বাঙ্গালা দেশে লবণ যেমন গুঁড়া পাওয়া যায়, উত্তর ও পশ্চিম ভারতে লবণ

ইংলণ্ডের সামাজিক  
রীতিনীতি

চাপড়া চাপড়া হয়, কিন্তু ইংলণ্ডে লবণ রাখার প্রথা একেবারেই অগ্ৰরূপ। ইংলণ্ড মেঘলা, জলো দেশ, সব সময়েই কুয়াসায় আচ্ছন্ন, গুঁড়ি গুঁড়ি বৃষ্টি অনবরতই পড়ে, এই হেতু ওদেশে লবণ গুঁড়া করিয়া রাখিলে জল হইয়া যাইবার সম্ভাবনা, তাই লবণ চাপ চাপ করিয়া মোটা মোটা ইটের মত করিয়া রাখা হয়। দরকার মত একটা কুটনা-কোটা ছুরি দিয়া ( ওদেশে বলে peeling knife ) উপরটা চাঁচিয়া লওয়া হয়। সেই চাঁচা লবণটুকু একটা কাঁচের বাটিতে রাখা হয়। খাইবার সময় টেবিলের উপর একটা তারের বা অথ জিনিসের হাতাওয়ালা একটা পাত্র থাকে, তাহাতে একটা শিশি ভরা ভিনিগার ( vinegar ) থাকে, আর একটা শিশিতে সাদা মরিচ থাকে—সেই শিশিটির উপরের ঢাকনাটিতে বিদ্ধ বিদ্ধ করা গর্ত থাকে। এদেশে কাল মরিচের ব্যবহার আছে, কিন্তু ইংলণ্ডে সাদা মরিচ ব্যবহৃত হয়।

- ওদেশে আমাদের জানা আছে, সকলেই খাবার সময় ছুরি কাঁটা ব্যবহার করিয়া থাকে—ছুরি ডান হাতে ধরিয়া কাঁটাটি বাম হাতে ধরিতে হয়, ঐ কাঁটার দ্বারা খাবার বিদ্ধ করিয়া মুখে দিতে খাইবার পদ্ধতি।

হয়। চামচ দিয়া খাবার সময় কিন্তু ডান হাতে চামচ

## লগুনে বিবেকানন্দ

ধরিয়া খাওয়ার রীতি আছে। খাবার সময় ওদেশে আরও চাওয়া ভদ্রতা-বিরুদ্ধ। ছুরি, কাঁটা রাখিবার পদ্ধতি অনুসারেই পুনরায় চাওয়া বা খাওয়া শেষ হইয়া যাওয়া বুঝায়। ছুরি, আর কাঁটার ডগা যদি একসঙ্গে মিশান থাকে, তাহা হইলে বুঝিতে হইবে—খাওয়া শেষ হয় নাই, আরও খাওয়ার প্রয়োজন কিন্তু ঐ দুটা যদি পৃথক্ পৃথক্ করিয়া পাশাপাশি বসান থাকে, তাহা হইলে আর কিছু প্রয়োজন হইবে না, খাওয়া শেষ হইয়া গিয়াছে। এই সব ওদের দেশের আদব কায়দা না জানা থাকায়, প্রথম প্রথম ওদেশে যাইয়া আমাদের দেশের ছেলেদের বহু কষ্টে পড়িতে হয়। অনেক সময় কাঁটা, ছুরি, চামচ প্রভৃতি বৈঠক রাখার দরুণ টেবিল হইতে খাড়ে ভরা থালা ইত্যাদি তুলিয়া লইয়া যাওয়া হয়। এরূপ হঠাৎ থালা বাটি সম্মুখ হইতে অদৃশ্য হওয়ার ক্ষুধিত ব্যক্তির কষ্টের সীমা থাকে না।

ভারতবর্ষে শুভ কৰ্ম্মে বা বৈশীর ভাগ সময় ডান হাত লোকে ব্যবহার করিয়া থাকে, কিন্তু ইংলণ্ডে বাম হাতের চলনই অধিক। আমাদের দেশে কাহাকেও ডাকিতে হইলে ডান হাত তুলিয়া নাড়িতে হয় এবং এই সঙ্কেতে দূরের লোক কাছে আসে, এগিয়ার সৰ্ব্বত্রই এই প্রথা। কিন্তু ইংলণ্ডে সম্পূর্ণ বিপরীত। আমাদের দেশে বাম হাত দিয়া কোন কার্য করা নীতিবিগর্হিত, এমন কি অবজ্ঞাসূচক। ইংলণ্ডে ডাকিবার প্রথা—বাম হাত তুলিয়া হাতের চোটোটা উপরিভাগে ধরিয়া অঙ্গুলি সঙ্কেচ করা। খাইবার সময়েও ইংরেজেরা বাম হাতই অধিক ব্যবহার করিয়া থাকে। অনেকেই দেখিয়া থাকিবেন, ইংরেজদের বক্তৃতাকালীন বাম হাত সঞ্চালন অধিক সময়েই হয়।

ভারতবর্ষের চিনি সাদা বা কাল হইলেও সবই গুঁড়ো চিনি। আমরা যাহাকে মিছরি বলি, ওরূপ পদার্থ ইংলণ্ডে নাই। ইংলণ্ডের চিনি

লালচে—উহাকে Brown sugar বলে। সাদা দোবরা চিনিও পাওয়া যায়, কিন্তু কম। চলিত চিনি হইতেছে একইধি চোকা সাদা চিনির ডেলা, উহাকে lump sugar বলা হয়। চা বা কফির সঙ্গে এইরূপ একটা চাকা ডেলা দিয়া খাইতে হয়। আর একরকম চিনি আছে উপর দিকে মোটা ও নিম্নদিকে সরু—একরকম চোঙ্গার মত, ইহাকে বলে loaf sugar. এই চিনিও যথেষ্ট ব্যবহৃত হয়। লবণের তায় ইহাও জল হইয়া যাইবার আশঙ্কায় চাপ দিয়া চাকা চাকা টুকরা বা ডেলা করিয়া রাখা হয়।

ইংলণ্ডে বৈকাল বেলা রুটি ও মাখন বা জাম jam খাওয়া রীতি আছে। কিন্তু এই পাউরুটি কাটিবার বিশেষ কৌশল আছে। রুটির দুই পার্শ্বের দু টুকরা কাটিয়া ফেলিয়া দেওয়া হয়। তারপর খুব ধারাল ছুরি দিয়া এক এক চাকলা এরূপ নিপুণতা ও তৎপরতার সহিত কাটা হয় যে তাহা সত্যই দেখিবার জিনিস। সেই কাটা রুটিগুলি পাতলা পেপে বোর্ডের (paste-board) মত দেখিতে হয়। এইরূপ কাটা হইয়া যাইবার পর সেগুলি আবার একত্র করিয়া পাশাপাশি রাখা হয়, মনে হয় আস্ত রুটিখানি (কাটিবার পূর্বে) যে রূপ ছিল ঠিক সেইরূপই বসান রহিয়াছে। ইংলণ্ডের স্ত্রীলোকেরা রুটি কাটা কাজে বিশেষ দক্ষ।

একদিন সকালে আহারের পর সকলে বসিয়া আছে। ষ্টার্ডি মেদিন বেশ প্রফুল্ল। কথা প্রসঙ্গে ফরাসী বিপ্লবের কথা উঠিল। প্যারী সহরে  
 ময়স্তর পড়িল। গমওয়ালারা গোলাতে গম আটকাইয়া  
 রাখিল। গমের মূল্য চড়িয়া যাওয়ায় রুটি মহাখর হইয়া  
 উঠিল। গরীব লোকের খাবার বড়ই কষ্ট হইল।

একদিন সকালে বড় বড় বাড়ীর ঝি, চাকরানী, মজুরানী প্রভৃতি

## সপ্তমে বিবেকানন্দ

নিয়ন্ত্রণের জীলোকেরা সব একজোট হইয়া পথে বাহির হইল। বিয়েদের অস্ত্র ত ঝাড়ু, প্রত্যেকে ঝাড়ু হাতে লইল। বাঙ্গালা ঝাড়ুর মাথার দিকটা হাতে করিয়া ধরিতে হয়, কিন্তু ইউরোপের অনেক স্থানে একটা লম্বা ডাঙা দেওয়া থাকে। ইহাকে Broom-stick বলে। সেই সব জীলোকেরা এইরূপ প্রকাণ্ড প্রকাণ্ড ডাঙা-দেওয়া ঝাড়ু কাঁধে করিয়া রাস্তা দিয়া চলিতে লাগিল। ক্রমে তাহাদের সংখ্যা বাড়িয়া প্রায় পাঁচ হাজার হইল। তাদের সঙ্গে গোটাকতক ঢুলি বা Drummer জুটিল। উহারা জীলোকদের সঙ্গে সঙ্গে ঢাক বাজাইতে বাজাইতে, রুটি রুটি রুটি করিয়া চীৎকার করিতে করিতে চলিল। তাহারা এইরূপে ভারসেলস্ (Versailles) এর পথে আসিল। আশে পাশের চাষীরাও কাস্তে প্রভৃতি যন্ত্র হাতে লইয়া দলে মিশিল।

রাজা, রাণী বিলাসে থাকে—তাহারা ত' লোকের দুঃখ কষ্টের কোনও খোঁজ খবরই রাখে না। উন্নত বিয়ের দল ভারসেলস্ এর বাগানে প্রবেশ করিল। রাণী মেরী এন্টোয়ানেট (Mary Antoinette), অষ্ট্রিয়ার সম্রাজ্ঞী মেরিয়া থেরেসার (Maria Therisa) মেয়ে ছিলেন। ভৃত্যদের রাণী জিজ্ঞাসা করিলেন, “লোকগুলা ওরূপ চীৎকার করে কেন?” ভৃত্যেরা উত্তর করিল “Madam, they have no bread,” রাণী, ওরা রুটি খাইতে পায় না। রাণী উত্তর করিলেন, “Let them have cakes”—ওদের কেবু খেতে দাও। কিন্তু কেবু যে ময়দায় তৈয়ারী হয় এবং সেই ময়দারই অভাবে যে ইহাদের এই অবস্থা, রাণী বা রাজার তাহা খেয়ালের মধ্যেও ছিল না। উন্নত জীলোকের দল মনে করিল, রাণী বুঝিয়াই তাহাদের অবমাননা ও বিক্রম করিয়াছে। ইহাতে তাহারা মহা প্রচণ্ড হইয়া উঠিল। রাজবাড়ীতে প্রবেশ করিয়া রাজা ও রাণীকে তাহারা বন্দী করিল। রাণীকে তাহারা Baker's wife বলিয়া

লঙনে বিবেকানন্দ

বিজ্ঞপ করিতে লাগিল। তাহাদের একটা গাড়ীতে বসাইয়া তাহারা  
প্যারীতে লইয়া আসিল। এই হইল ফরাসী বিপ্লবের প্রথম দিনের  
ঘটনা।

সমাপ্ত



# স্বামীজীর সহোদর শ্রীযুক্ত মহেন্দ্রনাথ দত্ত প্রণীত গ্রন্থাবলী

Appreciation of Michael & Dinobandhu  
Dissertation on Painting

As. 4.

(Highly appreciated by Romain Rolland) Rs. 3.

স্বামীজীর জীবনের ঘটনাবলী

তিন ভাগ প্রত্যেক ভাগ ১।০

কাম্বীধামে বিবেকানন্দ

১।০ আনা

Reflections on Woman

Rs. 1. 4. As.

ডাঃ ভূপেন্দ্র নাথ দত্ত এম-এ, পি-এইচ-ডি

যৌবনের সাধনা

এক টাকা

ছাত্র এবং যুবকদের জ্ঞাত বিস্তৃতভাবে বিভিন্ন ধারার কর্মপদ্ধতি দেওয়া হইয়াছে। ছাত্র আন্দোলন, যুব আন্দোলন, গণ শ্রেণীর আদর্শ, জাতীয় শিক্ষা প্রভৃতি বিষয়ে সূচিস্থিত প্রবন্ধ এবং বিশদভাবে কার্য প্রণালী দিয়া চিন্তাশীল লেখক ডাঃ দত্ত ভবিষ্যতের পথ নির্দেশ করিয়াছেন। প্রত্যেক ছাত্র, যুবক এবং দেশকর্মীর অবশ্য পাঠ্য।

যুগ-সমস্যা (পরিবর্দ্ধিত দ্বিতীয় সংস্করণ)

আট আনা

দেশের বর্তমান অবস্থা সম্বন্ধে একটা মূল্যবান প্রবন্ধ এই সংস্করণের গ্রন্থে সন্নিবেশিত হইয়াছে। ইহাতে দেশের বর্তমান অবস্থা উপলব্ধি করিবার সুবিধা হইবে। পাঠকগণের আগ্রহে দ্বিতীয় সংস্করণ বাহির হইল।

কবি বিবেকানন্দ মুখোপাধ্যায়

বিপ্লবী নায়িকা (উন্মাদনাময় কাব্যগ্রন্থ)

পাঁচ টাকা

বাজেয়াপ্ত ‘শতাব্দীর সঙ্গীতের’ খ্যাতনামা কবি বিবেকানন্দ বাবু এই গ্রন্থে নর-নারীর সম্পর্কের মধ্যে এক নূতন আলোক সম্পাত করিয়াছেন। কাব্যের মধ্যে সংসার, সমাজ ও রাষ্ট্রে নারীর বিপ্লবী-নায়িকা মূর্তি দেখিতে পাইবেন। বলিষ্ঠ ভাষা এবং ভাবের গাভীরোহো ইহা একখানি অতুলনীয় গ্রন্থ।

যুগান্তর লালী

৩০, কর্ণওয়ালিস স্ট্রিট, কলিকাতা





